



11

11/11/11





1

1


1

1



# এগারটি বাংলা নাট্যগ্রন্থের দৃশ্য-নিদর্শন

অমরেন্দ্রনাথ রায়  
কর্তৃক সংকলিত



কলিকাতা বিশ্ববিদ্যালয়  
১৯৫৮

মূল্য—৬

ভারতবর্ষে মুদ্রিত । কলিকাতা বিশ্ববিদ্যালয়ের প্রেসের সুপারিন্টেন্ডেন্ট  
শ্রীশিবেন্দ্রনাথ কাঞ্জিলাল কর্তৃক ৪৮ হাজারা রোড,  
কলিকাতা হইতে প্রকাশিত ।

মুদ্রক : শ্রীগোপালচন্দ্র রায়  
নাভানা প্রিন্টিং ওয়ার্কস্ প্রাইভেট লিমিটেড  
৪৭ গণেশচন্দ্র অ্যাভিনিউ, কলিকাতা ১৩

## সূচীপত্র

বিষয়		পৃষ্ঠা
চণ্ডী নাটক	...	১
কুলীন কুলসর্বস্ব	...	৪
বিধবা বিবাহ নাটক	...	৩০
বোধেন্দু বিকাশ	...	৪১
সাবিত্রী সত্যবান নাটক	...	১১০
একেই কি বলে সভ্যতা	...	১৪০
নীলদর্পণ	...	১৫৫
প্রণয়পরীক্ষা নাটক	...	১৭৬
নয়শো রূপেয়া	...	২০৪
শরৎ-সরোজিনী	...	২৩৬
হামির	...	২৫২



# চণ্ডী নাটক

[ ভারতচন্দ্র রায় ]

[ ভারতচন্দ্রের এই অসমাপ্ত নাট্য-রচনা আবিষ্কার করিয়াছিলেন—  
ঈশ্বরচন্দ্র গুপ্ত । ১২৬২ সালে গুপ্ত-কবির লিখিত “কবিবর ৮ভারতচন্দ্র  
রায় গুণাকরের জীবন-বৃত্তান্ত” নামে যে পুস্তক প্রকাশিত হয়, তাহা  
হইতেই এই লেখাটুকু উদ্ধৃত হইল । এই রচনা-প্রকাশ-প্রসঙ্গে গুপ্ত-  
কবি তখন লিখিয়াছিলেন,—“মরণের কিছুদিন পূর্বে ভারতচন্দ্র সংস্কৃত  
নাটকের পদ্ধতিক্রমে মহিষাসুরের যুদ্ধ বর্ণনা ছলে সংস্কৃত ও হিন্দি  
মিশ্রিত বঙ্গভাষায় “চণ্ডী নাটক” নামে এক গ্রন্থ রচনা আরম্ভ করেন,  
তাহার ভূমিকা ও যুদ্ধের আড়ম্বর মাত্র প্ররচনা করিয়াই মৃত্যুর গ্রাসে  
পতিত হইলেন । আমরা অনেক যত্ন, অনেক পরিশ্রম এবং অনেক  
উপাসনা করত সেই কয়েক পাত পুঁতি সংগ্রহপূর্বক মহানন্দে নিম্নভাগে  
প্রকটন করিলাম, কবিতা-কুসুমের মধুপ স্বরূপ পাঠকবৃন্দ মকরন্দ পানে  
আনন্দ করিতে থাকুন ।” ]

[ সূত্রধার এবং নটীর রাজসভায় প্রবেশ ]

সংগায়ন্ যদশেষ-কৌতুককথাঃ পঞ্চাননো পঞ্চভি-  
বৈভ্রু-বাণবিশালকৈর্ডমরুকোখানৈশ্চ সংনৃত্যতি ।  
যা তস্মিন্ দশবাহুভির্দশভুজা তালং বিধাতুং গতা  
সা দুর্গা দশদিশু বঃ কলয়তু শ্রেয়াংসি নঃ শ্রেয়সে ॥

[ নটীর উক্তি ]

শুন শুন ঠাকুর	নৃত্য বিশারদ	সভাসদ সারি চতুরী ।
নূতন নাটক	নূতন কবিকৃত	হাম তৌহি নূতন নারী ॥
ক্যায়সে বাতায়ব	ভাব ভবানীকো	ভীতি ভৈঁ মুঝে ভারি ।
দানব-দলনে	ধরণী-মণ্ডলে	তারিণী লে অবতারি ॥
গুরুসম ধীর	বীরসম শুনহ	সম সগুণ মুরারি ।
কৃষ্ণচন্দ্র নৃপ	রাজ-শিরোমণি	ভারতচন্দ্র বিচারি ॥



[ নৃত্যধারের উক্তি ]

রাজোহন্ত প্রপিতামহো নরপতী রজোহন্তবদ্রাঘব-  
 স্তংপুত্রঃ কিল রামজীবন ইতি খ্যাতঃ ক্রিতীশো মহান্ ।  
 তংপুত্রো রঘুরামরায়নৃপতিঃ শাণ্ডিল্যগোত্রাগ্রণী-  
 স্তংপুত্রোহয়মশেষধীরতিলকঃ শ্রীকৃষ্ণচন্দ্রো নৃপঃ ॥  
 ভূপশ্চাস্ত্র সভাসদো বিমলধীঃ শ্রীভারতো ব্রাহ্মণো ।  
 ভূরিশ্রেষ্ঠপুত্রো পুরন্দরসমো যত্তাত আসীন্নপঃ ।  
 রাজ্যাদ্ ভ্রষ্ট ইহাগতঃ স নৃপতেঃ পার্শ্বে বভূবাপ্রিতঃ  
 মূল্যঘোড়পুরং দদৌ স নৃপতির্বাসায় গজাতটে ॥  
 তস্মৈ ভারতচন্দ্ররায়কবয়ে কাব্যাস্থুরাশীন্দবে ।  
 ভাষাশ্লোককবিত্বগীতমিলিতং যতেন সঙ্গীতম্ ॥

[ চণ্ডী এবং মহিষাসুরের আগমন ]

খট্‌মট্‌ খট্‌মট্‌ খুরোখ-ধ্বনিকৃত-জগতী-কর্ণপূরাবরোধঃ  
 ফেঁ ফেঁ ফেঁ ফেঁতি নাসানিলচলদচলাত্যস্তবিভ্রাস্তলোকঃ ।  
 সপ্ সপ্ সপ্ পুচ্ছঘাতোচ্ছলদধিজলপ্লাবিতস্বর্গমর্ত্যো  
 ঘরু ঘরু ঘরু ঘোরনাদৈঃ প্রবিশতি মহিষঃ কামরূপো বিরূপঃ ॥  
 ধো ধো ধো ধো নাগারা গড় গড় গড় গড় চৌঘড়ী ঘোরগজৈঃ  
 ভৌ ভৌ ভোরজ শকৈর্ঘন ঘন ঘন বাজে চ মন্দীরনাদৈঃ ।  
 ভেরী তুরী দাম্যাদগড়দড়মসা স্তক্ নিস্তক্ দেবৈঃ  
 দৈত্যোহসৌ ঘোরদৈত্যৈঃ প্রবিশতি মহিষঃ সার্বভৌমো বভূব ॥

[ মহিষাসুরের উক্তি ]

ভাগেগা দেবদেবী	পাথর পাথর	ইন্দ্রকো বাঁধ আগে ।
নৈঋতকো রীত দেনা	যমঘর যমকো	আগকো অগলাগে ॥
বায়োকো রোধ করকে	করত বরণকো	সব তুসো অব মাগে
ব্রহ্মা সৌ বাসুকি সৌ	কতি নেহি ঝগড়ো	জোঁঠ কুবেরা না ভাগে ॥

[ প্রজার প্রতি মহিষাসুরের উক্তি ]

শোন্ রে গোঁয়ার লোগ্, ছোড় দে উপাস্ যোগ্, মানহ আনন্দ ভোগ,  
 ভৈষরাজ যোগমে ।

আগমে লাগাও ঘিউ, কাহেকো জালাও জিউ, এক যোজ প্যার পিউ,  
 ভোগ এহি লোগমে ॥  
 আপকো লাগাও ভোগ, কামকো জাগাও যোগ, ছোড় দেও যাগ  
 যোগ, মোক্ষ এহি লোগমে ।  
 ক্যা এগান্ ক্যা বেগান, অর্থ নার আব জান, এহি ধ্যান এহি জান,  
 আর সর্ব রোগমে ॥

[ এই বাক্যে ভগবতীর ক্রোধ, প্রথমে হস্ত করিলেন ]

কমঠ করট্ট      ফণিফণা ফলট্ট      দিগ্গজ উলট্ট      ঝগট্ট ভায়রে  
 বসুমতী কম্পত      গিরিগণ নম্রত      জলনিধি বাম্পত      বাড়বময় রে ॥  
 ত্রিভুবন ঘুঁটত      রবিরথ টুটত      ঘন ঘন ছুটত      যেওঁ পরলয়রে ।  
 বিজলী চট চট      ঘর ঘর ঘট ঘট      অটঅটঅটঅট      আঃক্যায়া হায়রে ॥

অসম্পূর্ণ

# কুলীন কুলসর্বস্ব

[ রামনারায়ণ তর্করত্ন ]

## বিজ্ঞাপন

পুরাকালে বল্লাল ভূপাল আবহমান প্রচলিত জাতিমর্যাদা মধ্যে স্বকপোলকল্পিত কুল-মর্যাদা প্রচার করিয়া যান। তৎপ্রথায় অধুনা বঙ্গশ্রী যেরূপ দুরবস্থাগ্রস্ত হইয়াছে, তদ্বিষয়ে কোন প্রস্তাব লিখিতে আমি নিতান্ত অভিলাষী ছিলাম; তন্নিমিত্ত “পতিব্রতোপাখ্যান” প্রসঙ্গক্রমে কিঞ্চিৎ উল্লেখ করা গিয়াছে। পরে রঙ্গপুরস্থ ভূম্যধিকারী শ্রীল শ্রীযুক্ত বাবু কালীচন্দ্র চতুর্ধুরী মহাশয় ভাস্করাদি পত্রে এক বিজ্ঞাপন প্রকাশ করেন; তাহার মর্ম্ম এই যে, “বল্লালসেনীয় কৌলীণ্য-প্রথা প্রচলিত থাকায় কুলীনকামিনীগণের এক্ষণে যেরূপ দুর্দশা ঘটতেছে, তদ্বিষয়ক প্রস্তাবসম্বলিত ‘কুলীন কুলসর্বস্ব’ নামে এক নবীন নাটক যিনি রচনা করিয়া রচকগণমধ্যে সর্বোৎকৃষ্টতা দর্শাইতে পারিবেন, তাঁহাকে তিনি ৫০ টাকা পারিতোষিক দিবেন।” পরে আমি তাহা রচনা করিয়া তাঁহার নিকট প্রেরণ করিয়াছিলাম; তাহাতে উক্ত গুণগ্রাহী দেশহিতৈষী মহোদয় তদৃষ্টে সান্তিশয় পরিতুষ্ট হইয়া অঙ্গীকৃত ৫০ টাকা আমাকে পারিতোষিক দিয়াছেন এবং অসামান্য বদান্যতাশালী উক্ত মহানুভব আমার প্রার্থনামুসারে পুস্তকও আমাকে দেন। আমি তাহা মুদ্রিত ও প্রচারিত করিলাম।

এই নাটক ছয়ভাগে বিভক্ত। প্রথমে, কুলপালক বন্দ্যোপাধ্যায়ের কন্যাগণের বিবাহানুষ্ঠান। দ্বিতীয়ে, ঘটকের কপট ব্যবহারসূচক রহস্যজনক নানা প্রস্তাব। তৃতীয়ে, কুলকামিনীগণের আচার ব্যবহার। চতুর্থে, শুক্রবিজয়ীর দোষোদ্‌ঘোষণা। পঞ্চমে, নানা রহস্য ও বিরহিপঞ্চাননের বিয়োগপরিবেদন। ষষ্ঠে, বিবাহ নিকাহ। এই রীতিক্রমে এই নাটক রচিত হইয়াছে। ইহা কেবল রহস্যজনক ব্যাপারেই পরিপূর্ণ বটে, কিন্তু আত্মোপাস্ত সমস্ত পাঠ করিয়া তাৎপর্য গ্রহণ করিলে, কৃত্রিম কৌলীণ্য-প্রথায় বঙ্গদেশের যে দুরবস্থা ঘটিয়াছে, তাহা সম্যক অবগত হওয়া ঘাইতে

পারে। এক্ষণে প্রার্থনা, সজ্জনগণসমীপে ইহা আদরণীয় হয়, তাহা হইলেই শ্রম সকল জ্ঞান করিব। ইতি—

শ্রীরামনারায়ণ শর্মা।

১৮৫৪ খৃষ্টাব্দ।

### নাট্যোল্লিখিত পুরুষ ও স্ত্রী

ধর্মশীল	...	পুরোহিত।
তর্কবাগীশ	...	ঐ ছাত্র।
ভোলা	...	কুলপালকের কৃষাণ
		ভৃত্য।
অধর্মরুচি	}	বৈদেশিক
বিবাহবণিক		কুলীন ব্রাহ্মণ।
উত্তম মুখোপাধ্যায়		বিবাহবণিকের
		ক্ষেত্রজ পুত্র।
উদরপরায়ণ	...	ব্রাহ্মণ।
গ্রাম্যালঙ্কার	...	অধ্যাপক।
শিশু	...	উদরপরায়ণের পুত্র।
স্বমতি	...	ঐ স্ত্রী।

### চতুর্থ অঙ্ক।

ভোলার প্রবেশ।

ভোলা। ( স্বগত )

মোগার কোপালে ছক নেকেচে গোসাই।

খাতি খাতি মনু এটু বসি পাই নাই ॥

বসি ঘরে প্যাটভরে খাতি নাই পাই।

চাকুরি ঝকমারি কাম করি মুই তাই ॥

ঐ ওস্তরের বাড়ির মুই খ্যানাকাটি গেহালান্, এসতে এসতেই বড়মোশাই বল্যে “ওরে ভোলা, তুই যা, পুরুষ্ঠাকুরের ডাকি

আন,” তা এই মুই অদূরে থাকি আলাম, তামুক খাতিও পালাম না, এটু জিকৃতিও পালাম না, তাই ত মোদের বৌ বলে হালো, বলে “চাকুরি না কুকুরি” তা খাতিপত্তি পাইনে, না করে কি কর্বে? মুনিব বা বলে, তা না কল্যে মেইনে দেবে কেন? খাদায়ে দেবে যে, তাই যাচ্চি, আসি তবে তামুক খাব। (কিঞ্চিং গমন করিয়া) ঐ বাঃ, কেচে খানা ভুলি আলাম, দাদা-ঠাকুর বল্যে “এস্বের বেলা এটা খোঁড়ের গাছ আনিম্” তা কিদি কাটবো? আবার ফিরি যাব? (চিন্তা করিয়া) না বেনে, পদেদ্বারে মোর বীয়ের ঘর, সেইসেই গ্ৰাবো। (কিয়দূর গিয়া) এই মোর বীয়ের ঘর, এখন বী মোর হেতা নেই, তা বীন্কে ডাকি। (প্রকাশে) ও বীন! বীইন্! একবার তোগার কেচে খান দিবি? (আকাশে কণ দিয়া) আ কি বলি? হেরিয়ে গেচে? বাক্গে, আবার মোরে ফিরি এস্তে হলো; যাই তবে (অধিক দূর গিয়া, স্বগত) ঐ পুরুঠাকুরের বাড়ি দেক্তি পাচ্চি, শালার বামুণ কদূরে ঘর বেনিয়েচে? (নিকটে গিয়া, প্রকাশে) ও পুরুঠাকুর! ঘরে, গো!—না গো, আর পুরুঠাকুর বল্‌বো না, সেবার বলে হেলাম্, তা সে বামুণ কুখ্য করে; (উচ্চৈঃস্বরে) ও বাবাঠাকুর, বাবাঠাকুর! ঘরে গো! কৈ ওত্তর দেয় না ঝে? কোথা বুঝি ছরাদ কত্তি গেচে বামুণদের কি? বড় মান্‌ষির বাড়িই ছায়ায় বসি, গোলবালিশে ঠ্যাশ মারি শুড়ুক তামুক খায়, গপ্পি করে, তাই বুঝি গেচে। ও ও মা ঠাকুরগ্! মা ঠাকুরগ্! তোমার বাবাঠাকুর কোতা গো?

ধর্মশীলের প্রবেশ।

ধর্ম। (সক্রোধে) আঃ করে ও! রাম রাম, প্রস্রাব করিতে বসিছি, এতো চীৎকার কর্তেছে কেন?

ভোলা। মুই, বেড়ুয়োর বাড়ির মেন্দের-ভোলা।

ধর্ম। (সহাস্ত্র মুখে) কিরে ভোলা?

ভোলা। এজে ই বাবাঠাকুর, পেগ্লাম।

ধর্ম। কিরে কেন এসেছিম্? ভাল ত সকল?

ভোলা। এজ্ঞে, বড়মোশাই তোমারে এসতে বলে, তার মেয়েগার ব্যা।

ধর্ম। বিবাহ! কি অমুই হইবে?

ভোলা। হাঁ বাবাঠাকুর, আজি সজ্জাবালা ব্যা হবে। তিনি আমার বল্যে

“ভোলা, তুই আজি নাস্তিরে ঘর ব্যাসনে, তোর দিদিঠাগ-কুণীন্দ্রের ব্যা।”

ধর্ম। হাঁ, হাঁ, শুভাচার্যের মুখে শুনিতেছিলাম বটে। তাঁর চারিটি কন্যারি কি বিবাহ একেবারে হবে?

ভোলা। এজ্ঞে মশাই।

ধর্ম। (স্বগত) এবারকার দক্ষিণার টাকায় ব্রাহ্মণীর নত গড়ান হইতে পারিবে। (প্রকাশে) তবে তুই যা, আমি পুথি লইয়া যাইতেছি।

ভোলা। যে এজ্ঞে—মুই তবে যাই।

(ভোলার প্রস্থান।)

ধর্ম। একাকী যাওয়াটা ভাল হয় না, ছাত্রেরা কোথায়?—

তর্কবাগীশের প্রবেশ।

এই যে তর্কবাগীশ বাবা, ওহে একবার আমার সঙ্গে যাইতে পারিবে?

তর্ক। কোথায় যাইব?

ধর্ম। আমার যজ্ঞমানের বাটীতে বিবাহ, তুমি গেলে চাউল কলা সব আসে, যাও তবে এস।

তর্ক। যে আজ্ঞা, চলুন তবে; (পথে গমন) মহাশয়! আজি ত বিবাহের দিন নাই।

ধর্ম। বাপু হে! সে কথা আর জিজ্ঞাসা করিতেছ? আমার যজ্ঞমান কুলপালক বাঁড়ুয্যে, তিনি বল্লালকৃত কুলকল্লোলে পতিত; তাঁহার চারিটি কন্যা; তন্মধ্যে কনিষ্ঠা কন্যাটির কেবল কন্যাকাল আছে, তৃতীয়টি যুবতী, দ্বিতীয়া আর জ্যেষ্ঠা তারা অনুঢ়াবস্থায়ই যৌবন যাপন করিয়াছে। তিনি এতাবদ্বিবস সমযোগ্য কুলীন বর প্রাপ্ত হন নাই, কুলভঙ্গ ভয়ে তাহাদের বিবাহ দিতেও পারেন নাই। (কিঞ্চিৎ নয়ন মুদ্রিত করিয়া) আহা! হা! কি মহাপাতক—রাম! রাম! বিষ্ণুস্মৃতিতে কথিত আছে,—



“যাবন্তু কন্তামৃতবঃ স্পৃশন্তি তুল্যৈঃ সন্ধ্যাম্যপি যাচ্যমানাঃ ।

তাবন্তি ভূতানি হতানি তাভ্যাং মাতাপিতৃভ্যামিতি ধর্মবাদঃ ॥”

অবিবাহিতাবস্থায় কন্টার যতবার রজোযোগ হয়, তাহার পিতা মাতা তত প্রাণিহত্যার পাপে পাপী হয়, এবং পৈঠীনসি कहियाছেন,—‘যাবন্তোত্তিষ্ঠেতে শুনৌ তাবদেব দেয়া, অথ ঋতুমতী ভবতী, তদা দাতা প্রতিগ্রহীতা চ নরকমাপ্নোতি পিতৃপিতামহ প্রপিতামহাশ্চ বিষ্ঠায়াং জায়ন্তে তন্মায়গ্নিকা দাতব্যেতি ।’

কুচযুগল মুকুলিত না হইতে হইতেই বিবাহ দিবে, এই বিধি ; কিন্তু যদি অনুঢ়াবস্থায় ঋতুমতী হয়, কন্টাদাতা, বর, উভয়ে নরকে গমন করে, আর তাহার পিতা, পিতামহ প্রভৃতি সকলে বিষ্ঠার হুদে কীটভাব লাভ করে । অতএব ঋতু হইবার পূর্বেই কন্টার বিবাহ দিবে, এই শাস্ত্র ; কিন্তু এক্ষণে বল্লালকৃত কুলগৌরব-সৌরভ-লোভে কুলপালক এই সকল যুক্তি-সিদ্ধ বিস্তৃত শাস্ত্রকে অশ্রদ্ধা করিয়া, কতশত পাতক না স্বীকার করিয়াছে ? এত দিনের পর কোথা হইতে অশেষ দোষাকর কুলীন এক পাত্র পাইয়া অণু অদিনে, তাহাকে কন্টাচতুষ্টয় প্রদান করিবে ! করুক, যাহার যাহা অভিমত,—দক্ষিণা প্রাপ্তি হইলেই আমার অভিমত সিদ্ধ হয়, দিনের কথায় কাষ কি ?

তর্ক । ভট্টাচার্য্য মহাশয় ! ভাল এক কথা জিজ্ঞাসা করি ; যাহার কন্টা, সে কুলীনপাত্র না পাইলে কুলভঙ্গভয়ে বিবাহ দিতে পারে না ; সুতরাং তাহাতে পাপ স্বীকার করিতে হয়, কিন্তু রজোযোগ হইলে, সে কন্টাকে কে গ্রহণ করিয়া এমন পাপে লিপ্ত হয় ?

ধর্ম । সেও ঐ কুলীন মহাত্মারা ; তাঁহারা ধর্ম্মাধর্ম্মের প্রতি নেত্রপাত করেন না, অর্থ পাইলে পরমার্থ বোধে সকল দুষ্ক্রিয়াই করিয়া থাকেন । তাঁহাদিগের বয়োবিবেচনা, গুণপর্যালোচনা, সৌন্দর্য্য-ভিলাষ, জাতিবিনাশশঙ্কা, লোকাপবাদভয়, কিছুই নাই ; অর্থ-লোভে এক ব্যক্তি একশত পর্য্যন্ত পরিণয়ে প্রণয় বন্ধ করেন, কাহার বা বিবাহব্যাপারে আলস্য নাই ।

অধর্মরচিত্র প্রবেশ ।

অধর্ম । কে হে তুমি, বে তে আলিস্তির কথা বল্চো ? বে কর্তে কি আলিস্তি হয় ? গেলেম্—বে কল্লেম—যৎকিঞ্চিৎ—কাঞ্চনমূল্য পেলেম্—চল্যেম্—আর কি ? বে অকচির কচি, যদি পাই কপার কুচি, তবে মুচিকেও করি শুচি, তাতে কি আলিস্তি আছে ?

ধর্ম । ( জনান্তিকে ) তর্কবাগীশ ! এই দেখ, এক মহাপুরুষ ! ( প্রকাশে ) না তাহা নয়, আমি একটা কথার কথা কহিতেছিলাম ; আপনার নিবাস কোথায় মহাশয় !

অধর্ম । শ্বশুরবাড়ী ।

ধর্ম । শ্বশুরবাড়ী নিবাস, ইহা কেমন কহিলেন ?

অধর্ম । যেখানে থাকতে হয়, সেই নিবাস ।

ধর্ম । আপনি কি ধর্মশাস্ত্র ব্যবসায় করেন ?

অধর্ম । ( সক্রোধে ) আঃ আমি কি ডোম ; যে ধর্মশাস্ত্র শিখে ধর্মপণ্ডিত হব ?

ধর্ম । আপনি ক্রোধ করিবেন না, জিজ্ঞাসার এমন রীতি আছে—লোকে ক'রে থাকে, তায় ক্ষতি কি ? বলুন না কেন, কি ব্যবসায় করেন ?

অধর্ম । আমার বিবাহ ব্যবসা, আর কি ব্যবসা ?

ধর্ম । বিবাহ ব্যবসায় কি দেহযাত্রা নির্বাহ হয় ?

অধর্ম । হাঁ, হয়ে থাকে । মহারাজাধিরাজ বল্লালসেন আমাদিগকে যে নিষ্কর তালুক দিয়া গেছেন, তার হাজাশুকো নাই—তাতেই আমরা সুখে আছি । আমরা রাজারও রেয়েত নই, সেধেরও খাতক নই, আপনি কি কুলীনেচ্ছেলের বিষয় জানেন না ?

ধর্ম । হাঁ জানি, বিশেষ জানি না, আপনারা শ্বশুরবাড়ীতে কিরূপ থাকেন ?

অধর্ম । শ্বশুরবাড়ীর সুখের কথা এক মুখে কত কব ?

বরফী তুলিয়া হাতে দাঁত দিয়া কাটি ।

পায়স অঙ্গুলে করে বসে বসে চাটি ॥

ভোজনে ওজন বুঝে ঘন দুধবাটি ।

শয়নে কেমন সুখ পরিপাটি পাটি ॥



আলাপে শীলতা বড় কথা কাটাকাটি ।

সম্বল কিছুই নাই মুখে মালসাটি ॥

বসিয়া মজাগি করি কখন না খাটি ।

অহঙ্কারভরে মোরা না মাড়াই মাটি ॥

ধর্ম । ইঁ, হইতে পারে, আহাৱাদির ক্লেশ ঘটে না বটে, কিন্তু সংসারি মানব মাত্ৰেরই অর্থ প্রয়োজনীয় । যদি কোন কারণে ধনের প্রয়োজন হয়, কি করেন ?

অধর্ম । তাহাও সেথায় পাওয়া যায়,—দক্ষিণহস্তে দক্ষিণে না পেলো কি সেথা থাকি ? কেন থাকবো ? বরং অতিত হ'য়ে অন্তের বাড়িই সিদ্ধপক করি—তা ভাল ; মশা তাড়াই—সেও আচ্ছা ; আমরা এমন গুরুর শিষ্য নই, কুলমর্যাদা না পেলো কদাচ সেথায় থাকিনে ;—আরও কোন রকম সকম আছে ।

ধর্ম । কিরূপ রকম সকম ?

অধর্ম । পেটের দায়ে আমাদের এসে ধরে, আমরাও পেটের দায়ে কিছু নে থাকি ।

ধর্ম । পেটের দায়ে কিরূপ, বুঝিতে পারিলাম না ।

অধর্ম । ( অট্টহাস্য করিয়া ) ব্রাহ্মণ পণ্ডিত, কিছুই বোঝেন না !

ধর্ম । ইঁ বাপু, আমরা ওরূপ কথা বুঝিতে পারি না ।

অধর্ম । আমরা কুলীনের ছেলে, অনেকগুলো বে, সর্বত্র ত যাওয়া হয় না, তা যদি কোথাও বেঁধে যায় আর নিকাশ প্রকাশ না হয়—বুঝতে পেরেছেন কি ?

ধর্ম । ইঁ বুঝিছি । তবে কি হয় ?

অধর্ম । তবে তারা লোকনিন্দে ভয়ে এসে আমাদের নে যাওয়ার চেষ্টা করে, আমাদেরও ঝোপ বুঝে কোপ, মটকা মেয়ে বসে থাকি । সুতরাং তারা ১০।২০।৩০ দিয়া লইয়ে যায় ।

ধর্ম । ভাল বুঝিয়াছি, আর একটা কথা জিজ্ঞাসা করি, খণ্ডরালয়ে অধিক দিন থাকিলে, তোমাদের আদর ও গৌরবের কিছু হানি হয় কিনা ।

অধর্ম । ( ঈষৎ হাস্য মুখে ) না মহাশয়, কুলীনের ছেলে যত অধিক কাল খণ্ডরবাড়ী থাকে, তত অধিক আদর বাড়ে,—তা থাক্তে পাই কৈ ? বচ্ছরে তিন শ ঘাটি দিন বৈ ত নয় ?

ধর্ম । ( উচ্চহাস্য মুখে ) আপনি কত সংসার করিয়াছেন ?

অধর্ম । আমাদের কুলীনেছেলে অনেক বে করে থাকে, কিন্তু, আমি ধর্মভীত অধর্মকুচি মুকুযো, আমি অধিক করি নাই ।

ধর্ম । তবু কত, শুনিতে পাই না ?

অধর্ম । শুন্তে পাবেন না কেন ? আমি সাড়ে আঠার গুণা বৈ আর বে করি নাই ;—কত গুলো বে কর্যো কি হবে ? আমাদের মহাশয় চারি কুড়ি পোনের টা বে করেছেন, এখন তিনি অন্তদন্তহীন হয়েছেন, তবু পেনে ছাড়েন না ।

ধর্ম । ( সহাস্য মুখে ) আপনি এত অল্প বিবাহ করিয়াছেন ? ভাল একটা কথা জিজ্ঞাসা করি, আপনি আপন বিবাহিত ৭৪টি স্ত্রীর প্রত্যেকের কি ধর্মরক্ষা করিতে পারেন ?

অধর্ম । ধর্মই ধর্ম রক্ষা করেন, আমরা ধর্মধর্মের ধার ধারি নে, অথবা যার ধর্ম সেই রক্ষা করে । আমাদের ধর্ম এই যে আমরা কুলীনের ছেলে ধর্ম্যে ধর্ম্যে কিছু পেনে ছাড়িনে, সে কথায় কাষ কি ? নমস্কার মহাশয়, আমি পিতার তত্ত্বে এসেছি, দেখি তিনি কোথায় ।

( ইতস্ততঃ অন্বেষণ করিয়া অধর্মকুচির গ্রহণ ।

ধর্ম । শুনিলে তর্কবাগীশ ?

তর্ক । আজ্ঞা, শুনলাম ; কি চমৎকার ! কি ভয়ানক ব্যাপার ! বল্লালসেন গৌড়রাজ্যে ধর্মনির্মূলনার্থ ধুমকেতুস্বরূপ উদ্ভিত হইয়াছিল, যথার্থই বটে ।

ধর্ম । বাপু হে ! বলিব কি ? পূর্বে কুলীন শব্দে নবগুণবিশিষ্ট ব্যক্তি বুঝাইত, এই ক্ষণে আর তাহা নাই ; কুকার্যে যে লীন, তাহাকেই কুলীন কহে । হা বিধাতঃ ! তোমার সূদৃশ বিশ্বরাজ্য পরিণামে কি পর্য্যন্ত ভয়াবহ হইয়া উঠিল ! হে বসুন্ধরে ! বিবাহ করিয়া পত্নীর ভরণপোষণ ও ধর্মরক্ষা করিতে হয়, ইহা যাহাদিগের কর্ণকুহরেও কদাচ স্থান পায় না—সর্বদাই বিবাহ-বাণিজ্যে দীক্ষিত থাকে, তাহাদের পাপভরেই তুমি ভারাক্রান্ত রহিয়াছ ! স্ত্রীজাতির ইন্দ্রিয়বিশেষ পুরুষাপেক্ষা অষ্টগুণ শাস্ত্রে কথিত আছে, কিন্তু এই সকল বল্লাল-দত্ত-কৌলীকচিহ্ন-ধারী

কুলীন মহারথীরা ইহা বিবেচনা না করিয়া শতাধিক বিবাহ করেন, ইহাতে ঐ বিবাহিত কুলকামিনীগণের প্রত্যেকের কি ধর্মরক্ষা হয়? বিবাহের পর জীবনকালমধ্যে কোন স্বস্ত্রালায়ে ইহারা দ্বিবার, কোথায় ত্রিবার পদার্পণ করিয়া থাকেন, তাহাতে তাহাদিগের পাতিব্রত্য ধর্ম কিরূপে রক্ষিত হইবে? বর্তমান কালে স্ত্রীজাতির বিদ্যাশিক্ষার সম্যক্ প্রথা নাই, সুতরাং তাহারা অন্তঃকরণকে বিষয়বিশেষে ব্যাপৃত করিতে পায় না, চিরকাল পিত্রালায়ে অবস্থান করে, দুঃসহ যৌবন-যাতনা উপস্থিত হইলে নিতান্তই হিতাহিত বিবেচনাবিহীন হইয়া স্ব স্ব সমীহিতসাধনে যত্নবতী হয়, তাহাতে জাতিপাত ও জনাগবাদ প্রভৃতি বিবিধ ব্যাপার তাহাদের ক্রভঙ্কের আনুসঙ্গিক ফল হইয়া উঠে। মনু কহিয়াছেন,—

বাল্যে পিতুর্ক্ৰোধে তিষ্ঠেৎ পাণিগ্রাহন্ত যৌবনে ।

পুত্রাণাং ভর্তৃরি প্রেতে ন ভজেৎ স্ত্রী স্বতন্ত্রতাম্ ॥

বাল্যকালে পিতা, যৌবনে পরিণেতা, এবং পতির লোকান্তর হইলে পুত্রগণ, স্ত্রী জাতির আবরক হইবে।

পানং দুর্জ্জনসংসর্গঃ পত্যা চ বিরহোহটনম্ ।

স্বপ্নোহন্ত্যগেহবাসশ্চ নারীসংদূষণানি ষট্ ॥

মনু এই শ্লোকে স্ত্রীজাতির ষট্প্রকার দূষণ গণনাতে পতির সহিত চিরবিরহেরও পাতিব্রত্যনাশকতা কহিয়াছেন। কিন্তু বঙ্গালি প্রথায় কুলীনকন্যা ও কুলীন কর্তৃক বিবাহিত বনিতাদিগের প্রায় অহরহই বিরহবেদনা সহ্য করিতে হয় ও চিরদিনই পিত্রালায়ে থাকিতে হয়, সুতরাং তাহারা কিরূপে সতীত্ব রক্ষা করিবে? ব্যভিচারদোষে অবশ্যই লিপ্ত হইয়া থাকে।

তর্ক । যথার্থ মহাশয় ।

ধর্ম । আমরাও সেই সকল ব্যক্তির যাজ্ঞন কার্য্যে ভূরি ভূরি মহাপাতক স্বীকার করিতেছি! কি করি? কালধর্ম সহকারে সকলি করিতে হয়।

নিজ পিতা বিবাহ-বণিকের সহিত অধর্মরূটির পুনঃ প্রবেশ।

বিবাহ। তার পর বাপু! কি হলো?

অধর্ম। তার পর মাধবপুরে যাচ্ছিলাম, এই আপনার সঙ্গে সাক্ষাৎ।

ভাল হলো, তবে একটা মন্তব্য জিজ্ঞাসা করি, কি কর্কো বলুন দেখি?

বিবাহ। কি বল?—কেন এত বিষমুখে রহিলে?

অধর্ম। (দীর্ঘ নিশ্বাস ত্যাগ করিয়া) জৈত্রপুরের দোকানে বসে আমি মোতাৎ কচ্ছিলাম, এমন সময়ে এক বেটা নাপ্তে নকুলপুর থেকে এক খানা পত্র এনে দিলেক।

বিবাহ। নকুলপুরে তুমি কি বে করেছিলে?

অধর্ম। আপনি কি করে জানিলেন?

বিবাহ। বলি, এ আর জাস্তে কি? কুলীনের ছেলের তিন কুলে কে আছে যে চিঠি লিখিবে? তা পত্রে কি লেখা আছে?

অধর্ম। আমি ত লেখা পড়া শিখিনি, সেই দোকানি তা পড়িল।

বিবাহ। কি বৃত্তান্ত?—কেন বাপু! অধোমুখে নিরুত্তর হইলে? কোন অমঙ্গল সম্বাদ না কি? বল বাবা কি হ'য়েছে?

অধর্ম। (অধোমুখে) হাঁ—এক প্রকার অমঙ্গলই বটে, সেথায় আমার একটি মেয়ে হ'য়েছে, তার অন্নপ্রাশনের নিমিত্তে আমার সম্বন্ধী আমাকে সেথায় যেতে লিখেচে, দোকানি বেটা ত এই বল্লো।

বিবাহ। আ—হা! কণ্ঠা হ'লো! পুত্র সন্তান হ'লে ভাল হ'তো! ঈশ্বরের ইচ্ছা, এত অন্তর সাধ্য নয়, তা কি কর্কো, তবে কিনা আমাদের কন্যাগত কুল; তাহার বিবাহ সময়ে কুলকর্ম কতো হবে, না পারিলে কুলভঙ্গের সম্ভাবনা বটে, তা কি কর্কো বাপু! যাও অন্নপ্রাশন দেও গে।

অধর্ম। বাবা! তার নিমিত্তে বল্চি না।

বিবাহ। তবে কি নিমিত্ত?

অধর্ম। কি বলবো বাবা, লজ্জা হয়; সে দেশে প্রায় তিন বছর যাই নাই, তাই বলি—মেয়েটা হ'লো!

বিবাহ। (উচ্চহাস্য করিয়া) বাপু হে! তাতে কতি কি? আমি তোমার জননীকে বিবাহ করিয়া তথায় একবারও যাই নাই,

একেবারে তোমার সঙ্গে সাক্ষাৎ হয়। তা বাপু! আমরা কুলীনের ছেলে, আমাদের ও রকম হয়ে থাকে, তাতে কতি কি? যাও বাপু! তারা অমোদ করে লিখেছে, যাও, লজ্জা কি?—

( অধোমুখেই অধর্মরচিত্র প্রস্থান। )

( স্বগত ) আমার কিছু টাকা চাই; কোথা যাই, বেলাও অনেকটা হ'য়েছে, নিকটে কি কোন খুশরবাড়ী নাই? ( চিন্তা করিয়া ) হাঁ, যেন মনে হচ্ছে, এখান হইতে এক ক্রোশ হইবে বিমলাপুর, সেখানে বুঝি একবার বে হ'য়েছিল ( চিন্তা করিয়া ) আমিই সেথায় বে করেছি, না পুত্রের বে দিছি? ভাল মনে হচ্ছে না—পুত্রকে ডেকে জিজ্ঞাসা করিব? ( কিঞ্চিদ্রাবিয়া ) না, আমার কাছে ত ফর্দ আছে, তাই দেখি না কেন? ( ফর্দ খুলিয়া ) হাঁ, এই যে “১২৪২ সাল, ৩রা মাঘ, বিমলাপুরের কমল শ্রায়ালঙ্কারের কন্যাকে আমিই বে করেছি” হু, দেখেছ? লেখা পড়া রাখা ভাল, মনে করে কত রাখা যায়? লেখা ছিল, এইত মনে হ'লো, নৈলে কি হ'তো? যাই এখন সেখানেই যাই; কিন্তু সে বামণ বামণপণ্ডিত, কিছু দিতে পারে এমন বোধ হয় না। ভাল, ব্রাহ্মণীর কাটনা কাটাও কি কিছু নেই? দেখে আসিনে কেন? কিন্তু যদি বাবাজীর মত আমারও সেথায় কন্যা হ'য়ে থাকে, তবেই ত বিলাট ( কিঞ্চিদগমন করিয়া ) কোন্ পথটা দে যাব, কাহাকেও যে দেখিতে পাই না, জিজ্ঞাসা করি কাকে?—

উত্তম মুখোপাধ্যায়ের প্রবেশ।

( প্রকাশে ) ওহে! কে হে তুমি! বিমলাপুরে কোন্ পথে যাব, বলিতে পার?

উত্তম। বিমলাপুরে যাবেন। আমার সঙ্গে আসুন। আপনি বিমলাপুরে কার বাড়ীতে যাবেন?

বিবাহ। কমল শ্রায়ালঙ্কারের বাড়ী।

উত্তম। তথায় কি প্রয়োজন?

বিবাহ। আমি তাঁহার কন্যাকে বিবাহ করিয়াছি, তাই একবার তত্ত্বাবধান করিতে যাই।



উত্তম । মহাশয়ের নাম কি ?

বিবাহ । আমার নাম শ্রীবিবাহবণিক মুখোপাধ্যায় ।

উত্তম । তবে আমি প্রণাম করি । ( প্রণিপাত )

বিবাহ । বাপু, তুমি কে আমাকে প্রণাম করিতেছ ?

উত্তম । আমি মহাশয়ের পুত্র, আমার নাম উত্তম মুখোপাধ্যায় ।

বিবাহ । পুত্র ! সে কি ! তুমি কাহার দৌহিত্র ?

উত্তম । আমি বিমলাপুরের শ্রীযুক্ত কমল গ্রামালঙ্কার মহাশয়ের দৌহিত্র ।

বিবাহ । তবে ষথার্থ ইত বটে, এস এস বাছা এস, ( মস্তকে হস্তার্পণ ) ।

উত্তম । আমি আজি কৃতার্থ হইলাম—জন্মাবধি পিতৃদর্শন পাই নাই ।

বিবাহ । ( স্বগত ) তুমি দর্শন পাবে কি, তোমার মাও আমাকে কখন দেখে নাই—সেই শুভদৃষ্টি মাত্রই যা হউক । কৈ, অধর্মকৃচি বাপা এখন কোথায়,—কত্না হ'য়েছে বলে বড় ভয় পেয়েছিলেন ; দেখুন এসে, আমার এককালে কুড়ি বৎসরের ছেলে হয়েছে । ( প্রকাশে ) হাঁ, আমারও আজি পরম আহ্লাদ—পুত্রের সহিত সাক্ষাৎ হইল ।

উত্তম । মহাশয়ের শরীর ভাল আছে ?

বিবাহ । হাঁ বাপু, তোমাদের সকল মঙ্গল ?

উত্তম । আজ্ঞা শ্রীচরণপ্রসাদাৎ সকলই মঙ্গল ?

বিবাহ । ( স্বগত ) দূর হউক, আর সেথায় যাব না । ( প্রকাশে )

উত্তম,—বাপু তোমার সঙ্গে দেখা হ'য়ে ভাল হ'লো, সেথাকার সংবাদ পাইলাম, তবে আর যাইবার আবশ্যকতা কি ? তুমি যাও, আমার একটু বিশেষ প্রয়োজন আছে, তথায় যাই ।

উত্তম । না মহাশয়, আপনাকে যেতে হবে, চলুন ।

বিবাহ । কেন আর মিছে কস্মভোগ ? সংবাদ ত পেলেম ।

উত্তম । না না, তা হবে না, যেতেই হবে ।

বিবাহ । কেন ? তুমি এত আকিঞ্চন করিতেছ কেন ?

উত্তম । আজ্ঞে, আমি আকিঞ্চন করিতেছি, তাহার কারণ আছে ।

বিবাহ । কি কারণ বল, শুনি ।

উত্তম । মহাশয় ! আজি তিন বৎসর হইল, আমরা মহাশয়ের শরীরের অমঙ্গল সংবাদ পেয়েছিলাম, এখন বুঝিলাম, সে সংবাদ মিথ্যা,

কিন্তু তাহাতেই আমার মাতৃঠাকুরাণী বিধবা হইয়াছেন। অল্প আপনার সহিত যে আমার সাক্ষাৎ হইল, পরম সৌভাগ্যের বিষয়। আমি এই সংবাদ বাটীর সকলকে জানাইলে তাঁহারা বিশ্বাস করিবেন না, তাই মহাশয়কে আকিঞ্চন করিয়া লইয়া যাইতেছি—তাঁহারাও তুষ্ট হইবেন, মাতৃঠাকুরাণীরও বৈধব্য দূর হইবে।

বিবাহ। (হাস্তমুখে, স্বগত) স্বামী স্ত্রীর সকল দেখিতে পায়, কিন্তু বৈধব্যদশা কদাচ দর্শন করিতে পায় না। দেখ, আমি কি ভাগ্যবান! তাহাও স্বচক্ষে দেখিব,—হা অদৃষ্ট! (প্রকাশে) চল বাপু তবে যাই।

(উভয়ের প্রস্থান।)

গর্ভবতীর প্রবেশ।

গর্ভবতী। (রোদন করিতে করিতে)

সংসারেতে ছিল সাধ তাহে হ'লো বিসম্বাদ  
বিধাতা সাধিল বাধ পূরাল না সাধনা।  
বাঁচিয়া নাহিক সুখ কেবল সতত দুখ  
দেখাইতে কালামুখ আর নাহি বাসনা ॥  
একোট। এক প্রকার দেখে হই চমৎকার  
গুণকথা কহি কার কেহ ভাল বাসে না।  
শাশুড়ী বাঘিনী প্রায় ননদী নাগিনী তায়  
যদি কোন ছল পায় তবে রক্ষা থাকে না ॥  
প্রতিবাসী যদি আসি হয় মোরে মিষ্টভাষী  
অমনি সে সর্বনাশী প্রকাশিতে ছাড়ে না  
শাশুড়ী তা শুন্তে পেল ভূতছাড়া করে গেলে  
দিতে এসে মুড়ো জেলে বিবেচনা করে না ॥  
পেলে অপরাধ তিল তালের সমান কীল  
বুকে পিঠে লাগে খিল নাহি থাকে চেতনা।  
ভাতারের মুখে ছাই তাহার মরণ নাই  
তা হলে নিকুলে যাই ঘুচে সব যাতনা ॥

মরি মদা মনস্তাপে      কি দেখে দিচ্ছে বাপে  
ধাক্ তাকে কাল সাপে      যে করেছে ঘটনা।

মরণ হইলে হয়      পোড়া প্রাণে কত নয়  
যম গেছ যমালয়      একবার ডাক না ॥

আমি ত আর সহিতে পারিনে, বিধাতা যদি দিন দেয়, তবেই দিন পাব! যাই দেখি পুরুতের বাড়ী, ( পশ্চিমধ্যে ) এই যে পুরুত ঠাকুর এই দিকেই আশ্চেন।

( নিকটে গিয়া প্রণাম করিয়া রোদনারম্ভ করিল )

ধর্ম । কে ও ? হরির মা ! রোদন করিতেছ কেন বাছা ? বালকেরা তো ভাল আছে ?—কেন মা ? কেন কেন ? বড় রোদন করিতে লাগিলে, কি জ্ঞে ? চক্রবর্তী বাপা কি কিছু বলিয়াছেন ?

গর্ভ । আমার আর কেউ নেই, আপনি রক্ষা করুন ( চরণধারণ । )

ধর্ম । কেন কেন মা ? ছাড় ছাড়, আমাকে যাহা বলিবে, তাহাই করিব,—বল কি করিতে হইবে ?

গর্ভ । এবার যেন আমার একটি মেয়ে হয়, এই সংকল্প করে কালি কিছু স্বস্ত্যন করিবেন বলুন, নৈলে আমি তোমার কাছে স্ত্রীহত্যা হব।

ধর্ম । অবশ্য করিব, এই বৈত নয়, তাহার নিমিত্ত আর চরণধারণ কেন ? ছাড়।

গর্ভ । ( চরণ ত্যাগ করিয়া ) তবে আমি উয্যুগ করি গে ?

ধর্ম । হাঁ, যাও। একটি কন্যা কি ইচ্ছা করিয়াছ ? ( হাস্তমুখে ) হাঁ, হাঁ, অভিলাষ হইতে পারে, কন্যা সস্তানটা বড় স্নেহপাত্র বটে, বিশেষত “দশপুত্রসমা কন্যা যদি পাত্রে প্রদীয়তে” কন্যা যদি সংপাত্রে প্রদান করা হয়, তবে সে কন্যা দশপুত্রতুল্যা। আর কন্যাদানের ফলও বড়—ক্রিয়াযোগসারে কথিত আছে, “কন্যাদানকৃতো নাস্তি স্বর্গাদাগমনং পুনঃ” যে ব্যক্তি কন্যাদান করে, তাহার অক্ষয় স্বর্গ হয়। এই সমাগরা ধরা দান করিলে যে পুণ্য হয়, সেই পুণ্যে কন্যাদাতার অধিকার, ইহার প্রমাণ বচনটা তর্কবাগীশ স্মরণ হয় হাঁ ?

তর্ক । আজ্ঞা, বড় মনে হইতেছে না।

ধর্ম । নাই হলো, ভারতেও লিখেছেন,



“দৌহিত্রস্ত মুখং দৃষ্ট্বা কিমর্থমনুশোচতি ।” এবং,

“তেন দৌহিত্রজান্ লোকান্ প্রাপ্নুয়ামিতি মে যতিঃ ।”

কন্যা সন্তান দ্বারা দৌহিত্রমুখ দর্শন হয়, তাহাতেই দৌহিত্রজ নামে স্বর্গ লাভ হয়, সুতরাং এই সকল ফল অনুসন্ধান করিলে, কন্যাসন্তান প্রসবে অভিলাষ হয় বটে ।

গর্ভ । তাঙ্কন্তো বড় নয় ।

ধর্ম । তবে কি নিমিত্ত কন্যার প্রার্থনা ?

গর্ভ । ( সজলনয়নে ) সেই পোড়ারমুখো মিলে আমাকে মেরেছে ।  
( উচ্চৈঃস্বরে রোদন । )

ধর্ম । রাম রাম ! জ্বীলোকের নিগ্রহ, একি ! “জ্বিয়ঃ সমস্তাঃ সকলা জগৎসু ।” দেবতারা কহিয়াছেন, “পৃথিবীসু সমস্ত জ্বীলোকই ভগবতীর অংশ ।” তৎপ্রতি দণ্ড, একি ! বিশেষত মনু কহিয়াছেন,

“শোচন্তি জাময়ো যত্র বিনশ্যন্ত্যাশু তৎকুলং ।

ন শোচন্তি হি যত্রৈতা বর্দ্ধতে তন্ধি সর্বদা ॥”

যে কুলে কুলকামিনীরা রোদন করে, সে কুল শীঘ্রই বিনাশ পায়, আর যে কুলে তাহারা আহ্লাদিতা থাকে, সে কুল সর্বদা বর্দ্ধনশীল হয় । অতএব চক্রবর্তী কেন ধর্মাতিবর্তী হইয়া তোমাকে নিগ্রহ করিলেন ? বাছা ! তুমি কি কোন অপরাধ করিয়াছ ?

গর্ভ । এমন কিছু করি নাই, কেবল পুল প্রসব করেছিলাম ।

ধর্ম । তাহাতে অপরাধ কি ? সৌভাগ্যবতী নারীই পুল প্রসব করে ; বিশেষত “পুলার্থে ক্রিয়তে ভার্যা পুলঃ পিণ্ডপ্রয়োজনঃ ।” পুলের নিমিত্তই দার গ্রহণ করিতে হয়, নতুবা ভার্যার প্রয়োজন কি ? বিষ্ণুসংহিতাতে লিখিত আছে,

“পুল্মায়ো নরকাদ্ যস্মাৎ পিতরং ত্রায়তে স্ততঃ ।

তস্মাৎ পুল ইতি প্রোক্তঃ স্বয়মেব স্বয়ভুবা ॥”

পুলমুখ দর্শন করিলে, পুল্মাম নরকে গমন করিতে হয় না । যাহার ছুরদৃষ্ট দোষবশে পুলমুখ নিরীক্ষিত না হয়, তাহাকে পুল্মাম নরক-ভোগ স্বীকার করিতে হয় । অতএব পুল প্রসব করিয়া তাহাকে কৃতার্থ করিয়াছ, তাহাতে অপরাধ কি ?

গর্ভ । না, এক পুত্র প্রসব করেছি ।

ধর্ম । তাহা ত অতি উত্তম, “এষ্টব্যা বহবঃ পুত্রা যদ্যপ্যেকো গম্মাং ব্রজেৎ ।” সংসারীরা বহু পুত্র ইচ্ছা করিবেক ? যেহেতু অনেক পুত্র হইলে যদি কেহ গয়াধামে গমন করে, তাহা হইলেই চতুর্দশ পুরুষ পর্য্যন্ত অনায়াসে উদ্ধার হইতে পারে । আর এক পুত্রে বংশরক্ষারও সন্দেহ । ভারতে কথিত আছে,

“একপুত্রো হপুত্রো মে মতঃ কৌরবনন্দন ।

একচক্ষুর্যথা চক্ষুর্নাশে তস্তাক্ষ এব সঃ ॥”

যেমন কাণ ব্যক্তির বর্তমান যে এক চক্ষু, তাহে আস্থা নাই, তন্নাশ হইলে অন্ধ হইতে হয়, সেইরূপ এক পুত্রীর সে পুত্র বিনাশ হইলে, তাহার বংশ নিমূলিত হইয়া যায় । বিশেষত নিমিত্ত-নিদানে কথিত আছে, “বহু-পুত্রবতী নারী সুখসৌভাগ্যশালিনী ।” যে স্ত্রী বহুপুত্র-প্রসবিনী, সে লক্ষণাক্রান্তা ; অতএব হরির মা ! বাছা তুমি অনেক পুত্র প্রসব করিয়া সৌভাগ্যশালিনী হইয়াছ, ইহাতে তোমার অপরাধ আমি কিছুই বুঝিতে পারিলাম না ।

গর্ভ । তবে আপনি শুনুন, আমাদের বংশে সকলেই মেয়ে ব্যাচে, আমার বড় ভাস্কর পাঁচটা মেয়ে বেচে কোটা করেছেন, আরো এখনো দুটো আছে । আমার চারিটিই মেয়ে হয়নি তাই আমাদের সেই মিসেস আমারে সর্বদা তাড়না করে, বলে ‘এমন হতভাগিনী তুই একটাও মেয়ে বিউতে পারিনি ।’ এবার আবার সেই অলক্ষণে পেট উপস্থিত হয়েছে, আজ কোথা থেকে এসেই আমারে নিগ্রহ কল্যে, আর বল্যে “এবার যদি না মেয়ে হয়, দূর করে দিবো” তাই আপনি দয়া করে কিছু স্বস্ত্যন করুন, যেন এবার মেয়ে হয়—আমি জ্বালা মৈতে পারিনে ! ( উচ্চৈঃস্বরে রোদন ) ।

ধর্ম । ( কর্ণে হাত দিয়া ) ঐ একি শুনি ? রাম, রাম, রাম ! নারায়ণ, নারায়ণ, নারায়ণ ! কণ্ঠা বিক্রয় ! যাহা শ্রবণেও পাপস্পর্শে, এতাদৃশ ব্যাপারেও প্রাণীদিগের অভিক্রটি ! হা ভগবান্, এ কি ! পদ্মপুরাণে কথিত আছে, “কণ্ঠাবিক্রয়িণো নান্তি নরকান্নিকৃতিঃ

পুনঃ।” যে ব্যক্তি কন্যা বিক্রয় করে, নরক হইতে তাহার নিস্তার নাই, সে চিরকাল নিরয়গামী হইয়া থাকে এবং ক্রিয়া-যোগসারে কথিত আছে, “যঃ কন্যাবিক্রয়ং যুটো মোহাৎ প্রকুরুতে দ্বিজ। স গচ্ছেন্নরকং ঘোরং পুরীষহ্রদসংকুলং”। যে ব্যক্তি নিতান্ত ধনগ্ৰস্তা প্রযুক্ত অযুক্ত কন্যাবিক্রয়রূপ দুঃসহ পাতক স্বীকার করে, তাহাকে বিষ্ঠাহ্রদ নরকে গমন করিতে হয় এবং “কন্যাবিক্রয়িণঃ পুংসো মুখং পশ্চেন্ন শাস্ত্রবিৎ। পশ্চোদজ্ঞানতো বাপি কুর্যাদ্ভাস্করদর্শনং ॥” যে ব্যক্তি অজ্ঞানত কন্যাবিক্রয়ীর মুখাবলোকন করে, সেও সূর্য্যদর্শনস্বরূপ প্রায়শ্চিত্ত করিবেক। “যৎকিঞ্চিৎ ক্রিয়তে কৰ্ম্ম কন্যাবিক্রয়িণঃ পুনঃ। শুভং তৎ সকলং বিপ্র গচ্ছেদ্বিফলতাং প্রতি”। কন্যাবিক্রেতা যদি কোন সংকৰ্ম্ম করে, তাহাও তাহার বিফল হয়। আর অধিক কি বলিব, “তদ্দেশং পতিতং মন্ত্রে যজ্ঞাস্তে শুক্রবিক্রয়ী।” কন্যাপুত্রবিক্রেতা যে স্থানে বাস করে, সে দেশ পর্য্যন্ত পতিত হয়। অপর কুল-সৰ্বস্ব গ্রন্থে লিখিত আছে, “ন কুর্য্যাদর্থসম্বন্ধঃ কন্যাদানে কদাচন”। কন্যাদাতা কন্যাগ্রহীতার সহিত কদাচ অর্থসম্বন্ধ করিবে না, করিলে কন্যাবিক্রয় দোষে লিপ্ত হয়, এই শাস্ত্রানুসারে অত্যাধি সজ্জনগণ কদাচ বরপক্ষের দ্রব্যসামগ্রীও গ্রহণ করেন না এবং দৌহিত্রমুখ নিরীক্ষণের পূর্বে জামাতৃগৃহে অভ্যবহারেও বিমুখ থাকেন। শাস্ত্রে এইরূপ শুক্রবিক্রয়ীর অশেষ প্রকার নরক লেখে, কিন্তু কি আশ্চর্য্য, পামরপ্রকৃতি প্রাণিগণ সেই সমস্ত দুর্দ্বর্ষ পাপপুঞ্জ স্বীকারে বহুমতীকে দূষিত করিতেছে! বাছা হরির মা! তুমি এক্ষণে যাও, আমি আশীর্বাদ করিলাম তোমার কন্যা হইবে, আর স্বস্ত্যয়ন করিতে হইবে না।

(গর্ভবতীর প্রস্থান।)

তর্কবাগীশ! শুনলে, কি কদর্য্য ব্যবহার! কন্যাবিক্রয়, কি আশ্চর্য্য কি আশ্চর্য্য!!!

তর্ক। সম্পন্ন ব্যক্তির কি করে? যাহারা দরিদ্র তাহারা কি করিবে, সংসারযাত্রা নির্বাহ নিমিত্তই এই সকল পাপ স্বীকার করিয়া থাকে।

ধর্ম । রেখে দেও তুমি সংসারযাত্রা । বুকে কি পত্র নাই ?—নদীতে কি জল নাই ?—অরণ্যভূমিতে কি স্থান নাই ?—পল্লবে কি শয্যারচনা হয় না ?—বামবাহু কি উপধান হইতে পারে না ?—বকল কি পরিধেয় নহে ? এই পৃথিবীতলে জগদীশ্বরদত্ত অমূল্য-স্বলভ কি না আছে ? কি না পাওয়া যায় ?—সকলই মিলে—তবে কি নিমিত্ত এই মহাপাতক ?

তর্ক । মহাশয় ! বর্তমানকালীন মানবগণমধ্যে শাস্ত্রে প্রজ্ঞা অত্যল্প লোকের আছে, অলৌকিক যে পাপপদার্থ তাহা কত লোকে বিবেচনা করে ? সুতরাং তাহাতেই এই দুর্কার্যের প্রচার আছে ।

ধর্ম । তা শাস্ত্রই যেন না মানিলেক, কণ্ঠা বিক্রয়ের দৃষ্টদোষও দর্শন করে না ?

তর্ক । দৃষ্টদোষ শুনিতে ইচ্ছা করি ।

ধর্ম । শুনবে, শুন ; আজন্ম পর্য্যন্ত স্নেহপূর্বক যে কণ্ঠার লালনপালন করা যায়, পোষিত গৃহকুক্কটের ন্যায় তাহাকে বিক্রয় করা কি বিহিত কার্য্য ? বিশেষত কণ্ঠাবানিজিকেরা পাত্রেব বিজ্ঞা, বুদ্ধি, রীতি, চরিত্র, কিছুই বিবেচনা করে না । যাহার নিকট অভিমত পণ প্রাপ্ত হয়, সে ব্যক্তি জরাজীর্ণ, ব্যাধিশীর্ণ, বিবর্ণ, বিকৃপ, নিগুণ হইলেও তাহার করে ঐ স্নেহময় কণ্ঠারত্নকে বিসর্জন করে,—আহা ! তাহারা কি নির্দয় !! কি নিষ্ঠুর, কি নিষ্ঠুর !!! এ সকল ব্যাপারেই এতদ্দেশে মহা অমঙ্গল ঘটিতেছে ।

তর্ক । দেশের অপকার কি ?

ধর্ম । নয় কেন ? কোন ব্যক্তি, রুগ্ন, ভুগ্ন, অন্ধ, বধির হইয়াও ধনগৌরবে কোন সুরূপা কামিনীর কর গ্রহণপূর্বক তাহার অমূল্য যৌবন-ধারণের বৈফল্য বিধান করিতেছে, কোথাও বা উত্তম বিদ্বান্, রূপবান্, চরিত্রবান্ যুবক নির্ধনতায় বিবাহ করিতে অসমর্থ হইতেছে, ইহাতে এ প্রদেশে কত অনিষ্ট ঘটিতেছে, দেখ দেখি ।

তর্ক । ভাল, প্রজার পক্ষে এমন অনিষ্ট, রাজা কেন বিবেচনা করেন না ?

ধর্ম । ঐ ত আক্ষেপের বিষয় ! বল্লালি কুপ্রথার পরিবর্তনে ও অপত্য-বিক্রয়বারণে যদি রাজপুরুষেরা মনোযোগী হন, তবেই বঙ্গভূমির সুখসমৃদ্ধি বৃদ্ধি হয় ; কিন্তু তাঁহারা প্রজার ধর্মে হস্তার্পণ করেন না ।

তর্ক। মহাশয়! এতো ধর্ম নয়, যাহা বিহিত কার্য তাহাই ধর্ম। এক ব্যক্তি যত অভিলাষ ততই বিবাহ করিবে, কেহ বা বিবাহ করিতে পারিবে না—ইহা কি প্রকারে বিহিত হয়? বিশেষত “রাজ্যে মনুষ্যবিক্রয় হইবে না” এরূপ রাজনিয়ম আছে, এ নিয়মানুসারে কন্যাবিক্রয়-নিষেধ হইতে পারে এবং “স্ত্রীকে ভরণ পোষণ করিতে হয়” এ নিয়মেও ফল ফলে বিবাহবাণিজ্য নিবারণ হইতে পারে।

ধর্ম। হাঁ বাপু, ভাল বলিয়াছ। আমিও এই বঙ্গরাজ্যের সাময়িক উন্নতি দেখিয়া বোধ করি, ক্রমশঃ রাজপুরুষেরা এ বিষয়ে মনোযোগী হইবেন।

তর্ক। ভট্টাচার্য্য মহাশয়! আপনি ত কন্যাবিক্রয়ের দোষোদ্‌ঘোষণা করিলেন; ভাল, কন্যা ক্রয় করিয়া যাহারা বিবাহ করে, তাহাদিগের কিছু দোষ আছে কি না?

ধর্ম। কিছু কেমন?

তর্ক। বলুন না কি দোষ, শুনিতে শুনিতে যাই—জানা থাকা ভাল।

ধর্ম। ক্রয় করিয়া বিবাহ করিলে, বিবাহই সিদ্ধ হয় না; ‘অন্যে পরে কা কথা।’

“ক্রয়ক্রীতা তু যা নারী ন সা পত্ন্যভিধীয়তে।

ন সা দৈবে ন সা পৈত্রে দাসীং তাং কবয়ো বিদুঃ।”

ক্রীত বিবাহিত স্ত্রী দাসীতুল্যা, পত্নী নহে। আর তাহার পুত্রও ‘দাসপুত্র’ বলিয়া শাস্ত্রে খ্যাত আছে।

“ক্রীতা যা রমিতা মূল্যে: সা দাসীতি নিগচ্ছতে।

তস্মাদ্ যো জায়তে পুত্রো দাসপুত্রস্ত স শ্বতঃ ॥”

এবং বিক্রীত কন্যার পুত্রসকল ধর্ম হইতে বহিষ্কৃত, তাহাকেও চণ্ডালতুল্যও कहিয়াছেন।

“বিক্রীতায়ান্চ কন্যায়া: পুত্রো যো জায়তে দ্বিজ:।

স চণ্ডাল ইব জ্ঞেয়: সর্বধর্মবহিষ্কৃত: ॥”

অপর রাজা যদি ক্রয় করিয়া বিবাহ করেন, তাহা হইলে সে স্ত্রীর পুত্র রাজ্যাধিকারী হয় না;—ব্রাহ্মণ যদি ক্রয় করিয়া বিবাহ



করেন, তবে সে দ্বীপ পুত্র তাহার আধিকারী হয় না, সে পুত্র সকল পুত্রের অধম ।

“ন রাজ্ঞো রাজ্যভাক্ স স্ত্রীপ্রাণাং আক্কুয়চ ।

অধমঃ সর্বপুত্রোভ্যন্তস্বাত্তং পরিবর্জয়েৎ ॥”

তর্ক । মহাশয় ! এ সকল প্রমাণ কোথাকার ?

ধর্ম । কেন ? অতি প্রাচীন দত্তক মীমাংসাতে ধৃত হইয়াছে ।

তর্ক । তবে ত ক্রয় করিয়া বিবাহ করাও অতি মন্দ ।

ধর্ম । হাঁ ( শঙ্খবাত্ত শুনিয়া ) চল চল আমরা যাই ( কিয়দূরে যাইয়া )

এই যে কুলপালকের বাটি, চল প্রবিষ্ট হওয়া যাউক ।

তর্ক । যে আজ্ঞা, আপনি অগ্রসর হউন ।

( বাটির মধ্যে উভয়ের প্রস্থান ।

### পঞ্চম অঙ্ক

শিশুকে সঙ্গে লইয়া স্ত্রীমতির প্রবেশ ।

স্ত্রীমতি । ( শিশুর প্রতি ) বাছা একবার ডাকনা, মতো গেল কোথা ?

ফলারের নেমন্তন্ন হয়েছে, বেলাবেলি ছেলোটো নে যাক্ না কেন ?

শিশু । ওমা ! তুই আমাকে ফলারে নে যা, আমি তোরা সঙ্গে যাব ।

স্ত্রীমতি । বাছা ! আমি কি সেথায় যেতে পারি ।

শিশু । কেন পারিস্ নে—তুই পারবি ।

স্ত্রীমতি । আমি যে মেয়ে মানুষ, কেমন করে যাব ?

শিশু । না, তুই মেয়ে মানুষ নয়—তুই যাবি আয়, আমার সঙ্গে আয়

( অঞ্চলাকর্ষণ ) ।

স্ত্রীমতি । না বাছা, আমি গেলে লোকে নিন্দে কর্বে, তুই ডাক্, সে এখন তোকে নে যাবে ।

শিশু । ওমা ! কাকে ডাক্বে ? কে নে যাবে মা

স্ত্রীমতি । সেই মিসেকে ডাক্, থাকে থাকে নিউদেশ হয় ।

শিশু । কোন্ মিসেকে মা ? যে আমাদের ঘর ছেয়েছিল ?

স্ত্রীমতি । না না, তাকে কেন ?

শিশু । ( সজলনয়নে ) তবে আবার কোন্ মিসেকে ডাকবো ?

স্বমতি । সেই কস্তাকে রে কস্তাকে ; ছেনেটাও তেরি !

শিশু । কোস্তাকে, তাই বলনা কেন । আয় তু তু তু ।

স্বমতি । ( সক্রোধে ) না রে, পোড়া কপালে ছেনে, কুকুরকে কেন ?

শিশু । ( সরোদনে ) আ, আ তুই যে বলি কোস্তাকে, তবে আবার কোস্তা কে ?

স্বমতি । সেই তোদের তাকে ।

শিশু । ( সাভিলাষে ) ওমা ! আমাদের তাকে কি আছে মা ? বলনা, মা বল ।

স্বমতি । কি দায় হলো ! এখানেও কেউ নাই যে বলে দেয় ।

উদরপরায়ণের প্রবেশ ।

উদর । কালে কালে সব গেল কি হইল ভাই ।  
পূর্বমত ফলার নয়নে দেখি নাই ॥  
থাকিত ঘরেতে মোর হাঁড়িপোরা লুচি ।  
খাইতে খাইতে তাহা হইত অরুচি ॥  
দিন দিন কত কত জুটিত ফলার ।  
এখন মণ্ডার গন্ধ আর মিলা ভার ॥  
এমন দুর্ভাগা দেশে মারী ভয় নাই ।  
ভাবি তাই কোথা গেলে আত্ম শ্রদ্ধ পাই ॥  
বিবাহের দফা রফা বল্লালে করেছে ।  
খাতা পত্র যাহা ছিল হারিয়ে গিয়েছে ॥  
তাই আমি দৈয়ে হাটে ঘুরিয়া ঘুরিয়া ।  
ফলার সন্ধান করি খুঁজিয়া খুঁজিয়া ॥

হায় কিছুই হলো না ! এতটা পরিশ্রম করিলাম ।

পরিশ্রম হলো সার, নাহি মিলিল ফলার,  
ফল আর জীবনে কি আছে ।

গৃহে অগ্নে নাই রুচি, ত্যজিছি লক্ষ্মীর খুচি,  
লুচি বিনে কিসে প্রাণ বাচে ॥

শিশু । ( আহ্লাদে ) ওমা, ওমা, এই যে বাবা এয়েচে ! আমি বাবার সঙ্গে যাব ।

উদর। কি রে তুই এখানে কেন ? একা এসেছিস্ নাকি ?

শিশু। ( শীঘ্র গিয়া পিতার অঙ্গুলি ধারণপূর্বক ) এই যে বাবা এয়েচে, এই যে বাবা এয়েচে, ও বাবা ! ও বাবা ! আমি মার সঙ্গে এইচি, ঐ মা দাঁড়িয়ে আছে ।

( হস্ত দ্বারা দর্শায় )

উদর। ( স্মৃতির প্রতি সক্রোধে ) কি ! এমন যোগ্যতা একেবারে রাস্তার উপর ! লজ্জা নাই ! ভাদ্র মাসের তালের মত কীল না পেলো বুঝি হবে না ? এই চারিদিকে পুরুষ, এখানে আসা, দেখুবি একবার ?

শিশু। বাবা, মা তোকে ডাকতে এয়েচে ।

উদর। আমাকে ডাকতে এসেছে, কি আর কাকে ডাকতে এসেছে, তার নিশ্চয় কি ?

স্মৃতি। ( সভয়ে ) ফলারের কথা বলতে এসেচি ।

উদর। ( সানন্দে ) আ, কি বলিয়া ? নিকটে আয়, নিকটে আয়, এখানে কেহই নাই, এত লজ্জাই কি ? ভাল তুই ত আর নববধাগমনের বৌ নোস, ( স্মৃতিকে নিকটে আনিয়া ) কি বল দেখি, ফলার জুটেছে, বলিস্ কি ! নিমন্ত্ৰণ না অনিমন্ত্ৰণ ?

স্মৃতি। অনিমন্ত্ৰণ আবার কি ?

উদর। তুই মেয়ে মানুষ কি বুঝিবি ? নিমন্ত্ৰণ অপেক্ষা অনিমন্ত্ৰণে অধিক মজা, নিমন্ত্ৰণে পেটে হয়, অনিমন্ত্ৰণে পেটে পিটে দুয়েতেই হয় ।

স্মৃতি। তা এত আমি জানিনে ; বাঁড়ুঘোর বাড়ী নিমন্ত্ৰণ হয়েছে, সেথায় বে ।

উদর। ঐ ও পাড়ায় কুলপালকের বাড়ী ? ফলার কেমন রকম ?

স্মৃতি। ( সান্ধভঙ্গে ) ফলার আবার কেমন রকম, কথা শুন্লে গা জালা করে ।

উদর। হা কেপি, কিছুই জানিস্নে ! ফলার তিন প্রকার ; উত্তম, মধ্যম, আর অধম । ইহাদের প্রত্যেকের লক্ষণ শুন্বি ? শুনে রাখ্, যদি কখন কাষে লাগে ।





উদর । চল্যম—ভূর্গ ভূর্গা ।

শিশু । ও বাবা ! আমি যাব ।

উদর । ( সক্রোধে ) আঃ পেচু ডাকুলি, দূর হ, যদি ঈশ্বরের ইচ্ছায় একটি ফলার পেলাম, এই তার দফা রফা হলো !

স্বমতি । ছেলে মানুষ, জ্ঞান কি ? তুমি ওকে সঙ্গে নে যাও ।

উদর । হাঁঃ, একে ত সেই খুবড়ো মেয়েদের বে, তায় আবার এই অঘাতা । তুই ওকে নে ঘরে যা ।

শিশু । ( সরোদনে ) আঁ আঁ আঁ ও মা ! আমি যাব ।

স্বমতি । ( ঈষৎ ক্রোধে ) আঃ, নে যাওনা কেন—ও কি তোমার ভাগ কেড়ে খাবে ? ছেলে মানুষ, কাঁদচে ।

উদর । মর মাগি, ওকে নে গে কি হবে ও কি ফলার কতো শিখেছে ?  
( শিশুর প্রতি ) কেমন রে, ফলার কতো পারবি ?

শিশু । হাঁ আমি পারবো ।

উদর । ভাল, কেমন পারবি বল দেখি, কথানা পাত পাতবি ?

শিশু । আমি একখানা পাত পাতবো ।

উদর । ( সক্রোধে ) এক খানা পাত ? তবে খাবি বা কিসে নিবি বা কিসে বল দেখি ?

শিশু । আমি সব্ খাব ।

উদর । তবেই হলো, আজিও তুই কিছুই শিখলিনে ?

স্বমতি । আঃ, শিকিই কেন দেও না ? তুমি কি পেটে থেকে পড়েই শিকেচ ? ছেলে মানুষ, কি জানে, এত তাড়না কর কেন ।

উদর । আঃ মলো, এ মাগী বলে কি ? ফলার কি কেউ কারু শেখায় ! আমি আপনাতোই শিখিছি, কিন্তু ছেলেটা আমার তেমন হলো না ! হবে কি, তুই যে প্রতিদিন সকালে পাতের তাড়ি, দোত, কলম দে মাজিয়ে গুজিয়ে পাঠাইস্, তাতেই উচ্ছন্ন গেল । কালির আঁক পাড়লে ধার কর্জ হয় জানিস্নে ? আমারও ঐরূপ কিছু দিন হয়েছিল, মা বাপ্ আমাকে গুরু মহাশয়ের কাছে দশ বার দিন প্রায় পাঠায়েছিল, তাতেই আমি নষ্ট হবার উপক্রম হয়েছিলাম, কিন্তু আমার অদৃষ্ট ভাল, সেই মা বাপ্ অমনি অক্কা পেলো, আর আমায় পায় কে । তুই তেমনি এ ছেলেটার

মাথা খেতে বসিছিস্, ওকে নষ্ট করবি ?—যা ইচ্ছে । আমি ওরে  
নে যেতে পারিবো না ।

শিশু । ( সরোদনে ) আমি যাব, আঁ আঁ ।

স্বমতি । ভাল মন্দ সামগ্রী খেতে পার না, নে যাও, খেয়ে আসবে ।

উদর । ভালই খেতে পার না—মন্দ সামগ্রী খেতে পাবে না কেন ? তুই  
মাগি ভারি দুষ্ট, আমার অখ্যাত কচ্চিস্ ।

স্বমতি । তুমি একে নে যাও, আর রন্ধে কাষ নাই ।

উদর । কি আপদ, ওকে নে গে কি হবে ? ও কি খেতে শিখেছে ?  
( শিশুর প্রতি ) কেমন রে, তুই ফলার কতো শিখেছিস্ ?

শিশু । ( চক্ষুর জল মুছিয়া ) হাঁ শিকিচি ।

উদর । আচ্ছা, বল দেখি কেমন শিখেছিস্, ফলারে গে কি খাবি ?

শিশু । বাবা ! আমি পরমায় খাব ।

উদর । দেখলি মাগি, দেখলি ; ও বানর সন্তান—ওর কি বুদ্ধি আছে,  
ফলারে কি পরমায় থাকে ? ( শিশুর প্রতি ) ওরে লুচি, মতিচূর,  
সন্দেশ, দই, এই সকল আছে, এর মধ্যে আগে কি খাবি ?

শিশু । আমি আগে দই খাব ।

উদর । ( শিশুকে চপেটাঘাত পূর্বক ) মরে যা, এমন সন্তান থাকা চেয়ে  
না থাকা ভাল ! আগে দই খেলে কি আর কিছু খেতে পারে ?  
( রোরুতমান শিশুকে অভিমানে ক্রোড়ে লইয়া গৃহে স্বমতির প্রস্থান )

যাক্ উৎপাত গেল, এখন আমি যাই ( পথে গমন ) কৈ  
কাহাকেও যে দেখি না, একলাই যাব ? ( অগ্রে দেখিয়া ) এই যে  
শ্রায়ালঙ্কার মহাশয় আসিতেছেন ।

শ্রায়ালঙ্কারের প্রবেশ ।

শ্রায়া । কে হে তুমি কোথায় যাইতেছ ?

উদর । আমি, মহাশয় ! বের নিমন্ত্রণে যাবেন না ?

শ্রায়া । ( নম্র লইয়া অট্টহাস্তমুখে ) বিবাহ কোথায় হে ? ও পাড়ায়  
একটা বৃষোৎসর্গ ।

উদর । আমি শুনিলাম, বাঁড়ুঘোর বাড়ী নাকি বে ।

শ্রায়া । হাঁ হাঁ, তাই বটে । কুলপালক একটা বৃদ্ধ বর আনিয়াছে । তাহাকে

চারিটা মেয়ে দিবে, তাই বলি বৎসতরী চতুষ্টয় সহিত বৃষোৎসর্গ ।  
তা সে স্থানে গমন করিয়া কি হইবে ? কিছুই না চতুষ্পাঠীর অর্ক  
মুদ্রাও পাওয়া দুষ্কর । কুলীন বরের বিবাহ কি বিবাহ ?  
উদর । আমি কুলীন মৌলিক খুঁজি না, চৌপাড়ীর টাকারও অনুসন্ধান  
করি না ; বুঝিতে পারি, ফলার ভাল হলেই বে ভাল হয় ।  
শ্রীয়া । হাঁ, তাহা তোমার পক্ষে বটে ।

“কন্যা বরয়তে রূপং মাতা বিদ্বং পিতা ক্রতং ।

বান্ধবাঃ কুলমিচ্ছন্তি মিষ্টান্নমিতরে জনাঃ ॥”

অর্থাৎ কন্যা—বরের উত্তম রূপ হইলেই ভাল বিবাহ বোধ করে,  
কন্যার মাতা—যে বরের ঐশ্বর্য আছে তাহাতে কন্যার বিবাহ  
হইলেই কৃতার্থ হয় ; কন্যার পিতা বিদ্বান্কে জামাতা করিতে  
নিতান্তই অভিলাষী থাকে ; এবং কন্যার ভ্রাতা, পিতৃব্য-ভ্রাতা  
প্রভৃতি বান্ধবগণ—বরের কোলীন্দ্ৰ বিবেচনা করে ; অন্যান্য  
ব্যক্তির—উত্তম মিষ্টান্ন পাইলেই অত্যুত্তম বিবাহ বোধ করিয়া  
থাকে । সুতরাং তোমার পক্ষে ফলার হইলেই বিবাহ ভাল হয় ।  
উদর । আজ্ঞা, ঠিক বলেছেন । তবে যাবেন না কি ?  
শ্রীয়া । চল যাওয়া যাক্, যাওয়াটা ভাল ।  
উদর । আনুন মহাশয় ! ( উভয়ের কিঞ্চিদগমন ) ।  
শ্রীয়া । নাহে, ওপথে স্ত্রীলোকে গমনাগমন করিতেছে, এই পথেই যাই ।

(উভয়ের প্রস্থান ।)

# বিধবা বিবাহ নাটক

[ উমেশচন্দ্র মিত্র ]

১ম অঙ্ক

( কীর্ত্তিরাম ঘোষের বাটী )

বিদ্যালতা ও সুখময়ীর প্রবেশ ।\*

বিদ্যালতা । দিদি কেমন আছিন্ গো, অনেক দিন তোকে দেখি নি,  
একবার দেখতে এলেম ।

সুখময়ী । আর ভাই প্রাণে কেবল বেঁচে আছি, দিন রাত একরকমে কেটে  
গেলেই হয় ।

বিদ্যালতা । সে কি বোন্ তোর কিসের দুঃখ, বড়মানুষের বৌ, বড়-  
মানুষের ঝি, ভাল খাস্, ভাল পরিস্, এত শীগ্গির কি বাঁচবার  
সাধ গেল ?

সুখময়ী । ভাল খেলে আর ভাল পলেই কি সুখ হয়, কে না খায়, কে না  
পরে, মনিষি জন্মের সাধ যার কিছুই হলো না তার বাঁচলেই কি  
মলেই কি !

বিদ্যালতা । সে বোন্ যার যেমন অদেষ্টের লেখন, বিধাতাপুরুষ যাকে যেমন  
রেখেছেন সে তেমনি আছে, সুখ দুঃখ তো মনিষির হাত নয় ।

সুখময়ী । যা বলো তা সত্য কিন্তু কি দুঃস্থ কাল পড়েছে দেখ দেখি,  
রক্তমাংসের শরীর তো বটে, আর কত যন্তনা সইবো । শুন্তে  
পাই ছ বচরের বেলা বিধবা হয়েছি, তা ছেলেবেলা খেলায় ধুলোয়  
এক রকমে কেটে গেছে, এখন তো আর তা হয় না । এখন বোন্  
থেকে থেকে মন যে কি করে ওঠে তা বলবার নয় ।

বিদ্যালতা । ভাই কাল আবার দুঃস্থ কি ? কাকে মারেও না, ধরেও না,  
যেমন কালি গেছে তেমনি আজিও যাচ্ছে । কাল কি আবার  
দুঃস্থ হয় আর শান্ত হয়—তোর কথা ভাই বুঝতে পাল্লেম্ না ।

\* সংস্কৃত নাটকাদিতে নানীপাঠ ইত্যাদি যে সকল প্রণালী আছে তাহা বঙ্গভাষায়  
সুপ্রাচ্য হয় না এজন্য পরিত্যাগ করিলাম ।

সুখময়ী। তুই বুঝতে পারবি কেন লো! যার কিছুই অভাব নাই  
সে কি অভাব করে বলে তা জানে? যে দেশে রাৎ নাই, সে  
দেশে কি চাঁদ আছে?

সুখের বসন্ত দেখে ব্যাপিল ভুবন।  
বহিতেছে সুখময় মলয় পবন ॥  
তরুণ নব পত্র করেছে ধারণ।  
কোকিল করিছে দেখে সুখা বরিষণ ॥  
মল্লিকা মালতী আদি পুষ্প প্রস্ফুটিত।  
গন্ধে দেখে চতুর্দিক্ কিবা আমোদিত ॥  
ভ্রমর ভ্রমিছে দেখে ভ্রমরীর সনে।  
তিলার্কি সে নহে স্থির মত্ত মধুপানে ॥  
সুধাকরে সুধা ক্ষরে স্বরে শর হানে।  
বিধবা যে বিরহিণী বাঁচে কিসে প্রাণে ॥  
যে রাখিবে কুলমান সে রহিল কোথা।  
কে বুঝিবে করে কব অন্তরের ব্যথা ॥  
রমণীর শিরোমণি কান্ত যার নাই।  
সে জন বল লো দিবে কাহার দোহাই ॥  
দিন রাত্রি সমভাব ভিন্ন ভাব নাই।  
বসন্ত ছরন্ত কাল বলিলাম তাই ॥

এখন বুঝলি?

বিদ্যলতা। হাঁ হাঁ বুঝেছি, ভাতারের কথা বলতেছিলে, তা ভাই এত  
ঘোর ঘোর করে বলে বুঝবো কেমন করে!

সুখময়ী। তুই বুঝবি কেন।

যার জালা সেই জানে কি জানিবে পরে।  
বধিরে কি ধার ধারে সুমধুর স্বরে ॥

বিদ্যলতা। ভাই এত কে জানে, তুই রাঁড় মানুষ, তোর আবার বসন্তে  
ক্লেশ বোধ হয়, কোকিলের ডাকে মন কেমন করে, ভ্রমরের গান  
শুনতে পারিস্ নে, ফুলের গন্ধ সহিতে পারিস্ নে, তা কেমন করে  
জানবো, তোদের ভাই—কি ও সব হয়?

সুখময়ী। না, আমরা আর মানুষ নই, যেদিন বিধবা হয়েছি সেই দিন



মহুশ্বাস গিয়ে দেবত্ব হয়েছে, আর চাঁটে হাত পা বেরিয়েছে।  
আমাদের কি কিছু বোধ হয়? একেবারে স্পন্দরহিত হয়েছে।  
বিদ্যুৎ। কি করবো বোন্ যেমন শুনেছি, তেমনি বল্লেম। বিধবা  
হলেই ধম্মকন্মে মন হয়, আর কোন দিকে মন যায় না, তোর  
ভাই আর এক রকম তা কেমন করে জানুবো।

সুখময়ী। তা জানুবি কেন, কথায় বলে উড়তে না পেরে পোষ মানে।  
কি করব, যেখানে বল্লে কিছু হবার ঘো নাই, সেখানে না বলাই  
ভাল। মনের কথা যদি সকলে বলে তবে আমি যা বল্লেম এই  
কথা সকলেই বল্বে। তুই ভাই জিজ্ঞাসা করি, তাই কথার  
পিটে কথা পড়ে বলে ফেল্লেম। তুই ভাই এ কথা কাকেও  
বলিস্ নে।

বিদ্যুৎ। না ভাই করে আর বলুবো।

পদ্মাবতী ও তাঁহার তিন বিধবা কণ্ঠ্য প্রবেশ।

পদ্মাবতী। কি গো বিদ্য, অনেক দিনের পর যে, ভাল আছিহ্ তো গো?  
বিদ্য। হাঁ মা ভাল আছি, আসতে পারি নে, ছেলে পিলের ব্যাম, আর  
কেউ ঘরে নাই, কি করে আসুবো। আজ একটু অবকাশ পেয়ে  
একবার দেখতে এলেম্।

পদ্মা। তোদের পাড়ায় কোন গোল শুন্তে পেয়েছিহ্?

বিদ্য। কিসের গোল মা?

পদ্মা। তা শুনিস্‌নি, সে কেমন গো? এদেশে যে আর কোন কথা নাই,  
কেবল সেই কথাই হচ্ছে, তোরা শুন্তে পাস্‌ নি?

বিদ্য। না মা কিছু তো শুনি নি।

পদ্মা। বিধবার বে হবে তোরা তা শুনিস্‌ নি?

বেবতী। ( অঞ্চল ধরিয়া ) কি বলি মা রাঁড়ের বে হবে, কবে মা?

রাইকিশোরী। কি বলি কি বলি মা রাঁড়ের বে, কার আগে হবে মা?

সুলোচনা। ওমা! ওমা! কার সঙ্গে মা, কোথা থেকে, বাপের বাড়ী  
থেকে, না খণ্ডর বাড়ী থেকে?

পদ্মাবতী। তোরা তো বড় উতলা গো, কথার উপর কথা কোন্ বলতে  
দিস্‌ নে, আগে শোন্‌ তারপর যা হয় তা বলিস্‌।

সুলোচনা। কি মা, বল শীগগির করে বল।

পদ্মাবতী। শোন শোন; কালি কস্তাটি বলতেছিলেন যে কে একজন (কিকিৎ ভাবিয়া) দূর হোগ্‌ বেনে নামটা মনে পড়ে না, কিসের সাগর কি একখানা বই ছাপিয়েছে, তাতে লিখেছে যে, যে শাস্ত্রে স্বামীকে মান্য কন্তে বলে, আর যে শাস্ত্রে পতির আজ্ঞা লঙ্ঘন কলে পতিত হয় বলে, সেই শাস্ত্রেই নাকি বিধবার বিয়ের বিধেন আছে। কে জানে মা, রামমোহন রায় নাকি বিধবার বে দেবার জন্তে বিলেতে গিয়েছিলো, তা ধন্য আছেন, সে কন্ম না হতে হতে তাঁর সেখানেই মিত্য হলো, আর তাঁকে ফিরে আসতে হলো না। ওমা এ সাগর আবার কোন্‌ গুণের সাগর গো! দেশভুক্ত না কি এর কথা নিয়ে ভোলপাড় করতেছে। আবার নাকি দুটো দল বেঁধেছে, এক দল বে দেবার দিকে, আর এক দল বে না দেবার দিকে। কে জানে মা, কলি ঘোর হলো আরও কত হবে।

সুলোচনা। ওমা কি বলি দুই দল বেঁধেছে, একদল বে দেবার দিকে, আর এক দল বে না দেবার দিকে? হেঁ মা, তবে বাবা কোন্‌ দলে মা? পদ্মাবতী। সে তো আর তোর মত কেপে উঠে নি, তা সে কোন্‌ দলে জিজ্ঞাসা করতেছি। ভাল মানুষের ঘরে কি কখন বিধবার বে হতে পারে, এ কথা বলতে লজ্জা করে, একি কখন হয়!

সুলোচনা। তা হবে কেন, আমরা কেপেছি বটে। বাবা যেমন পাঁচটার পর তোকে বে করেছেন, আবার তুই যদি আজ মরিস্ তবে কাল্‌ অম্মনি আর একটি হবে। আমাদের বেলাই—(অস্পষ্ট স্বরে)

পদ্মাবতী। (সুলোচনার কথা শেষ না হইতে হইতে) তুই তো বড় বেহায়া মেয়ে রে। কথা কোন্‌ তার আইল নাই, কি বলতে কি বলিস্।

সুলোচনা। হাঁ মা এখনকার কালে সত্যি কথা বলতে গেলেই বেহায়া হয়। কথায় বলে মনের কথা ফুটে বুলেই পাগল, পেটে করে রাখতে পাভেম তবেই ভাল হতেম। বলতে গেলেই কথা জন্মায়।

পদ্মাবতী। থাক থাক আর তোর কথায় কাজ নাই। ভাল সুলোচনা!

যদি সত্যি সত্যি রাঁড়ের বে হয় তুই কি বে কন্তে পারবি?

সুলোচনা। বাবা কি এতে মত করবেন মা, তোকে কি বলেছেন? তাঁর মতই মত।



পদ্মাবতী। এ মেয়েটা কেপেছে গো! বলে কি, এর যে আর দেরি  
সয় না। তোরা একে বুঝিয়ে বলতো মা।

সুলোচনা। আমাকে আর বুঝতে হবে না, আমি সব বুঝি, যেকোন বস্তুন্নায়  
কাল কাটাই শতুরেও যেন এমন করে না থাকে।

পদ্মাবতী। সে কি গো, আমাকে তো এতদিন বলিস্ নি, তোর কি  
ব্যামো হ'য়েছে মা?

সুলোচনা। সে কথা মা কত বলবো।

দিয়াছিলে বিবাহ আমার বাল্যকালে।

কিছু দিন পরে পতি গ্রাসিলেক কালে ॥

একরূপে গেছে কাল ধুলায় খেলায়।

নাহি জানিতাম পতিবিরহের দায় ॥

নাহি জানিতাম পতিসহবাস কিবা।

একরূপে কেটে গেছে নিশি আর দিবা ॥

কাল পেয়ে ক্রমে কাল যৌবন উদয়।

জ্বলিল বিরহানল নিবিবার নয় ॥

রাত্রি দিন জলে সেই প্রবল অনল।

একদিনে হবে বুঝি চিতায় শীতল ॥

লোকে বলে ধর্ম্মে ধর্ম্মে মন দিয়ে থাক।

দোহাই তোমার ধর্ম্ম ধর্ম্ম যদি রাখ ॥

কি করিবে ধর্ম্মে বল ধর্ম্ম নষ্ট হলে।

কি করিবে শুক কাষ্ঠ নির্ঝাণ অনলে ॥

কথায় কি যায় কভু অন্তরের ব্যথা।

বিরহেতে অনুরোধ উপরোধ বৃথা ॥

প্রতিদিন একভাব ভিন্নভাব নাই।

দিবস যেকূলে যায় রজনীও তাই ॥

সহিত শয্যায় নিত্য করি গো শয়ন।

শয্যায় কণ্টক বোধ কণ্ঠাগত প্রাণ ॥

কালী যদি কুল দেন হয় যদি বিয়ে।

সবে মেলি ঘটা করে আসি পূজা দিয়ে ॥

মা শুন্লি আর কত বলবো।

পদ্মাবতী। এই কথা তোর! আমি বলি কত ব্যামই না হয়েছে। কি করবে মা, যার যা অদেষ্টের লেখন, তা কে ধুতে পারে। এখন যাই রান্নাবান্নার কিছু হয় নি।

[ সকলের স্ব স্ব কর্ণে গমন।

( বাটীর বহির্ভাগ )

কীর্তিরাম ঘোষের প্রবেশ।

কীর্তিরাম। ( স্বগত ) আজ কোন কর্মই হলো না, ছেলেগুলোর সঙ্গে মিথ্যা গোল করলেম। বলে কি বিধবার বিবাহ হবে, কি সর্বনাশ! কি আশ্চর্য! অত্যাধি চন্দ্রসূর্য উদয় হচ্ছে, এখন গঙ্গা প্রবলবাহিনী আছেন, এখন ভূমিকম্প হতেছে। হা! ধর্ম কি নাই? এত নীত্রেই কি ভারতভূমি পরিত্যাগ করেছেন? এ কি ভ্রম! আবহমান কাল পর্যন্ত বিধবারা ব্রহ্মচর্যাশ্রম গ্রহণ ও প্রতিপালন করে আসতেছে, এখন কি আবার নূতন নিয়ম হবে। আবার বলে কি বিধবারা কি মানুষ নয়—তাদের কি ইন্দ্রিয় ও রিপুগণের তিলান্নি বিভিন্নতা আছে? কি নির্বোধের কথা! আমাদের পিতা, পিতামহ প্রভৃতি পূর্বপুরুষেরা এই নিয়ম স্বচ্ছন্দে প্রতিপালন করে এসেছেন, এখন কি আমরা তাঁদের অপেক্ষা জ্ঞানী ও বুদ্ধিমান হয়েছি? বিধবারা যদি একাল পর্যন্ত পতিবিরহ সহ্য করতে পেরে থাকে তবে এখনও পারবে।

শ্রামাচরণ মিত্রের ( বন্ধু ) প্রবেশ।

শ্রামাচরণ। কি গো ঘোষণা মহাশয় ভাল আছেন তো, একক বসে কিসের ভাবনা হচ্ছে?

কীর্তিরাম। আস্তে আস্তে হউক মহাশয়। ভাল আছেন, অনেক দিন যে দেখি নাই, বাটীর সমস্ত মঙ্গল?

শ্রামাচরণ। ( অভ্যর্থনা করিয়া ) হাঁ মহাশয়, আপনার মঙ্গলেই মঙ্গল। বড় যে ক্লেশ দেখতেছি, কোন ব্যারাম হয় নাই তো?

কীর্তিরাম। না মহাশয়, শারীরিক কোন ক্লেশ নাই, তবে সংসারযাত্রা নির্বাহ করতে সময়ে সময়ে অনেক ভাবনা উপস্থিত হয়, তাতেই বোধ হয় ক্লেশ দেখতেছেন।

শ্রামাচরণ। সে কথা সত্য, সকল সময় একভাবে যায় না। সংসারে কখন আহ্লাদ, কখন শোক, কখন কোভ। কাল কি একরূপে যায় ? আপনার পুত্রেরা কোথা, এখনও কি স্কুল হতে আসেন নাই ?

কীর্তিরাম। না মহাশয় এখনও আসে নাই। ছেলেগুলো আজি একটা মিছা কথা লয়ে মহা গোল করতেছিল, আমাকে কোন কৰ্ম করতে দেয় নাই।

শ্রামাচরণ। ছেলের গোলে কৰ্ম বন্দ, সে কিরূপ মহাশয় ?

কীর্তিরাম। সে কথা আর কি বলবো, বিধবার বিবাহ লয়ে সর্বত্রই মহা গোলযোগ হতেছে, আজি ছেলেদের সঙ্গে সেই বিষয় তর্ক করতে করতে এমন রাগের উদয় হলো, যে আর কোন কৰ্ম করতে পারলেম না। আপনি বিবেচনা করুন দেখি, বিধবা বিবাহের গ্রাম লজ্জাকর বিষয় আর কি আছে। কন্যা কিছু বড় হলে তাকে পাত্রস্থ করণ কালীন সকলের সম্মুখে আন্তে কত ঘৃণা হয় ! বয়স্থা বিধবার কিরূপে বিবাহ দিবে ! সাগরস্বরূপ হিন্দুশাস্ত্র হতে বিষ্ণুসাগর মহাশয় যে কি বিধি বাহির করেছেন তা বলতে পারি না, একেবারে সকলে নেচে উঠেছে—আর কোন কথা নাই, ঘরে ঘরে কেবল ঐ কথাই শুন্তে পাই।

শ্রামাচরণ। কি বলেন মহাশয়, বিধবা বিবাহের গ্রাম লজ্জাকর বিষয় আর কিছুই নাই ? এ কথা সঙ্গত হলো না, বিধবা বিবাহ লজ্জাকর বলতেছেন, কিন্তু তাহারা পতিবিহনে যে সকল কৰ্ম করে তাহা কি লজ্জাকর নয়, বিবাহটাই লজ্জাকর বিষয় হলো ?

কীর্তিরাম। ওহে ভাই লুক্কে চুরয়ে কোথায় কে কি করে সে সমুদয় দেখতে গেলে কি কৰ্ম চলে ? প্রকাশেই সমুদয় দোষ, গোপনে কে না কি করে, কার ঘরে কি না আছে ? অতএব সে কথা ছেড়ে দেও।

শ্রামাচরণ। তবে আপনার কি এই অভিপ্রায় যে গোপনে জগহত্যা, ব্যভিচার দোষ ইত্যাদি হওয়া ভাল, কিন্তু প্রকাশে শাস্ত্রসম্মত দ্বিতীয় বার বিবাহ হওয়া ভাল নয়।

কীর্তিরাম। দূর হউক ও কথায় আর কাজ নাই। (কিঞ্চিৎ ভাবিয়া) মিত্রজ মহাশয় আবার দেখুন দেখি রাজা কি অবিচার করতেছেন।

শুন্তে পাই ব্যবস্থাপক সমাজে নাকি বিধবা বিবাহের আইন হতেছে—রাজা বলপূর্বক যে কোন কৰ্ম হউক অনায়াসে করিতে পারেন, অতএব হিন্দুধর্ম যে এককালীন লোপ হবে তার আর সন্দেহ নাই।

শ্রামাচরণ। মহাশয়! আপনার নিতান্ত ভ্রম হয়েছে। ব্যবস্থাপক সমাজে বিধবা বিবাহ সম্বন্ধীয় যে আইনের কথা উল্লেখ করলেন, সে আইনের মর্মই আপনি অবগত হন নাই। ঐ আইনের স্থূল মর্ম এই যে, যদি কেহ বিধবা স্ত্রী পুনর্বার বিবাহ করে, তবে সেই পরিণয় দ্বারা উৎপাদিত যে সন্তান, তিনি প্রথম বিবাহের সন্তানের ন্যায় পিতার ধনাধিকারী হবেন। এক্ষণে এই আইনে কাহার কি আপত্তি হতে পারে? রাজা বলপূর্বক কাহারও বিবাহ দিতেছেন না, তবে যিনি ইচ্ছাপূর্বক বিবাহ করবেন তাঁহার জন্যই এই নিয়ম হতেছে।

কীর্তিরাম। তবেই হলো গো তবেই হলো, কথায় বলে তোকে তাড়াব না তোর উঠান চোসবো। একটা উপলক্ষ মাত্র করে বিধবার বিবাহ দেওয়া রাজার চেষ্টা হয়েছে। যা হউক, এতদিনের পর বিদ্যাসাগর মহাশয় সাক্ষাৎ কলি অবতার রূপে ভারতভূমিতে অবতীর্ণ হয়েছেন। দুঃখের বিষয় এই যে আমাদেরকে জীবিত থাকিতে থাকিতে এই সকল গুলো দেখতে হলো। আরও বা অদৃষ্টে কি আছে কে বলতে পারে।

শ্রামাচরণ। আপনার সঙ্গে মিথ্যা মিথ্যা বিতণ্ডা করতে পারি না। আপনি যদি ইচ্ছাপূর্বক না বুঝেন, তবে আপনাকে কে বুঝাবে।

রামদাস বাবাজীর ( বৈষ্ণব ) প্রবেশ।

রামদাস। ( কুঁড়াজালির মধ্যে মালার শব্দ করিতে করিতে ) হরিবোল! হরিবোল! প্রভু তোমার ইচ্ছা! কোথা গো ঘোষজা মহাশয় বাটীতে আছেন?

কীর্তিরাম। কে গো বাবাজী নাকি, আস্তে আস্তে হউক, উপরে আসুন।

রামদাস। হরিবোল! হরিবোল! কৃষ্ণ পার কর! কি গো কি

গুণগোল করতেছিলেন, কোন শাস্ত্রের তর্ক হতেছিল ? ( অতি উচ্চ স্বরে ) কু-ফ-ফ-ফ-ফ ।

কীর্তিরাম । ( বন্ধুকে সম্বোধন করিয়া ) মিত্রজ মহাশয়, আমরা যে বিষয়ের তর্ক করিতেছিলাম, বাবাজীকে সেই বিষয়ের মধ্যস্থ করুন ।

শ্রামাচরণ । বাবাজীদের সব চলে, পাঁচ সিকা খরচ মাত্র, কাড়তে যেমন ছাড়তেও তেমন । বাবাজীদের মত আমাদের নিয়ম হলে ভাবনা কি ছিল । প্রথম স্বামী বর্তমানে স্ত্রীপুরুষে বিবাদ হলে যেখানে নূতন কাড়া হয় সেখানে বিধবার বিবাহ কোন্ বিচিত্র কথা ।

রামদাস । ( রাগান্বিত হইয়া ) হরিবোল ! হরিবোল ! তুই পাষাণ মূর্খ, বৈষ্ণব তন্ত্রের কি ধার ধারিস, মিছা কতকগুলো বকলেই তো হয় না । বেপ্লিকের কথা শুনেছ হে ? এখানে বসাই নয় । ( গাভ্রোখান করিয়া গমনোচ্চোগ )

কীর্তিরাম । বাবাজী বহ্নন বহ্নন, কোথা গমন করেন, ও সব কথায় কান দেন কেন ? এখন একটা কথা জিজ্ঞাসা করি, বিধবা বিবাহের যে উচ্চোগ হচ্ছে তাতে আপনার মত কি ?

রামদাস । আমার মতের কথা যদি জিজ্ঞাসা করলে তবে বলি । “অমৃতং পক্কুশ্মাণ্ডং কুশ্মাণ্ডশূরুণং বিষং” কুশ্মাণ্ডটা পকই ভাল । বিবাহ যদি বলে, তবে কিঞ্চিং বয়স্হা নারীটাই উত্তম নিতান্ত বালিকাটা ভাল নয়, অতএব বয়স্হা নিতান্ত ঘৃণার পাত্রী নহে । ( ক্ষণেক ভাবিয়া ) যদি বল লোকাচার—তা সকল কর্ম চালালেই চলে । আমাদের মত যদি সর্বত্রই চলে, তবে কি এ কর্মে কোন গোল হয় ? সে যা হউক, এখন যেমন চলছে তেমনি চলুক, দেখ না কোথাকার জল কোথায় মরে ।

কীর্তিরাম । সে কথা নয়, বিধবা বিবাহের পক্ষে যে দল হয়েছে, তাতে আমাকে থাকতে বল ?

রামদাস । কৃষ্ণ ! তোমার ইচ্ছা ! কেন গো ঘোষজা, তোমার বৈবাহিক কোন্ দলে ? তিনি তো সন্ধিবেচক বটেন, তাঁহার মতে মত দেও না কেন, আর অন্যের মতে আবশ্যক কি ?

কীর্তিরাম । তাঁর কথা কেন জিজ্ঞাসা করছেন, তাঁর বুড়ো বয়সে ধেড়ে রোগ হয়েছে, তিনি বিধবা বিবাহের পক্ষে একজন প্রধান গৌড়া ।



রামদাস। রাধে! রাধে! কি বল্লো গোঁড়া? হা! তিনি তবে যে মহাত্মা, প্রাতঃস্মরণীয় ব্যক্তি—তঁাহার তুল্য আর কে আছে—  
তঁার যে মত আমারও সেই মত।

কীর্তিরাম। বাবাজী সে গোঁড়া নয়, বিধবার বিবাহে তঁার অত্যন্ত উৎসাহ,  
এইজন্য তঁাকে তৎপক্ষে গোঁড়া বলতেছিলাম।

রামদাস। হরি হরি! তাই ভেঙ্গে বল, আমি আর একখানা বুঝেছিলাম,  
সে যা হউক, এখন কোন দিকেই থাকা নয়, দেখ না কি হতে  
কি হয়, শেষে যে দিকে জল পড়বে সেই দিকেই ছাতি ধরবে।

কীর্তিরাম। ( স্বগত ) বাবাজী গোঁড়ার নাম শুনেই অস্থির হয়েছিলেন,  
শেষটা মীমাংসা করুলেন ভাল ( প্রকাশে ) বাবাজী বেলাটা  
অধিক হয়েছে আহার করে আসি।

রামদাস। আমরাও এক্ষণে বিদায় হই।

[ সকলের প্রস্থান। ]

( অন্তঃপুর। )

কীর্তিরাম ঘোষের প্রবেশ, পদ্মাবতী উপস্থিত।

কীর্তিরাম। কিগো সকলে কোথা—আমার অন্ন প্রস্তুত হয়েছে? বেলাটা  
অনেক হয়েছে।

পদ্মাবতী। এই যে সব হয়েছে, আমার কি এক কন্ম, বৌগুলি মেয়েগুলি  
সব সমান—যে কন্ম না দেখি সেই কন্মই হয় না—মলেই বাঁচি,  
আর পারি নে।

কীর্তিরাম। কেন গো তোমার কিসের অভাব, সোনার ঘরকন্মা, কি না  
আছে। ( আহারারম্ভ করিয়া ) কৈ গো রেবতী কোথা, রাই-  
কিশোরী কোথা, স্থলোচনা কোথা, তোরা সব কি করিস্ গো,  
বুড়ো মাগির ঘাড়েই কি সব ভার দিতে হয়?

পদ্মাবতী। তোরা সব রজ নিয়ে আছে, তোমার কথা তাই শোন্বার জন্তে  
বসে রয়েছে। কথায় কথায় বিধবা বিয়ের কথা বলেছিলাম, তা  
একেবারে নেচে উঠলো। বয়েস কালে কেবল কি রজ নিয়েই  
থাকতে হয়?

কীর্তিরাম। সে কি গো! মেয়েমানুষের ও সব কথা কি, তাদের এ  
কথা কে বল্লো?

পদ্মাবতী । কেন তুমি আমাকে সে দিন বলেছিলে, তাই কথায় কথায় সেই কথা বলেছিলেন, তা বলে না পেতায় বাবে একেবারে সব নেচে উঠলো । তুমি যদি তাদের রকম দেখতে তো অবাক হতে । ওঁরা এক এক জন এক ধনুধর ।

কীর্তিরাম । ( স্বগত ) কি আশ্চর্য্য ! ইহারা কুলবালা, কাকেও কোন কথা বলে না, ইহারাও নির্লজ্জ হয়ে এই কর্ণে উৎসাহ প্রকাশ করেছে, বোধ করি ইহাদিগের মনে মনে সম্পূর্ণ ইচ্ছা আছে, নতুবা একথা ব্যক্ত করবে কেন ? হা ! কালের কি বিচিত্র গতি ( প্রকাশ্যে ) ওগো মেয়েরা এদিকে আয় দেখি ?

কন্যাগণের প্রবেশ ।

সুলোচনা । কেন বাবা কি জন্তে ডাকচো, এই যে আমরা এসেছি ।

কীর্তিরাম । তোরা কেমন মেয়ে গা, মায়ের উপর—

পদ্মাবতী । বুড়ো হলে কি বাওন্তুরে হয়, কি বলতে কি বল ।

কীর্তিরাম । তাই বলতেছিলাম, ওটা কথার ফের । হে গা মেয়েরা, গিন্নির উপর কি সব ভার দিতে হয়, ও আর কতদিন বাঁচবে, তোরা করবি নে তো কে করবে ?

সুলোচনা ।  
রেবতী  
রাইকিশোরী

} ( একত্রে ) আমরা করি নে তো কে করে ? গিন্নির জন্তে বুঝি ওপাড়ার মানুষে কায করে যায় ? উনি কেবল লাগাতে আছেন বৈ তো নয় ।

পদ্মাবতী । শুনলে ওদের কথার শ্রী, ওদের কথায় আঁটে কে, ওরা কি সব সামান্যি মেয়ে । একবার সে কথাটা জিজ্ঞাসা কর দেখি ।

কীর্তিরাম । হেঁ গা তোরা মা—রাম—রাম—এক যাই ভুলে যাই—  
গিন্নির সঙ্গে তোরা বিধবার বিয়ের কথা কি বলতেছিলি ?

সুলোচনা । সে কি গো ! আমরা কি বলবো ( উচ্চৈঃস্বরে হাসিতে হাসিতে দ্রুতগমনে কন্যাগণের প্রস্থান )

পদ্মাবতী । দেখলে ওদের রকম, ওরা কোন্‌দিন কি করে বসে দেখ না ।

কীর্তিরাম । মেয়েগুলো বড় বেহায়া হয়েছে বটে, একদিন ভাল করে শিখাব, আজ বারবেলাটা কিছু বলবো না ।

[ কীর্তিরাম ঘোষের প্রস্থান ।

# বোধেন্দু বিকাশ

[ ঈশ্বরচন্দ্র গুপ্ত ]

## দ্বিতীয় অঙ্ক

বিবেক মহারাজের এতদ্রূপ যুদ্ধের অস্থিষ্ঠান এবং সূচনা প্রবণ পূর্বক  
মহারাজ মহামোহ দেশ কাল পাত্র-বিচার করত স্বপক্ষরক্ষণ এবং বিপক্ষ  
বিনাশন নিমিত্ত দস্তাদিকে কার্যে উদ্যুক্ত করিলেন ।

দস্ত ।

গীত ।

রাগিণী ধাড়া । তাল একতাল ।

আমার তুলনা কি হয় । আমি অতুল্য অজয়

তমোগুণে তমোরূপী, মম সম নয় ॥

সর্বোপরি করি গর্ব, ইন্দ্র, চন্দ্র, অতি থর্ব,

তুচ্ছ বিধি, হরি শর্ব, আমি সর্বময় ॥

আমার সহিত তুলে, তুলনা করিল তুলে,

লঘু হোয়ে রবি, শশী, গগনেতে রয় ॥

অরে ও মূঢ় লোক সকল ! তোরা সকলে আমার চরণতলে  
প্রণত হ । আমি ত্রৈলোক্য জয় করিয়াছি, আমি সর্বশ্রেষ্ঠ । আমার  
তুল্য মহাপুরুষ আর কেহই নাই, আমার পদধূলি যে ব্যক্তি ভক্তি  
পূর্বক মস্তকে ধারণ করিবে, সেই ব্যক্তি পবিত্র হইবে ।

সাক্ষাৎ জগীশ্বর মহারাজ মহামোহ এই মাত্র আমাকে আজ্ঞা করিলেন,  
'হে প্রাণাধিক দস্ত ! বাপু, তোমার কুশল হোক, কুশল হোক ।  
হিতাহিত বিবেচনা বিহীন দুর্ভাগ্য বিবেক আমারদিগের কুলনাশের  
নিমিত্ত অমাত্যের সহিত স্থিরপ্রতিজ্ঞ হইয়া প্রবোধচন্দ্রের উদয়ের জন্ত  
সমুদয় তীর্থধামে শম দম প্রভৃতিকে প্রেরণ করিয়াছে । অতএব তুমি  
এই দণ্ডেই কামাদি সেনাপতি এবং আর আর মহাবল যোদ্ধাদিগের  
সহিত সংযুক্ত হইয়া বারাণসী, বৃন্দাবন, কুরুক্ষেত্র, হরিদ্বার, অযোধ্যা,  
ত্রীক্ষেত্র, কামাখ্যা, চন্দ্রনাথ, এবং সেতুবন্ধরামেশ্বর প্রভৃতি সকল তীর্থে



গমন ও ভ্রমণ পূর্বক শত্রুদিগে সংহার কর। ব্রহ্মচারী, গৃহী, বাণপ্রস্থ  
এবং যতি, এই চতুর্বিধ আশ্রমি-গণের আশ্রমে ধর্মকর্মাদির বিপ্লব কর।  
শীঘ্রই গিয়া ধর্মের ও তৎসংক্রান্ত কর্মের মর্মে বিষমতর বেদনা প্রদান  
কর, তোমার গাত্রের চর্মের ঘর্মে যেন ধর্মের দল ভূণের স্থায় ডাসিয়া  
যায়।' আমি সেই আজ্ঞা শিরোধার্য্য করিয়া সংপ্রতি কাশী-বাসী হইয়া  
এখানকার সমস্ত লোককে অধীন করিয়াছি, তাবতেই আমার বশ  
হইয়াছে।

চপলাগতিচ্ছন্দ।

কাঁহা শম, কাঁহা দম,  
পাখ্‌ড়া, পাখ্‌ড়া, পাখ্‌ড়া।  
ওন্‌কো, পাখ্‌ড়া, পাখ্‌ড়া পাখ্‌ড়া ॥  
নৈ ছোড়েগা, হাড় তোড়েগা,  
হাম্‌ বড়া হায় বাঁক্‌ড়া।  
বাবা হাম্‌ বড়া হায়, বাঁক্‌ড়া ॥  
আবি যাকে, মারো তাকে,  
টোঁড়্‌ টোঁড়্‌ কে, আখ্‌ড়া।  
বাবা, টোঁড়্‌ টোঁড়্‌ কে আখ্‌ড়া ॥  
কাঁহা যাগা, কাঁহা ভাগা,  
মারা যাগা, মাক্‌ড়া।  
বাবা, মারা যাগা মাক্‌ড়া ॥

অশ্রুদিকে মুখ করিয়া।

মালিনীচ্ছন্দ।

কোথা সে বিবেক বুড়ো, কোথা গেল বোক্‌ড়া,  
কোথা গেল মতি রাঁড়ী, কাকে কোরে ধোক্‌ড়া,  
আমারে দেখিলে তারা, ভয়ে হবে কৌক্‌ড়া,  
কারাগারে ভোরে শেষে, খেতে দেব ওক্‌ড়া ॥

আর একদিগে চাহিয়া।

বাণ, মার, আশীর্ব্বাদে, আমি কিরে হার্ব ?  
স্বর্গ, মর্ত্য, নখে তুলে, ফেলে দিতে পার্ব ॥

শত্রু দলে ধর্য বলে, একে একে সার্ব ।  
মার্ক মার্ক, মার্ক প্রাণে, একেবারে মার্ক ॥

কার হেন সাধ্য আছে, আমার কি কর্বে ?  
মাথার উপরে কেটা, দুটো মাথা ধর্বে ?  
আমাদের অধিকার, শক্তি কার হর্বে ।  
আপনার দোষে তারা, আপনারা মর্বে ॥  
চিরকাল সমভাবে, ঘেঁষ জ্বরে জ্বর্বে ।  
নিয়ত মনের দুখে, চোখে জল ঝর্বে ॥  
মায়াক্ষেত্র ছেড়ে তারা, কোথা গিয়ে চর্বে ।  
চারিদিকে ছাঁকাজাল, কোন্ দিকে তর্বে ॥  
চোর সম বন্দি হোয়ে, পায়ে বেড়ী পর্বে ।  
পড়েছে ষমের হাতে, কেমনেতে সর্বে ? ॥

আবার অপরদিকে চাহিয়া ।

আয় রোদ্দ হেনে, ছাগ দেব মেনে, ছন্দ ।

এই হাত ছাড়্বে । গোঁপ বুক্ চাড়্বে ॥  
মৃত্যুবাড়্ বাড়্বে । ধৈয়ে কৌক্ ভাঁড়্বে ॥  
ফণি ফণা নাড়্বে । কোথা ষাবে আড়্বে ॥  
ধরাতলে পাড়্বে । কাটফাঁড়া ফাঁড়্বে ॥  
কোসে কোসে কাঁড়্বে । একগাড়ে গাড়্বে ॥  
বুকে পিটে দাঁড়্বে । দুই পায়ে মাড়্বে ॥  
দেশ থেকে তাড়্বে । দেব ভূত ঝাড়্বে ॥  
কোপ তোপ ছুঁড়্বে । গুলি গোলা জুড়্বে ॥  
ত্রিভুবন ফুঁড়্বে । ধূমে দিক্ মুড়্বে ॥  
ধর্মকর্ম পুড়্বে । ধূলো হোয়ে উড়্বে ॥  
মাথা মুড়্ খুঁড়্বে । বিপক্ষে তুড়্বে ॥  
ঝাড়ে ঝোড়ে ঝড়্বে । হাড়ে হাড়ে থড়্বে ॥

তিস্তাধিনা পাকালোনা ছন্দ ।

নোড়্ বনা তো, লোড়্ বো স্মখে ।

পোড়্ বো ক্কে, চোড়্ বো বুক্ ॥

শত্রু যদি, আসে বুঁকে ।  
 খাবুড়া কোলে, মার্ক বুকে ॥  
 জোম্কে আমি, বোসুবো যবে ।  
 চোম্কে যাবে, দেবতা সবে ॥  
 ধোম্কে দেব, উচ্চ রবে ।  
 সূর্য্য, শশী, ধোম্কে রবে ॥  
 তুচ্ছ লোকে উচ্চ ছলে ।  
 পুচ্ছ ধরে, কুচ্ছ ছলে ॥  
 রক্ত দেখে, অঙ্গ জলে ।  
 দণ্ড দেব, ভণ্ড দলে ॥  
 মেলবো আখি, ভজি ঠেঁরে ।  
 ঠেলবো পায়ে, মেরে মেরে ॥  
 খেলবো খেলা, শত্রু ঘেরে ।  
 হেলবো নাতো, ফেলবো সেরে ॥

পুনর্ব্বার আর একদিকে মুখ করিয়া ।

চৌপদীচ্ছন্দ ।

বিবেকের দল ধারা, স্মৃথে আনুক তারা,  
 এখনি করিব সারা, বুকে মেরে সোড়্কে ।  
 কারে আমি লক্ষ্য করি, কার তরে অস্ত্র ধরি,  
 কেঁপে যাবে থরহরি, কোলে নিলে কোড়্কে  
 প্রকাশ করিলে বল, ধরা যায় রসাতল,  
 তখুনিই টলমল, গিরি পড়ে হোড়্কে ।  
 দেখিলে আমার ভূর, স্তব্ধ হয় তিন-পুর,  
 যক্ষ, রক্ষ, সুরাসুর, ভয়ে যায় ভোড়্কে ॥  
 কোথা মাগী, বিফুভক্তি, আমার স্বভাব শক্তি,  
 হেরে তার হরিভক্তি, উড়ে যাবে ফোড়্কে ।  
 আছে ধর্ম্ম কোন দেশে, মারা-যাবে অবশেষে,  
 এখনি দাঁড়াকু এসে, দাঁতে কোরে খোড়্কে ।

আহা কি আহ্লাদ ! কি আহ্লাদ ! আমি কৃতকার্য হইয়াছি, সকল প্রকার লোকেরাই আমার অভিমত ব্রতে ব্রতী হইয়াছে, কর্মচারী ব্রহ্মচারী প্রভৃতি ধর্মচারী জনেরা ছলনা দ্বারা নিরন্তর কেবল ব্রহ্মাণ্ডকে বধনা করিতেছে, তাবতেরি “মুখে একখানা পেটে একখানা” কপটতা করিয়া লোকের নিকট কহে, “আমি ব্রহ্মজ্ঞানী আমি অগ্নিহোত্রী আমি তপস্বী”। কিন্তু মনে মনে কিছুই করে না। আমিই ব্রহ্ম, আমার পাপ কোথা ? আমি স্বেচ্ছাচারী হইয়া যাহা স্বেচ্ছা তাহাই করিব এই বলিয়া ব্রহ্মজ্ঞানিরা রমণীদিগে সাক্ষাৎ ব্রহ্ম তৎ স্বথ-সম্ভোগকে পরম ব্রহ্মচর্য্য এবং বারবধু মুখমধু পানের আনন্দকে সাক্ষাৎ ব্রহ্মানন্দ জ্ঞান করিতেছে। অগ্নিহোত্রীদিগের হৃদয়ে প্রতিক্রমেই কেবল মদনাগ্নি প্রজ্জ্বলিত হইতেছে, এবং তপস্বিরা তপস্তা না করিতে করিতেই আগ্নে-ভাগে এই বর মাগিতেছে, যে, আমি যেন শীঘ্রই ইন্দ্রের ইন্দ্রত্ব লইয়া শচী প্রভৃতি স্বর্গবিজ্ঞাধরীগণের রতিরস সম্ভোগ করিতে পারি, ইত্যাদি।

[ দূর হইতে অহঙ্কারকে দৃষ্টি করিয়া বিতর্ক । ]

গজার ওপার হোতে এপারে ঐ কে আসছে ? গায়ে যেন রবি ছবি ভাস্ ভাস্ছে। সকলকে তুচ্ছজ্ঞানে উচ্চরবে ভাষ্ ভাষ্ছে ? বাহ নেড়ে ধরা যেন শাস্ছে ? ঐ-যে-দেখি ভণ্ডদের ভণ্ডামি সব্ নাশ্ছে ? নৈলে কেন নিজভাবে উপহাসে হাস্ হাস্ছে ? হাদে, ঐ কে আসছে ? কে আসছে ? বোধ হয়, ইনি দক্ষিণরাঢ়দেশ হইতে আগমন করিতেছেন। ইহারি নিকট আমার পিতামহ অহঙ্কারের সংবাদটা পাওয়া যাইতে পারে।

[ পূজার আসনে উপবেশন পূর্বক নাকে হাত । ]

—০—

অহঙ্কার ।

[ সভা প্রবেশ পূর্বক নিজ গরিমা । ]

গীত ।

রাগিনী বেহাগ । তাল আড়া ।

আমি সহজ-ত নয় । জীবের সহজতনয় ॥

সৃষ্টি, স্থিতি, লয়, আমার প্রভাবেতে হয় ।

সবার প্রধান আমি, কুলীন-কুলের স্বামী,  
কে আছে, কাহার কাছে, দিব পরিচয় ? ॥

আমার যে কত মান, নাহি তার পরিমাণ,  
অভিमानে অহুমান, ত্রিয়মাণ হয় ।

কে বুঝিবে কলিতার্থ, মম অর্থ পরমার্থ,  
অপদার্থ অযথার্থ, হেরি সমুদয় ॥

মায়াময় এ সংসারে, দয়া নাহি করি যারে,  
সেই জীব একেবারে, মাটি হোয়ে রয় ।

কথা নাহি স্বরে মুখে, নিয়ত মনের দুখে,  
বঞ্চিত সঞ্চিত-সুখে, থাকিতে বিষয় ॥

বিধি, হরি, হর, কেবা, আর যত দেবী-দেবা,  
না কোরে আমার সেবা, স্থির কেবা রয় ? ।

জলচর, স্থলচর, ভূচর, পবনচর,  
যত সব চরাচর, আমা ছাড়া নয় ॥

আমার চেতনে ভাই, অচেতন কেহ নাই,  
সচেতন সব ঠাই, দেখ বিশ্বময় ।

প্রভাহীন হোলে আমি, কাম নাহি হয় কামী,  
তবে আর, আমি আমি, মুখে কেবা কয় ? ॥

না থাকিলে অহঙ্কার, তবে বল অহং কার,  
সহজে, প্রবৃত্তি, পায়, নিবৃত্তিতে লয় ।

প্রকৃতি প্রধানা স্থল, জগতের আমি মূল,  
আমা হোতে যত কুল, হতেছে উদয় ॥

করি ক্রম, পরিক্রম, ক্রমে আমি করি ক্রম,  
এ ক্রমের ব্যতিক্রম, কখনো কি হয় ? ।

করিয়া কারণ-বৃষ্টি, প্রত্যক্ষ করাই দৃষ্টি,  
মূঢ়-জনে এই সৃষ্টি, মিছে তবু কয় ? ॥

বস্তুতা ।

[ সত্যগণের প্রতি । ]

লঘুত্রিপদী ।

রূপে, গুণে, মানে,                      ধন-পরিমাণে,  
আমার সমান কেবা ? ।

দেখ শত শত,                      দাস দাসী কত,  
সতত করিছে সেবা ॥

দারা, স্ত্রুত, ভাই,                      হুহিতা জামাই,  
পরিবার দেখ যত ।

জ্ঞাতিগণ যারা,                      অহুগত তারা,  
কুলীন কুটুম্ব কত ॥

টাকা দিয়া পালি,                      কত দিই গালি,  
কখনো করে না রাগ ।

মুখের ধমকে,                      সকলে চমকে,  
কেঁচো হোয়ে থাকে নাগ ॥

জনক আমার,                      গুণের আধার,  
ভূষিত-ভুবনধাম ।

কেমন স্কন্ধুতি,                      আমি হোয়ে কৃতী,  
ঢেকেছি তাঁহার নাম ॥

কুলের প্রতাপে,                      ছোট করি বাপে,  
বড় হই অহুরাগে ।

কুটুম্ব-ভোজনে,                      বসিলে দুজনে,  
ভাত পাই আমি আগে ॥

গৃহের গৃহিণী,                      আমার জননী,  
ইাড়ি নাহি ছুঁতে পারে ।

দারা তার চেয়ে,                      কুলীনের মেয়ে,  
ভাত বেড়ে দেয় তারে ॥

কত বলে বলী,                      কত ছলে ছলি,  
কত কলে আনি চাকি ।



মনে যদি করি, স্বর্গবিজ্ঞাধরী,  
 এইখানে আনি বোসে ।  
 যতপি পাছাড়ি, গগনে আছাড়ি,  
 রবি, শনী পড়ে খোসে ॥  
 কোথা স্বররাজ, কোথা তার বাজ,  
 গোঁপে যদি দিই চাড়া ? ।  
 সহিত অমর, করি জোড়-কর,  
 এখনি হইবে খাড়া ॥  
 অসাধ্য আমার, কিছু নাই আর,  
 সকলি করিতে পারি ।  
 থেকে এই পুরে, খাই সাধ পুরে,  
 ক্ষীরোদসাগর-বারি ॥  
 দেবতার স্থল, দিই রসাতল,  
 ধরা জ্ঞান করি শরা ।  
 দেখো দিয়ে কর, আমার উদর,  
 চারি পোয়া, গুণে ভরা ॥  
 গুণ আছে জাই, প্রকাশিয়া তাই,  
 হয়েছি প্রধান ধনী ।  
 সকলেই কয়, সব দিকে জয়,  
 সদা জয় জয় ধ্বনি ॥  
 এই দেখ নাম এই দেখ থাম,  
 এই দেখ বালাথানা ।  
 এই দেখ পাখা, মথ্মলে ঢাকা,  
 কারিগুরি তায় নানা ॥  
 এই দেখ বাড়ী, এই বাড়াবাড়ি,  
 এই দেখ গাড়ী ঘোড়া ।  
 এই দেখ সাজ, এই দেখ কাজ,  
 এই দেখ জামা জোড়া ॥  
 এই দেখ ছাতি, এই দেখ হাতী,  
 এই দেখ সপ্ মোড়া ।



এই দেখ জন,                      এই দেখ ধন,  
সব আছে ঘরজোড়া ॥

কেমন পুকুর,                      কেমন কুকুর,  
কেমন হাতের কোড়া ।

কেমন এ ঘড়ি,                      কেমন এ ছড়ি,  
কেমন ফুলের তোড়া ॥

দেখনা কেমন, চিকন-বসন,  
পেয়েছি আমিই সবে ।

মনের মতন,                      এমন রতন,  
আর কি কাহারো হবে ? ॥

সবে আঁখি পাড়ে,                      আমার এ ঝাড়ে,  
দোষ দিতে পারে কেঁটা ।

আলো দেখে ঝাড়ে,                      কটু যদি ঝাড়ে,  
ঝাড়ের কলক সেটা ॥

— • —

[ তীর্থবাসি সৰ্বসাধাৰণেৰে প্ৰতি । ]

আমোদিনীচন্দ ।

আমায়, ছুঁ স্নে, কেউ ছুঁ স্নে, কেউ ছুঁ স্নে রে  
সরু সরু সরু সরু । তোরা, সরু সরু সরু সরু ॥


<https://creativecommons.org/licenses/by-sa/4.0/>

যত সব দুৰাচাৰ, কৰিতেছে অনাচাৰ,  
অতিশয় কদাচাৰ, কেহ নহে নৱ ।

ভূত, প্রেত, সমুদয়, মানুষ কাহারে কয়,  
কাঙ্ক্ষেতে মানুষ নয়, মিছে কলেবর ॥

কাৱে কৰি সন্তোষন, অপবিত্ৰ সৰ্বজন,  
ঘোৱপাপি, অভাজন, নৱকৈৱ চৰ ।

ঘুণা হয় গাত্র-বাসে, উকি উঠে, বমি আসে,  
বাতাসে ছুটেছে গন্ধ, ভয় ভয় ভয় ভয় ॥

পচা, ভব্ ভব্ ভব্ ভব্ ॥

আমায়্ ছুঁ'স্নে, কেউ ছুঁ'স্নে, কেউ ছুঁ'স্নে রে  
সরু সরু সরু সরু । তোরা, সরু সরু সরু সরু ॥

—০—

[ অপরদিগে মুখ করিয়া । ]

জুটিয়াছে হট্ট যত, খট্ট মট্ট বকে কত,  
নাহি জানে ভট্ট-মত, শাস্ত্র স্খ্যাকর ।  
বৃহস্পতি কৃত আহা !, মধ্যম-আগম যাহা,  
কেহ কি করেনি তাহা, চক্ষের গোচর ? ॥  
মীমাংসা শাস্ত্রের সার, অধিকার তাহে কার,  
সামুদ্রিক, আর আর, মত-স্থিরতর ।  
প্রভাকর-মত যত, কেহ নোস্ অবগত,  
দূর দূর দূর, দূর পশু, মরু মরু মরু মরু ॥  
তোরা, মরু মরু মরু মরু ॥

আমায়্ ছুঁ'স্নে, কেউ ছুঁ'স্নে কেউ ছুঁ'স্নে রে  
সরু সরু সরু সরু । তোরা, সরু সরু সরু সরু ॥

—০—

আবার অন্ত্র দিগে মুখ করিয়া বিকট ভঙ্গিতে ।  
যে দিগেতে ফিরে চাই, নরপশু দেখি ভাই,  
কারো কিছু বিজ্ঞা নাই, পেটের ভিতর ।  
কারু কাছে করি খেদ, নাহি ছেদ, নাহি ভেদ,  
ঘাটিয়া অলীক বেদ, ব্যস্ত পরম্পর ॥  
যত ধূর্ত পাপভাগি, উদরের অনুরাগি,  
কেবল ধনের লাগি, ব্যাকুল-অন্তর ।  
বিফল বেদান্ত পোড়ে মিছেমিছি মত গোড়ে,  
ঘুরিতেছে নোড়ে চোড়ে, ফরু ফরু ফরু ফরু ॥  
মুখে, ফরু ফরু ফরু ফরু ॥

আমায়্ ছুঁ'স্নে, কেউ ছুঁ'স্নে, কেউ ছুঁ'স্নে রে  
সরু সরু সরু সরু । তোরা, সরু সরু সরু সরু ॥

—০—

অশ্রু দিগে মুখ করিয়া পুনর্বীর হাশ্রু পূর্বক  
 হাদে এটা, ব্রহ্মচারী, করেছে আসর জারি,  
 শঠতা শিখেছে ভারি, বিষম্ বর্বর ।  
 কেরে ষণ্ড, এ পাষণ্ড ? অতি গণ্ড, অতি ভণ্ড,  
 শাস্ত্র করে লণ্ড ভণ্ড, হোয়ে দণ্ডধর ॥  
 এটা কেটা, জ্ঞান-চাসা, বিড়্ বিড়্ মুখে ভাষা,  
 আঙুলেতে যুক্ত-নাসা, হাঁসা-দিগম্বর ।  
 উর্দ্ধদিগে বাহনেড়ে, চৈচাতেছে ডাকছেড়ে,  
 হাদে ধেড়ে, কেরে দেড়ে, তেড়ে গিয়ে ধর ? ।  
 ওরে, ধরু ধরু ধরু ধরু ॥  
 আমায়্ ছুঁস্নে, কেউ ছুঁস্নে, কেউ ছুঁস্নে রে  
 সরু সরু সরু সরু । তোরা, সরু সরু সরু সরু ।

—০—

অশ্রু দিগে মুখ করিয়া উপহাস পূর্বক  
 হাদে পোড়া, কেরে গোঁড়া ? তীলোক কপালজোড়া,  
 নিয়ে যত হুড়ীনোড়া, ভরিয়াছে ঘর ।  
 ধর্মশীল যেন বক্, মালা করি ঠক্ ঠক্,  
 ঠকাতেছে যত ঠক্, বোলে হরি হর ॥  
 কেন করি দরশন ?, এখানেতে যত-জন,  
 নরকের নিকেতন, পাপের আকর ।  
 কপট কুহকী খল, কেমন্ করিয়া ছল,  
 ফেলিছে নয়ন জল, দরু দরু দরু দরু ।

ফেলে, দরু দরু দরু দরু ॥  
 আমায়্ ছুঁস্নে, কেউ ছুঁস্নে, কেউ ছুঁস্নে রে  
 সরু সরু সরু সরু, তোরা, সরু সরু সরু সরু ॥

—০—

[ কণকাল পরে অজ্ঞাত-দণ্ডের আশ্রম দর্শন করিয়া বিতর্ক । ]

উত্তরবাহিনী-গঙ্গাতীরে ঐ কোন্ ব্যক্তির আশ্রম দৃষ্ট হইতেছে ?  
 স্বদৃশ উচ্চ বংশদণ্ডের উপর সূচিকন নির্মল ধবল বস্ত্র সকল উড়িতেছে ।

আহা! কি মনোহর উপবন! আশ্রমকে বেষ্টন করিয়া বিচিত্র শোভা বিস্তার করিতেছে। প্রফুল্ল-ফুলের সুসৌরভ মৃদু-মন্দ মলয়ানিলে সঞ্চালিত হইয়া ব্রহ্মরন্ধ্র পর্য্যন্ত আমোদিত করিতেছে। ঐ, যে, দেখি, সুখের সামগ্রী সকলি রহিয়াছে। এ স্থান পবিত্র বটে, দুই তিন দিন এখানে বাস করিলেও করা যাইতে পারে।

[ পরে আশ্রমের ভিতরে প্রবেশ পূর্বক বকুল-বৃক্ষের ছায়ায় দণ্ডায়মান হইয়া বাম কাটিতে বাম-হস্ত রাখিয়া দক্ষিণ-হস্তের দুটি অঙ্গুলিতে গোঁপ বিস্তার করিতে করিতে চিন্তা। ]

হাঁ ঐ যুবা-পুরুষটি, যে সাক্ষাৎ দন্তের ন্যায় মূর্তিমান, বিলক্ষণ সুলক্ষণ-যুক্ত সুপুরুষ বটে। শরীরে সুচিহ্ন সকলি দেখিতেছি, ব্রহ্মাচুষ্ঠানেবো ক্রটি নাই, পায়ে পায়ে আস্তে আস্তে নিকটে যাই।

[ পরে কিঞ্চিৎ নিকটে গিয়া ঈষৎ হাসিয়া জিজ্ঞাসা। ]

কেমন তোমার মঙ্গলতো?

দন্ত।

নাসিকা হইতে অঙ্গুলি চালিয়া ভঙ্গিমা-দ্বারা হুঁকার শব্দে নিবারণ।

হুঁ হুঁ হুঁ-ও দিগে।

দন্তের ভৃত্য।

ভিতরে কেন? ভিতরে কেন? বাহিরে যাও, বাহিরে যাও। তোমার সকল শরীরে ময়লা, ঐ ধূলো। স্নান করনি, পা ধোওনি, আমার প্রভুর এ পবিত্র আশ্রম। এখানে কি এমন কোরে আস্তে আছে? তোমার গায়ের ঘাম যদি উড়ে প্রভুর গায়ে লাগে তবে তিনি কোপদৃষ্টে চাইলে পরেই তুমি এখনি পুড়ে ভস্ম হবে।

অহঙ্কার।

কি, এত আশ্পর্ক? এত অভিমান? এত সাহস? আমি ভস্ম হব? আমি অপবিত্র? কি? ওরে, এটা কি স্নেহের দেশ? এরা অতি ব্যলীক, অধার্মিক, আমি বিশ্বপূজ্য, সর্ব-শাস্ত্রজ্ঞ, মহাকুলীন চূড়ামনি, আমার আগমন, আমার পদার্পণ যাহা ব্রহ্মা, বিষ্ণু, ভাগ্য বোলে স্বীকার করে।—এরা কি নরাধম; কি মহাপাপি; নিতান্তই

ভাগ্যের দোষ, আমার চরণ-পূজা না কোরে দস্ত করে ? অমাগ্ন করে ?  
আমাকে বলে বাহিরে যা।—আমাকে বলে অপবিত্র। কি ? কি ?  
যত দূর মুখ, ততদূর কথা ?

দস্ত ।

সেকালিকাচ্ছন্দ ।

বুড়া হোলে বুদ্ধি যায়, মিছে কিছু নয় ।  
কি সাহসে, কাছে আসে, নাহি করে ভয় ? ॥  
নাহি জানে আমাদের, কুলপরিচয় ।  
এর কথা, কাণপেতে, শোনা ভাল নয় ॥  
নিতান্ত অজ্ঞান এটা, জ্ঞান নাই ঘটে ।  
ঘোর অহঙ্কারে অন্ধ, তাই বটে বটে ॥  
স্বকীয়-স্বভাব-দোষ, অনলেতে জলে ।  
আমার আশ্রমে এসে, স্নেহদেশ বলে ? ॥  
রাগেতে শরীর পোড়ে, মূর্তিখানা হেরে ।  
দেখ্ দেখ্ দেখ্ গিয়ে, কেরে ? এটা কেরে ? ॥  
কদাকার আগা, মুড়ো, এ কোন্ হরির্ খুড়ো,  
কোথা থেকে এসে বুড়ো, কথা কয় ঠেরে ? ।  
দেখ্ দেখ্ দেখ্ গিয়ে, কেরে ? এটা কেরে ? ॥

—০—

নিজ মুখে বলা নয়, আপন মহিমা ।  
কত দূর বড় আমি, কে জানিবে সীমা ॥  
আপনি আসিয়া ব্রহ্মা, ভাবে গদগদ ।  
স্বর্গ হোতে জল এনে, ধুয়ে দেয় পদ ॥  
মস্তকের চুল দিয়া, পুঁছায় চরণ ।  
বুকের উপরে করি গোময় লেপন ॥  
আপনার সুপবিত্র হৃদয় আসনে ।  
মাথা খাও, খাও বোলে, বসায় যতনে ॥  
বুড়োটার কাছে এই, পরিচয় দেবে ।  
দেখ্ দেখ্ দেখ্ গিয়ে, কেরে ? এটা কেরে ॥

কথাগুলো কড়া কড়া, স্বভাব বিষম-চড়া,  
গঙ্গার ঘাটের মড়া, ছুঁ স্নেহ কো এরে ।  
দেখ্ দেখ্ দেখ্ গিয়ে, কেরে ? এটা কেরে ? ॥

—০—

আমাদের কুলে যত, গুরুজন আছে ।  
সমভাবে প্রিয় আমি, সকলের কাছে ॥  
সকলের সারি ধন, মন বলে ধারে ।  
সে মন আমায় ছেড়ে, থাকিতে কি পারে ? ॥  
ধার মনে নাহি হয়, আমার উদয় ।  
বুথায় শরীর তার, শব সম হয় ॥  
বৃষকাট কঁাকে ঝোলে, আজ্, কাল্ মরে ।  
আমার নিকটে এসে, আশ্ফালন্ করে ? ॥  
ফের যদি চেড়ে উঠে, দেব তবে সেরে ।  
দেখ্ দেখ্ দেখ্ গিয়ে, কেরে ? এটা কেরে ? ॥  
নাহি জানে যোগ যাগ, নাহি কোন অমুরাগ  
নাকের আগায় রাগ, ফেরে কত ফেরে ।  
দেখ্ দেখ্ দেখ্ গিয়ে, কেরে ? এটা কেরে ? ॥

আমার হুন্দের ধূমে, ধূমের ব্যাপার ।  
আকাশে হয়েছে তায়, মেঘের সঞ্চার ॥  
ভ্রমে লোক গগনেতে, বজ্রনাদ কয় ।  
আমার হুঙ্কার সেটা, বজ্রনাদ নয় ।  
লোকেতে রটনা করে, চপলা বলিয়া ।  
আমার নিখাস ছোট্টে, অনল হইয়া ॥  
মুনি, ঋষি, তেজ ধরে, আমার প্রকাশে ।  
তুচ্ছ জনে, উচ্চ করি, গায়ের বাতাসে ॥  
বাহিরে দাঁড়াতে বল, গিয়ে এক টেরে ।  
দেখ্ দেখ্ দেখ্ গিয়ে, কেরে ? এটা কেরে ?

বুড়ো বোলে হয় দয়া, নতুবা দিতেম্ গয়া,  
 যতপি যাচিঞা করে, ভিক্ষা কিছু দেরে ।  
 দেখ্ দেখ্ দেখ্ গিয়ে, কেরে ? এটা কেরে ? ॥

—০—

অহংকার ।

শাসকচন্দ ।

[ ক্রোধ অথচ উপহাস পূর্বক । ]

কোথাকার কেটা তুই, কেটা তুই, কেটা ? ।  
 কি তোৰ বাপের নাম্, তুই কার বেটা ? ॥  
 বল্ বল্ বল্ ছোঁড়া, কেটা তুই কেটা ? ।

—০—

কটু কথা, যত থাকে, বোলে সাধ্ মেটা ।  
 ঘেঁটিবনা, পারিস্, ঘেঁটাতে, যত ঘেঁটা ॥  
 অভিমানে ফেটে-মরে, বেঁধে এক ফেটা ।  
 লক্ষ টাকা স্বপ্নে দেখে, পেতে ছেঁড়া চেটা ॥  
 মরি কি মুখের ছাঁদ, দেহখানি গেঁটা ।  
 ব্যাভারে গাদার মত, হাঁদা নাদাপেটা ॥  
 কেটা ব্রহ্মা, কেটা বিষ্ণু, মহেশ্বর কেটা ? ।  
 আমার সৃজিত সব, জানেনাকো সেটা ? ॥  
 মুখ্ ফুটে বলা নয়, নিজ গুণ যেটা ।  
 জেনেছি চালাক্ বটে, বস্তুহীন এটা ॥  
 বাপ্ বাপ্, একি পাপ্ ! কচিছেলে জ্যাটা ।  
 এঁচোড়ে পেকেছে ছোঁড়া, এ, যে, বড় ল্যাটা  
 বয়সেতে দেখি নাই, এর মত ঠেঁটা ।  
 কোথাকার কেটা তুই, কেটা তুই কেটা ? ॥  
 কি তোৰ বাপের নাম্, তুই কার বেটা ? ।  
 বল্ বল্ বল্ ছোঁড়া, কেটা তুই কেটা ? ॥

—০—



দস্ত ।

স্থিররূপে অনেকক্ষণ দৃষ্টি করিয়া ।

ওরে—কি ভাগ্য, কি ভাগ্য, কি ভাগ্য ! সুপ্রভাত, সুপ্রভাত, সুপ্রভাত ! ওরে—ইনি আমার পরমপূজ্য মাথারমণি । বাবার বাবা-পিতামহ স্বয়ং কুলদেব অহঙ্কার ঠাকুর । ওরে—আসন্ দে, আসন্ দে, অর্ঘ্য দে, অর্ঘ্য দে । ফুল আন্, ফুল আন্, । জল আন্, জল আন্ । আমি চরণ-যুগল পূজা করি, পূজা করি ।

গলায় বস্ত্র দিয়া ভূমিষ্ঠ হইয়া অষ্টাঙ্গে প্রণাম ।

হে পিতামহ ! আমার অপরাধ মার্জনা করুন । আমি বালক, অজ্ঞান, দুর্ভাগ্য-বশতঃ, এতক্ষণ আপনাকে চিনিতে পারি নাই, প্রণাম করি, প্রসন্ন হইয়া সদয়চিত্তে আমার মস্তকে চরণাজুলি প্রদান পূর্বক আশীর্বাদ করুন । আমি লোভের পুত্র দস্ত, আপনার দাসামুদাস ।

অহঙ্কার ।

[ আহ্লাদে গদ গদ হইয়া । ]

ওরে তুই দস্ত ? তুই দস্ত ? আশীর্বাদ করি, চিরজীবি হ, চিরজীবি হ । দ্বাপরযুগের শেষভাগে তোকে এতটুকু ছেলেমানুষ দেখেছিলাম, এখন তোমার বয়স হয়েছে, গোঁপ উঠেছে, যুবা হয়েছি । আমি বুড়ো হয়েছি, চোখে আর তেমন তেজ্ নাই, সর্বদাই ঝাপসা ঝাপসা দেখে থাকি, বয়সের ধর্ম্মে জ্ঞানেরো কিছু বৈলক্ষণ্য হয়েছে । হাঁরে ভাই ! “অসত্য” নামে তোমার, যে, একটি দুধের ছেলে, সেটিতো ভাল আছে ?

দস্ত ।

হাঁ ঠাকুরদাদা ! সে আমার এই বৃকের উপরেই রয়েছে, আমি তারে ছেড়ে এক মুহূর্ত্তকালো প্রাণধারণ করিতে পারিনে, এই ছেলেটি আমার বড় “নেয়োট্” কোনোমতেই কোন্ ছাড়া হয়না, আপনার পদার্পণে অণু সে বড় সন্তুষ্ট হয়েছে ।

অহঙ্কার ।

ও নাতি, ও ভাই । হাঁরে তোমার পিতা “লোভ” ও মাতা “তৃষ্ণা” তাহারাও কি এখানে আছে ?

দৃশ্য ।

হাঁ ঠাকুরদাদা ! মহারাজ মহামোহের আজ্ঞাক্রমে তাঁহারা সকলেই এখানে অবস্থান করিতেছেন ।

অহঙ্কার ।

হে ভাই ! ব্যাপার-খানা কি ? মহামোহের নাকি অতিশয় অমঙ্গল ঘটনার সম্ভাবনা হইতেছে ? আমি তাহা শ্রবণ করিয়া বিশেষ সন্ধান লইবার জন্ত এখানে আসিয়াছি । মহারাজ এখন কোথায় ! কিরূপ অবস্থায় আছেন ? কি কি অনুষ্ঠান করিতেছেন ?

দৃশ্য ।

দাদা মহাশয় ! আমারদিগের কুলসংহারে-উদ্ধত-বিবেক এই বারাগসীতেই বাস করিয়া বিজ্ঞা এবং প্রবোধের জন্ম-প্রদান করিবে, তাহার অনুষ্ঠান করিতেছে, সে একরূপ নিশ্চয় করিয়াছে, এই স্থান কাম-ক্রোধাদির প্রাদুর্ভাব-রহিত, ব্রহ্মপুরী, এইখানেই বাস করিয়া কৃতকার্য হইব । এই সমাচার শ্রবণ করিয়া অস্মদাদির কুলস্বামি মহামোহ ইন্দ্রলোক পরিত্যাগ পুরঃসর কাশীধামে আসিয়া সর্ব্বারম্ভে বাস করিবেন । প্রভু এখানে রাজত্ব করিলে বিবেক কখনই প্রবল হইয়া তিষ্ঠিতে পারিবেনা, আমরা যুদ্ধ করিয়া তাহার দল বলকে বিনাশ করিব, তাহা হইলেই বিজ্ঞা ও প্রবোধের জন্ম হইতে পারিবেনা । ফলে একটা ঘোরতর-ভয়ঙ্কর যুদ্ধদ্বারা অনেক কষ্ট-ভোগ করিতে হইবে ।

অহঙ্কার ।

[ আসনে বসিয়া গালে হাত দিয়া ]

পদ্য ।

ওরে ভাই, ভাবি তাই, বিষম বিষয় ।

এ, যে, বিষম বিষয় ।

সহজ-তো নয়, বড়, সহজ-তো নয় ॥

মনে হোলো ভয়, বড়, মনে হোলো ভয় ।

কি হয়, কি হয়, রণে, কি হয়, কি হয় ॥

—০—

বিজ্ঞা, আর, প্রবোধের, জন্ম যদি হয় ।

তবেইতো একেবারে আমাদের ক্ষয় ॥

স্থানশুণে, মনে মনে, হোতেছে সংশয় ।  
 বিপক্ষ বিনাশ করা, শত্রু অতিশয় ॥  
 কেমনে বারণ করি, জ্ঞানের উদয় ? ।  
 এত দিনে বুঝি আর, কুল নাহি রয় ॥  
 অতি পাপি, মহাপাপি, পাপি সমুদয় ।  
 কানীতে মরিলে কেহ, জন্ম নাহি লয় ॥  
 ভবের বন্ধন তার, কাটিবে নিশ্চয় ।  
 একেবারে মুক্ত হোয়ে, পায় জীব লয় ॥  
 ভবভয়হর হর, ভব যারে কয় ।  
 মনোভব যার নামে, ভয়ে পরাজয় ॥  
 সেই ভব কানীনাথ, সদানন্দময় ।  
 পাপি তাপি মৃতজনে, সদাই সদয় ॥  
 আপনি জীবের হোয়ে, হৃদয়ে উদয় ।  
 “তত্ত্বমসি” মন্ত্র দেন, মরণ সময় ॥  
 এখানে কেমনে তবে, শত্রু করি জয় ? ।  
 ওরে ভাই, ভাবি তাই, বিষম বিষয় ॥

এ, যে, বিষম বিষয় ।

সহজ-তো নয়, বড়, সহজ-তো নয় ।  
 মনে হোলো ভয়, বড় মনে হোলো ভয় ।  
 কি হয়, কি হয়, রণে, কি হয়, কি হয় ॥

দম্ভ ।

পদ্ম ।

কি ভয়, কি ভয়, দাদা, কি ভয়, কি ভয় ? ।  
 কেটা পাবে তত্ত্বমসি, মত্ত সমুদয় ? ॥  
 সকলেই প্রতিগ্রহ, করেছে স্বীকার ।  
 বেষ্ঠার ভবনে করে, দিবসে বিহার ॥  
 কামের অধীন হোয়ে, মাতিয়াছে ভোগে ।  
 যতি করে রতি-কেলি, সুরাপান ষোগে ॥  
 লোভের অধীনে সবে, মিছে কথা কয় ।  
 হবেনা হবেনা, কভু, জ্ঞানের উদয় ॥

[ এমত সময়ে সম্ভাসদনে কলকল কলরব ]

মহামোহের কোন সেনা

ওহে পুরবাসিগণ ! তোমরা সাবধান হও, সাবধান হও । রাজপথ সকল পবিত্র কর, মঙ্গলাচরণ কর, আনন্দধ্বনি কর । রত্নরাজী-রাজিত-রাজসিংহাসন সকল স্নগন্ধি কুসুমের ও ঘৃষ্টচন্দনে সুবাসিত কর । সমস্ত নগর সুন্দর শোভায় সুশোভিত কর, জলপ্রণালী-পুঞ্জের দ্বার সমুদয় মুক্ত কর, ভাগীরথী, অসী এবং বরুণাদি নদী হইতে সুশীতল নির্মল-জল সকল গৃহেই পতিত হউক, সিংহদ্বার মনোহর মণির-দ্বারা খচিত কর । অট্টালিকার উপরিভাগে অতি উচ্চ জয়পতাকা সকল উদ্ভীষমান কর, পূজ্যপাদ ভুবনেশ্বর শ্রীমন্মহামোহ আগত প্রায়, ঐ আসিতেছেন ।

দম্ভ ।

ঠাকুরদাদা মহাশয় ! মহারাজ নিকটবর্তী হইলেন, চলুন আমরা উভয়ে অগ্রসর হইয়া তাঁহাকে সম্মান পূর্বক আহ্বান করি ।

অহঙ্কার ।

চল ভাই শীঘ্রই চল ।

[ তদনন্তর অহঙ্কার এবং দম্ভ উভয়েই রঙ্গভূমি হইতে নির্গত হইলেন । ]

[ ইতিমধ্যে মহামোহের একজন অগ্রগামী প্রবেশক উপস্থিত । ]

এই আমাদের মহারাজ আসিতেছেন ।

—০—

[ মহারাজ মহামোহের স্বকীয় সৈন্য সামন্ত সমভিব্যাহারে সমুদয় রাজসম্পত্তি সহকারে সপরিবারে রঙ্গভূমিতে আগমন ]

মহামোহ\* ।

[ সভা প্রবেশ পূর্বক সভ্যগণের প্রতি । ]

সংগীতচ্ছলে বহুতা ।

[ বৃহদ্রথ হস্তবদনে ]

রাগিনী সুহিনীবাহার । তাল মধ্যমান ।

এই অখিল সংসার, ভাবিয়া অসার,

বল কি ভেবেছ সার ? ।

জাননা যে জীব তুমি, সব নিরাকার ॥

\* মহামোহ ।—মনের অত্যন্ত ভ্রম ।

ধূরা ।

একাকারে, ব্যাপ্ত ভব, একাকারে লুপ্ত সব,  
 একাকারে আমি রব, হব একাকার ।  
 না মানিয়া একাকার, যদি মানো একাকার,  
 একাকারে সে আকারে, না রহে আকার ॥ ১

রূপ, রস, আদি পঞ্চ, তাহাতে করিয়া তঞ্চ,  
 মানিছ উপাস্ত-পঞ্চ\*, প্রভেদ-প্রকার ।  
 এত নহে ভ্রম অল্প, শাস্ত্রে শুনি মিছে গল্প,  
 মনেতে করিয়া কল্প, পূজিছ সাকার ॥ ২

অজমুণ্ড, গজমুণ্ড, চারিমুণ্ড, পাঁচমুণ্ড,  
 না বুঝিয়া মাথামুণ্ড, গড়িছ আকার ।  
 মাটি, জল, সহকারে, স্বহস্তে গড়েছি যারে,  
 কেমনে করিব তারে, অনাদি স্বীকার ? ॥ ৩

ভ্রাস্ত যত পাপি-নরে, স্বভাবে অভাব ধরে,  
 মাটিতে নিক্ষেপ করে, নানা উপচার ।  
 কেবলি হতেছে ভ্রষ্ট, দেখে পষ্ট যত নষ্ট,  
 নিজ দেহে দেয় কষ্ট, থেকে অনাহার ॥ ৪

বঞ্চনাবৃক্ষের বীজ, প্রতারক যত দ্বিজ,  
 কেবল শিখেছে নিজ, আহার বিহার ।  
 নিজতত্ত্বে বোধশূন্য, স্বভাবত অতি ক্ষুণ্ণ,  
 উপবাসে কোথা পুণ্য, গুরে ছরাচার ? ॥ ৫

হোয়ে তুমি ভ্রমলব্ধ, কখনো, বা, রহ স্তব্ধ,  
 কখনো বা মানো শব্দ, কভু বর্ণাকার ।

\* উপাস্তপঞ্চ ।—গণেশ, দিনেশ, রমেশ, উমেশ, আত্মশক্তি ভগবতী ।

ইহারদিগের উপাসক পঞ্চপ্রকার ।—যাঁহার গণেশের উপাসক, তাঁহার “গাণপত্য”  
 যাঁহার সূর্য্যের উপাসক, তাঁহার “সৌর” যাঁহার বিষ্ণুর উপাসক, তাঁহার “বৈষ্ণব”  
 যাঁহার শিবের উপাসক, তাঁহার “শৈব” এবং যাঁহার শক্তির উপাসক, তাঁহার “শাক্ত-  
 শব্দে” বাচ্য হয়েন ।—ইহারদিগেই পঞ্চপ্রকার সাকারবাদি উপাসক কহে ।

কোথা শব্দ\*, কোথা কণ, কোথা চক্ষু কোথা বর্ণন,

সে বর্ণ বিবর্ণ শুধু, মনেরি বিকার ॥ ৬

যদি বল বিভূ “বীজ,” বল কোথা তার বীজ,

সে বীজে কি হয় নিজ, ফলের সঞ্চার ? ।

বর্ণে যোগ মিছে ইন্দু, মিছে নাদ‡ মিছে বিন্দু§,

সস্তরগে মহাসিদ্ধ, কিসে হবে পার ? ॥ ৭

যদি বল সত্য “বেদ,” তাহে কি ঘুচিবে খেদ,

করে বেদ, ব্রহ্ম-ভেদ, লিখিয়া ঔকার॥ ।

অকার (১) বেদের উক্তি, সাধনে কি হয় মুক্তি,

কেমনে মানিব যুক্তি, উকার (২) মকার (৩) ? ॥ ৮

প্রকৃতি প্রকৃত জানি, সেই জানে হই জানি,

কিরূপে তাহারে মানি, দৃশ্য নাহি যার ? ।

অদৃশ্য বলিব যারে, মনে কি মানিব তারে,

একাকারে নিরাকারে, হেরি নীরাকার ॥ ৯

মেনে শাস্ত্র অমুরোধ, হিতবাক্যে করে ক্রোধ,

কিছুমাত্র নাহি বোধ, আধেয় আধার ।

স্বভাবের একি রিষ্টি, কার প্রতি কর দৃষ্টি,

সে কি করে এই সৃষ্টি, হোয়ে নিরাকার ? ॥ ১০

দৃশ্যাদৃশ্য যত সব, মূল তায় অনুভব,

নাহি এক ভবধব, বিফল বিচার ।

\* “শব্দ ।—ব্রহ্ম” ।

† “বর্ণ ।—ব্রহ্ম” ।

শব্দকে ও বর্ণ অর্থাৎ অক্ষরকে বেদে ব্রহ্ম বলিয়া ব্যাখ্যা করিয়াছেন ।

‡ নাদ ।—শক্তি ।

§ বিন্দু ।—ব্রহ্ম ।

॥ ঔ ।—প্রণব । ব্রহ্ম ।

ভগবান । শঙ্করাচার্য ইহার ভাষ্যেতে বাহ্যরূপ বর্ণনা করত পরিশেষ ব্রহ্মরূপে প্রতিপন্ন করিয়াছেন ।

(১) অ ।—সত্ত্বগুণি বিষ্ণু ।

(২) উ ।—তমগুণি রুদ্র ।

(৩) ম ।—রজগুণি ব্রহ্মা ।

সদা অন্ধ সহকারে, রহে অন্ধকারাগারে,

অন্ধ কি জানিতে পারে, কোথা অন্ধকার ? ॥ ১১

জ্ঞান কর গজানীয়ে, মর নানা দেশ ফিরে,

মিছে মিছি কেন শিরে, বহু ভ্রাস্তি-ভার ।

পতিতপাবনী যদি, হয় এই গজানদী,

তোমা চেয়ে কুস্তীরাদি, বহুপুণ্যধার ? ॥ ১২

কিসে তুমি কর ভয়, কিসে তুমি হবে লয়,

কিসে বা আচার রয়, কিসে অনাচার ? ।

এই যে শরীর তব, অপবিত্র কিসে কব,

মনেতে সঞ্চিত সব, মন মূল্যধার ॥ ১৩

অতি টোঁসা, পত্রচোঁসা, মণ্ডালোঁসা, যত ফোঁসা,

ধোঁরে পুষ্প, কুণী কোঁসা, করে কি আচার ? ।

মনে মনে কি বাসনা, পূজা করে শবাসনা,

বৃথা এই উপাসনা, নিজ অপকার ॥ ১৪

এই সব ভগুগণ, কেবল পাবার মন,

করে শাস্ত্র বিরচন, অশেষ প্রকার ।

এটা পুণ্য, এটা পাপ, বোলে দেয় নানা তাপ,

হায় ইকি মনস্তাপ, কব কারে আর ? ॥ ১৫

ইহকাল ভোগসুখ, ভোগ ছাড়া নাহি কুখ,

ভোগ-হেতু দারা পুত্র, যত পরিবার ।

যতদিন বেঁচে থাকি, ততদিন নাহি ফাকি,

মুদিলে যুগল আঁখি, কেহ নহে কার ॥ ১৬

অতএব বাক্য ধর, দুখে কেন কাল হর,

সকলেই হবে পর, হোলে শবাকার ।

যোগে দেহ অহুযোগ, সুখে কর সুখভোগ,

জীবনান্তে ভোগাভোগ, কিছু নাই আর ॥ ১৭



[ অন্তর্দৃষ্টি মুখ করিয়া কিঞ্চিৎ গাভীর্বা পূর্বক ]

সংগীতচ্ছন্দে বক্তৃতা

রাগিণী আলোয়া । তাল মধ্যমান ।

এই শরীর-রতন, হইবে পতন ।

নিজভাবে ভারী হোয়ে, কররে যতন ॥

এই শরীর রতন, হইবে পতন ।

না হইল সুখ লাভ, মনের মতন ॥

ধূয়া ।

আপন আপন-রব, নিশির-স্বপন সব,

গোপন কি আছে তব, ভব-প্রকরণ ।

পেয়েছ ভোগের দেহ, তার প্রতি কর স্নেহ,

পরে আর নাহি কেহ, মুদিলে নয়ন ॥

প্রকৃত প্রকৃতি-গুণ, বিকৃতি কি তাহে পুন,

আকৃতি দেখিয়া কর, স্কৃতি-সাধন ।

দেহ ছাড়া আত্মা এক, নাই নাই, মিছে ভেক,

দৃষ্টিহীনে অভিষেক, কোরোনারে মন ॥

পেয়েছ উজ্জল আঁখি, তার কাছে কোথা ফাকি,

বুঝিতে কি আছে বাকী, সার বিবরণ ? ।

স্বভাবে রাখিয়া দৃষ্টি, দেখ দেখি এই সৃষ্টি,

সৃষ্টিছাড়া অনাসৃষ্টি, সৃষ্টির কারণ ॥

গ্রহ, তারা, তিথি, রাশি, কাল, দণ্ড, রাশি রাশি,

রীতিমত আসে যায়, করিয়া ভ্রমণ ।

স্বভাবের এই ধারা, স্বভাবেতে বদ্ধ তারা,

স্বভাবে অভাব-ভাব, হয় কি কখন ? ॥

এতো-নহে ভার বোঝা, সহজেই যায় বোঝা,

সোজাপথ ছেড়ে করে, কুপথে গমন ।

পরলোকে স্বর্গভোগ, ভ্রমে ভোগে কর্মভোগ,

করিতেছে মিছে যোগ, যত মূঢ়গণ ॥

শোন্ শোন্ নরলোক, কোথা তোর পরলোক,  
 অজ্ঞান-মদের ঘোঁক, প্রলাপ-বচন ? ।  
 পরকালে কর্মফল, কেবল ধূর্তের ছল,  
 আকাশ-তরুর ফল, অলীক যেমন ॥  
 গগনের নাহি মূল, তাতে নাহি ফোটে ফুল,  
 পুরাণের লেখা-ভুল, মিছে দরশন\* ।  
 মাধে আমি বলি কুট, বল্ বল্ ওরে মূঢ়,  
 কোথা পেলি মর্ম গুঢ়, আত্মনিকূপণ ? ॥  
 যাহা নাই, তাই আছে, শুনেছিস্ কার কাছে,  
 মিছে কাচে, কাচ কাচে, মূর্থ যত জন ।  
 কোথা তোর দিব্যজ্ঞান, ধ্যান নয়, এ, যে, ধ্যান  
 নয়নে না হয় কেন, আত্মা-দরশন ? ॥  
 ভ্রমে যত হরে কাল, আপনার করে কাল,  
 জীবনান্তে পরকাল, অলীক-কথন ।  
 পদ্যপাতে যথা জল, নাহি পায় বাসস্থল,  
 সেইরূপ ভাবি-ফল, কর্ম্মতে ঘটন ॥  
 প্রকৃতির কিবে লীলে, দুষ্কৃতে অস্থল দিলে,  
 পরিণামে হয় যথা, দধির সৃজন ।  
 বায়ু, বহি, ধরা, জলে, পরস্পর যোগ-বলে,  
 স্বভাবে সেরূপ সদা, হতেছে চেতন ॥  
 অজ্ঞান মানব চয়, এই দেহ জড় কয়,  
 জড় নয়, জড় নয়, দেহ সচেতন ।  
 বৃহস্পতি করি যুক্তি, করেছেন এই উক্তি,  
 অণু আর নাই মুক্তি, মুক্তিই মরণ ॥  
 আকার প্রকার সব, সম সব, অবয়ব,  
 সমান জনম মৃত্যু, সমান গঠন ।  
 সম ছেদ, সম ভেদ, কিছু নাই, ভেদাভেদ,  
 সম সুখ, সম দুখ, রমণ গমন ॥

\* দরশন ।—দর্শন, ।—শ্রাব, সাংখ্য, পাতঞ্জলাদি বড় দর্শন ।

তবে কেন ভণ্ড নরে, মিছে ভেদাভেদ ধরে,  
 কল্পনা করিয়ে করে, বর্ণ নিরূপণ ? ।  
 এই বড়, এই ক্ষুদ্র, এই দ্বিজ, এই শূদ্র,  
 ছুঁয়োনা ছুঁয়োনা ওরে, ও হয় যবন ॥  
 সাথে আমি হই ক্রুদ্ধ, বোধেরে করিয়া ক্রুদ্ধ,  
 এ অশুদ্ধ, আমি শুদ্ধ, এ ভেদ কেমন ? ।  
 কত দূর অভিমান, অজ্ঞানের এই ভান,  
 কেমন পাষণ্ড প্রাণ, প্রেমহীন-মন ॥  
 অরসিক হোয়ে রসে, ঘেঘ-বশে বোলে বসে,  
 এ হয় পাপের অন্ন, কোরোনা ভোজন ।  
 না খেলেতো নাহি ত্রাণ, খেলে পরে থাকে ত্রাণ,  
 দেহে করি বল দান, বাঁচায় জীবন ॥  
 নরাধম কৰ্মচটো, হেন “অন্ন” বলে এঁটো,  
 ব্রহ্মরূপে করে যেই, জীবের পালন ।  
 দুঃখে বহে চক্ষে ধারা, হোয়ে সবে ভেদহারা,  
 বলে এই পরদারা, কোরোনা হরণ ॥  
 পর-বোধ আছে যার, সেই ভাবে পরদার,  
 পর নহে কেহ কার, সকলি আপন ।  
 সকলেরি এক গতি, সকলেরি এক মতি,  
 সকলেরি মনে রতি, সহিত মদন ॥  
 পরস্পর নহে পর, স্বভাবের অশুচর,  
 স্বভাবে অভাব যার, সে করে বারণ ।  
 ভোগে ভেদ যদি রবে, পশু, পাখি, সবে ভবে,  
 স্বৈচ্ছামত কেন তবে, করিবে গমন ? ॥  
 খাটি নহে কারো মন, প্রেম-অন্ধ যত জন,  
 বলে এই পরধন, কোরোনা গ্রহণ ।  
 পাগলের এই কথা, বলিতেছে যথা তথা,  
 বাচাল হইয়া করে, শাস্ত্র-আলাপন ॥  
 প্রাণে আর নাহি সয় দিলে সত্য পরিচয়,  
 পাগলে পাগল কয়, একি কুলক্ষণ ? ।

নাস্তিকে নাস্তিক ভাবে, তুনিয়া প্রকৃতি হাসে,  
 তাহার আনস্তিক যদি, নাস্তিক কেমন ? ॥  
 জয় জয় বৃহস্পতি, চার্বাক-চরণে নতি,  
 বৌদ্ধমত সত্য অতি, শাস্ত্র-সনাতন ।  
 অদৃশ্য পদার্থবাদী, প্রত্যয়ক মিথ্যাবাদী,  
 হেরিবনা হেরিবনা, তাদের বদন ॥

—•—

[ আর একদিনে মুখ করিয়া খলু খলু শব্দে হাসিতে হাসিতে ভঙ্গিমা ধারা ]

হাঃ—হাঃ—হাঃ—এরা কে গজারু ধারে ? এতো বড় হাসির  
 ব্যাপার ! হাঁরে ও আঙুল নেড়ে কি ভেঙাচ্ছে ? বিড়িরু বিড়িরু  
 কি ঘেঙাচ্ছে । আরে ঐ ফুলের বাড়ী কি ঠেঙাচ্ছে ? এই  
 বিটলে মাটি নিষে কি গোড়্ছে ? ওখানে ও কি পোড়্ছে ?  
 ভিড়িং ভিড়িং, ধিড়িং ধিড়িং, পিড়িং পিড়িং, এরা কি সেতার  
 বাজাচ্ছে ?

রোহিণী পরার ।

হায় হায়, হায়, এরা, ঘোর পাপযুক্ত ।  
 ভাস্তিরূপ পাশ হোতে, কিসে হবে মুক্ত ? ॥  
 হতবুদ্ধি যত জন্তু একদল ভুক্ত ।  
 নাহি জানে সার শাস্ত্র, বৃহস্পতি উক্ত ॥  
 হায় আমি বেণাবনে, কেন ফেলি মুক্ত ? ।  
 থাকিতে পায়স, পিঠে, খেয়ে মরে স্তব্ধ ॥

[ আর একদিনে নিরীক্ষণ করিয়া স্নানাপূর্বক ]

মোহিনীচন্দ্র ।

অকাট্য আমার কথা, কারু সাধ্য কাটে রে ? ।  
 আমার নিকটে কার, জারিজুরি খাটে রে ? ॥  
 সমুখ-বিচার-যুদ্ধে, কে আমারে আটে রে ? ।  
 প্রমাণের বাণ দেখে, সকলেই ঘাঁটে রে ॥

মিছে ধর্ম, মিছে মর্ম, কর্মফল চাটে রে ? ।  
 কখনো কি ফল হয়, রসহীন কাটে রে ? ॥  
 বঞ্চক বামুন-জুলা, ফেরে কত ঠাটে রে ।  
 দিয়েছে ভোগের ভাগা, ভোগারূপ হাটে রে ॥  
 বাচালতা কোরে শুধু, ফেরে মালসাটে রে ? ।  
 সকলে সেজেছে শঙ, নাটুয়ার নাটে রে ॥  
 সত্যপথে কেহ আর, ভ্রমে নাহি হাটে রে ।  
 তৃষ্ণাদোষে নাবিয়াছে, মিথ্যানদী ঘাটে রে ॥  
 মরুক, চরুক, গরুক, আশারূপ মাটে রে ।  
 স্বেখে আমি রাজ্য করি, বোসে রাজপাটে রে ॥

—০—

[ কলি এবং শিষ্টের সহিত চার্বাকের রজভূমিতে আগমন ]

চার্বাক\* ।

[ সভামধ্যে প্রবেশ পূর্বক সকলকে তুচ্ছ করিয়া অতি উচ্চরবে বক্তৃতা ]  
 হিম্মোলচ্ছন্দ ।

ধর্মপথে হোয়ে চোর, কেন পাও দুঃখ ঘোর,  
 নয়নের অগোচর, নাই কিছু, নাই কিছু ।  
 স্বেচ্ছাচার স্বর্গভোগ, সেই যোগে দেহ যোগ,  
 পরকালে ভোগাভোগ, নাই কিছু, নাই কিছু ॥  
 শরীরের মাঝে শূন্য, ইথে কেন হও ক্ষুণ্ণ,  
 কোথা পাপ কোথা পুণ্য, নাই কিছু, নাই কিছু ।  
 ভ্রমে কর কার সেবা, তোমার উপাস্ত কেবা,  
 শাস্ত্রমতে দেবী দেবা, নাই কিছু, নাই কিছু ॥  
 ধর্ম বল কিসে বল, কর্মবীজে শর্মফল,  
 পরে আর ফলাফল, নাই কিছু, নাই কিছু ।  
 তত্ত্ব নিজে পাপ-তত্ত্ব, মূল মাত্র নিজ-যত্ত্ব,  
 জপ, হোম, পূজা, যজ্ঞ, নাই কিছু, নাই কিছু ॥  
 মনে কেন রাখ খেদ, ভণ্ড লোকে মানে বেদ,  
 আত্মমতে ভেদাভেদ, নাই কিছু, নাই কিছু ॥

বীরবিলাসিনীচ্ছন্দ ।

সমুদয় এই বিশ্ব, স্থলরূপে হয় দৃশ্য,  
অপরূপ কতরূপ, বস্তু সমুদয় হে,  
বস্তু সমুদয় ।

এই ভব ভোগ্য তব, ভোগে কেন পরাভব,  
স্বভাবে শোভিত সব, স্বভাবেই হয় হে,  
স্বভাবেই হয় ॥

সকলি স্বভাব-অংশ, স্বভাবে সকলি ধ্বংস,  
সমুদ্রের বিশ্ব যথা, সমুদ্রেই লয় হে,  
সমুদ্রেই লয় ।

ঋতু, মাস, তিথি, বার, আসে যায় বারবার,  
স্বভাবের পরিবার, স্বভাবে উদয় হে,  
স্বভাবে উদয় ॥

রবি আর শশধর, স্বভাবত নিরন্তর,  
স্বভাবের চক্ষু হোয়ে, করে আলোময় হে,  
করে আলোময় ।

বহি, বারি, ধরা, জল, শস্য, বীজ, বৃক্ষ, ফল,  
ভোগের কারণ সব, সুখের আলয় হে,  
সুখের আলয় ॥

নয়নের অগোচর, আছে এক সৃষ্টিকর,  
নহে দৃশ্য, ছাড়া বিশ্ব, বল কোথা রয় হে,  
বল কোথা রয় ? ।

কি কহিব আহা আহা, কেমনে মানিব তাহা,  
আখির অদৃশ্য যাহা, কিছু কিছু নয় হে,  
কিছু কিছু নয় ॥

কলেবর মনোহর, কেবল ভোগের ঘর,  
সেই কর্ম সদা কর, যাহে সুখোদয় হে,  
যাহে সুখোদয় ।

পদে পদে পরিতাপ্, প্রাণ যায় বাপ্‌বাপ্,  
আহার-বিহারে পাপ্, পাপিলোকে কয় হে,  
পাপিলোকে কয় ॥

যত সব বুদ্ধিমোটা, কপাল জুড়িয়া ফোটা,  
সুখপথে মেরে খোটা, দুঃখ বোঝা-বয় হে,  
দুঃখ বোঝা বয় ।

ইন্দ্ৰিয়ের রেখে মৰ্ম্ম, সাধন করিব কৰ্ম্ম,  
দূর দূর দূর ধৰ্ম্ম, তারে কিসে ভয় হে, ?  
তারে কিসে ভয় ? ॥

শাস্ত্রকার ভাঁড় যত, লিখিয়াছে নানামত,  
তাদের অলীক-মত, প্রাণে নাহি সয় হে,  
প্রাণে নাহি সয় ।

করি যোগ গাত্রে গাত্রে, স্বৰ্গভোগ স্পর্শমাত্রে,  
যুগ্মভাবে পাত্রে পাত্রে, পূর্ণানন্দময় হে,  
পূর্ণানন্দময় ॥

সমভাব সব অঙ্গে, সমভাব সব সঙ্গে,  
রসভাস রস-রঙ্গে, কর কালক্ষয় হে,  
কর কালক্ষয় ।

চুরি নয়, হত্যা নয়, অধিকন্তু, সুখ হয়,  
ইথে যারা পাপ কয়, তারা দুরাশয় হে,  
তারা দুরাশয় ।

ভেদজ্ঞান মহারোগ, কেবলি পাপের ভোগ,  
ইচ্ছামতে কর ভোগ, মনে যাহা লয় হে,  
মনে যাহা লয় ॥

বিবেক বৈরাগ্য আদি, যত সব প্রতিবাদি,  
ছেড়ে রব, ক্রমে সব, কর পরাজয় হে,  
কর পরাজয় ।

ফুটিল মানসকলি, মোহিত আনন্দ-অলি,  
কলিযুগে মহাবলী, মহামোহ জয় হে,  
মহামোহ জয় ॥



### চার্কাকের শিষ্য ।

[ সংশয়চ্ছেদনার্থ গুরুর প্রতি প্রস্তাব ]

হে গুরো! ষথার্থ শাস্ত্র বলিয়া কাহাকে মান্য করিব? এবং কিরূপ আচার করিয়া জীবনযাত্রা যাপন করিব? যদি অভিলষিত-দ্রব্য ভোজন ও পান এবং স্বেচ্ছানুরূপ-কর্ম-দ্বারা ইন্দ্রিয়গণকে চরিতার্থ করাই পরমার্থ হয়, তবে এই সমস্ত তীর্থবাসি জনেরা কেন এতকাল সাংসারিক-সুখ পরিহার-পুরঃসর শীত গ্রীষ্মাদি ঋতুদিগের ঘোরতর যাতনা সহ করত পরাকাদি\* ব্রত-দ্বারা এত কষ্টে এত দুঃখে সময়, দেহ, এবং আয়ু-ক্ষয় করিতেছে? ইহারা তাবতেই কহিতেছে, এই সংসার কেবল অসার, দুঃখের আধার, ইহাতে সুখমাত্রই নাই।—এই সাংসারিক সুখ সর্বতো-ভাবেই ত্যাগ করা কর্তব্য। সংসারাসক্ত জীব ইন্দ্রিয়ের অধীন, বিষয়-ভোগানুরাগ-বশতঃ পাপ সঞ্চয় করে, সুতরাং তত্ত্বজ্ঞানলাভ করিয়া মুক্ত হইতে পারেনা, মরণান্তে নারকী হইয়া পাপের দণ্ড ভোগ করে ইত্যাদি।

### চার্কাক ।

হে বাপু! তুমি কি জাননা, অর্থশাস্ত্রই ষথার্থ শাস্ত্র, অর্থকরীবিদ্যাই প্রকৃত বিদ্যা, ইতিহাসাদি যে শাস্ত্র, সে তাহারি অনুরূপ-অন্তর্গত মাত্র। বেদাদি শাস্ত্র সকল শাস্ত্রই নহে। শুদ্ধ প্রবঞ্চনা, ছলনা, চাতুর্য ও মিথ্যাবাক্যে পরিপূর্ণ, প্রলাপিদিগের প্রলাপ মাত্র। দুর্জ্ঞান বঞ্চকেরা আগনাগন প্রভৃৎ স্থাপন ও প্রবঞ্চনা-পূর্বক অর্থ-সংগ্রহ করণ কারণ কতকগুলীন অর্থহীন প্রমাণহীন আকাশভেদি বচন রচন করিয়া নিরন্তর অবোধ-লোকদিগের বঞ্চনা করিতেছে, এবং আপনারা আত্মদোষে প্রত্যহই প্রত্যক-সুখে বঞ্চিত হইতেছে। হে বৎস! দেখ, ইহারদিগের একখানি দোষ নহে, ইহারা বঞ্চক, মিথ্যাবাদি, ভ্রান্ত এবং মূর্থ। মুক্তি কাহাকে বলে তাহা জানেনা, মৃত্যুর নামি মুক্তি, মুক্তি আর একটা স্বতন্ত্র গাছের ফল নহে। কি ভ্রান্তি! কি চাতুরী! ইহারা মিথ্যাক্রমে মৃত-ব্যক্তির প্রেতরূপ কল্পনা করে। এক মুখে দুই কথা কয়, একবার বলে কাশীতে মরিলেই মুক্তি হয়, গঙ্গায় মরিলেই মুক্তি হয়, আবার চমৎকার দেখ, যাহারা এই বারাগসীধামে প্রাণত্যাগ করিতেছে, গঙ্গার-তীরে নীরে দেহ

\* পরাক—প্রারম্ভিক্তবিশেষ, যাহাতে ষাদশ দিন উপবাস করিতে হয়।

পরিহার করিতেছে, তাহারদিগেরি প্রেত বলিতেছে, শ্রাদ্ধ তর্পণ বিধান করিতেছে। ধূর্তেরা এক বিষয়েই দুই প্রকার প্রমাদের কথা উল্লেখ করে, অতএব ইহারদের কথা কি শুনিতে আছে? এই মিথ্যা কথায় কি কাণ দিতে আছে?

পর্যায়।

যাগ করে, ত্রুত করে, ক্রিয়া করে যত।  
 মিছে ভ্রমে, মিছে শ্রমে, আয়ু করে গত ॥  
 কর্ত্তা, ক্রিয়া, দ্রব্যের, হইলে পরে নাশ।  
 যাগকারকের যদি, হয় স্বর্গবাস ॥  
 দাবানলে দগ্ধ হয়, তরু যে সকল।  
 সে সকল গাছে তবে, হোতে পারে ফল ॥  
 পোড়া গাছে ফল যদি, সম্ভাবনা হয়।  
 এদের কথায় তবে, করিব প্রত্যয় ॥  
 মৃতজনে জল দেয়, দেয় অন্ন গ্রাস।  
 মরা গরু কখনো কি, খেয়ে থাকে ঘাস? ॥  
 মৃতনর তৃপ্ত হয়, তর্পণের জলে।  
 তেল পেলো নেবা দীপ, কেন নাহি জলে? ॥  
 কুহকী জনের মনে, কি কুহক আছে।  
 একেবারে জগতে, অন্ধ করিয়াছে ॥  
 যে বিজ্ঞায় নাহি হয়, অর্থ উপার্জন।  
 যে বিজ্ঞায় নাহি হয়, স্ত্রের সাধন ॥  
 যে শাস্ত্রের কথা নহে, বিশ্বাসের স্থল।  
 যুক্তি সহ যোগ করি, নাহি দেখি ফল ॥  
 এলোমেলো লিখিয়াছে, যা এসেছে মনে।  
 সে লেখা প্রমাণ আমি, করিব কেমনে? ॥  
 গুরে বাপু প্রাণাধিক, স্থির জেনো এই।  
 শাস্ত্র নয়, শাস্ত্র নয়, বিজ্ঞা নয়, সেই ॥  
 বঞ্চকেরা বাঁধিয়াছে, বঞ্চনার গুণে।  
 ভ্রান্ত লোকে ভুলিয়াছে, ফলশ্রুতি শুনে ॥

ভুলিয়া মিষ্টের লোভে, শিশু যে প্রকার ।  
 আশার অধীনে হয়, অধীন পিতার ॥  
 ভাবি-স্বর্গভোগ-রূপ, সন্দেসের লোভে ।  
 যত সব মূর্থ লোক, মরিতেছে কোভে ॥  
 ক্রিয়াকাণ্ড-রত যত, সার-বস্তুহীন ।  
 আশায় হতেছে সব, শঠের অধীন ॥  
 সংসারেতে দুঃখ আছে, করিব স্বীকার ।  
 বিনা দুখে সুখভোগ, হোয়ে থাকে কার ? ॥  
 আপনার হিতবোধ, মনে আছে যার ।  
 সে কি কভু ছেড়ে থাকে, সুখের সংসার ? ॥  
 জগতের গুঢ়ভাব, কে জানিবে স্থির ।  
 সুখ ধনে ভরা আছে, ভিতর বাহির ॥  
 সমুদ্রের জল দেখ, স্বভাবে লবণ ।  
 মথন করিলে হয়, অমৃত সৃজন ॥  
 “টক” বোলে দধি কেন, ফেলে দিতে যাবে ? ।  
 এখনি মথন কর, ননী, স্নাত, পাবে ॥  
 ধান নিয়ে দেখ বাবা, হাতের উপরে ।  
 তগুল রয়েছে তার, তুষের ভিতরে ॥  
 তুষ বোলে কেন তারে, ফেলে দিতে যাবে ? ।  
 ধান-ভেনে, চাল লও, কত সুখ পাবে ॥  
 চিরকাল প্রিয় যেই, প্রিয় সেই রয় ।  
 ক্ষুদ্র-দোষে কখনো কি, অপ্রিয় সে হয় ? ॥  
 নানা দোষে দেহ হোলে, দোষের আধার ।  
 এই দেহ কবে বল, প্রিয় নয় কার ? ॥  
 রসনারে করে সদা, দশন আঘাত ।  
 নোড়া দিয়ে কোন্‌কালে, কে ভেঙেছে দাঁত ? ॥  
 ছারখার করে অগ্নি, পোড়াইয়া ঘর ।  
 সে আগুনে, কবে কেবা, করে অনাদর ? ॥  
 ভূমি নাশ করে জল, বিস্তারিয়া ঢেউ ।  
 সে জলের অনাদর, নাহি করে কেউ ॥

কিছু দুঃখ আছে বোলে, শুন ওরে বাবা ।  
 যেজন সংসার ছাড়ে, হাবা, সেই হাবা ॥  
 ইচ্ছামত সুখভোগ, আহার বিহার ।  
 তার চেয়ে পরমার্থ, কিছু নাই আর ॥  
 বোধহীন মূঢ় যারা, বন্ধ ভ্রমজালে ।  
 এ সুখ কি ভোগ হয়, তাদের কপালে ? ॥  
 শরীর শোষণ করে, রবির কিরণে ।  
 ঘরে ঘরে ভিক্ষা করে, পেটের কারণে ॥  
 উপবাসে ভোগ করে, কঠোর যাতনা ।  
 মোক্ষের সাধনা নয়, দুঃখের সাধনা ॥  
 তপস্তায় জ্বলে পুড়ে, পাপে ভোগে দুখ ।  
 মোরে গেলে ফুরাইল, কবে পাবে সুখ ? ॥  
 বাপুর্বে প্রত্যক্ষ দেখ, তপস্তার ফল ।  
 আত্মঘাতি হোয়ে মরে, পাষণ্ডের দল ॥  
 স্বৈচ্ছামত ভোগ করি, আমরা সকলে ।  
 সশরীরে স্বর্গভোগ, কারে আর বলে ? ॥

[ সন্ন্যাসী দেখিয়া । ]

বল-হে সন্ন্যাসি, তুমি, কি কাজ করেছ ? ।  
 বগলে ভিক্ষার বুলি কি হেতু ধরেছ ?  
 ঘরে ঘরে ফেরো যদি, ঘর-ছাড়া হোয়ে ।  
 ঘর ছেড়ে, কিবা ফল, থাকো ঘর লোয়ে ? ॥  
 পেট নিয়ে ঘরে ঘরে, যদি গুণো হাপু ।  
 এমন সন্ন্যাসে তোর, কাজ কিরে বাপু ? ॥  
 ঘর ছেড়ে ঘরে ঘরে, ফিরিতে না হয় ।  
 অনাহারে, দেহ যদি, সমভাবে রয় ॥  
 তবেতো তপস্তা জানি, মানি তোর ক্রিয়া ।  
 সকলেই ঘুরিতেছে, পোড়া পেট নিয়া ॥  
 সেই যদি খেতে হোলো, অন্ন আর জল ।  
 বল্ বল্ বল্ তবে, সন্ন্যাসে কি ফল ? ॥

দেহ আছে খেটে খেয়ে, ভোগ কর ক্রিয়া ।  
কারো কাছে চোঁচায়োনা, পেটে হাত দিয়া ॥

( দণ্ডিদিগের প্রতি দৃষ্টি করিয়া । )

ওরে ভণ্ড, হাতে দণ্ড, এ কেমন রোগ ? ।  
দণ্ডে দণ্ডে, নিজ দণ্ডে, দণ্ড কর ভোগ ? ॥  
নিজ হাতে, নিজ পিণ্ড, করিয়া গ্রহণ ।  
লণ্ডভণ্ড হোয়ে মরো, কাণ্ড এ কেমন ? ॥  
মুক্তি মুক্তি, করিতেছ, যত নারী নরে ।  
কথায় বসায় হাট, বেচা, কেনা, করে ॥  
কেহ বেচে, কেহ কেনে, কেহ করে দান ।  
সকলেই শুনিতেছে, কারো নাই কাণ ॥  
সকলেই দেখিতেছে, চক্ষু কারো নাই ।  
কোথা যুক্তি, কোথা মুক্তি, ভাবি আমি তাই ॥  
প্রকৃতি প্রকৃতি পেলে, আকৃতির নাশ ।  
ভূতে ভূত মিশাইয়ে, হয় অপ্রকাশ ॥  
অবিনাশী, শূন্য এই, স্বভাবেই রয় ।  
বল তবে, এ জগতে, মুক্তি কার হয় ? ॥  
ভোগেতে প্রত্যক্ষ সুখ, আর সব শূন্য ।  
বল বল, কোথা পাপ, কোথা তবে পুণ্য ? ॥

মহামোহ ।

[ আত্ম-মনোগত বাক্য শ্রবণ করিয়া আশ্লাদ পূর্বক । ]

আহা, আহা ! এখানে কোন্ সাধু ব্যক্তির আগমন হইয়াছে ?  
সাধু সাধু, ধন্য ধন্য, এ মহাত্মা কে-রে ? চিরকালের পর অজ্ঞ আমি  
যথার্থরূপে স্থখী হইলাম । ওরে এমন্ সত্যবাদী, সুধাতাবী-পবিত্র-চিত্ত  
সদানন্দময় সংশয়চ্ছেদক মহাপুরুষ কি আছে রে ? মরি মরি ! আহা  
আহা ! ওহে কে তুমি ? কে তুমি ? আমার মনের অন্ধকারকে হরণ  
করিলে । আহা, আমার কর্ণপথে কি সুমধুর অমৃত-বৃষ্টি হইতেছে ! কি  
আনন্দ, কি আনন্দ !

( আহ্লাদে গদগদ হইয়া দৃষ্টি পূর্বক )

আরে, এই যে, দেখি।—ইনি আমার প্রাণাধিক প্রিয়তম-পরম-স্বহৃৎ চাক্ষাক। না হবে কেন? ওরে চাক্ষাক-রে—চাক্ষাক।

চাক্ষাক।

[ অবলোকন করিয়া হুটুটিতে । ]

হাঁ—ইনি বিশ্বপূজ্য মহারাজ মহামোহ। ভাল ভাল, বড় সুখের দিন, যাই তবে নিকটে যাই।

[ নিকটে গিয়া । ]

মহারাজের জয় হউক, জয় হউক, শত্রু সব ক্ষয় হউক, ক্ষয় হউক। তাদের মনে ভয় হউক, ভয় হউক, ভয় হউক, কালের কোলে লয় হউক, লয় হউক। এই সমুদয়, একাকারময় হউক, একাকারময় হউক।

[ ভূমিষ্ঠ হইয়া প্রণাম করণে উত্তত । ]

মহামোহ।

এসো এসো, চাক্ষাক এসো, প্রাণের ভাই এসো, এই আসনে বোসো বোসো, এত ব্যস্ত কেন? রোসো রোসো, আগে কোলাকুলিটি করি।

কোলাকুলি।

মহামোহ।

বোসো ভাই বোসো,—কেমন তোমার মঙ্গলতো।

চাক্ষাক।

ত্রীচরণের আশীর্বাদে সমস্তই মঙ্গল। মহারাজ আপনার শিষ্যানুশিষ্য, দাসানুদাস কালশ্রেষ্ঠ কালরাজ কলি আপনাকে দর্শন করিবার নিমিত্ত এবং আপনার ভুবন-পূজ্য ত্রীপাদপদ্মে অষ্টাঙ্গে প্রণাম করিয়া পবিত্র হইবার জন্য এই আমার সঙ্গেই আসিয়াছেন।

মহামোহ।

কই কলি, কই? এসো এসো, এসো বাপু, এসো এসো, কল্যাণ হোক, কল্যাণ হোক, দেখি বাপু, মুখখানি দেখি,—এই, যে, বড়



হয়েছ, তোমাকে আমি “হামাগুড়ি” দিতে দেখেছিলাম, তখন এক একবার হাঁটি হাঁটি পা-পা করিতে । এখন তোমার গৌণের রেখা দিয়েছে । ভাল ভাল, তবে এ দিগের কি পর্য্যন্ত হয়েছে, বল দেখি । তীর্থের সংবাদ কি ? এখনো কি বেদ-বিহিত ধর্ম কৰ্মে লোকের বিশ্বাস আছে ?

কলি ।

প্রভু । প্রণাম করি, অণু শ্রীচরণ দর্শন করিয়া কৃতার্থ হইলাম । মহাশয় আমার কার্য ও পরাক্রম প্রত্যহই প্রতিক্রমে প্রত্যক্ষ দর্শন করিতেছেন । হে মহারাজ ! আমরা কেবল উপলক্ষ মাত্র, সকলি আপনার কটাক্ষের প্রভাব । পদযুগের মহিমাতেই সকলি হইতেছে । আর কি নিবেদন করিব ?

[ মহারাজের মঙ্গল প্রার্থনা ]

যে স্বভাব পৃথিবী-উজ্জলকারি-গগনবিহারি—ধ্বাস্তহারি-সূর্য্যদেবকে দীপ্তমান করিতেছেন ।—যে স্বভাব রজনীতে নক্ষত্র-মণ্ডলমণ্ডিত অতি চিত্র চিত্র-মণ্ডলে চন্দ্রের উদয় করিয়া আমারদিগের হৃদয়-কুমুদ প্রফুল্ল করিতেছেন ।—যে স্বভাব গ্রীষ্ম, বর্ষা, শরদ, হিম, শিশির, বসন্ত, এই সুখময় ছয় ঋতুকে আমাদিগের ভোগের নিমিত্ত সৃজন করিতেছেন ।—যে স্বভাব বহুবিধ ভক্ষ্য-ভোজ্য-পানীয় প্রদান পূর্বক অন্নাদিকে সমূহ সুখে সুখি করিতেছেন, আর যে স্বভাব পুরুষের কামকেলি-সুখসন্তোগার্থে সর্ব-দুঃখসংহারিণী সাক্ষাৎ-মোক্ষবিধায়িনী—সর্বমনোমোহিনী—রতি-রসবিলাসিনী—কোমলাঙ্গী—কুটিলাক্ষী—কামিনী-কদম্বের সৃষ্টি করিয়া তাহারদিগের বিমল-বদনে কেশাবলী প্রদান করেন নাই, সেই স্বভাব অনুকূল হইয়া সততই মহারাজের মঙ্গল বিধান করুন ।

আমাকে নিতান্ত ছেলেমানুষ বিবেচনা করিবেন না, আমি বয়সে বালক বটি, কিন্তু কার্যে অত্যন্তই প্রবীণ ।

[ সভাস্থ সকলের প্রতি ]

গীত ।

রাগিণী বেহাগ । তাল আড়া ।

স্বচ্ছাময়-মন তুমি, জগতের ভূপ ।

আপন স্বরূপ তুমি, আপন স্বরূপ ॥



লোক সব মিছে ভ্রমে, সংসার-কাননে ভ্রমে,  
 নাহি দেখে কোনোক্রমে, নিজ নিজ রূপ ।  
 নানা-ভাবে ভাব হরে, অভাবের ভাব ধরে,  
 বিরূপ স্বভাবে করে, স্বভাবে বিরূপ ॥  
 সূখে নাহি কাল বঞ্চে, পড়িয়া বিষম-তঞ্চে,  
 রূপ, রস, আদি পঞ্চে, ভাবে নানা রূপ ।  
 আত্মহিতে যত কৰ্ম, সেই মাত্র মূল-ধৰ্ম,  
 কি কব তাহার মৰ্ম, অতি অপরূপ ॥  
 হোয়ে মন অমূল্য, ঘুচাও মনের ভুল,  
 দেখাও সহজ ভাব, স্বভাব অমূল্য ।  
 আর কত দিনে সবে, এক রবে এক কবে,  
 এক ভাবে এই ভবে, হবে এক-রূপ ॥  
 আত্মহিতে হবে রত, সবে মাত্র এক মত,  
 না থাকিবে মতামত, ইচ্ছা-অমূল্য ।  
 ভিন্ন-ভাব যারা ধরে, নানা পথে ঘুরে মরে,  
 আপন নাশের তরে, নিজে খোঁড়ে কূপ ।  
 না চিনিয়া ভাল মন্দ, যত অন্ধ করে বন্দ,  
 নাশিতে তাদের ধ্বংস, বুঝাব কিরূপ ? ॥  
 কালীবাণি গুরে জীব, শিবময় মনোশিব,  
 শিবরূপে না পূজিয়ে, পূজিস্ কিরূপ ? ।  
 বঞ্চনা-মদের ঘোর, বাড়িয়াছে বড় জোর,  
 করিস্ কি মিছে শোর, চূপ চূপ চূপ ॥

ষষ্ঠপদীচ্ছন্দ ।

প্রকাশ করিয়া মৰ্ম, কারে বলি নিজ-কৰ্ম,  
 কোথায় সে খোঁড়া ধৰ্ম, শুকায়েছে অস্থিচৰ্ম,  
 সকলেই পেয়ে শৰ্ম, মম বশ হয়েছে ।  
 কোথা বেদ, কোথা তন্ত্র, আমার স্বতন্ত্র তন্ত্র,  
 কুহক-কলের যন্ত্র, গুঢ়-বীজ মহামন্ত্র,  
 ছেড়ে সবে গুরুমন্ত্র, মম মন্ত্র লয়েছে ॥

বাঁকি কিছু নাহি আর, করিয়াছি একাকার,  
 আয়ারিতো অধিকার, পলায়েছে দেশাচার,  
 পাপ-বোধ আছে কার, ক্রমে সব সয়েছে ।  
 হইয়া বিষম ওজা, মারিয়া কালের গৌজা,  
 বাঁকারে করেছি সোজা, নাহি আর ভার বোঝা,  
 সকলেই হোয়ে সোজা, শিরে বোঝা বয়েছে ॥  
 যে কিঞ্চিৎ আছে বাঁকি, আর কি অপেক্ষা রাখি  
 ঘরে ঘরে বাঁকাবাঁকী, কোথায় রহিবে ফাকি,  
 ওড়াবে সত্যের চাকি, ছোঁড়া-গুলো কয়েছে ।  
 অগতির আমি গতি, আত্মাধীন কাম, রতি,  
 কেহ আর নাহি সতী, বিধবা পেয়েছে পতি,  
 মাচ মাংস খেতে আর, বাঁকি নাহি রয়েছে ॥

ঈশ্বরতো আর নেই, কেটেছি ভ্রমের খেই,  
 নাস্তিকের রাজা যেই, কলির ঈশ্বর সেই,  
 আমার প্রভাবে হবে, নব-মত ধরেছে ।  
 নাহি ভেদ পাত্রাপাত্র, জাতি, ধর্ম, এক-মাত্র,  
 পবিত্র সবার গাত্র, একমতে শিষ্ট-ছাত্র,  
 ছেড়ে গোত্র যত্রতত্র, একছত্র করেছে ॥  
 ব্রাহ্মণ পণ্ডিত কত, অধ্যাপক শত শত,  
 হোয়ে অতি অমুরত, এ মতে দিয়েছে মত,  
 জনমের মত তারা, পূর্বমত হরেছে ।  
 মিছে ধর্ম নাহি খাটে, নাহি নাচে মিছেনাটে,  
 মিছেপথে নাহি হাঁটে, জল খায় এক-ঘাটে,  
 এক ঠাটে এক পাটে, এক মাঠে চরেছে ॥  
 সবাই টাকার বশ, টাকাতেই যত রস,  
 টাকা যার তার বশ, ব্যাপ্ত হয় দিক্ দশ,  
 ধনরূপ-মদ-গন্ধে, ত্রিভুবন ভরেছে ।

পদ গেলে বাঁচা ভার, টাকা কোথা পাবে আর,  
 মারা যাবে পরিবার, হাহাকার হবে সার,  
 সাথে কি পণ্ডিত-গুলো, লোভজ্বরে জ্বরেছে ॥  
 গোটা কত মোটা গুঁড়ি, যেন কাঁঠালের গুঁড়ি,  
 নাহি আর বলে থুড়ি, কেবল মারিছে তুড়ি,  
 কত বুড়ী, কত ছুঁড়ী, শাঁকা চুড়ী পরেছে ।  
 জাতি, কুল পরিচ্ছেদ, কিঞ্চিৎ যা ছিল, ভেদ,  
 সে ভেদ করেছি ছেদ, কারো মনে নাহি খেদ,  
 নিজ নিজ ইচ্ছামত, মত সব ধরেছে ॥  
 গুঁড়ি, হাড়ি, ডোম, মুচি, অণ্ডুটি হয়েছে গুচি,  
 পাইলে রূপার-কুচি, অগ্নিতে সবার কুচি,  
 পাতের প্রসাদ খেয়ে, কত লোক তরেছে ।  
 কুল, শীল, জাতি মানে, যাদের সবাই মানে,  
 মত্ত ছিল অভিমানে, এখন ধনির স্থানে,  
 পদানত হোয়ে কত, চোখে জল ঝরেছে ॥  
 দেখ দেখ, মহারাজ, আমার কেমন কাজ,  
 করিঘা সময় সাজ, মেয়েছি এমন বাজ,  
 সকাম নিকাম কৰ্ম, সেই বাজে মরেছে ।  
 তোমার বিপক্ষ যারা, আমার প্রতাপে তারা,  
 সকলেই বলহারা, ভয়েতে হতেছে সারা,  
 বিবেক, বৈরাগ্য, আদি, কোন্ দেশে সরেছে ॥

---

এমন কি হবে কৃত্র, কেমন তুলেছি সূত্র,  
 টাড়ালে ধরিয়ে সূত্র, হয়েছে ব্রাহ্মণপুত্র,  
 কিরূপ সাহস দেখ, কত বাড়্ বেড়েছে ।  
 নিজ বল প্রকাশিয়া, করিছে অদ্ভুত ক্রিয়া,  
 বাজারের বেণী নিয়া, দারা-পরিচয় দিয়া,  
 জারজাত ছেলে মেয়ে, ঘরকান্না কেড়েছে ॥

সঙ্গ-দোষে পরস্পর, মজিতেছে কত ঘর,  
যে সব আমার চর, তাহারাই সাধু নর,  
জ্বেলের বিপক্ষে সবে, কোসে বাড়্ ঝেড়েছে ।  
হাটে ভাঁড়্ ভেঙে ভাঁড়্, হতেছে ধর্মের বাঁড়্,  
গৃহিণী হয়েছে রাঁড়্, কার সাধ্য করে আড়্,  
নিজ নিজ মতে এনে, অনেকেরে পেড়েছে ॥  
আগে যারা ছিল খাটি, ক্রমে তারা হয় মাটি,  
যত করে আঁটাআঁটি, তত হয় কাটাকাটি,  
ফাটাফাটি কোরে সবে, এক গাড়ে গেড়েছে ।  
হয়েছে সকল শেষ, নির্মল করেছি দেশ,  
প্রায় নাই ঘেঘাঘেঘ, যাহা আছে অবশেষ,  
পালাই পালাই ডাক্, তারা সব ছেড়েছে ॥

বিনোদিনীচন্দ্র ।

দেখ-হে কেমন মজা, কেমন তুলেছি ধবজা,  
যত সব কর্ত্তাভজা, একছত্রে খেতেছে ।  
সকলেরি মন-শাদা, পরস্পর, দিদী, দাদা,  
মেলায় ঢুকিয়া দেখি, মেয়ে, মদে, মেতেছে ॥  
মেলা-মাঝে মেলামেলি, লুকাচুরি, খেলাখেলি  
গায় গায় ঠেলাঠেলি, কলাপাত পেতেছে ।  
যবনার যারা খায়, তাহারাই পুনরায়,  
শ্রদ্ধ-বাড়ী খেয়ে লাড়ু, থালা গাড়ু পেতেছে ॥  
আমার সুভক্ত যারা, প্রবল হইয়া তারা,  
কার্য্য-বলে শত্রুদলে, ঘাঁতে ঘাঁতে ঘেঁতেছে ।  
আগে যারা ছিল বোড়া, এখন হয়েছে টোঁড়া,  
পোড়ামুখ পুড়িয়াছে, সকলেই চেতেছে ॥

অবোধ হিঁদুর নারী, ব্রত ধর্ম্মে ভক্তি ভারি,  
কেমনে করিব বশ, সেই ভয় টুটেছে ।

শিখিছে বিলিতি ভাষা, বালিকার বাড়ে আশা,  
 বই হাতে, উঠে প্রাতে, বিদ্যালয়ে ছুটেছে ॥  
 তত আর নহে কুনো, সাহস বেড়েছে কুনো,  
 পুরুষের স্বাধীনতা, স্বখ, তারা লুটেছে ।  
 ভূগল পড়েছে যারা, জেনেছে সৃষ্টির ধারা,  
 ভেঙেছে মনের ভ্রম, সূর্য্যঅর্ঘ্য উঠেছে ॥  
 বিধবারা আগে যারা, ধরিয়া প্রাচীন ধারা,  
 শিব গোড়ে, পূজা কোরে, কত মাথা কুটেছে ।  
 এখন আমার ডরে, সিঁতের সিন্দুর পরে,  
 শাঁকা খাড়া হাতে নিয়ে, এক দলে জুটেছে ॥  
 প্রথমেতে কাণাকাণি, কিছু কিছু জানাজানি,  
 শেষে কোরে থানাথানি, সাত দেশ ঘুটেছে ।  
 এইতো কলির সন্ধ্যা, পুত্রবতী হবে বন্ধ্যা,  
 ফলাবো অশেষ ফল, ফুল সব ফুটেছে ॥

ছুঁড়ীগুলো ছেলে-বেলা, নাহি করে ছেলেখেলা,  
 পাকা পাকা কথা কয়, মন সব খুলেছে ।  
 দেখিলাম ঘরে ঘরে, পূর্বভাব নাহি ধরে,  
 সাজ সঁজোতির ত্রুত, সকলেই ভুলেছে ॥  
 বেকে বেকে পথ হাঁটে, তেড়া কোরে সিঁতি কাটে,  
 গরবিনী হোয়ে সব, গরবেতে ফুলেছে ।  
 কে আঁটে মুখের সাটে, পুরুষের কাণ কাটে,  
 সুখভোগ-আশা-হাটে, ইচ্ছাধ্বজা তুলেছে ॥  
 যখন যেমন ধরে, তখনি তেমনি করে,  
 নাহি রাখে কোন ক্ষোভ, লোভ দোলে ছুলেছে ।  
 পতির কি সাধ্য হয়, মত ছাড়া কথা কয়,  
 অধীনতা দড়ি ধোরে, কত নীচে ঝুলেছে ॥  
 স্বস্তর, খাণ্ডী কেবা, কেবা তার করে সেবা,  
 নিজ নিজ কর্মভোগ-কুপে তারা উলেছে ।

বাগ মায় কেবা মানে, নারীই সর্বস্ব জানে,  
বধু-প্রেম মধুপানে, যুবকেরা ঢুলেছে ॥

—

দেখিলাম অলি গলি, পরস্পর গলাগলি,  
দিনে রোতে টলাটলি, ভাল খেলা খেলেছে ।  
নাহি আর ঢলাটলি, কেবা করে দলাদলি,  
কোরে কত বলাবলি, বুড়ো-গুলো এলেছে ॥  
সুপাদ্ সম্পর্ক যত, সকলি হয়েছে হত,  
ঘরে ঘরে মনোমত, এক চাল্ চলেছে ।  
বিপরীতে দিলে বোধ, তখনই করে ক্রোধ,  
উপরোধ অহুরোধ, একেবারে টেলেছে ॥  
রমণী হয়েছে হেন, এক ধ্যান এক জ্ঞান,  
পুরুষ দেখিলে ঘেন, আগে আঁখি মেলেছে ।  
মুখে পেটে ভেদ নয়, ফুটে সব কথা কয়,  
নর নারী সমুদয়, মম আঁজা পেলোছে ॥  
ভাঙে তবু নোবেনাকো, শাদা ভাত ছোঁবেনাকো  
একা কেউ শোবেনাকো, মন খুব্ হেলেছে ।  
অধীন রয়েছে যারা, কি করিবে নাহি চারা,  
সাঁতারে হাঁপায়ে তারা, সোঁতে অঙ্গ টেলেছে ॥  
একপোদে\* কোথা খোঁড়া, কোথা তার যত গোঁড়া,  
মেরে তারে যত ছোঁড়া, দুই পায়ে ঠেলেছে ।  
যত সব তীর্থধাম, কেবল রয়েছে নাম,  
বল করি রতি কাম, কোসে ঝাল্ ঝেলেছে ॥  
লাথাল্যাথি হাতাহাতি, ধূমধাম মাতামাতি,  
স্বাধীনতা দীপে বাতি, সকলেই জেলেছে ।  
করিতে ধর্মের লোপ, গাঁথিয়া কোপের টোপ,  
বাসনার সরোবরে, ছিপ্ স্রুতো ফেলেছে ॥

—

\*একপোদে—চতুস্পদ ধর্মের কলিতে কেবল এক পদ মাত্র রহিয়াছে ।



আমার নূতন চেলা, কি কব তাহার খেলা,  
 যত যুবা, তার কাছে, মূল-মন্ত্র পেয়েছে ।  
 যেখানে সেখানে ঘাই, নিয়ত দেখিতে পাই,  
 ছেলে মেয়ে তাবতেই, তার মতে এয়েছে ॥  
 গদগদ ভাবভরে, এক রাগে এক স্বরে,  
 প্রকাশ করিয়া সবে, তার গুণ গেয়েছে ।  
 এই শুভ-সমাচার, করিবারে সূত্রচার,  
 দেশে দেশে দেখ তার, কত দূত ধেয়েছে ॥  
 ডাকে ডাকে হাঁকে হাঁকে, ফাকে ফাকে থাকে থাকে,  
 ঝাঁকে ঝাঁকে, লাখেলাখে, ধরাময় ছেয়েছে ।  
 নেচে কুঁদে সবে বলে, মারুদিয়া বাহুবলে,  
 প্রতিজ্ঞা-নদীর জলে, ডুব্‌দিয়ে নেয়েছে ॥  
 বড় যারা ধনে মানে, তারাই সে মত মানে,  
 সবাই সবার পানে, প্রেমনেত্রে চেয়েছে ।  
 সকল তরুণি নিয়ে, চালাতেছে ঝাঁকে দিয়ে,  
 কেহবা তুলেছে পাল্, কেহ দাঁড়্‌ বেয়েছে ॥  
 পানপাত্র হাতে ধরি, আগেতে শপথ করি,  
 চল চল হোয়ে শেষ, ঢুক ঢুক খেয়েছে ।  
 যাতে হয় একাকার, করি তার, অঙ্গীকার,  
 সমুদয় বিধবার, বিয়ে দিতে চেয়েছে ॥

মহারাজ জয় জয়, ত্রিভুবনে কারে ভয়,  
 মোহ-রসে প্রাণিগণ, সমুদয় গলেছে ।  
 যাজক ব্রাহ্মণ যত, সকলেই অনুগত,  
 মুখে এক, পেটে আর, যজ্ঞমানে ছলেছে ॥  
 ভক্তি পালায়েছে ছুটে, শুধু লয় ধন লুটে,  
 পাঁজী পুঁথি ঘেঁটেঘুটে, কেটেকুটে ভলেছে ।  
 যজ্ঞমান শিষ্য যারা, বিষম বৈকেছে তারা,  
 গুরু, পুরোহিত ধোরে, ছুটি কাণ মলেছে ॥



বিজ্ঞানগ্নে কত শিশু, মজ্জছে ভজ্জছে ঈশু,  
 মনেতে বিকার নাই, একদিকে ঢলেছে ।  
 মশ মশ, যুতা পায়, ঠাকুরের ঘরে যায়,  
 বিছানায় ভাত খায়, রতি কত টলেছে ॥  
 খেয়ে খানা, পড়ে খানা, কতখানা কারখানা,  
 বাড়িতে খানার খোলা, দিবে নিশি জলেছে ।  
 ফিরেছে সবার মতি, নাহি পূজে ভগবতী,  
 আহারের সময়েতে, ভগবতী চলেছে ॥  
 পায়ে দিয়ে বাঁকা বুট, দাঁতে কাটে বিস্কুট,  
 গোটু-হেল ড্যাম ছুট, মা, বাপেরে বলেছে ।  
 এর চেয়ে সুখোদয়, কবে আর কার হয়,  
 দেখ দেখ মহাশয়, আশাতরু ফলেছে ॥

আমার সেবক যত, তারা সব জেঁকেছে ।  
 হাতে করি পরাশর, সরাসর ডেকেছে ॥  
 স্মৃতি, মনু, বেদ আদি, দূরে ফেলে রেখেছে ।  
 কেহ না আদর করে, বড় দায় ঠেকেছে ॥  
 প্রকাশিয়া নব-পথ, নব-মত লিখেছে ।  
 সেই মত খাঁটি বটে, সাহেবেরা দেখেছে ॥  
 ছিল স্মার্ত্ত, স্মার্ত্তপর, তার অর্থ ঢেকেছে ।  
 পুনর্ভবা স্মৃত যত, সতীপুল, থেকেছে ॥  
 অপ্রমাণ যত কথা, গার জোরে টেকেছে ।  
 নানা যোগে, জাগ পেয়ে, কাঁচাতেই পেকেছে ।  
 এক রোকে এক ঝোঁকে, বাঁকেঝাঁকে ঝোঁকেছে ।  
 এক জালে রুই আদি, চুনা পুঁটি ছেকেছে ॥  
 অতি বেগে একরোখা, জোর বায়ু হেঁকেছে ।  
 সে বায়ুর প্রভাবেতে, তাবতেই বেঁকেছে ॥  
 কলঙ্কের কটু-রস, সুধা সম, চেকেছে ।  
 উপহাসে অনায়াসে, গায়ে সব মেখেছে ॥

কেমনে প্রবল হবে, সেই তাক তেকেছে।

শৃঙ্গালের মত সব, এক ডাক ডেকেছে ॥

মহারাজ ! দল-বল খুব জাঁকছে, ক্রমে সব পাকছে, সকলেই ঝাঁকছে, আপন মতে ডাকছে, সুখের বিষয় তাকছে, মৌদা কি কেউ থাকছে ? নিজে এসে বাঁকছে, কেউ পেটে যত দিতে পারে গায়ে শেষ মাখছে, কেউ কুটোকাটা ছাঁকছে, কচি কচি ছেলে যারা তারা এখন চাকছে, কেউ কিছু কি আর ঢাকছে ? স্পষ্ট হোয়েই হাঁকছে, পেটের ভিতর একটি কথা কেহ নাহি রাখছে।

হে মহারাজ ! আমি যাহা যাহা করিয়াছি তাহার শতাংশের একাংশ অতি সংক্ষেপে নিবেদন করিলাম। যদি অনুমতি করেন, তবে আমার প্রধান বন্ধু একাকার-আচার্য্যকে নিকটে আনিয়া বাবাজীচক্র, ভৈরবীচক্র, এবং কুমারীচক্র প্রভৃতি বৃহৎ বৃহৎ ব্যাপারবৃহৎ বিস্তার করি।

মহামোহ।

বাপু হে ! আমি সীমাশূন্য-সন্তোষ-মাগরে নিমগ্ন হইলাম, তোমার এত পরাক্রম, এতদিন তাতো জানিতে পারি নাই, ভাল ভাল, একা তোমা হইতেই আমার অনেক কার্য্য সিদ্ধ হইবে, তুমি এখন সর্বত্র ভ্রমণ করিয়া যাহা যাহা করিতে হয় তাহাই কর !

চার্কাব।

হে মহারাজ ! আমরা তো প্রাণ পর্য্যন্ত পণ করিয়াছি, সাধ্যের ক্রটি কিছুই হইবে না, কিন্তু একটা বড় ভয়ঙ্কর বিষয় আছে, আমি তজ্জন্ম সর্বদাই অতিশয় শঙ্কা করিয়া থাকি, আহা মনে হইলে বাহুজ্ঞানশূন্য হইতে হয়। হে প্রভো ! “বিষ্ণুভক্তি” নামী এক মহাপ্রভাবা-যোগিনী আছে, সে বিবেকের অত্যন্ত সহকারিণী, তাহাকে দর্শন করা দূরে থাকুক, তাহার নাম ও ভয়ঙ্কর-মূর্তিখানা স্মরণ করিলেই মরণকে নিকট বোধ হয়, যদিও বলী কলির পরাক্রমে অধুনা তাহার সর্বত্র তাদৃশ আবির্ভাব নাই, প্রকাশ হইয়া সকলের নয়নপথে ভ্রমণ করিতে পারে না, তথাচ তাহাকে প্রত্যয় নাই, কি জানি, গোপনে গোপনে কখন কি সর্বনাশ করে।

মহামোহ ।

[ ভীত হইয়া কণকাল বিবেচনার পর ]

হে প্রাণাধিক ! বটে বটে, এখন আমার মনে পড়িল, সেই ষোগিনীটে বড় ভয়ঙ্করী, ভাল চার্কাক !—বল দেখি ভাই, জিজ্ঞাসা করি, আমার-দিগের কাম ক্রোধাদি এই সকল বলবান সেনাপতি দেদীপ্যমান্ সত্ত্বে সে কি সাহসে, কি উপায়ে প্রকাশ হইয়া আপনার ক্ষমতা দেখাইতে পারিবে ? তাহার কি এতই সাধ্য ?

চার্কাক ।

ই। মহারাজ ! নিবেদন করি, যদিষ্ঠাৎ কাম ক্রোধাদির বাতাস তাহার পক্ষে অতিশয় হতাশজনক বটে, কিন্তু শত্রুরা এখনো একেবারে হতাশ হয় নাই, তাহারা আশার দাস হইয়া প্রয়াসে আয়াসে উপনিষদের সহিত বিলাসে প্রবোধ-প্রকাশের জন্ত প্রচুরতর প্রযত্ন করিতেছে, সূতরাং নীতিনিপুণ পণ্ডিত-পুঞ্জের উপদেশ ক্রমে জয়প্রত্যাশি অতি ক্ষুদ্র শত্রুকেও সর্বদাই ভয় করিতে হইবেক । কেননা তাহারা কোন এক সূত্রে পশ্চাতে প্রবল হইয়া পদলগ্ন তুচ্ছ এক কণ্টকের দ্বারা মর্মান্তিক কষ্টকর হইলেও তো হইতে পারে, অতএব এখনিই তাহার বিনাশের জন্ত বিশেষ একটা উপায় নির্ণয় করা অতি কর্তব্যই হইয়াছে ।

মহামোহ ।

আমি এখনি তাহার বিহিত উপায় করিব, এতো অতি সামান্য বিষয় । এইক্ষণে তোমরা সকলে বিদায় হইয়া অতি মনোযোগ পূর্বক স্ব স্ব কার্য্য সামাধা কর, এবং সকল স্থানের কর্মচারিদিগেও শীঘ্র শীঘ্র কুশলসংবাদ লিখিয়া পত্র পাঠাইতে অনুমতি কর ।

চার্কাক-‘শিষ্য’ এবং কলি ।

মহারাজ প্রণাম করি, অনুমতি করুন, তবে এখন আমরা বিদায় হইয়া আজ্ঞানুরূপ কার্য্য করি ।

তদনন্তর চার্কাক শীষ্য-শিষ্য এবং কলির সহিত রত্নভূমি হইতে প্রস্থান করিলেন ।

মহামোহ ।

চার্কাব যাহা বলিয়া গেল তাহাতে নিতান্ত তাচ্ছল্য করা উচিত হয় না, অন্ধা ও তাহার মেয়ে শান্তি, অগ্রে এই দুটোকে সংহার করি, পরে সেই সর্বনানী-কালামুখী বুড়ী বাঁড়ীর শ্রদ্ধা করা বাইবে ।

হারের নিকটে আসিয়া ।

কো-হায়, কো-হায়, হিঁয়া কৈ হায়রে । বজ্জাং লোক সৰ্ হাজির হায় নৈ । কাঁই গিয়া, কাঁই গিয়া ? দরয়ান্ দরয়ান্, হিঁয়া আও, হিঁয়া আও ।

অসংস্ক দৌবারিক ।

[ হাত যোড় করিয়া ]

খোদাবন্দ-গরিব-নোয়াজ্, গোলাম্ হাজির হায় ।

মহামোহ ।

দরয়ান্, তোম্ যাকে ক্রোধ আয়োর লোভকো আবি হিঁয়া আনে কহো, বড়া-জরুর, বড়া জরুর—জল্দি, লে-আও, জল্দি, লে আও, তোম্কে হাম্, খসি করেগা,—এলাম্ দেগা ।—আল্‌বত্তা বক্‌সিস্ মেলেগা ।

দৌবারিক ।

জো—হকুম মহারাজ—বহৎ খুব ।

মোঁহা ।

তীরথ বরৎ ছোড়্ দেও, দেও—পাতর পূজ মৎ ।

ধরম্ করম্ ভরম্ ছোড়ো, ছোড়ো শাস্ত্র মৎ ॥

যেত্তা ব্রাহ্মণ্ ছুনিয়ামে, সৰ্ বড়া বজ্জাং ।

গল্‌মে ডোরি, পেট্‌মে ছোরি, মুউমে বুটা-বাং ॥

ব্রাহ্মণ্‌সে, চামার ভালা, যিক্‌ সাং ব্যাভার ।

পুতুলা-সে, কুত্তা ভালা, ফুকে মাজ্‌দুয়ার ॥

মুরং সুরং কিয়া দেখেগ, রহ মেরা সাং ।

খুসি-মে সৰ্ দার পিয়ে খাও শুঁওকা ভাং ॥

যাহা তাঁহা পরোয়া-নারী, যব্ মেলেগা শং ।  
 বেপরোয়া মজা লুটো, অংমে দেকে অং ॥  
 আও আও আও, মেরা পিছে, হও মেরা ভকং ।  
 অসং সঙ্গ বড়া সোজা, কোন্ কহে শকং ॥  
 এহিতো স্বরগ্, কাঁহা পরলোগ, বুটমুট সব্ বাং ।  
 জয়্ মহারাজ্ মহামোহকি, নাম্‌সে স্প্রভাত ॥  
 কিঞ্চিৎ কাল পরেই ক্রোধ এবং লোভকে সঙ্গে লইয়া উপস্থিত ।

ক্রোধ এবং লোভের সঙ্গীক হইয়া রক্তভূমিতে প্রবেশ ।

ক্রোধ ।

[ স্বকীয় স্বভাব প্রকাশ । ]

গীত । অধচ বদ্ধতা ।

রাগিনী ঝিঁঝিঁট । তাল আড়া ।

ওরে, এরা, কেরে দুরাচার ? ।  
 অতি কদাকার, দেখি, অতি কদাকার ॥  
 কি সাহসে দাঁড়াইল সমুখে আমার ? ।  
 ওরে, এরা, কেরে দুরাচার ? ।

ধূয়া ।

মর মর, মর মর, ওরে, এরে ধর ধর,  
 কাট্ কাট্, কেটে ফ্যান্, মার মার মার ।  
 হাদে এটা, ঘেসে ঘেসে, বসেছে নিকটে এসে,  
 গদি ঠেসে, হেসে হেসে, করে কি ব্যাভার ? ॥  
 কিছু নাহি করে ভয়, ঘাড়্ নেড়ে খাড়া রয়,  
 বুক চেড়ে কথা কয়, এত অহঙ্কার ? ।  
 অতি নীচ দুরাশয়, আমার সমান হয়,  
 কত বড় লোক আমি, করে না বিচার ? ।  
 সহিতে না পারি যাহা, সকলেই করে তাহা,  
 কোনমতে ছাড়িব না, কিসে পাবে পার ? ।

এ ব্যাটা, চড়েছে গাড়ী, এ ব্যাটা রেখেছে দাড়ি  
ঠিক যেন, তোলো-হাঁড়ি, মুখ ভার ভার ।

দারা সহ যোগ করি, যতপি স্বভাব ধরি,  
এ জগতে বল তবে, রক্ষা থাকে কার ? ।

কে পারে আমার চোটে, মুখে যেন খই ফোটে,  
স্বর্গ, মর্ত্য কেঁপে ওঠে, ছাড়িলে ছকার ।

মহাবীর আমি ক্রোধ, বোধের কি রাখি বোধ,  
জনমের মত তারে, করেছি সংহার ।

উপরোধ অনুরোধ, হিতাহিত বোধাবোধ,  
কোনোকালে, আমি কারো, ধারিনেকো ধার ।  
পিতা মাতা, বন্ধু ভাই, কিছুই বিচার নাই,  
যখন যাহারে পাই, তখনি প্রহার ।

যে আমারে হিত বলে, তাহা শুনে অঙ্গ জলে,  
আগে যেন গালে গিয়ে, চড়্ মারি তার ।  
কত কত রাজকুল, কাহারো রাখিনি মূল,  
করিয়া জ্ঞানের ভুল, হয়েছি প্রচার ।

পরস্পর আপনারা, বিবাদে পড়েছে মারা,  
শোক পেয়ে দারা-সুত, করে হাহাকার ।  
বিধি, হর, মুরহর হইলে আমার চর,  
অঙ্ক হোয়ে একেবারে, দেখে অঙ্ককার ।

কোথা, হিংসে, প্রাণপ্রিয়ে, শীঘ্র আসি দেখসিয়ে  
দেবলোকে করিয়াছে, স্বর্গ অধিকার ।

পোড়াও পোড়াও কোপে, ওড়াও ওড়াও তোপে  
সমুদয় উড়ে পুড়ে, হোক ছারখার ॥

আমি তরু, তুমি ছায়া, আমি প্রাণি তুমি মায়া,  
মিলন করিয়ে কায়া, ধরি একাকার ।

ধরিলে যুগল-বেশ, অস্থির করিব দেশ,  
অশেষ হইবে শেষ, শেষ থাকা ভার ।

আকাশেরে চলে নিয়া, পাতালে ফেলিব গিয়া,  
পবন, অনল, ক্ষিতি, কোথা রবে আর ? ।



যার বাসে করি বাস, তার ঘটে সর্বনাশ,  
সকলি অসার হয়, নাহি থাকে সার ।  
অনুকূল দেবীলাভি, কোথা শ্রদ্ধা ? কোথা শাস্তি ?  
কোথা দয়া, কোথা ক্ষান্তি, মষ্ট পরিবার ? ।  
শত্রুগণে ফেলো মেরে, একেবারে দেও মেরে,  
জগতে না হয় যেন, প্রবোধ-প্রচার ।  
অগ্নি জ্বালো মন ফুঁড়ে, সকলে মরুক পুড়ে,  
আমরাই সৃষ্টি জুড়ে, করিব বিহার ।

হিংসা ।

গৌরবিশীলচন্দ্র ।

হাদে, দেখি ঘরে ঘরে, সকলেই খায় পরে,  
সুখে আছে পরস্পরে, আজো এরা মরেনি ? ।  
কত সাজে সাজ্-করে, গরবেতে ফেটে মরে,  
এখনো এদের ঘরে, যম্ এসে ধরেনি ? ॥  
এই সব্ জামা জোড়া, এই সব্ গাড়ী ঘোড়া,  
এ সব্ টাকার তোড়া, চোরে কেন হরেনি ? ।  
আরে, ওরা, ভাগ্যবান্, বাড়িয়াছে বড় মান,  
গোলাভরা আছে ধান্ লক্ষী আজো মরেনি ॥  
মরু এটা যেন হাতী, দশ্ হাত বুকে ছাতি,  
করিতেছে মাতামাতি, জ্বরে কেন জ্বরেনি ? ।  
হাদে, মাগী, কালামুখী, ঠিক যেন কচিখুকী,  
পতিসুখে বড় সুখী, ঠেঁটি কেন পরেনি ? ॥  
মরু মরু ওই ছুঁড়ী, পরেছে সোণার চুড়ী,  
বেঁকে চলে, মেরে তুড়ি, ফুল্ তবু ঝরেনি ।  
দেখ্ দেখ্ নিয়ে মিঠে, খেতেছে কি, পুলিপিতে,  
এখনো এদের ভিটে, ঘুঘু কেন চরেনি ? ॥



বিবাদিনীচ্ছন্দ ।

তাল, খেমটা ।

প্রাণে আরু সয় না । প্রাণে আরু সয় না ।  
সয় না-রে, প্রাণে আরু সয় না, সয় না ॥

---

খোঁপা বেঁধে, পেটে পেড়ে,  
চোপা করে, নং নেড়ে,  
ঠেকারে বাঁচে না আর, গায়ে দিয়ে গয়না ।  
গায়ে দিয়ে গয়না ॥  
শুয়েছে ছাপোরু খাটে, রয়েছে রাণীর ঠাটে,  
রাগেতে গুমুরে মরি, গতোরু তো বয় না ।  
গতোরু তো বয় না ॥

প্রাণে আরু সয় না, প্রাণে আরু সয় না ।  
সয় না-রে, প্রাণে আরু সয় না, সয় না ॥

---

দেওর বিষম ছাই, ননদীরে রক্ষা নাই,  
মরুক তাদের ভাই, তাতে কিছু বয় না ।  
তাতে কিছু বয় না ॥  
বুকে কোরে পতি লোয়ে, আমি থাকি এয়ো হয়ে,  
জতিনী সতিনী মাগী, রাঁড়্ কেন হয় না ।  
রাঁড়্ কেন হয় না ।

প্রাণে আরু সয় না, প্রাণে আরু সয় না ।  
সয় না-রে, প্রাণে আরু সয় না, সয় না ॥

---

ভাই, বুন, যত-গুলো, সকলেই যাক চুলো,  
নেড়া হোক মুলোখেং, কিছু যেন, রয় না ।  
কিছু যেন রয় না ॥

লাতি মেরে দেও তেড়ে, ওরা যাক দেশছেড়ে,  
খালা, ঘড়া, কড়া, কেঁড়ে, কিছু যেন লয় না।

কিছু যেন লয় না ॥

প্রাণে আরু সয় না, প্রাণে আরু সয় না।

সয় না-রে, প্রাণে আরু সয় না, সয় না ॥

বাপ্ বড়ো, বড় ঠক্, মুখে মিঠে হাড়ে টক্,  
বোসে আছে যেন বক্, তত্ব কভু লয় না।

তত্ব কভু লয় না ॥

উদরে ধরেছে যেটা, সাক্ষাৎ ডাকিনী সেটা,  
দেখিলে শরীর জলে, ঠিক যেন ময়না।

ঠিক যেন, ময়না ॥

প্রাণে আরু সয় না। প্রাণে আরু সয় না।

সয় না-রে, প্রাণে আরু সয় না, সয় না ॥

ক্রোধ।

[ বাহবিস্তার পূর্বক হিংসাকে কোলে করিয়া ]

হে প্রিয়ে প্রাণেশ্বর হিংসে ! এসো এসো সদয়চিত্তে আমার হৃদয়ে হৃদয়  
সংলগ্ন কর।—তুমি একবার আপনার বিশ্ববিদেষিণী বিষমামূর্ত্তি প্রকাশ  
কর, তোমার গাত্রে নিরন্তর কেবল অনল শিখা প্রজ্জলিত হইতে থাকুক।  
ক্ষণমাত্র যেন নির্বাণ না হয়। তোমার প্রভাবে এই দেখ, আমি কেমন  
এক ব্যাপার করি, গো-হত্যা, ব্রহ্মহত্যা, গুরুহত্যা, পিতৃহত্যা, মাতৃহত্যা,  
ভ্রাতৃ-হত্যা, পুত্রহত্যা, স্ত্রীহত্যা, জ্ঞাতিহত্যা, কুটুম্বহত্যা এবং ভ্রূণহত্যা  
প্রভৃতি যতপ্রকার হত্যা আছে,—তাহার দ্বারা সমস্ত কুল একেবারে  
সমূলে নিপাত করিব।—কিছুই রাখিব না, আমারদিগের সম্পূর্ণ প্রভাব  
দূরে থাক্, আবির্ভাবের উদ্রেক মাত্রেই মানব ও মানবী সকলে এখনিই  
অত্যন্ত চঞ্চল হইবে, অর্ধৈর্ষ্য হইয়া কার্যসাধনের পথ দেখিতে পাইবে না।

হিংসা।

হে নাথ! লোকের এ, যে, বিষয় ভ্রান্তি,—আমার নিকট কোথায় শান্তি?  
বিপক্ষদিগের লক্ষ লক্ষ থাকিলেও কাক-ক্রান্তি বলিয়া লক্ষ্য করিনে।  
আমি এই অরি-পথ রোধ করিয়া ব্রহ্মাণ্ডময় শরীর বিস্তার করিলাম।

—০—

লোভ।

[সভা মধ্যে স্বভাব প্রকাশ।]

সংগীতচ্ছলে বক্তৃতা।

বল বল, কিসে হবে, ক্ষুধা নিবারণ?  
কঠোর জঠরজালা, করে জালাতন ॥

ধূম।

মাধ্ কোরে দিই গাল্, এত চাল্ এত ডাল,  
এক দিনে গেল কাল্, কি করি এখন?  
তেল, লুণ, নাই ঘরে, হাঁড়ী ঠন্ ঠন্ করে,  
নূতন করিতে হবে, সব আয়োজন ॥  
সকলেরি মুখ-বাঁকা, কোথা গেলে পাব টাকা,  
কার্ কাছে যেতে পারি, পেতে পারি ধন?  
চুরি কোরে আনি কড়ি, পাছে শেষ ধরা পড়ি,  
দিয়ে দড়ি হাতে খড়ি, করিবে শাসন ॥  
যতই বাড়িছে বেলা, ততই ক্ষুধার ঠেলা,  
আজ্ বুঝি কপালেতে, হোলো না ভোজন।  
চল দেখি হাটে যাই, চিড়ে মুড়ি যদি পাই,  
ফাকা ফুকা খেয়ে তবে, বাঁচাব জীবন ॥  
এই দেখি শত শত, বড় বড় ধনি যত,  
আমারে করে না কেন, ধন বিতরণ?  
গোয়ালার বাড়ী ওই, ভাঁড়্ ভরা ছানা দই,  
চুপি চুপি কেন তাই, করিনে হরণ?  
ফলবান যত গাছ, ফলেছে বাছের বাছ,  
পুকুরেতে কত মাচ, না হয় গণন।

গাছে উঠে, ফল পাড়ি, জড় করি কাড়ি কাড়ি,  
 যত পারি বাড়ি নিয়ে, করিব গমন ॥  
 পুকুরের কর্তা যারা, এখানেতো নাই তারা,  
 ছিপ্ ফেলে ধরি মাচ, কে করে বারণ ? ।  
 দেখে যদি ছিপ্ স্রুতো, না হয়,—মারিবে জুতো,  
 ধুলো ঝেড়ে চোলে যাব, মুদিয়ে নয়ন ॥  
 যা হবার তাই হয়, মিছে কেন করি ভয়,  
 পেটে খেলে পিটে সয়, এইতো বচন ।  
 চুরি কোরে নং, ঢেঁড়ি, সে দিনে খেটেছি বেড়ী  
 না হয় আবার গিয়ে, খাটিব তখন ॥  
 বেড়ী নয়, মল পরি, মাটি কেটে, দিন হরি,  
 কারাগার, সে আমার, শশুর-সদন ।  
 হাদে ওই থালখানা, যদি ভাই যায় আনা,  
 দুদিন-তো হবে তায়, স্রুখেতে যাপন ॥  
 ধোবারা কাপোড় কাছে, ভাল ভাল ধুতি আছে  
 শুকুতে দিয়েছে সব, চিকন-বসন ।  
 সবুজ, সফেদ, লাল, পাল্লাদার বেড়ে মাল,  
 আনিয়াছে পাল পাল, খোঁট্টা মহাজন ॥  
 মোগোল, পাঠান কত, কাবেলের মেয়া যত  
 উঠে উঠে, আনিতেছে, করিয়া যতন ।  
 এসব স্রুথের যোগ, যদি নাহি হয় ভোগ,  
 তবে কেন করি মিছে, শরীর-ধারণ ? ॥  
 বেনের দোকান লোট,—রূপা সোনা, টাকা, নোট,  
 বেঁধে মোট, ছোট ছোট—পালা ওরে, মন ॥

[ অশ্লিষ্টে অবলোকন পূর্বক । ]

এই দেখি পেট ডোঙা, ঢেঁকুর্ উঠিছে চোঙা,  
 হাতী, ঘোড়া, কত কত, করেছি ভক্ষণ ।

কোথায় গিয়েছে গোলে, আবার উঠেছে জোলে,  
 দেরে দেরে খেতে দেরে, বাঁচারে এখন ॥  
 কটাক্ষেতে দিয়ে টান্, এখনিই আন্ আন্,  
 থান্ থান্ কোরে খাই, এতিন্ ভুবন ।  
 প্রিয়তমা তুষা সতী, আমি তার প্রাণপতি,  
 এই দেখ বুকে তারে, করেছি স্থাপন ॥  
 আমাদের ছোয়ে বশ, মনের বিষয়-রস,  
 মুহূর্তে ব্রহ্মাণ্ড কোটি, করিছে সৃজন ।  
 আমার কারণে তাঁর, নিদ্রা নাই একবার,  
 বাসনার পথে শুধু, করেন্ ভ্রমণ ॥  
 দেহ হোলে নিদ্রাকুল, তবু নাই তার ভুল,  
 স্বপনে আপন ভাব, করেন্ জ্ঞাপন ।  
 আমাদের ঘোর বেগ্, কিসে তিনি নিরুদ্ধেগ,  
 মন বিনা এই বেগ্, কে করে ধারণ ? ॥  
 হেন সাধ্য কার আছে, কে যায় মনের কাছে,  
 মনেরে প্রবোধ দিয়া, কে করে বারণ ? ।  
 যদি কেউ খড়িপেতে, কোনরূপে গুণে গৈঁথে,  
 আকাশের কত তারা, করে নিরূপণ ॥  
 যদি কেউ এ জগতে, উপায়েতে কোনমতে,  
 প্রতাপে করিতে পারে, বাতাস বন্ধন ।  
 কোনরূপে যদি কেউ, জলধির যত ঢেউ,  
 রোধ করি একেবারে, করে নিবারণ ॥  
 প্রকৃতির এ সংসারে, কোনরূপ অস্ত্রধারে,  
 যতপি করিতে পারে, আকাশ-খণ্ডন ।  
 পূর্বদিগে প্রাতে রবি, প্রভাবে প্রকাশে ছবি,  
 সে উদয় রোধ যদি, করে কোন জন ॥  
 এসব সম্ভব নয়, সম্ভাবনা যদি হয়,  
 হয় হয়, হোলো হোলো, কে করে বারণ ।  
 মনেরে কে দেবে বোধ্, লাঠি ধোরে আছে ক্রোধ্,  
 করিবে আমায় রোধ্, কে আছে এমন ? ॥

[ তুকার মুখচুষন পূর্বক ক্ষুধার অত্যন্ত কাতর হইয়া আর নিগে  
মুখ করিয়া পেটে হাত দিয়া মুখভক্ষিয়া । ]

ওরে, আর, যে, বাঁচিনে, পেট জোলে যায়, জোলে যায়, ওরে কিছু  
দেবে, দেবে ।

পেটের নিকটে আর, কিছুতে না পাই পার,  
সমুদয় অন্ধকার, করি দরশন ।

চুকিয়াছে ভস্মকীট, না মরে ক্ষুধার ছিট,

চুমুকেতে কত আর, করিব শোষণ ? ॥

উঠিয়াছে খাই খাই, না মেটে আশার খাই,

খাই খাই রবে সবে, ছাড়িছে বচন ।

ঠাই ঠাই ডাঁই ডাঁই, যেন পর্বতের চাঁই,

কোথা হোতে এসে করে, কোথায় গমন ? ॥

এই দেখি, এই এই, ক্ষণপরে নেই নেই,

এ খেয়ের খেই কেটা, করে নিরুপণ ? ।

কেবা বাছে পচা, সড়া, কেবা বাছে বাসিমড়া,

যত পারি তত করি, উদরে ধারণ ॥

ওই যে, ঠাকুর ঘরে, বামুনেরা পূজা করে,

বহুবিধ খাওয়া নিয়া, করে নিবেদন ।

ওতো কভু শুদ্ধ নয়, এঁটো করা সমুদয়,

কতক্ষণ আগে আমি, করেছি ভক্ষণ ॥

ওদের কুলের-বধু, প্রফুল্ল ফুলের-মধু,

কেহ নাহি পায় যার, দেখিতে বদন ।

কত দিন আগে আমি, হয়েছি তাহার স্বামী,

ঘরে বোসে, মনে মনে, করেছি রমণ ॥

ওরা পেয়ে খাট্ খানা, স্বেদে হোয়ে আট্ খানা

ধোরে কত ঠাট্ খানা, করেছে শয়ন ।

সকলের অগোচরে, সময়ের অবসরে,

কত দিন শুয়ে তায়, করেছি যাপন ॥

দেবপতি তারাপতি, হোলো গুরুদারাপতি,

তাহে কিছু একা নয়, কামের সাধন ।

সম্মুখে হইল লোভ, না ভুগিলে পায় কোভ,  
 সেধে কেঁদে পূজে ছিল, আমার চরণ ॥  
 আমি জাগি সর্ব আগে, কাম, ক্রোধ, পরে জাগে,  
 না চাগালে কেবা চাগে, সবারি মরণ ।  
 মানসের ভালবাসা, মানসেই ভালবাসা,  
 আমার চরণে আশা, লোয়েছে শরণ ॥  
 বিধি, হরি, স্মরহর, সেবা করে নিরন্তর,  
 আমারে না দিয়ে কিছু, করে না গ্রহণ ॥  
 ধর্মের যে পুত্র হয়, যারে লোকে যম কয়,  
 সে যমের উচ্চপদ, আমার কারণ ।  
 আমার সেবক যারা, দারুণ চতুর তারা,  
 চতুরতা কেবা জানে, তাদের মতন ॥  
 ডুব্ দিয়ে জল খায়, শিব নাহি টেরু পায়,  
 নল-দিয়ে, দুধ করে, উদরে শোষণ ।  
 রেখে বস্তু অবয়ব, জিব দিয়ে চাটে সব,  
 জিলিপির ফের-ভেঙে, করিবে ভোজন ॥  
 পিতা, মাতা, দেব, গুরু, সবার উপরে গুরু,  
 নিজ এঁটো, সকলেরে করে বিতরণ ॥

[ আবার আর এক দিগে চাহিয়া । ]

ওরে, এ, কার দোকান রে ? কার দোকান ?

বহুতা-চ্ছলে সংগীত ।

তাল একতাল ।

হায় হায় মজিল নয়ন । কি করি এখন,

বল কি করি এখন ? ।

অপরূপ মনোলোভা, আহা মরি কিবে শোভা,

জনমে করিনি কভু, হেন, দরশন ॥



হায় হায় মজিল নয়ন ।

আহা এই, নদীতটে, দোকান্ জাঁকালো বটে

একেবারে খুলেগেল, ভুলেগেল মন ।

বিদ্যাবর, পানতুয়া, বাসিত-চন্দন,-চুয়া,

ভাসিছে হাসির রসে, কিবে স্নগঠন ॥

পাক্ রেখে কড়া কড়া, ভাজিতেছে ছানাবড়া,

পড়ে রস্, টস্ টস্, মুখের-বচন ।

স্বরূপ, চিবুক-তাজা, যেন বর্জ্যমেনে-খাজা,

অথবা, কি, সরভাজা, স্চারু-বদন ? ॥

মরি মরি কিবে নাসা, নিখুতি-সন্দেশ-খাসা,

মনোহরা, মনোহরা, শোভিছে অবণ ।

পয়োধর তিলেগজা, সাজানো রয়েছে মজা,

আয় আয় বোলে মন, করে আকর্ষণ ॥

দেহেতে লাবণ্য-নীর, যেন পাতা-সাজোক্ষীর,

ঢল ঢল সর তায়, স্খের যৌবন ।

এই ক্ষীর, এই সর, স্খমধুর বহুতর,

হায়, আমি কতক্ষণে, করিব ভোজন ? ॥

দিবে নিশি জলে খোলা, সদাই রয়েছে খোলা,

এক মনে গড়িতেছে, কত শত মন ।

নাহি দেখি, দান, তোলা, মনে মনে মনতোলা,

সে মন, ওজনে কত, কেজানে কেমন ? ॥

যাই দেখি মনে এঁচে, যদি কিছু দেয় যেচে,

প্রতিগ্রাহী হোয়ে তবে, করিব গ্রহণ ।

না গেলেতো নয় নয়, যেতে এই করি ভয়,

বোধ হয়, জিলিপি, জিলিপি, যেন মন ॥

হে প্রিয়ে তুষে! তুমি আপনার পরাক্রম একরূপে প্রকাশ কর, যেন  
কোনমতেই কাহারো মনে তৃপ্তি ও শান্তির উদয় না হয় ।

তৃষ্ণা ।

গীতচ্ছলে বক্তৃতা ।

আমার এ পোড়া পেট, কিছুতেই ভরেনা ।

কিছুতেই ভরেনা ॥

আমার এ পোড়া পেট, কিছুতেই ভরেনা ।

অনন্ত ব্রহ্মাণ্ড চলে, কাঁড়ি কোরে দেও ফেলে,  
নিখালে করিব শেষ, এক কোণে ধরেনা ॥

আমার এই পোড়া পেট, কিছুতেই ভরেনা ।

কিছুতেই ভরেনা ॥

কাস্ত নই দিনে রেতে, বসেছি আটোল পেতে,  
কখনই পূরিবেনা, কোঁচড় আমার ।

যত পাই পেটে ভরি, সমুদ্র শোষণ করি,  
তথাচ রয়েছে খালি, উদর ভাণ্ডার ॥

কিছুতে না হয় তৃপ্তি, সন্তোষের কোথা দীপ্তি,  
আমার ভয়েতে তারা, নিকটেতে চরেনা ।

আমার এ পোড়া পেট, কিছুতেই ভরেনা ।

কিছুতেই ভরেনা ॥

কোনমতে নাহি আলি, কিসে হবে আংখালি,  
দশন-ঘষণে সব, করি চূর মার ।

জঠর অনলে পুড়ে, ছাই হোয়ে যায় উড়ে,  
কোথায় গিয়েছে তার, চিহ্ন নাই আর ॥

উদরেই সমুদ্র, কোথায় উদরাময়,

পেট ফাঁপা দূরে থাক, বায়ু কভু সরেনা ।

আমার এ পোড়া পেট, কিছুতেই ভরেনা ।

কিছুতেই ভরেনা ॥

বাসনার হোরে বশ, খেতেছি বিষম-রস,  
করেছি অখিলময়, রসনা-বিস্তার ।  
আমার বিক্রম যথা, শাস্তির সঞ্চার তথা,  
বিষম ভ্রাস্তির কথা, বিশাল ব্যাপার ॥  
আমার কি আছে ঘুম, কেবল ভোগের ধুম,  
যত পাই, তত খাই, আশা কভু মরেনা ।  
আমার এ পোড়া পেট, কিছুতেই ভরেনা ।  
কিছুতেই ভরেনা ।

[ ক্রোধ, হিংসা, লোভ এবং তৃষ্ণার মহামোহের নিকট গমন । ]

মহারাজ জয়জয়কার, জয়জয়কার । আমরা সকলেই প্রণাম করিতে আসিয়াছি, আজ্ঞা করুন, কি করিতে হইবে ?

মহামোহ ।

ওহে, শ্রদ্ধার কণা শাস্তি আমারদিগের বিরুদ্ধে অতিশয় বিপক্ষতা-চরণ করিতেছে, অতএব যে প্রকারে হয়, তোমরা সকলে একত্র হইয়া এখনিই তাহাকে সমুচিত শাস্তি প্রদান কর ; তাহার যেন আর গতিশক্তি না থাকে ।

( ক্রোধ এবং লোভ, সজীক হইয়া । )

যে আজ্ঞা মহারাজ, তাহাকে সমূলেই নিপাত করিব ।

তদনন্তর ক্রোধ এবং লোভ স্ব স্ব স্ত্রী সহিত রঙ্গভূমি পরিত্যাগ করিলেন ।

মহারাজ মহামোহ ।

( মনে মনে বিতর্ক পূর্বক )

ওহে সভাসদ-গণ ! ভাল তোমরা বিবেচনা কর দেখি, শ্রদ্ধা-তো আমাদের দাসীর দাসী । শাস্তি সেই শ্রদ্ধার কণা, তাহাকে-তো বিনাশ করিবার বিলক্ষণ এক সহজ উপায় আছে, সেই শ্রদ্ধাকে উপনিষদেবীর নিবাস হইতে কেশাকর্ষণ পূর্বক আনয়ন করিয়া সংহার করিতে পারিলেই এই শাস্তি মাতৃবিচ্ছেদ-শোকানলে আপনি-দগ্ধা

হইয়া তৎক্ষণাৎ প্রাণত্যাগ করিবে।—আমার বিবেচনায় “মিথ্যাদৃষ্টি”-  
নামী বেষ্টাই কেবল এই কৰ্ম্মের যোগ্যপাত্রী, অতএব তাহাকে নিয়োগ  
করাই কর্তব্য, “বিভ্রমাবতী” দাসী গিয়া এখনই তাহাকে ডেকে  
আনুক।

( পরে দ্বার সমীপে গিয়া । )

“বিভ্রমাবতী” তুই এই দণ্ডেই “মিথ্যাদৃষ্টিকে” ডেকে আন।

বিভ্রমাবতী ।

( নিজ গুণগরিমা প্রকাশ । )

গীত ।

রাগিনী বাহার । তাল খেমটা ।

দিন্ দুপুরে চাঁদ উঠেছে, রাৎ পোয়ানো ভার ।

হোলো পূর্ণিমেতে আমাবস্থা,

তেরো-পহর্ অন্ধকার ॥

এসে বেন্দাবনে বোলে গেল, বামী বষ্টমী ।

একাদশীর্ দিনে হবে, জন্ম-অষ্টমী ॥

আর্ ভাদর্ মাসের সাতুই পোষে,

চড়ক পূজোর্ দিন্ এবার । ১

সেই ময়রা মাগী মোরে গেল, মেরে বুকে শূল,

বামুনগুলো ওষুদ্ নিয়ে মাথায় বোচ্ছে চুল,

কাল্ বিষ্টিজলে ছিষ্টি ভেসে,

পুড়ে হোলো ছারে থার ॥ ২

ঐ সৃজ্জিমামা পূবুদিগে, অস্তে চোলে যায়,

উত্তুর দখিন্ কোণ্ থেকে আজ,

বাতাস্ লাগ্চে গায় ।

সেই রাজার্ বাড়ীর্ টাটু ঘোড়া,

শিং উঠেছে দুটো তার ॥ ৩

ঐ কলু রামী, ধোপা শামী, হাসতেছে কেমন্ ।

এক্ বাপের পেটেতে এরা, জন্মেছে কজন্ ॥

কাল্ কামরূপেতে কাক মরেছে,  
কাশীধামে হাহাকার ॥ ৪

যে আজ্ঞা, মহারাজ । তাকে ডেকে আনি ।

কিঞ্চিৎ পরেই “বিভ্রমাবতীর” সহিত মিথ্যাদৃষ্টির আগমন ।

মিথ্যাদৃষ্টি\* ।

[ আপনার গুণগৌরব প্রকাশ । ]

গীত ।

রাগিণী বাহার । তাল খেম্টা ।

কোর্ক কত নিজ গুণ প্রকাশ ।

আমার বাতাসে হয় সর্বনাশ ॥

আমার ছায়ার আগে, সাধ্য কে দাঁড়ায় ।

ভয়ে উক্কু থুক্কু, ফল্‌না, তুক্কু শুক্কু, হোয়ে যায় ॥

আমায় দেখলে পরে অন্নপূর্ণ,

আপ্নি করেন উপবাস ॥ ১ ॥

আমার মিষ্টি কথা, যষ্টি লাগে গায় ।

যদি আড়নয়নে দিষ্টি করি, ছিষ্টি উড়ে যায় ॥

আমার পদাঙ্গনে ঘু-ঘু চরে,

হাড়ে গজ্জায় দুকোষাস ॥ ২ ॥

টল টল টল টল নাচিতে নাচিতে

খল খল বদনে হাসিতে হাসিতে

ওলো ও সখি বিভ্রমাবতী ! আমাকে কেমন দেখাচ্ছে, দেখ্ দেখি ?  
আমার কি আর সে কাল আছে গা ? সে রস্ নাই, সে কস্ নাই,  
সে কিছুই নাই, কেবল এক ঠাটখানা আছে । হালো বুন, এই ঠাট্টা  
দেখে লোকে কি আমায় ঠাট্টা কোর্কে ? আমি বুড়ো হয়েছি,—  
হাঁগো ! রাজা আমায় কেন ডাকছেন ?

\* মিথ্যাদৃষ্টি—নাস্তিকতা বুদ্ধি ।

## বিভ্রমাবতী ।

ওলো দিদি !—তুই কি কখনো বুড়ো হবি-গা ? সমস্ত মেয়েগুলো তোৰ কোথায় লাগে ? এমন্ চোখের চাউনি,—এমন্ চুলের ছাউনি—এমন্ দেহের ঠমক্—এমন্ ধারা জমক্—আর কি কারো আছে লো ? তোৰ বয়েস্ যত ঘুন্য়ে উঠ্ছে, শরীর তত উন্য়ে উঠ্ছে, রূপ যেন উল্সে উঠে চোকে চোকে বোকে বোকে পড়্চে গা। তোৰ এই ঘোবনের গাঙে কি কখনো ভাঁটা হবে বুন ।—চিরকাল কোটালের জোয়ার ভরা থাকবেই । তবে বুন বলতে কি ।—দিদি, বোলে পর তুই আমার উপর তো বেজার হবিনে ?—তোৰ গয়নাগুলো ভাল বটে, কিন্তু তুই পছন্দসই পোন্তে জানিস্নে,—বলিস্ যদি আমি তোরে আচ্ছাকোরে মনের মত সাজ্য়ে দি ।—ত্যাখ্ এই পায়ের-মল্ দুগাছা খুলে নিয়ে দুই নাকেতে ঝুল্য়ে দে । আমি একটা গজাল দিয়ে নাক্ দুটো ছেঁদা কোরে দি । আর ত্যাখ্ ।—নাকের এই নং গাচ্টা খুলে বাঁ-পার কোড়ে আঙুলে পোরে ফ্যান্ । চোকের কাজল্ মুছে নিয়ে দুই গালেতে মাখ্ দেখি । দিদি,—তুই হাজার নাগরের এক নাগরী । তাদের আয় পয়্ ও নিজের এয়োৎ রাখবার জন্তে একজোড়া সোণার শাঁকা পোন্তে তো হয় ।—তা হোলে তোৰ আশ্চজ্জি শোভা হবে ।

## মিথ্যাদৃষ্টি ।

ওলো সই, বেশ্ বলেছিস্, এই বেশ্ বেশ্ বটে ।

## বিভ্রমাবতী ।

দিদি !—পুরুষেরা বলে “আপক্ৰুচি খানা, পরক্ৰুচি পেঁদনা ।”—আমি যখন পোষাকপোরে জাঁক জম্কে পাড়া করি,—তখন পথের সকল্ লোকটা দেখে অম্নি ধন্নি ধন্নি ধন্নি করে ।—আর আমার “তিনি” আল্লাদে আটখানা হোয়ে গল্তে থাকেন ।—ভাল দিদি, জিজ্ঞাসা করি,—তোৰ চোক্ দুটো কেন ঢুল্ ঢুল্ কোচে ? ।

## মিথ্যাদৃষ্টি ।

( আল্লাদে গদগদ হইয়া মুখের ঠাট করিয়া হাসিতে হাসিতে । )

আর বুন, ও কথা তোরে কি বোল্বে ?—কি জিজ্ঞাসা করিস্ ? আমার কি আর দিন্ রাত্তির নিদ্রে আছে ? এই রাজবাটীর ছেলে

বুড়ো সকলগুলোই আসছেই আসছে।—চল্ বাঁকে এক দণ্ড অবসর পাইনে, আমি একা নারী, তাহারা সহস্র পুরুষ, এতে কি আর ঘুম আছে-লো ?

বিভ্রমাবতী ।

ওলো দিদি ! শুনে যে বড় আশ্চর্য্যি বোধ হচ্ছে, কামের রতি, লোভের তেষ্ঠা—ক্রোধের হিংসে, এই সকল ঘরের গিন্নী বার্মী আছে, তারা কি কেউ তোমার উপর বেজার হয়না গা ?।

মিথ্যা দৃষ্টি ।

কি বুন ? তারা আবার বেজার হবে ? তারাইতো সব ধোরে বেঁধে এনে গোংয়ে দেয়। আমি কখনো কাউকে যেচে ডাকিনে, হাঁলো একি বলবার কথা ? আপ্ত মুখে বলা নয়, হাদ্-দেখ্, রাজ্‌বাড়ীর ঐ বোউ-গুলো, মেয়ে-গুলো, আমায় ছেড়ে একরত্তি স্থির থাকতে পারে না।—হাঁলো সই, আমাকে কি ভাল দেখাচ্ছে ? রাজা দেখলে পরতো খুসি হবেন ।

বিভ্রমাবতী ।

দিদি !—দেখিস্, রাজা দেখলে পরেই অগ্নি মুচ্ছ যাবেন, এলুয়ে পোড়বেন ।

রঙ্গিনী চোঁপদী ।

যৌবন গিয়েছে ঢোসে, শরীর পোড়েছে খোসে,  
তবু আছ ঠিক বোসে, ঠোঁটে দিয়ে কস্-লো,  
ঠোঁটে দিয়ে কস্ ।

ভাল ভাল ভাগ্য জোর, কটাক্ষেই কর ভোর,  
এখনো লাবণ্য তোর, করে টস্ টস্ লো,  
করে টস্ টস্ ॥

তোয়েরি তোমার চেয়ে, এমন কে আছে মেয়ে,  
ঈশৎ ভক্তি চেয়ে, কর সব বশ লো,  
কর সব বশ ।



তুমি দিদি কল্পলতা, সমাদর যথা তথা,  
পড়িলে তোমার কথা, সবে গায় যশ লো,  
সবে গায় যশ ॥

স্থিরভাবে অষ্ট যাম, পদানত রতি কাম,  
বায়ুবেগে তোর নাম, ছোট্টে দিগ দশ লো,  
ছোট্টে দিগ্ দশ ।

দলহীন হোলো কলি, তথাচ মোহিত অলি,  
হালো দিদি বুড়ো হলি, তবু এত রস লো, ?  
তবু এত রস ? ।

মিথ্যাদৃষ্টি ।

হালো সই !—তোরা কয়্ বুন ?

বিভ্রমাবতী ।

বুদী মাসী, ক্ষুদী পিসী, বিম্বলী গোয়ালিনী, আর আমি, আমরা  
এই চারটি বুন ।

মিথ্যাদৃষ্টি ।

সই !—আজ্ শেষ বেলাটা রাজ্জার সঙ্গে দেখা কোর কি ?

বিভ্রমাবতী ।

দিদি !—রাং পর তেরো, কি সতেরো । ঐ মাতার উপর সৃজি  
ঝিক্ মিক্ কচে । এই সময়টাই ভাল সময় ।

দিদি !—ঐ মহারাজ্ সিন্ধেসনে বোসে আচেন্, তুমি তাঁহার নিকট  
শীগ্গির যাও শীগ্গির যাও ।

মিথ্যাদৃষ্টি ।

মহারাজ্ ! আজ্জা করুন, আমি আপনার দাসী, “মিথ্যাদৃষ্টি” প্রণাম  
করি, আমাকে কেন ডেকেচেন ?

মহামোহ ।

গীত ।

রাগিণী বারোয় ।। তাল আড়া ।

ছিছি ধনি ওখানে দাঁড়ায়ে কেন আর ? ।

এসো এসো কোলে এসো, বোসো একবার ॥

আজ্জ্ব একি শুভদিন, আমি তব প্রেমাধীন,  
 দেখি নাই বহু দিন, বদন তোমার ।  
 তোলো প্রিয়ে মুখ তোলো, মুখের আঁচল  
 খোলো, শোভায় হরণ কর, মনের আধার ॥  
 করযুগে হেঁদে ধর, হর হর তাপ হর,  
 মানস প্রফুল্ল কর, এখনি আমার ।  
 তুমি-লো প্রাণের প্রাণ, বাহিরেতে কেন প্রাণ,  
 তোমায় করেছি দান, হৃদয় ভাঙার ॥  
 শুন শুন প্রাণ প্রিয়ে, দেহ নিয়ে মন নিয়ে,  
 প্রাণের আসন গিয়ে, কর অধিকার ।  
 নধর-পল্লব যেন, অধর শোভিছে হেন,  
 নৃপূরের ধ্বনি পায়, ভ্রমর-ঝঙ্কার ।  
 বচন কোকিল-স্বর নয়নেতে পঞ্চশর,  
 করেছে বসন্ত তব, দেহ অধিকার ॥

হে প্রিয়ে! সেই দাসীর বেটা ভয়ঙ্করী, কুলানারী শ্রদ্ধা বিবেকের  
 সহিত উপনিষদেবীর সংঘটন দ্বারা প্রবোধ উৎপাদনের জন্য কুটুনির ছায়া  
 আঁটুনি করিয়া জুটুনি করিবার খুঁটুনি তুলিতেছে। তুমি সেই পাপীষসী  
 ভণ্ডা রণ্ডার চুলের গোছা ধরিয়া ষণ্ডাদিগের হস্তে সমর্পণ কর। পাষাণেরা  
 তাহাকে মুঠ্যাঘাত ও পদাঘাত করিতে করিতে সংহারমুদ্রা দর্শন  
 করাক।

মিথ্যাদৃষ্টি ।

গীত ।

রাগিনী বাহার । তাল খেমটা ।

জয় মহারাজ, ভয় কোরোনা আর ।  
 আমি কর্কে একা, একাকার ॥  
 এমন্ পতিব্রতা সতী আছে কে ।  
 আমি সাত-পুরুষকে, রমণ করাই অতি পুলকে ।  
 সেই সাধ্বীসতী সাবিত্রীকে,  
 সদা ঘটাই ব্যভিচার ॥

আমার একটুখানি বাতাস লাগলে গায় ।

বেচে কোশা কুশী, মুনি ঋষি, বেণ্ডাবাড়ী যায় ।

লোকেৰু পাড়াপাড়া, গোড়াগোড়া,

এখন কিছু নাই বিচার ॥

হে মহারাজ ! এই দাসী হোতেই সকল কৰ্ম সম্পন্ন হবে । তার একটা ভাবনা কি ? আমি এক ছক্কারে টুক্কারে সকলকেই কাণা কোঁর্ক, কেউ কি কিছু দেখতে পাবে ? ধর্ম নাই, কৰ্ম নাই, শাস্ত্র নাই, বেদ নাই, গায়িত্রী নাই, মোক্ষ নাই, সকলি মিছে ।—মহারাজ ! উপনিষদ, সে—কে ? বেদের একটা ভাগ বইতো নয় । তারেতো একগাছ তুণের চেয়ে তুচ্ছ জ্ঞান করি, সে যে বড় অপদার্থ, রস নাই, কস নাই, সুখ নাই, তাতে লোকের শ্রদ্ধা কেন হবে ? মোক্ষ, সে আবার কি ? মহারাজ মনের কোণেও ঠাঁই দিবেন না, সে শ্রদ্ধার এত আশ্পর্শ ? অশ্রদ্ধা এখনি তারে দাঁতে চিবুয়ে, গুঁড়ো করুক । আমি তার বুকে দাঁড়াবো, পায়ে মাড়াবো, দেশ-তাড়াবো, বেদ ছাড়াবো, ভেদ ঝাড়াবো ।

আর কি তারে আস্ত রাখি—আস্ত রাখি ? ।

এই দেখনা, ঘাড়টী ভেঙে,

রক্ত চাকি—রক্ত চাকি ॥

মহামোহ ।

আর আনন্দের সীমা নাই ।

হে হৃদয় রঞ্জিনী ! এত দিনে আমার মনের সকল উদ্বেগ দূর হইল, আর আমার কোন ভয় নাই, ভয় নাই । হে প্রিয়ে ! যেমন মহাদেবের বামভাগে পার্বতী বসিয়া শোভা করিতে থাকেন, তুমি সেইরূপে আমার বামাজে মিলিত হইয়া বিরাজ করিতে থাক ।

( অতিশয় ব্যাকুল হইয়া হস্ত প্রসারণ পূর্বক আলিঙ্গন করণে অগ্রসর । )

মিথ্যাদৃষ্টি ।

ও মহারাজ ! ও কি ? ও কি ? আমি মেয়ে মানুষ ।—সভার মাঝে ।—দিনের বেলা ।—দিনের বেলা ।—এই সব নোক রয়েছে, নোক রয়েছে ।—আই আই আই ।—আমি নজ্জাপাই, নজ্জাপাই । ছি ছি ছি, সোরে যাও, সোরে যাও ।

আদরিণীচন্দ্রঃ ।

ছিছিছি, দোড়্য়ে এসে, জোড়্য়ে ধোরে,  
মনের আগুন কেন জালো ? ।

ওকথা, আর বোলোনা, আর বোলোনা,  
আর বোলোনা । অম্নি ভালো,  
অম্নি ভালো ॥

ছি ছি ছি সভার মাজে, মরি লাজে,  
দিনের বেলা রবির আলো ।  
ওকথা আর বোলোনা, আর বোলোনা,  
আর বোলোনা । অম্নি ভালো,  
অম্নি ভালো ।

ছি ছি ছি, সময় আছে, সবাই কাছে,  
কামের পাশা, কেন চালো ? ।  
ওকথা, আর বোলোনা, আর বোলোনা,  
আর বোলোনা । অম্নি ভালো,  
অম্নি ভালো ॥

ছি ছি ছি, রঙ্গ দেখে, অঙ্গ জলে,  
ঠিক যেন ত্রিভঙ্গ কালো ।  
ওকথা, আর বোলোনা, আর বোলোনা,  
আর বোলোনা । অম্নি ভালো,  
অম্নি ভালো ॥

মহারাজ ! চল এখন আমরা সাজঘরে গমন করি ।

তদনন্তর মহামোহ এবং মিথ্যাদৃষ্টি রঙ্গভূমি হইতে প্রস্থান করিলেন ।

ইতি বোধেন্দু বিকাশ মহানাটকের দ্বিতীয় অঙ্ক সমাপ্ত ।

# সাবিত্রী সত্যবান নাটক

[ কালীপ্রসন্ন সিংহ ]

## বিজ্ঞাপন

সাবিত্রী সত্যবান নাটক, মুদ্রিত ও প্রচারিত হইল। মহাভারতীয় বনপর্বাস্তর্গত পতিব্রতোপাখ্যানে সাবিত্রী সত্যবান বিষয়ক আখ্যায়িকা বিশেষ রূপে লিখিত থাকায় এস্থলে সে বিষয় উল্লেখ করা নিম্প্রয়োজন। মহাভারতীয় বনপর্বাস্তর্গত পতিব্রতোপাখ্যানের সাবিত্রী চরিত হইতে কেবল মর্ম মাত্র পরিগৃহীত হইয়াছে, নতুবা কোন কোন স্থান অসংলগ্ন-বোধে পরিত্যক্ত। স্থান বিশেষে নূতন ঘটনায় অলঙ্কৃত করা গিয়াছে, যাঁহারা সংস্কৃত জানেন তাঁহারা অবশ্যই মুক্তকণ্ঠে স্বীকার করিবেন, যে মহাভারতীয় সাবিত্রী সত্যবানের উপাখ্যান অতীব সুন্দর, ইহার রমণীয়-ভাব ও কমনীয় প্রতিভার দ্বারা পাঠকগণ সময়ে সুন্দর রসে সম্মোহিত হইবেন তাহার সন্দেহ নাই, বিশেষতঃ বঙ্গীয় জ্ঞীলোকের সাবিত্রী সত্যবান উপাখ্যান বিশেষ রূপে জানা আবশ্যক, যদ্বারা পতিব্রত্য ধর্মের উদাহরণ স্বরূপে ও ধর্মজ্ঞান শিক্ষায় তদনুসরণে সমর্থ হইবে। এক্ষণে সাবিত্রী সত্যবান উপাখ্যান নাটকাকারে পরিণত করিয়া সহৃদয় পাঠকগণ সমীপে সমর্পণ করিলাম, বিজ্ঞোৎসাহী মহোদয়গণের পাঠযোগ্য এবং নগরীয় অন্যান্য রঙ্গভূমির অভিনয়্যাই হইলেই পরিশ্রম ও ধন ব্যয় সার্থক বিবেচনা করিব।

কলিকাতা

বিজ্ঞোৎসাহিনী সভা

১৭৮০ শকাব্দা

শ্রীকালীপ্রসন্ন সিংহ

## নাট্যোল্লিখিত ব্যক্তিগণ

রাজা দ্যুমৎসেন

সত্যবানের পিতা

সনক

সত্যবান

নায়ক

মঙ্গলগর্ভ

ঋষিকুমার সত্যবানের মথা

রাজা

সাবিত্রীর পিতা

মন্ত্রী

নারদ

কঙ্ককী

দেবী

সাবিত্রীর মাতা

সাবিত্রী

নায়িকা

সাগরিকা

তরলিকা

}

সাবিত্রীর সখীগণ

## চতুর্থ কাণ্ড

### প্রথম অঙ্ক

পটোন্তোলনানন্তর।

( নদীতীরস্থ পর্ণকুটীর। দ্রুমৎসেন রাজার প্রবেশ। )

দ্রুমৎসেন। ( স্বগত ) হে জগদীশ্বর! আমি পূর্ব জন্মে কি মহাপাপ করিয়াছিলাম যদ্বারা বিশেষ রূপে ক্লেশিত হইতেছি তা বলিতে পারি না, রাজকুলে জন্ম গ্রহণ করিয়া রাজপুত্র হইয়া বনে চির-জীবন বাস করিতে হইবে ইহা স্বপ্নের অগোচর, আবার অন্ধ। হে পরমাত্মন তোমার দুজ্জের্য বিশ্ব বিরচনায় সুবিলেচনা ও আশ্চর্য্য কৌশল দ্বারা তুমি সর্বপূজ্য সর্বারাধ্য ও সকলের শরণ্য হইয়াছ, শুনিয়াছি তোমার শ্রবণ করিলে বিপদ নিজে বিপদাকীর্ণ হয়, কিন্তু নাথ! আমি বিপদগ্রস্ত হইয়া কত শত বার একাগ্রচিত্তে তোমাকে শ্রবণ করিয়াছি, বোধ হয় কেবল আমার প্রাক্তন জন্ম কর্মের ফলে ছরদৃষ্ট বশতঃই নাথ! তুমি সদয় হও নাই, কিন্তু ইহা উপযুক্ত নয়, পিতা পুত্রের শত শত অপরাধও গ্রহণ করেন না ( পদ শব্দানুভব করিয়া ) ( প্রকাশে ) কেও?

( শিষ্য সহিত সনকের প্রবেশ । )

সনক । মহারাজ ! আমি সনক ।

দ্রুমৎসেন । কে ও পূজ্যপাদ মহর্ষি সনক ।

শিষ্য । হাঁ মহারাজ !

দ্রুমৎসেন । ( সাষ্টাঙ্গে প্রণিপাতানন্তর ) অহা এ দীন কৃতার্থ হইল ।

এত দিনের পর আমার সকল ক্লেশ দূর হইবে, তাহা জানিতে পারিয়াছি, এত দিনের পর পরম পিতা জগদীশ্বর আমার প্রতি কৃপাস্বিত হইয়াছেন । প্রভো ! তবে শারীরিক কুশল তো ?

সনক । হাঁ ! মহারাজ ! ভবদীয় রাজশ্রীর কুশলেই অশ্বদাদির সর্বাঙ্গীণ মঙ্গল ।

দ্রুমৎসেন । প্রভো ! আর আমাকে রাজা বলিয়া সম্বোধন করিবেন না, আমি যে সময় রাজা ছিলাম সে সময়ে সুখী হইতে পারিতাম, কিন্তু এক্ষণে আমার সে রাজত্ব নাই সে রাজসিংহাসন নাই, সে রাজপুরী নাই যদ্বারা রাজ সম্ভাষণের যোগ্য হইব, প্রভো ! এক্ষণে ঐ রূপ সম্বোধনে মৃত কল্পিত শোক পুনর্ব্বার উপস্থিত হইয়া হৃদয়ে শেলসম বিদ্ধ হয় ।

সনক । ( সহাস্তে ) মহারাজ ! স্থির হউন, স্থির হউন, রাজ্য নাশ জনিত বিষম দুঃখে আপনাকে বিবেচনা শূন্য করিয়াছে, কারণ ইহা সর্বত্র প্রত্যক্ষ পরিমাণে দৃষ্ট হইতেছে, যে মানবগণ স্বীয় স্বীয় পদ ও আবদ্ধ হইতে বিচ্ছিন্ন হইলে তাহাদিগের জ্ঞান ও বিবেচনা বিনাশ পায় । মহারাজ ! আপনি মহারাজা, সকলের পূজ্য, ও অশ্বদাদির বিশেষ আদরনীয়, যদিচ আপনি এক্ষণে রাজ্যচ্যুত হইয়া জীবনের অবশিষ্ট কাল বনবাসে কাটাইতে মানস করিয়াছেন, তথাপি আপনার বংশ গৌরবে এক্ষণেও সেইরূপ আদরনীয় ও পূজ্য হইবেন, বিশেষতঃ আপনি বিবিধগুণশালী, ধার্মিক প্রবর, ও জিতেন্দ্রিয়, মহারাজ ! এদশাতেও জনসমাজে বিশেষ রূপে পূজ্য হইবেন তাহার কি সন্দেহ আছে । কারণ, চক্রবৎ পরিবর্ত্তস্তে দুঃখানিচ সুখানিচ, দুঃখ এবং সুখ চক্রের স্তায় পরিভ্রমণ করে । কখন কাহার অদৃষ্টে কি ঘটবে তাহা কে বলিতে পারে ?

দ্রুমৎসেন । প্রভো ! তাহার সন্দেহ কি, কিন্তু আমার স্তায় দুঃখী জগতে



কেহই নাই রাজ্যচ্যুত হইয়া বনে বাস করিতেছি, ত্রীপুরুষ অঙ্ক ইহা কি সামান্ত দুঃখের বিষয় ?

সনক । মহারাজ ! এমন মনে করিবেন না, মানব প্রকৃতির রীতিই এই, যে সময় ধনাদি ঐশ্বর্য্য হস্তগত থাকে, পরিজন আজ্ঞা পালন করে, সে সময় বিবিধ প্রকারে সুখী হইয়া মনে করে আমার জ্ঞায় সুখী কেহ জগতে নাই, কিন্তু সে আশা দুরাশা মাত্র । জগতের যাবতীয় জীব মাত্রে কেহই সুখী নয়, যে মুমুকু যোগী শতাধিক বর্ষ কঠোর সাধন করিয়া বাহ্য জ্ঞান বিহীন হইয়াছেন, তিনিও আন্তরিক সুখী নহেন । কারণ, যতদিন তাঁহার অভিলষিত বিষয় অসিদ্ধ না হয়, ততদিন তাঁহারও মনে সুখ হয় না, এই প্রকারে বিবেচনা করিয়া দেখিলে স্পষ্টই জানা যাইবে, যে এই জগতীতলে মানব মাত্রেই অসুখী কেহই সম্যক্ প্রকারে সুখী নহে, এক এক বিষয়ে এক এক প্রকারে সকলেই অসুখী ।

দ্যুমৎসেন । প্রভো ! একথা যথার্থ, যে জগতে কেহই সুখী নহেন, কিন্তু যে মহাপুরুষ আপনার আয়াস সাধ্য শাকাম দ্বারা জীবন ধারণ করেন, অশ্লীলী অপ্রবাসী অযাচক এবং ঈর্ষা, হিংসা, লোভ, ইত্যাদি দোষ হইতে অন্তর তাহাকেই যথার্থ সুখী বলা যায় ।

সনক । মহারাজ ! তাহাকে কখনই সুখী বলা যায় না । কারণ, এক না এক বিষয়ে তাহার অবশ্যই অসুখ জন্মিবে, বিশেষতঃ মন অগ্ৰাণ্য ইন্দ্রিয় হইতে অত্যন্ত ভয়ানক, অগ্ৰাণ্য ইন্দ্রিয় কলে বলে কোশলে ও দ্রব্যাদির সহযোগে দমিত হয়, কিন্তু মনের চঞ্চল প্রকৃতির বিকৃতির কোন সম্ভাবনা নাই, এবিষয় সামান্ত সাধারণে বিশেষ রূপে অবগত আছেন, মন কোমল বিষয়েই অগ্রে ধাবমান হয়, বহু শ্রম সাধ্য অতীব কঠোর অনায়াসে মনে করিলে সম্পাদন করা কঠিন, বেদ প্রসঙ্গ ও শাস্ত্রালোচন ইত্যাদি হইতে নবান্বিতার সহিত বাঢ়াদির দ্বারা রজনী যাপন বিশেষ রমণীয় বোধ হয় ।

দ্যুমৎসেন । প্রভো ! অতী বিবিধ বিজ্ঞান পরিপূরিত সং কথা শ্রবণে সন্তুষ্ট হইলাম ।

সনক । মহারাজ ! আপনি সন্তুষ্ট থাকিলে আমরাও সন্তুষ্ট থাকি ।

হুম্মেন। প্রভো! সাবকাশ সময়ে দাসের কুটীরে পদার্পণ করিতে  
বিস্মৃত হইবেন না।

সনক। মহারাজ! আপনি অশ্বাদির রক্ষক এবং আমরা ভবদীয়  
রাজতীর শুভানুধ্যায়ী এমং সম্বন্ধে অবশ্যই সময়ে সময়ে সাক্ষাৎ  
করিব।

( সশিষ্টে সনকের প্রস্থান। )

( রাজার প্রবেশ )

রাজা। মহারাজ! স্নান ভোজনের সময় এক্ষণে অতীত হইল, কুটীরে  
চলুন।

হুম্মেন। কেও দেবী, প্রিয়ে! এস এস, তোমার একান্ত মনে পতি  
শুক্রবায় পরম পরিতোষ প্রাপ্ত হইয়াছি, এক্ষণে বাছা সত্যবান  
কোথা?

রাজা। মহারাজ! কয়েক দিবসাবধি সত্যবান অসুস্থ হইয়াছে এমত  
বোধ হইতেছে, কারণ সময়ে আহার সময়ে স্নান, সময়ে শয়ন  
ইত্যাদি হইতে নিরন্তর হইয়া ক্ষীণবৎ কাল যাপন করিতেছে।

হুম্মেন। দেবি! বাছা সত্যবান অসুস্থ হয়েছে চল চল শীঘ্র চল  
শুনে আমার অন্তঃকরণ বিদীর্ণ হইয়া মনে এক প্রকার বিজাতীয়  
দুঃখের উদয় হইল, প্রিয়ে! বল বল সত্যবান এখন কেমন আছে?

রাজা। মহারাজ! চিন্তা কি সত্যবান অবিলম্বেই আরোগ্য লাভ করিবে,  
মহারাজ! এক্ষণে সত্যবানের বিবাহের চেষ্টা করা আবশ্যক।

রাজা। দেবি! ( সরোদনে ) আমরা স্ত্রী পুরুষে অন্ধ বিশেষতঃ পরিজন  
শূন্য, বাছা সত্যবানই আমাদের এক মাত্র সহায় রাজ্যচ্যুত ও  
হত সর্বস্ব হইয়া বনে বাস করিতেছি, সত্যবানের যে রূপ গুণ,  
তদুপযুক্ত রাজকুমারীর সহিত পরিণয় প্রার্থনা করা নিতান্ত  
হাশ্বাস্পদ, বিত্ত বিহীন অনাথ বালককে বনবাসী ভিন্ন অন্য কেহই  
কথা প্রদান করিবে না।

রাজা। মহারাজ! ভবিতব্যতা অনুসারেই বিবাহ ব্যাপার সম্পাদিত  
হয়, তন্নিমিত্ত চিন্তা করা বৃথা, এক্ষণে কুটীরে চলুন।

( পট প্রক্ষেপে নিষ্কান্তাঃ সর্কে। )

## চতুর্থ কাণ্ড

### দ্বিতীয় অঙ্ক

( পটোভোলনানন্তর । আশ্রম নিকটবর্তি উপবন সত্যবান ও মঙ্গলগর্ভের প্রবেশ । )

সত্যবান । বয়স্য ! আমার চিত্ত বিনোদনের কি উপায় স্থির করিয়াছ ?

মঙ্গলগর্ভ । সখে ! শাস্ত হও শাস্ত হও, পরস্পর প্রণয় সাধন অতীব দুর্লভ ব্যাপার, অত্যল্পকাল মধ্যে সম্পাদিত হওয়া অসম্ভব পর ।

সত্যবান । সখে ! ক্রমশঃ আমার শারীরিক ও মানসিক শক্তি হ্রাস হইতেছে, মন কি দিবা কি রজনী সকল সময়েই চঞ্চল, গুরুজন সেবা এবং সাবকাশ সময়ে বন্ধুগণ সঙ্গে স্বচ্ছন্দে কাল যাপনও প্রিয়কর হইতেছে না, বোধ করি অনতিকাল মধ্যেই কামশরে কাল করে পতিত হইতে হইবে ।

মঙ্গলগর্ভ । সখে ! এ কি ? তুমি যথার্থই একেবারে বিবেচনা শূন্য হইয়া পড়িলে ?

সত্যবান । বয়স্য ! বারম্বার বৃথা আশ্বাসে বিশ্বাস করিয়া নিশ্চিন্ত থাকিতে অসমর্থ ।

নেপথ্যে । ( কামিনীগণের চরণ নৃপুরুষনি ও রথচক্র ঘর্ষণ শব্দ । )

মঙ্গলগর্ভ । ( আকাশে কর্ণ প্রদান পূর্বক ) সখে ! বনান্তরে রমণীগণের চরণ নৃপুরুষনি শুনা যাইতেছে, চল ঐ স্থানে যাই ।

সত্যবান । বয়স্য ! উহা বনশ্রেণীর অনতিদূরে সরোবরস্থ রাজহংসী কুলের কলরব উহা চরণ নৃপুরুষনি নহে । কারণ, বিজন বিপিন মধ্যে কুলাঙ্গনাগণের আগমন সম্ভাবিত হয় না ।

মঙ্গলগর্ভ । না সখা আমি স্পষ্ট শুনিয়াছি, বরং তুমি অত্র অবস্থান কর আমি আনুপূর্বিক বৃত্তান্ত অবগত হইয়া আসি !

( মঙ্গলগর্ভের প্রস্থান । )

সত্যবান । ( শিলাপটে উপবেশন করিয়া ) কামশর কি ভয়ানক ইহাতে বিজ্ঞানেরও বুদ্ধি হ্রাস হয়, এবং চিত্ত চাঞ্চল্য জন্মে । আঃ কিছুতেই মনের সন্তোষ নাই, সকল কর্মেই হতোৎসাহ হইতেছি, ( শিলাপটোপরি শয়ন করিয়া ) হে মদন ! তুমি কোনগুণে এমত ভয়ানক শক্তিয়ুক্ত হইয়াছ তাহা বলিতে পারি না তোমার

সহযোগীগণও তদনুরূপ, হে শিকবর! তুমি বাহ্যিক সৌন্দর্য্য বিহীন ও সামান্য বায়স তুল্য হইয়াও যে অবশ্রকার সহযোগিতা দ্বারা যে মানব গণের চিত্ত উচ্চাটন করিতে সমর্থ হইবে ইহা স্বপ্নেরও অগোচর, কাকনীড়ে জন্ম গ্রহণ ও বাল্যকালাবধি কাক দ্বারা প্রতিপালিত হইয়া যৌবন সময়ে এমত অসদৃশ গুণবান হইবে ইহা অসম্ভব, হে মলয় বায়ু! তুমি জগতের জীবন স্বরূপ বিখ্যাত তোমার দ্বারা জীবগণ জীব ধারণ করিতেছে কিন্তু বিনাপরাধে আমার জীবন গ্রহণ করিতে উদ্যত হইয়াছ ইহাতে তোমার অসীম মহত্বে কলঙ্কাপিত হইবেক সন্দেহ নাই, কিন্তু ইহাতে তোমাকে দোষী করা বৃথা, তুমি সঙ্গদোষেই বিনষ্ট হইয়াছ, ওহে কাননবাসি পক্ষিগণ! তোমরা সুস্বরে গান করা অভ্যাস পরিত্যাগ কর, তাহা না হইলে নরহিংসক বলিয়া পরিগণিত হইবে, তোমাদিগের সুস্বর সহযোগে মদন বাণের তীক্ষ্ণতা বৃদ্ধি হয়, এবং মলয় পবন অতিশয় পরাক্রম প্রকাশ করে, তোমরা হিংসা, দ্বেষ, পর নিন্দা ইত্যাদি দোষ রহিত বনবাসি ঋষিকুলের পরম বন্ধু ও সহায়, কিন্তু ঋষিগণের সহবাসে সর্বদা বাস করিয়া পরানিষ্ট চেষ্টায় অবিরত অভিরত থাকিলে ঋষিকুল এবং তোমাদিগের নিষ্কলঙ্ক স্বভাব দ্বিজকুল কলঙ্কিত হইবে। হে বনস্থ তরুলতাগণ! তোমরা আর সুবাসিত পুষ্প প্রসব করিও না, মদন তোমাদিগেরও কলঙ্কিত করিতে সম্পূর্ণ চেষ্টা করিতেছে, তাহা হইলে জগতের অগ্রাহ্য হওত বনে প্রফুল্ল হইয়া বনেই শুষ্ক হইতে হইবে, সুকোমলাঙ্গি অঙ্গনাগণের মস্তকে স্থান পাওয়া দূরে থাকুক তাহারা স্পর্শও করিবেন না, ও রে! ভৃঙ্গদল! তোদের বাহ্যিক বর্ণের সহিত আন্তরিক বর্ণের কিছু মাত্র প্রভেদ নাই, তোরা মানব কুলের পরম শত্রু, সেই পাপেই বিগুপ্ত কমল ছেদন করণে অসমর্থ হইয়াছিস। কিম্বা তোরা বনবাসি বিজ্ঞান বিহীন পশু, তোদের উপদেশ দেওয়া নিষ্ফল, বরং উপদেশ শ্রবণে উত্তেজিত হইয়া আর পরাক্রম প্রকাশ করিতে পারিস্। হিতাহিত বিবেচনা শূন্য মূর্খ কুলকে কদাচ উপদেশ দিবে না। ইহা অতীব ষথার্থ কথা, ভাল, ইন্দ্রিয়গণ! তোমাদিগকেই অন্বেষণ করি,

তোমরা কি একেবারেই অকর্মণ্য হইয়া গিয়াছ ? কর্তব্যাকর্তব্য কি একেবারে শরীর হইতে এক কালে প্রস্থান করিয়াছে, লোক লাজ সামাজিক ভয়জ্ঞান কি অন্তরে নাই ? ভাল ভাল, জানিলাম বিপদ সময়ে সকলেই অন্তর্হিত হয়, তবে তোমাদিগকে প্রকৃত মিত্র বলিয়া পরিগণিত করা অনাবশ্যক । ভাল মন ! তোমারই কি এই বিবেচনা হইল ? তুমি কি জান না ? যে বিপদ সময়ে অগ্রে তুমিই ক্লেশিত হইবে, এক্ষণে জানিলাম বিরহি জনের সস্তাপনে সকলেই সচেত্বে ।

( শিলাপট হইতে গাত্রোত্থান করিয়া । )

দেখি বয়স্ক কোথায় গেলেন, তিনি মরীচিকার গায় বনান্তরে হংসরব শ্রবণে কামিনীচরণ নূপুর শব্দানুবোধে বিজন বিপিন মধ্যে প্রবেশ করিয়াছেন ( সবিস্ময়ে ) একি ? বনশ্রেণীর অদূরে রোদন শব্দানুভব হইতেছে, অহো ! যথার্থই বটে ক্রন্দন রব যথার্থই হইল ।

( মঙ্গলগর্ভের প্রবেশ । )

মঙ্গলগর্ভ । ( অতি ব্যস্ত হইয়া ) কোথায় সখা কোথায়, একবার এদিকে আইস, কই সখাকে যে দেখিতে পাই না তিনি আবার কোথায় গেলেন ।

সত্যবান । বয়স্ক ! ব্যাপারটা কি ?

মঙ্গলগর্ভ । এই যে সখা আসিয়াছ ভালই হইল ।

সত্যবান । বয়স্ক ! এত চিন্তাকুলের গায় ভ্রমণ করিতেছ কারণ কি ?

মঙ্গলগর্ভ । সখে ! অদ্ভুত একটা অতীব আশ্চর্য্য ব্যাপার প্রত্যক্ষ করিয়া আসিয়াছি, বনমধ্যে তিনটি পরমসুন্দরী রমণী ক্রন্দন করিতেছে, কিন্তু আশ্চর্য্যের বিষয় এই যে তাহারা দৃশ্যে ভদ্র কুলাজনা বোধ হইল কিন্তু বনমধ্যে অসহায়ে স্বেচ্ছাচারিণী হইয়া ভ্রমণ করায় সে বিষয়ে সন্দেহ হইতেছে, তাহারা কি রাক্ষসী ? বা মায়াবিনী ? মানব কুলের হিংসা কারণ মায়াবলে কমনীয় বেশধারণ করিয়া বন মধ্যে উপস্থিত হইয়াছে । সখে ! এবিষয়ে বিশেষ অনুসন্ধান করা কর্তব্য ।



স্বভাবান। বয়স! বৃক্ষশ্রেণীর মধ্যভাগ দিয়া বনাস্তরাল বিলক্ষণ দৃষ্ট  
হয় অতএব আইস এই স্থান দিয়া ঐ রমণীত্রয়ের ব্যবহার দর্শন  
করি। ( উভয়ের পার্শ্বে গমন।\* )

সাবিত্রী। সখি! আর বিলম্বে প্রয়োজন নাই বৃথা সময় বিনষ্ট হইতেছে।  
সখীস্বয়। সখি! তোমার এ প্রতিজ্ঞা অত্যন্ত ভয়ানক।

সাবিত্রী। না সখি! আমি অবিলম্বেই অনলে বা জলে প্রাণ পরিত্যাগ  
করিব, তোমরা ইহাতে বাধা দিও না পিতা মাতার নিকট হইতে  
বিদায় লইয়া আসিয়াছি উপযুক্ত পাত্র প্রাপ্ত হইলেই মানসে বরণ  
করিয়া তাঁহাদিগকে সন্বাদ করিব কিন্তু, লোকত্রয় ভ্রমণ করিয়াও  
মনের মত পতি পাইলাম না পুনরায় গৃহে গমন করা নিষ্প্রয়োজন,  
সখি! এই নাও আভরণ গ্রহণ কর, এবং মাতাকে বলো তোমার  
হতভাগিনী সাবিত্রী এজন্মের মত বিদায় হইয়াছে, সখীগণকেও  
আমার নমস্কার জানাইয়া বলো যে বাল্যকালাবধি একত্রে শয়ন  
একত্রে ভোজন ও একত্রে উপবেশন করিয়াছি, তিলার্দ্ধের নিমিত্তেও  
অস্তর হই নাই এক্ষণে মরণ সময়ে তাঁহাদের সহিত সাক্ষাৎ  
হইল না, মনের দুঃখ মনেই রহিল ( সরোদনে ) আর যদি  
অজ্ঞানতা বশতঃ কোন অপরাধে অপরাধিনী হয়ে থাকি তাঁহারা  
যেন সে অপরাধ গ্রহণ না করেন।

গীত।

রাগিণী ঝি ঝিট, তাল আড়াঠেকা।

বল বল আমারে আজ যত সখীগণে।

কেমনে দেখাবো মুখ প্রতিবাসিগণে ॥

মনবাঞ্ছা না পুরিল, গৃহে কিবা ফল বল,

না হবে মম মঙ্গল, পতিধন বিনে।

ঘোবনে সে কামানল, কত বা সহিব বল,

সকলি হলো বিফল, কি ফল জীবনে ॥

\* (এস্থলে অভিনয় সময়ে রঙ্গভূমির পার্শ্বপটিকার বৃক্ষ বিচিত্র ব্যবধানে  
উত্তোলন করিতে হইবেক, তাহা হইলেই বনাস্তরালের চিত্রিত পটিকা দর্শকগণের  
দৃষ্টিপথে পতিত হইবেক।)

অতএব সখি! আর বিলম্ব করিও না শীঘ্র অগ্নি আনয়ন কর।

( সখীদ্বয়ের সহিত সাবিত্রীর ঘোদন। )

মঙ্গলগর্ভ। বয়স্তু! কি ব্যাপার? যুবতী কামিনী সংসার স্রুথে জলাঞ্জলি  
দিয়া অকালে প্রাণ পরিত্যাগ করণে কৃতসঙ্কল্পা হইয়াছে, ইহার  
কারণ কি?

সত্যবান। সখে! ইহার নিগূঢ় কারণ অবগত হওয়া আবশ্যক।

মঙ্গলগর্ভ। বয়স্তু! তবে চল উভয়ে নিকটস্থ হই।

( উভয়ের পরিক্রমণ। )

সত্যবান। ( রমণীদ্বয়ের নিকটস্থ হইয়া ) ( সাগরিকার প্রতি ) আপনার  
নিকট আমার একটি জিজ্ঞাস্তা আছে যদি নির্ভয়ে প্রশ্ন করিতে  
আদেশ করেন তাহা হইলে চরিতার্থ হই।

সাগরিকা। ( আশ্চর্য্যান্বিত হইয়া ) আজ্ঞা করুন। কিন্তু আপনার প্রশ্ন  
করিবার পূর্বে আমার একটি জিজ্ঞাস্তা আছে।

সত্যবান। কি?

সাগরিকা। এই বিজ্ঞান বিপিন মধ্যে মানব সমাগম অসম্ভব, আপনি কে?  
এবং কোথায় নিবাস? আর কি নিমিত্তই বা এই বনমধ্যে  
আগমন করিয়াছেন? এবং আপনার সঙ্গে উনিই বা কে?  
সামান্যতঃ বস্ত্রাদি দর্শনে বোধ হইতেছে বনবাসী ঋষি হইবেন,  
কিন্তু শারীরিক সৌন্দর্য্য দর্শনে মন তাহাতে বিশ্বাস করে না।

সত্যবান। স্তুন্দরি! তুমি যাহা বিবেচনা করিয়াছ তাহাই যথার্থ,  
আমরা বনবাসী ঋষিকুমার।

সাগরিকা। আপনি কি আমাদিগের সহিত পরিহাস করিতেছেন?

সাবিত্রী। ( স্বগত ) লোকত্রয় ভ্রমণ করিয়াও এমত চমৎকার রূপবান্  
পুরুষ দর্শন করি নাই, বোধ হয়, ইনি কামদেব, ছদ্মবেশে কুলাঙ্গনা  
দুঃখ মোচনার্থ আগত হইয়াছেন।

তরলিকা। ( সাগরিকার প্রতি ) সখি! রাজনন্দিনী উহার পরিচয়  
জিজ্ঞাসার্থ উৎসুক হইয়াছেন।

সত্যবান। অবশ্য জগতের রীতিই এই পরিচয় প্রদান করিলেই পরিচয়  
প্রদান করিতে হয়।



সাবিত্রী । ( বাহ্যিক সরোষে ) ইহা তোমার আপন মনের কথা ।

সাগরিকা । জগদীশ্বর আমাদের প্রতি প্রসন্ন তাহার সন্দেহ নাই কারণ  
আপনার আগমনে সখীর সস্তাপিত হৃদয় সুস্থ হইয়াছে ।

তরলিকা । ভালইতো আপনারা এই স্থানে উপবেশন করুন আমরা প্রিয়  
সখীর পরিচয় প্রদান করি ।

সত্যবান । সখীদ্বয় ইহা আশ্রম নিষিদ্ধ ব্যাপার তোমার সখীকে বল এই  
শিলাপটে উপবেশন করুন, তাহা হইলে আমরা উপবেশন করিতে  
পারি ।

সখীদ্বয় । সখী ! ঋষিগণের অনুজ্ঞা উল্লংঘন করা অতীব অনুচিত ।

সাবিত্রী । ( সত্যবানের বামে উপবেশন করিয়া ) এই বসিলাম আর কি ?

সখীদ্বয় । এক্ষণে মনবাসনা পরিপূরিত হইল ।

মঙ্গলগর্ভ । রাজকুমার ! এই স্থান এক্ষণে পরম রমণীয় বোধ হইতেছে  
কারণ, মদনবাণ পরাক্রম রহিত, এবং মলয়পবন অপরূপ দম্পতী  
দর্শনে বিজ্ঞান বিহীন হইয়া মন্দগতি ধারণ করিয়াছে, নিকুঞ্জ-  
কাননস্থ পক্ষিগণ অসামান্য সৌন্দর্য্য অবলোকন করত আনন্দে  
বিহ্বল হইয়া এক এক বার অতি চীৎকার সহিত আনন্দধ্বনি  
প্রকাশ করিতেছে, দম্পতীর অপরূপ রূপ দর্শনে মনের ক্রেশে  
সূর্য্য ক্রমে তেজোবিহীন হইয়া জলধি মধ্যে নিপতিত হইতেছে,  
অতএব স্বভাবানুযায়ী প্রকৃতিগণের অস্থির প্রকৃতির বিকৃতি  
দেখিয়া মনে অত্যন্ত আপ্যায়িত হইয়াছি ।

সত্যবান । ( স্বগত ) এক্ষণে ঈঙ্গিত বিষয় সুসিদ্ধ করিতে যত্নবান হওয়া  
আবশ্যক ( প্রকাশে ) সুন্দরি ! যদি এত অনুগ্রহ করিয়া এখানে  
উপস্থিত হইয়াছ তখন যথার্থ নিজ পরিচয় প্রদানেও অস্বীকৃত  
হবে না, বিশেষতঃ আমরা বনবাসী বিশুদ্ধ স্বভাব ঋষিকুমার  
আমাদের নিকট এ বিষয় গোপন করত মানময়ী হইয়া থাকাও  
বিশেষ যুক্তিসিদ্ধ বোধ হয় না । সুন্দরি ! এক্ষণে তোমাদের  
পরিচয় প্রদান আবশ্যক হইয়াছে, অগ্রে ইনি কোন রাজতনয়া  
তাহা বল ।

তরলিকা । সখি ! দেখেছ আন্তরিক সঙ্কল্পসূত্রে পরিচয়ও প্রদান করিতে  
হয় না ।

সাবিত্রী। তরলিকে ! তোমার উপস্থিত প্রলাপ বাক্যের অবিলম্বেই সমুচিত দণ্ড বিধান করিব।

তরলিকা। ( জনান্তিকে সহাস্তে ) এক্ষণে দণ্ডকর্তা সম্মুখে উপস্থিত আজ্ঞা বিধান কর।

সত্যবান। ( আশ্চর্য্যান্বিত হইয়া ) অহো ! দৈবের কি বিচিত্রা গতি আমি কিছু দিবস পূর্বে ষাঁহাকে স্বপ্নে দর্শন করিয়াছিলাম, ইনি সেই কামিনীরত্ন এবং ষাঁহার নিমিত্তই এতাবতকাল জ্ঞানহীন হইয়া অস্থূল শরীরে কাল যাপন করিতেছি।

মঙ্গলগর্ভ। বয়স্ত ! এক্ষণে মনোভীষ্ট সিদ্ধ হইবার সম্ভব হইয়াছে।

সত্যবান। বয়স্ত ! মনোভীষ্ট সিদ্ধ হইবার আর কি বিলম্ব আছে ?

সাগরিকা। প্রিয়সখি ! এক্ষণে প্রাণ পরিত্যাগ করণে সঙ্কল্প কর।

সাবিত্রী। ( স্বগত ) প্রিয়সখী মনের কথা বলিয়াছে, ত্রিভুবন ভ্রমণ করিয়াও এমন ভুবনমোহন রূপ দেখিতে পাই নাই তবে আন্তরিক বিষয়ও পরীক্ষা করা কর্তব্য।

তরলিকা। সখি ! রাজকুমারী মনে মনে পরমস্থখী হইয়াছে দেখিতেছ না নিরুত্তরা হইয়া মোনাবলম্বন করিয়াছেন।

সাবিত্রী। সখি ! এ তোমাদের আপন মনের চিন্তা।

উভয়ে। ( ঋষিকুমার দ্বয়ের প্রতি ) আপনারা এই শিলাপটে উপবেশন করুন ও প্রিয়সখীর পরিচয় গ্রহণ করুন।

সাবিত্রী। ( বাহ্যিক কোপ প্রকাশ করিয়া ) যদি পরিচয় দানের ইচ্ছা থাকে তোমরাই কেন পরিচয় প্রদান কর না।

সাবিত্রী। ( সখী দ্বয়ের প্রতি ) যে স্থানে এমত অবিচার সে স্থানে ভদ্রের বাস উপযুক্ত নয়।

সত্যবান। ( সাদরে ) রাজকুমারি ! অবিচার কিরূপ ?

সাবিত্রী। সখি ! সকল স্থানেই একরূপ রীতি আছে, অগ্রে গৃহস্থ স্বীয় মনের অভিপ্রায় ও নিজ পরিচয় প্রদান করিয়া পরে অতিথি সংকারে নিযুক্ত হন, কিন্তু এখানে তাহার বিপরীত।

সত্যবান। রাজকুমারি ! গৃহস্থাত্ম ধর্ম ইহা সম্যক্ রূপে স্বীকার করি, কিন্তু আমরা বনবাসী ঋষিকুমার বনমধ্যে চিরকাল বাস করি, সামাজিক রীতি নীতিতে বিশেষ অজ্ঞ থাকিব তাহার সন্দেহ

কি, এবং তাহাও স্বীকার করিতে হইবে, যে বনচারী ও লোকালয় বাসীগণের নীতি কখনই একরূপ হইবে না।

সাবিত্রী। সখি! বনচারীগণের সহিত বনচারীগণ ভিন্ন অস্ত্রের প্রণয় হওয়া অসম্ভব।

সত্যবান। রাজকুমারি! একথা তুমি বলিলে বলিতে পার, কিন্তু বনবাসী ঋষিকুমার সামান্য মানবগণ হইতেও প্রণয় বিষয় বিশেষ রূপে অবগত আছে বিশেষতঃ সামাজিক পদবীর অন্তর হওয়ায় তাহারা হিংসা, ঘৃণা, খলতা ইত্যাদি বিবিধ দোষ হইতে অত্যন্ত অন্তর।

মঙ্গলগর্ভ। রাজকন্যে! আপনি এই ছদ্মবেশী বনবাসী ঋষিকুমারের পরিচয়ে অপরিচিত আছেন, কিন্তু উনি সামান্য ঋষিকুমার নহেন, রাজকুলে জন্ম গ্রহণ করিয়াছেন।

সাগরিকা। ইহা আমরা প্রথম দর্শনেই অন্তরে স্থির করিয়াছি।

তরলিকা। উনি কোন রাজার পুত্র?

মঙ্গলগর্ভ। দ্যুমৎসেন রাজার পুত্র ইহার নাম সত্যবান।

সাবিত্রী। ( মনে মনে ) হৃদয় বিশ্বাসিত হও বিশ্বাসিত হও, তরলিকা মনের কথা বলিয়াছে।

তরলিকা। রাজকুমারের বনবাসের অভিপ্রায় কি?

সত্যবান। দৈবই প্রেরণ করিয়াছেন।

সাগরিকা। রাজকুমারি! এক্ষণে পরিচয় পাইলে তো, যুবরাজকে পতিত্বে বরণ কর।

সাবিত্রী। হৃদয় অগ্রেই বরণ করিয়াছে এক্ষণে তোমার বলা বাহুল্য।

সাগরিকা। যুবরাজ! আমরা কানন মধ্যস্থ আশ্রম, ও বৃক্ষবাটীকা দর্শনে গমন করি আপনি সখীর সহায় স্বরূপ এ স্থানে অবস্থান করুন।  
( তরলিকার প্রতি ) তরলিকে! এস আমরা সখার সহিত বনাস্তুরালস্থ গিরিনদী দর্শনে গমন করি।

সাবিত্রী। এ কি সখি! আমাকে অসহায়ে বনমধ্যে ফেলিয়া চলিলে?

উভয়ে। সে কি সখি! রাজকুমার তোমার সহায় হইলেন আবার একাকিনী বল?

গীত ।

রাগিনী বেহাগ, তাল আড়ধেমটা ।

একাকিনী কেমনে সই বলো ওলো বিনোদিনী ।

যার পাসে আছেন বসে পৃথিবীর নাথ যিনি ॥

এই হেতু প্রিয়সখি, কুমারে নিকটে রাখি,

চলিলাম দেখিবারে সুরকুল তরঙ্গিনী ।

( মঙ্গলগর্ভ ও সখীদ্বয়ের প্রস্থান । )

সত্যবান । ( সাবিত্রীর নিকটস্থ হইয়া ) রাজকুমারি ! মুখাবরণ মোচন করত স্নহ হও ।

সাবিত্রী । ( সলজ্জভাবে ) আমি সখীগণের অন্তর্বে গমন করি ।

( প্রস্থানোত্তম । )

সত্যবান । ( বস্ত্রাঞ্চল ধারণ করিয়া ) একি ! বনের দুর্গম পথে একাকিনী গমন করা অত্যন্ত ভয়ানক ( পার্শ্বে বসাইয়া ) রাজকুমারি ! স্নহ হও ।

সাবিত্রী । স্নহ সময় উপস্থিত হইয়াছে ।

সত্যবান । ( হস্ত দ্বারা মুখাবরণ মোচন করিয়া ) প্রিয়ে ! তোমার মুখ কমল দর্শনে মানস সূর্য্য সমুদিত হইয়াছে ।

সাবিত্রী । ( কটাক্ষ নিক্ষেপ করিয়া ) পুরুষের সকলই বিপরীত, কমল দর্শনে সূর্য্য প্রকাশিত হওয়া অসম্ভব ।

সত্যবান । সুন্দরি ! মানসিক অত্যন্ত সুখবোধ হইলে সম্ভবপরও জ্ঞান থাকে না, ( হস্ত হইতে স্ফটিক মালা ভূমিতলে পতিত হইবা মাত্র সাবিত্রী সজোপনে গলদেশে ধারণ করিল । )

( মঙ্গলগর্ভের সহিত সখীদ্বয়ের প্রবেশ । )

সখীদ্বয় । যুবরাজ ! সখীকে ক্ষণকালের নিমিত্ত রক্ষা করিয়াছিলে, তন্নিমিত্ত আমরা অত্যন্ত বাধিত হইয়াছি, এক্ষণে জগদীশ্বর করুন আপনি চিরকালের নিমিত্ত সখীর রক্ষক হউন ।

তরলিকা । রাজকুমারি ! সায়ংকাল উপস্থিত এক্ষণে আর এখানে থাকা বিধেয় নহে ।

সাবিত্রী । সখি ! রথানয়ন কর ।

ভরলিকা। এমত সঙ্কীর্ণ স্থানে রথানয়ন করা দুক্লহ। চল বনাস্তরালে  
রথারোহণ করিগে।

সাগরিকা। সখি! এক্ষণে রাজকুমারের নিকট বিদায় প্রার্থনা কর।

সাবিত্রী। (সলজ্জভাবে) সখি! আমি বলিতে লজ্জিত হইতেছি,  
আমার প্রতিনিধি স্বরূপে তুমি রাজকুমারের নিকট বিদায় প্রার্থনা  
কর, এবং আর বল যেন মধ্যে মধ্যে স্মরণ করেন।

সাগরিকা। রাজকুমার! সখী আপনার নিকট বিদায় প্রার্থনা করিতেছে।

সত্যবান। সময়ে যেন এদাস স্মরণ পথে পতিত হয়।

সাবিত্রী।

গীত।

রাগিণী ভৈরবী, তাল আড়াঠেকা।

চরণ অবশ হল, চলিতে পারি না আর।  
দেহ লয়ে যেতে নারি, মনে করি পরিহার ॥  
চঞ্চল নয়ন পুন, লইল স্মরণ তার।  
থর থর কলেবর, করিতেছে অঙ্গ আর ॥  
(গান করিতে করিতে সখীদ্বয়ের সহিত প্রস্থান।)

সত্যবান। আশার ফল প্রাপ্ত হইলাম।

গীত।

রাগিণী ভৈরবী, তাল আড়াঠেকা।

মন মত ধনে আনি যদি বিবি মিলাইল।  
মনসাধ না পুরিতে পুন তারে হরে নিল।  
জলিয়ে বিরহানলে, আসি প্রেম সিন্ধুকূলে,  
শান্তি আশে বাঁপ দিতে অমনি সে সুখাইল।

(পট প্রক্ষেপণ নিষ্ক্রান্তাঃ সৰ্ব্বৈঃ।)

## চতুর্থ কাণ্ড

### তৃতীয় অঙ্ক

পটৌস্তোলনানন্তর

রাজপুরী ( রাজা ও মন্ত্রীর প্রবেশ । )

রাজা। সাবিত্রী ছ্যমৎসেন রাজার পুত্র সত্যবানকে বরণ করিয়াছে শুনিয়া  
হর্ষ বিষাদ সাগরে নিমগ্ন হইলাম। কারণ সত্যবান রাজ্যচ্যুত  
এক্ষণে বনবাসী ঋষিগণ গণনায় গণনীয়, অনিয়মিত সময়ে বৃক্ষের  
গলিত পত্র ও গিরি নদীর উষ্ণ কষায় জল পান করিয়া সমস্ত  
শরীরী জাগ্রতাবস্থায় যাপন করিতে হয়, যাহা হউক, যখন সাবিত্রী  
তাঁহাকে মনোনীত করিয়াছে তখন তাহাকে জামাতা বোধে  
আদর করাই উচিত ( পশ্চাৎ অবলোকন করিয়া ) অহো! বোধ  
করি মহামুনি নারদ আসিতেছেন। মন্ত্রীবর যাও সাবিত্রী ও  
দেবীকে এস্থানে আসিতে বল।

( মন্ত্রীর প্রস্থান । )

( রাজা সিংহাসনোপরি উপবেশন করিলেন । )

নেপথ্যে ।

গীত ।

রাগিণী খাম্বাজ, তাল একতালা ।

এসে ভবের হাটে হরিণাম টী কেউ ভুল না।

মরণ কালে হরি বিনে তরণ তরি কেউ পাবে না ॥

আমায় আমার বল্চ বটে, আমার কেবল মুখে বটে,

সময় পেলে আমার বলার টান্ থাকে না।

যত দেখ ভাল বাসা, সকল কেবল আশার আশা,

আলোকেরি ছায়া প্রায় অন্ধকারে আর থাকে না ॥

জগত অসার সার, যশকীর্তি সার তার,

শেষে সবে শবাকার, কেবল আণ্ড পিছু আনাগোনা।

দেহ পিঞ্জরের প্রায়, নটি দ্বার খোলা তায়,

কবে পাখি উড়ে যায়, দিনক্ষণ নাহি মানা ॥



সোণার খাঁচা দূরে ফেলে, আত্মা পাখি উড়ে গেলে,  
আবার হাজার খাবার দিলে, এমন পোষাপাখি আর পাবে না।

( মন্ত্রী ও নারদের প্রবেশ । )

মন্ত্রী । মহারাজ ! মহর্ষি নারদ আগমন করিলেন ।

রাজা । ( ব্যগ্র হইয়া দণ্ডায়মান পূর্বক ) আসিতে আজ্ঞা হয়, আসিতে  
আজ্ঞা হয়, মহাশয় ! এই দীন জনের ভবনে অসীম কৃপা বিতরণ  
। পুরঃসর পদার্পণ করাতেই জন্ম সফল কর্ম সফল ও গৃহ সফল  
হইল । ( অগ্নিদিগে ) ওরে কে আছে রে মহর্ষিকে শীঘ্র আসন  
প্রদান কর । ( ভূত্যের আসন প্রদান ) মহাশয় এই আসনে  
উপবেশনে অধীনকে চরিতার্থ করুন । ওরে ! অবিলম্বে অর্ঘ্য  
আনয়ন কর ।

নারদ । মহারাজ ! গিরীশ দৌহিত্রীদ্বয় আপনকার গৃহে অচলা হইয়া  
অবস্থান করুন । স্বর্গ মর্ত্য পাতাল সর্ব স্থানেতেই গমনাগমন  
করিয়া থাকি, কিন্তু কোন স্থানে আপনার গ্নায় সংস্রভাব সম্পন্ন  
মহাত্মা নয়ন পথে পতিত হয় না, জগদীশ্বর আপনার সদগুণে  
সন্তুষ্ট হইয়া অবিলম্বেই আপনকার গৃহকে পুত্ররূপ দীপ দ্বারা  
সমুজ্জ্বল করিবেন ।

( অর্ঘ্য লইয়া পরিজনের প্রবেশ । )

পরিজন । এই ভগবানের অর্ঘ্য ।

( অর্ঘ্য রাখিয়া প্রস্থান । )

নারদ । মহারাজ ! আপনার কন্যা পরিণয় যোগ্য হইয়াছেন, কোন  
নৃপকুল তিলককে স্বর্ণ লতিকা সাবিত্রী সতী সমর্পণে মানস  
করিয়াছেন ?

রাজা । মহাশয় ! কুমারী স্বয়ংই তাহা স্থির করিয়াছেন, আমায় সে বিষয়ে  
বড় পরিশ্রম স্বীকার করিতে হয় নাই, আর আপনি বিবেচনা  
করুন, যাহার চির সুখ সৌভাগ্য বর্ধনার্থ পিতাকে পাত্র অন্বেষণ  
করিতে সাতিশয় আয়াস প্রকাশ করিতে হয়, সেই যদি স্বয়ংই  
মনোমত পতিতে অঙ্গুগতা হইল, ইহা অপেক্ষা সৌভাগ্যের বিষয়  
আর কি আছে ।



নারদ । সাবিত্রী কাহাকে পাণি গ্রহণার্থ স্থির করিয়াছেন ?

রাজা । মহাশয় ! সূর্য্য-বংশাবতঃস-রাজা-দ্যুমৎসেনের-তনয় কুমার সত্য-  
বানকে স্থির করিয়াছেন ।

নারদ । কি বলিলেন দ্যুমৎসেন পুত্র সত্যবানকে বরণে স্থির করিয়াছেন,  
হাঁ ।—( গ্রীবানত করিয়া রহিলেন । )

রাজা । সে কি মহাশয় ! এ প্রকার বিরক্তি প্রকাশ করিলেন যে, অবশ্যই  
ইহাতে কোন প্রতিবন্ধক থাকিবে ।

নারদ । না এমন প্রতিবন্ধক কি, তবে কি না আপনার এবিষয়ে  
তদ্বাবধারণ করা উচিত ছিল ।

রাজা । আপনি যাহা মনে করিয়াছেন, তাহা পূর্বেই আমি কহিয়াছিলাম,  
যে রাজ্যচ্যুত রাজা, তাঁহার পুত্রকে বরণ করিলে লোকে অপযশ  
প্রকাশ করিবে, তা যখন দেখিলাম তিনি কোন মতে এই বিষম  
পদবী হইতে বিরত হন না, তখন অগত্যা অভিমত দিতে হইল ।

নারদ । মহারাজ ! ইহাতো দোষের মধ্যেই গণ্য নয়, যে স্থলে স্বয়ং লক্ষ্মী  
স্বরূপা সাবিত্রী সতী তাঁহার গৃহে গমন করিতেছেন, তখন তিনি  
পুনরায় রাজ্য সম্পত্তি প্রাপ্ত হইবেন তাহার সন্দেহ কি ? ।

রাজা । ভগবন্ ! তবে ইহাপেক্ষা এমন গুরুতর দোষ কি আছে, আমাকে  
অবিলম্বে বলিয়া চিরক্ৰীত করুন, আমি এমন পাত্রে কখনই কণ্ঠা  
প্রদান করিব না, আপনি যাহা কহিবেন তাহাই করিব ।

নারদ । মহারাজ ! এদোষ অবগণ করিতে হইলে সাতিশয় সাহস অপেক্ষা  
করে, যেহেতুক এই সংবাদটি কর্ণকুহরে প্রবেশ মাত্রই বজ্রাঘাত  
সদৃশ একটি আঘাত আপনাকে সহ করিতে হইবে ।

রাজা । ভগবন্ ! এই কথাতে আমার উৎকলিকাকুল চিত্ত আরও বিচ্ছিন্ন  
হইল, আর বিলম্ব করিবেন না ত্বরায় আমাকে এই বিষয় জ্ঞাত  
করিয়া বাধিত করুন ।

নারদ । মহারাজ ! আপনি নিতান্ত গুনিবেন, তবে শুনুন, আপন  
তনয়া যাহাকে পতিত্বে বরণ করিতে মানস করিয়াছেন, সেই  
নৃপকুমার আর এক বৎসর পরেই কালের করাল গ্রাসে পতিত  
হইবেন । এই পর্য্যন্ত তাঁহার পরমাযুঃ বিধি কর্তৃক নির্দিষ্ট  
হইয়াছে ।

রাজা। ( কর্ণে হস্ত প্রদান করিয়া ) কি সর্বনাশ, কি সর্বনাশ। ভগবন্ !  
 আপনি চিরকাল আমাদের বংশের শুভ প্রার্থনা করিয়া থাকেন,  
 আপনি ব্যতীত কোন ব্যক্তি এবিপদ হইতে পরিজ্ঞাণ করে ?  
 আজ কি সৌভাগ্য ফলে ও পুণ্যবলে আপনার ক্রীচরণ সন্দর্শন  
 হইয়াছিল, তাই এই মহৎ বিপদ হইতে পরিজ্ঞাণ পাইলাম।  
 হা দৈব ! এই চক্ষু প্রাণের দুহিতার চির বৈধব্য যাতনা  
 দেখিতে হইত।

যখন দুহিতা মম পতির কারণ।  
 হাহাকারে উর্দ্ধস্বরে করিত রোদন ॥  
 ছিন্ন স্বর্ণলতা সম ভূমিতলে পড়ি ॥  
 পতিশোকে মনদুঃখে দিত গড়াগড়ি ॥  
 কুরঙ্গ নয়ন হতো শোকে ছল ছল।  
 ভাসিত নয়ন জলে মুখ শতদল ॥  
 হৃদয় বিদীর্ণ হতো তাহা দরশনে।  
 বাঁচিলাম প্রভু আজ তোমার কারণে ॥

নারদ। মহারাজ ! এক্ষণে সাবিত্রীকে এবিষয়ে নিরস্ত করুন, আমি স্বয়ং  
 লোকত্রয় ভ্রমণ করিয়া অসামান্য রূপ গুণ সম্পন্ন পাতে সাবিত্রী  
 সমর্পণ করিব।

রাজা। মহানুগ্রহ, কণ্ঠকিন্ ! রাজ্যীকে এখানে আসিতে বল।  
 কণ্ঠকী। যে আজ্ঞা।

( কণ্ঠকির প্রস্থান। )

মন্ত্রী। মহারাজ ! অগ্রে সাবিত্রীর মত জানিয়া পরে মহামুনির নিকট  
 স্বীকার করা কর্তব্য।

( দেবী ও কণ্ঠকির প্রবেশ। )

দেবী। মহারাজের জয় হউক মহারাজের জয় হউক। মহারাজ ! কি  
 নিমিত্ত আহ্বান করিলেন।

রাজা। দেবি ! এস এস এই আসনে উপবেশন কর।

দেবী। ভগবন্ প্রণাম করি।

নারদ। শ্রীমতীর মঙ্গল হউক।

রাজা। প্রিয়ে! একটি ভয়ানক সমাচার অবগত করিবার কারণ তোমাকে এখানে আহ্বান করিয়াছি।

দেবী। (সভয়ে)। মহারাজ! কি অমঙ্গল বার্তা?

রাজা। প্রিয়ে! সত্যবানের আর এক বর্ষ পরমায়ু অবশিষ্ট আছে, এমতে কি প্রকারে সাবিত্রীকে পতিত্বে বরণে অমুমতি করি।

দেবী। মহারাজ! কি বলিলেন! সত্যবানের আর এক বর্ষান্তে জীবন শেষ হইবে?

নারদ। হাঁ! বিধাতা কর্তৃক নির্দিষ্ট পরমায়ু কে খণ্ডিতে পারে?

দেবী। মহারাজ! কাহাকেও অমুমতি করুন, সাবিত্রীকে এখানে আনেন।

রাজা। কঙ্কুকিন্! যাও সাবিত্রীকে এখানে আন।

কঙ্কুকী। যে আজ্ঞা মহারাজ।

(কঙ্কুকির প্রস্থান।)

মন্ত্রী। মহারাজ! সাবিত্রীর বিষয়ে সন্দেহিত হইতেছি, সাবিত্রীকে এবিষয় হইতে নিরস্ত করা অতি কঠিন ব্যাপার।

রাজা। মন্ত্রিন্! মুমূর্ষু ব্যক্তিকে কণ্ঠা সম্প্রদান করিতে পিতামাতার কখনই অভিলাষ হয় না।

(সাবিত্রী ও কঙ্কুকির প্রবেশ।)

সাবিত্রী। মা! প্রণাম করি।

দেবী। বৎসে! চিরজীবিনী হও।

সাবিত্রী। ভগবন্! প্রণাম করি।

নারদ। কল্যাণ হউক।

সাবিত্রী। পিতঃ! চরণ বন্দনা করি।

রাজা। সাবিত্রি! আশীর্বাদ করি পতিপ্রিয়া হও।

দেবী। বৎসে! এক্ষণে আমার একটি কথা আছে, অঙ্গীকার কর যেন অন্যথা না হয়।

সাবিত্রী। মা! কথাটী বল, প্রতিপাল্য হইলে অবশ্য প্রতিপালন করিব।

দেবী। বৎসে! সত্যবানকে পতিত্বে বরণ করা হইবেক না, তিনি অতি অম্লায়ুঃ।

সাবিত্রী। (ক্ষণকাল নিস্তব্ধ হইয়া রহিলেন।)

দেবী । বড় যে নিরুত্তরা হইয়া রহিলে ?

সাবিত্রী । মা ! এবিষয়ে আমার অপরাধ গ্রহণ করিবেন না, আমি যখন মনে মনে তাঁহাকে বরমাল্য প্রদান করিয়াছি, তখন তিনিই আমার পতি, কোন অহুরোধে তাঁহাকে পরিত্যাগ করিতে পারিব না, জগতে এই রীতিই সম্যক্ প্রকারে বর্তমান আছে, একবার মৃত্যু হয়, একবার জন্ম হয়, একবার মাতাপিতা কন্যাদান করিতে পারেন এবং পরিণীতা বালা একবার এক জনকেই স্বামী বলিয়া স্বীকার করিতে পারে, মা ! আমি যখন তাঁহাকে একবার মনে মনে বরণ করিয়াছি, তখন কোন ক্রমেই সে বিষয়ে নিরন্তর হইব না ।

দেবী । বৎসে ! সত্যবান্ অশ্বায়ুঃ একবৎসর পরেই তাহার মৃত্যু হইবেক, অতএব জানিয়া শুনিয়া কিরূপে মৃতকল্প পাঞ্চে কন্যা সম্প্রদানে পিতামাতায় যত্ববান্ হইব ।

সাবিত্রী । মা ! সত্যবান্ মৃতকল্প হইলেও আমি তাঁহাকে পতিত্বে বরণ করিব ।

রাজা । বৎসে ! পিতামাতার কথা শ্রবণ করা সন্তানের উচিত কৰ্ম্ম, যখন আমরা তোমাকে এ বিষয়ে নিরন্তর করিতেছি, তখন আমাদিগের বাক্য রক্ষা করিতে বিশেষ যত্ন করা আবশ্যক, যে মাতা দশমাস দশদিন নানা ক্রেশে ক্লেশিত ও বিবিধ রোগ সহ করত প্রসব সময়ের বিজাতীয় কষ্ট গ্রহণে তোমাকে ভূমিষ্ঠ করিয়াছেন, সেই মাতার বাক্যে অসম্মত হওয়া কি উচিত কৰ্ম্ম হয় ?

সাবিত্রী । অল্পবুদ্ধি জন নিজ কৰ্ম্ম দ্বারা অবশেষে অহুতাপ করণে প্রবৃত্ত হয়, এমত বিবেচনা করিয়া আমাকে সত্যবান বরণে অহুমতি করুন ।

মন্ত্রী । মহারাজ ! সাবিত্রী সামান্য কন্যা নয়, বিশেষতঃ বিধবা লক্ষণ শরীরে দেখিতে পাওয়া যায় না, বোধ হয় কোন অভূতপূর্ব ঘটনা দ্বারা সাবিত্রী সত্যবান সংরক্ষণে সমর্থ হইবে, যাহা হউক, মহারাজ ! এ বিষয়ে সাবিত্রীকে বারম্বার অহুরোধ করিবেন না, “ভবিতব্যং ভবত্যেব,” ইত্যাকার বিবেচনা দ্বারা স্থস্থির হউন ।

রাজা। সাবিত্রি ! যখন সত্যবান বরণে তোমার একান্ত মানস হইয়াছে তখন তাহাতে বারম্বার অনুরোধ করা বৃথা, স্বেচ্ছানুসারে সত্যবানকে বরণ কর গে, দেবি ! সাবিত্রীকে আগামি কল্য শুভ দিনে সত্যবানে সমর্পণে অনুমতি কর ।

দেবী। মহারাজ ! আপনি অনুমতি করিলেই আমার অনুমতি হইয়াছে ।

রাজা। মন্ত্রিন্ ! বিবাহাবশ্যকীয় যাবতীয় দ্রব্যাদি সাধন করণে সম্যক্ প্রকারে তৎপর হও, রাজধানীতে এবিষয়ের ঘোষণা করিয়া দেও, প্রজাগণ নৃত্যগীতাদি দ্বারা পরিতৃপ্ত হউক, ভট্টগণ প্রকাশ্য-মার্গে সত্যবান ও সাবিত্রীর গুণ কীর্তন করুক । অধ্যাপকগণ স্বীয় স্বীয় চতুষ্পাঠিতে ঋক্ যজু সাম অথর্ব বেদাদি উপনিষদের অধ্যাপনে জনগণের চিত্তাকর্ষণ করুন, গণিকাগণ বিবিধ অলঙ্কারে ভূষিত হইয়া বাজাদির সহযোগে নদীতীর হইতে মঙ্গলঘণ্টে বারি আনয়ন করুক !

মন্ত্রী। যে আজ্ঞা মহারাজ !

( মন্ত্রির প্রস্থান । )

নারদ। মহারাজ ! সাবিত্রীর বিষয়ে সম্যক্ প্রকারে নির্ভয় থাকুন, অপরূপ সুলক্ষণাক্রান্তা বালিকা কখনই বৈধব্য যন্ত্রণা সহ করিবে না ।

( বিদূষকের প্রবেশ । )

বিদূষক। মহারাজের জয় হউক, জয় হউক, মহারাজ ! নগরে সাবিত্রী সত্যবান বিবাহের যথেষ্ট সমারোহ লক্ষিত হইতেছে, মহারাজ ! বীরনগরের রাজকুমারের সহিত পরিণয় কৰ্ম সম্পাদিত হইলে যথেষ্ট আহার করিতে পাইতাম, কিন্তু সাবিত্রী কোথা হইতে একটা মৃতকল্প পাত্র আনিয়া উপস্থিত করিল, যে তাহার বিবাহ সময়ে আহার করা দূরে থাকুক বস্ত্রাদি কাড়িয়া লইলেও লইতে পারে, সেটা বনবাসী দম্ভ্যকুমার, হা ! বিধাতঃ ! তোমার মনে কি এই ছিল ? একদিনও পেট ভরিয়া ফলার করিতে পারিলাম না, মনের খেদ মনেই রহিল, কোথায় বীরবর রাজার পুত্র মহারাজার জামাতা হইবে, কোথায় বনবাসী ঋষিকুমার সেই স্থলে অভিবিক্ত হইল, কোথায় সহস্রসেনা পরিবৃত্তা হইয়া সাবিত্রী শব্দরালয়ে



গমন করিবে গমন করিয়া কাঞ্চন নির্মিত বিবিধ প্রবাল খচিত  
খটায় শয়ন করত, চিরজীবন অশেষ সুখে অতিবাহিত করিবে,  
কোথায় বৃক্ষমূলে কুশাসনে শয়ন, বনজাত ফলমূলাদি ভক্ষণে  
গিরিনদীর উষ্ণকষায় জলপান করত যৌবনকাল বিক্ষেপিত  
হইল।

(মন্ত্রির প্রবেশ।)

মন্ত্রী। মহারাজের জয় হউক, জয় হউক, মহারাজ! সকল প্রস্তুত,  
এক্ষণে আপনি স্বপূরে গমন করুন, তথায় আবশ্যকীয় বিবিধ  
বিষয়ের পরামর্শ কারণ অন্তঃপুরস্থ বৃদ্ধাগণ মহারাজের ও দেবীর  
সমাগম অপেক্ষা করিতেছেন।

রাজা। দেবি! তবে চল আর বিলম্বে প্রয়োজন নাই, অন্তঃপুরস্থ  
বৃদ্ধাগণ আমাদিগের সমাগম প্রতীক্ষা করিতেছেন।

দেবী। মহারাজ! তবে চলুন।

নারদ। মহারাজ! আমি এক্ষণে স্বস্থানে গমন করি, সাবিত্রী বিষয়ে  
ভাবিত হইবেন না, সাবিত্রী সামান্য কণ্ঠা নন।

রাজা। প্রভো! তবে প্রণাম করি।

নারদ। চিরজীবী হও।

(নিষ্ক্রান্তাঃ সর্বে।)

(সাগরিকা, তরলিকা, ও সাবিত্রীর প্রবেশ।)

সাগরিকা। সখি সাবিত্রি! স্বপূর ভবনে গমন করিয়া যে যে বিষয়  
প্রতিপালন করিতে হইবে তাহা শ্রবণ কর।

সাবিত্রী। সখি! তোমরা সে সকল বিষয়ে বিলক্ষণ নিপুণ অহুগ্রহ করে  
আমাকে বল আমি তাহাই শিক্ষা করিয়া তদনুগামিনী হইব।

তরলিকা। সখি! তুমি লেখাপড়া শিখিয়াছ বিলক্ষণ বুদ্ধিমতীও বট,  
তোমাকে শিক্ষা দেওয়া বাড়ার ভাগ।

সাবিত্রী। না সখি! উপদেশ গ্রহণে পাণ্ডিত্য অপেক্ষা করে না, সখী  
সাগরিকা ও হেমলতিকা এবিষয়ে বিলক্ষণ উপদিষ্টা, উহারা যে  
পরামর্শ দেবেন তাহাই আমার গ্রাহ।

সাগরিকা। সখি! স্বপূর ভবনে গমন করিয়া সময়ে পতি শুশ্রূষা, সময়ে

স্বস্তুর শান্তিটির সেবা এবং অহুগত জনের প্রতি স্নেহ প্রকাশ করিও, আর সখি যদি সপত্নী থাকে তাহাকে নিজ প্রিয়সখীর স্থান যত্ন কর, দেখো যেন সপত্নী বলে তাহার প্রতি হিংসা করিও না, নিয়ত ভোগের বাসনা পরিত্যাগ করে স্বামির স্বমতে ও স্বস্তুর শান্তিটির অহুমত্যহুসারে কৰ্ম কর, যাতে লোকে ভাল বলিবে, সকলের আদরিণী ও পতি সোহাগিনী হবে, সৌভাগ্যশালিনী হতে পারবে।

সৈনিক পুরুষদ্বয়ের প্রবেশ।

প্রথম। তার পর ?

দ্বিতীয়। তার পর মহারাজ রথাদি প্রস্তুত করিতে অহুমতি করিয়া রাণীর নিকট বিদায় গ্রহণে গমন করিয়াছেন, অবিলম্বেই আসিবেন, সাবিত্রী এতক্ষণে পরিণীতবেশা হইয়া মহারাজের অপেক্ষায় রহিয়াছেন, কারণ বৃদ্ধ কঞ্চুকী অনেকক্ষণ হইল সাবিত্রীকে আনিতে আদিষ্ট হইয়াছে।

সাবিত্রী। সখি ! ঐ দেখ কাহারো আসিতেছে, বোধ হয় পিতা আসিবেন চল এ স্থান হইতে প্রস্থান করিয়া অন্তঃপুরে গমন করি।

উভয়ে। হাঁ সখি।

( সাবিত্রীর সখীদ্বয়ের সহিত প্রস্থান। )

প্রথম। ওহে ভাই তবে চল আমরা রথারোহণ করিগে।

দ্বিতীয়। হাঁ ! ভাই তবে চল।

( উভয়ের প্রস্থান। )

পঞ্চম কাণ্ড

প্রথম অঙ্ক

পটোত্তোলনানন্তর, সায়ংকাল বন।

( সাবিত্রী ও সত্যবানের প্রবেশ। )

সাবিত্রী। নাথ ! আমিও তোমার সহিত গমন করিব।

সত্যবান। প্রিয়ে ! তুমি একে অবলা স্ত্রীলোক, বিশেষতঃ তিন দিন আহার করা দূরে থাকুক বিন্দুমাত্র জলও গ্রহণ কর নাই,



অতএব তোমাকে অত্ন আমি কোন মতেই বনমধ্যে লইয়া যাইতে পারিব না, বরং অত্ন এক দিন আমার সহিত উপবনে গমন করিলেও করিতে পার।

সাবিত্রী। নাথ! তাহা হইবে না আমি প্রতিজ্ঞা করিয়াছি, তোমার সহিত গমন করিব, ইহাতে তুমি বাধা দিলেও আমি নিজ প্রতিজ্ঞা ভঙ্গ করিব না।

সত্যবান। যদি নিতান্তই গমনে স্থির প্রতিজ্ঞা করিয়াছ, তবে চল।

( উভয়ের কিয়দূর গমন। )

সাবিত্রী। নাথ! আহা এই শিরীষবৃক্ষ কুসুমিত হইয়া অপূর্ব শোভা ধারণ করিয়াছে।

সত্যবান। প্রিয়ে! তুমি কিয়ৎকালের নিমিত্ত এস্থলে অবস্থান কর, আমি এই শিরীষ বৃক্ষোপরি আরোহণ করি অত্ন আমাদিগের কাষ্ঠ নাই এই শিরীষবৃক্ষের শুষ্ক শাখা দ্বারা আমাদেরো বিশেষ উপকার হইবেক, এবং বৃক্ষেরও শোভা বৃদ্ধি হইবার সম্ভাবনা।

( সত্যবান বৃক্ষোপরি আরোহণ করিল )

সাবিত্রী। নাথ! ঐ পুষ্পস্তবকটি নিয়ে ফেলিয়া দেও, ঐটি দেখিতে বড়ই সুন্দর।

সত্যবান। প্রিয়ে! ভ্রমরগণ পুষ্প বিরহভয়ে চতুর্দিক ব্যাপিয়া রহিয়াছে, উহাতে হস্ত প্রদান করা দুর্লভ, ( কিয়ৎকাল মৌনাবলম্বন করিয়া ) প্রিয়ে! আমার মস্তক বেদনা করিতেছে, বোধ হয় যেন আমার কাল উপস্থিত, শরীর ক্রমে অবসন্ন হইতেছে। আর বৃক্ষোপরি বসিবার শক্তি নাই, আমাকে ধর, ( হস্ত প্রসারণ করত ভূমিতলে পতিত হইলেন। )

সাবিত্রী। ( দৌড়িয়া গিয়া সত্যবানকে ধরিয়া সন্তর্পণে ক্রোড়ে নিবেশিত করিয়া ) হা, নাথ! কি হইল বুঝি দুঃস্থ নারদের কথা যথার্থই হইল, নাথ! তুমি কি আমাকে পরিত্যাগ করিলে, হৃদয়! এত দিনে কি জানিতে পার নাই যে পুরুষের মন পাষণ্ড হইতেও কঠিন, পুরুষের আত্ম পর বিবেচনা নাই, দয়া নাই, মমতা নাই, নাথ! উঠ উঠ, আর অনর্থক নিরপরাধিনী কুলকামিনীকে

ক্লেশিত করো না, এক বার বিশাল নয়নে বীক্ষণ কর, হতভাগিনী সাবিত্রী, পিতা মাতা সহোদর সহোদরাগণ পরিত্যাগ করিয়া তোমার চরণে শরণ লইয়া ছিল, এক্ষণে শরণাগতকে পরিত্যাগ করিয়া পলায়নপর হওয়া উচিত নয়, আশালতা হৃদয় হইতে সমূলে উৎপাটিত হইল, এক্ষণে হতাশ সূর্য্য বৈধব্য যন্ত্রণা রশ্মিঘারা চিরকাল ক্লেশিত করণার্থ সমুদিত হইল, সৌভাগ্য চন্দ্ৰিমা দৈব বিড়ম্বনা মেঘে আচ্ছাদিত হইল, এক্ষণে জীবন বিফল ।

গীত ।

রাগিণী বেহাগ, তাল আড়াঠেকা ।

এই কি কপালে ছিল বিধির লিখন ।  
এ সময়ে প্রাণনাথ তেজিল জীবন ॥  
প্রেমতরু হৃদিপরে, রোপিব যতন করে,  
অকালে শমন তারে, করিল নিধন ।  
কত আশা মনে ছিল, প্রাপ্ত হব সুখ ফল,  
মুকুলে বিবাদী হল, বিধাতা এখন ॥

নাথ ! উঠ উঠ, এক বার অধিনীর দিকে দৃষ্টিপাত কর, অতঃ  
তোমার পিতামাতার নিকট আমি কি বলিয়া মুখ দেখাইব,  
নাথ ! অধিনীকে দয়া করে এক বার গাত্রোখান কর, হে বনবাসী  
বিনিদ্রিত পক্ষিগণ ! হে বনদেবতাগণ ! তোমরা একবার অনুগ্রহ  
করিয়া নাথকে গাত্রোখান করিতে অনুমতি কর । নাথ উঠ উঠ  
একবার গাত্রোখান কর তোমার অন্ধ পিতামাতা তোমা বিরহে  
প্রাণ পরিত্যাগ করিবে, ( ক্ষণকাল নিস্তব্ধ থাকিয়া ) হা ! ব্রাহ্মণ  
গণের অমোঘ বাক্যও সময়ে এবং কাল গুণে অন্তথা হয় ।  
ভবানীপতিও কি আমার প্রতি একেবারে কৃপা শূন্য হইলেন ?

গীত ।

রাগিণী ভৈরবী, তাল আড়াঠেকা ।

কেমনে এবনে ভব পাব তব দরশন ।  
বিপদে পড়িয়ে নাথ লয়েছি তব শরণ ॥

জগত জন জীবন, মৃত্যুঞ্জয় পঞ্চানন,  
 ভবভয়ে পায় ভ্রাণ, করিলে তব সাধন ।  
 কাম দর্প ধ্বংস কর, আশুতোষ দিগম্বর,  
 দাসীরে করুণা কর, পতিপ্রাণ কর দান ॥  
 সাবিত্রী জীবন হর, শিবলোক শিবকর,  
 পার্শ্বতী প্রাণেশ্বর, হর কর পরিভ্রাণ ।

( চারিদিকে অবলোকন করিয়া ) ক্রমে রজনী নিজগাঢ় তিমির দ্বারা বনস্থলী ব্যাপিত করিল । ভয়ানক হিংস্রক পশুগণ আহারান্বেষণে ইতস্তত ভ্রমণ করিতেছে, অদূরে পেচক কুলের অমঙ্গল ও দূষিত চিৎকার দ্বারা এমন রমণীয় বনস্থলীও শ্মশান-বৎ বোধ হইতেছে, এক্ষণে কি উপায় অবলম্বন করি । মন ! শাস্ত হও বিপদ সময়ে অস্থিরতা প্রকাশ করিও না শোকাবেগ সম্বরণ করত স্মৃতি যুক্ত উপায়ের পন্থা অন্বেষণ কর ( কিয়ৎকাল চতুর্দিকে অবলোকন করিয়া ) অহো ! এতক্ষণে জানিলাম ভবানীপতি আমার প্রতি প্রসন্ন হইয়াছেন ।

( যমের প্রবেশ । )

সাবিত্রী । ভগবন্ ! প্রণাম করি, আপনি সহায় হইলে আর কি ভয় ।  
 যম । ( স্বগত ) আহা ! পতিব্রতা স্ত্রী পতি শোকে ইতঃ পর বিবেচনা শূন্য হইয়া পড়িয়াছে, ( প্রকাশ্যে ) কহে ! আমি যমরাজ তোমার মৃত পতিকে লইতে আসিয়াছি, এক্ষণে শোক পরিত্যাগ পূর্বক পতির উদ্ধ দৈহিক নিয়মিত কর্মে যত্নবতী হও, পরে ব্রহ্মচর্য্য অথবা পুনর্বিবাহ দ্বারা জীবনের অবশিষ্ট কাল যাপন করিও, ( যম সত্যবানের দেহ পাশে বদ্ধ করিয়া পৃষ্ঠদেশে প্রক্ষেপ করত প্রস্থানোত্তম করিল । )

সাবিত্রী । হৃদয় ! এক্ষণে আর অনুশোচনে প্রয়োজন করে না, ( যমের পশ্চাৎ গমন । )

যম । ( পশ্চাদবলোকন করিয়া ) একি ! তেজে যে দক্ষ প্রায় হইলাম, রাজকহে ! তুমি পতির পারত্রিক মঙ্গল কর্মে বিরত হইয়া আমার সহগামিনী হইয়াছ, ইহার কারণ কি ?

সাবিত্রী । ভগবন্ ! জগতীতলে পূর্ব পরম্পরা একুশ নীতি প্রচলিত আছে, যে সল্লোকেরা সৎ সহবাসেই সর্বদা কালক্ষেপ করেন যদ্বারা ধর্ম এবং জ্ঞানের ক্রমশঃ আলোচনা দ্বারা অন্ত্যন্ত বিবিধ প্রকার নিকৃষ্ট কর্মে হতাদর হইতে পারে, তন্নিমিত্তেই লোকে প্রথমতঃ সৎ সহবাসই জ্ঞানার্জনের পথ বলিয়া স্বীকার করেন, আপনি ধর্ম এবং সাধুগণের পূজ্য অতএব আপনার সহবাস বিরহ ভয়ে আপনারই সহগামিনী হইতেছি ।

যম । সাবিত্রি ! তুষ্ট হইলাম মনের অনুকূল বলিতেছ সত্যবানের জীবন ভিন্ন ঈপ্সিতবর যাচঞা কর ।

সাবিত্রী । ভগবন্ ! যদি একান্তই বর প্রদান করিবেন তবে আমার পিতা পুত্র বিহীন যাহাতে তাঁহার শতাধিক বলিষ্ঠ পুত্র হয় তাহা করুন ।

যম । তথাস্ত, তাহাই হইবে, এক্ষণে যাও পতির উর্দ্ধ দৈহিক ক্রিয়া সম্পাদন করত পুনর্বিবাহ বা ব্রহ্মচর্য্যাবলম্বন করিয়া জীবনের অবশিষ্ট কাল ক্ষেপণ কর ।

( পরিক্রমণ । )

( পশ্চাদবলোকন করিয়া ) একি ? পুনরায় আমার সহিত আসিতে লাগিলে ?

সাবিত্রী । ভগবন্ ! ইহ সংসারে ধর্মই এক মাত্র শ্রেষ্ঠ পদার্থ সাংসারিক যাবতীয় কর্ম ধর্মোপার্জনের উপায় স্বরূপে বিদ্যস্ত, অতএব ভাগ্য ফলে যখন আপনার দর্শন পাইয়াছি কখনই আপনাকে পরিত্যাগ করিব না, সাংসারিক আচার আবৃত হইয়া আমার ইত্যাকার বিবেচনায় জনগণ ধর্মোপার্জনে বিরত হয়, কিন্তু পরিশেষে সাধুগণ ধর্মই একমাত্র নিত্য লাভের পন্থা জানিয়া ধর্মোপার্জনে নিবিষ্ট হন ।

যম । সাবিত্রি ! তুষ্ট হইলাম, মনের অনুকূল বলিতেছ, সত্যবানের জীবন ভিন্ন ঈপ্সিতবর গ্রহণ কর ।

সাবিত্রী । ভগবন্ ! আমার স্বশ্র ও স্বশুর অঙ্ক যাহাতে তাঁহারা দিব্য চক্ষু লাভ করত স্বরাজ্য গ্রহণে সমর্থ হন এমত বর প্রদান করুন ।

যম । তথাস্ত, তাহাই হইবে, যাও এক্ষণে গৃহে গমন কর । দেখ ক্রমে নিবিড়গাঢ় তিমির দ্বারা পৃথিবী আচ্ছন্ন হইল, নক্ষত্র জালমালা

ব্যাপ্তা যামিনী ক্লে ক্লে চক্রবাক ও চকোরদিগের ধ্বনি ও মল্ল সমীরণের দ্বারা জনগণের সম্যক তৃপ্তিকারিণী হইয়াছে, কিন্তু বনমধ্যে ভীষণ পশুগণ স্বীয় স্বীয় আহাৰাশ্বেষণার্থ ভয়ঙ্কর রবে ভ্রমণ করিতেছে, বৃক্ষপতিত শুষ্ক পত্র রাশি মর্ম্মর শব্দ এবং নিবার কণিত বারিধারা প্রপাতশব্দে অদূরস্থিত গিরিগুহায় প্রতিধ্বনিত হইতেছে, এবম্বিধ সময়ে কুলকামিনীগণের বনমধ্যে অসহায় হইয়া থাকা উচিত নহে।

( পরিক্রমণ ও পশ্চাদবলোকন । )

একি ! পুনরায় যে আমার সহিত আসিতে লাগিলে ?

সাবিত্রী । এই জগন্মণ্ডলে মানবগণ লোভ পরবশ হইয়া বিবিধ প্রকার দুষ্কর্মে অবিরত অভিরত থাকে, শাস্ত্রেও কথিত আছে, লোভ হইতে ক্রোধ উৎপন্ন হয় লোভ হইতে অভিলাষ জন্মে লোভ হইতে মোহ জন্মে এই হেতু লোভই সকল পাপের মূল কারণ, বিশেষতঃ যে স্থানে স্ত্রীলোকের পতি গমন করিবেন তাহারও সেই স্থানে যাওয়া উচিত, যদ্বারা ধর্ম্ম ও সংপন্থা লাভের বিশেষ উপায় সৃষ্ট হইতে পারে, আপনি আমার পতিকে যে স্থানে লইয়া যাইবেন আমিও সেই স্থানে গমন করিব।

যম । সাবিত্রি ! মনের অনুকূল বলিতেছ, সন্তুষ্ট হইলাম, সত্যবানের জীবন ভিন্ন ঈপ্সিত বর গ্রহণ কর।

সাবিত্রী । ভগবন্ ! মৃত পতির সহবাসে আমার গর্ভে শতাধিক সন্ততি উৎপাদিত হউক।

যম । তথাস্তু, তাহাই হইবে যাও এক্ষণে গৃহে গমন করত শ্বশুর ও শ্বশুর সেবা করণে নিযুক্ত হও।

( পরিক্রমণ ও পশ্চাদবলোকন । )

একি ? পুনরায় আমার সহিত আসিতে লাগিলে ?

সাবিত্রী । ভগবন্ ! সত্যই ইহ সংসারে শ্রেষ্ঠ পদার্থ তন্নিমিত্ত সাধুগণ প্রাণপণে যথার্থ পথে গমন করেন।

যম । হাঁ ! ইহা অতীব যথার্থ, সত্যই সকলের শ্রেষ্ঠ পদার্থ।

সাবিত্রী । তবে ভগবানের বাক্য অগ্রথা হইলে অন্য পরের কথায় নিম্নয়োজন।



যম । ( সরোষে ) কি ? আমার বাক্য অন্তথা হইবে ? কাহার সাধ্য আমার বাক্যে প্রতিকূলতাচরণ করে ।

সাবিত্রী । ভগবন্ ! ভবদীয় অহুগ্রহে মৃত পতির সহবাসে আমার গর্ভে শতাদিক সন্ততি উৎপাদিত হইবে কিন্তু আপনি আমার পতিকে পরিত্যাগ না করিয়া লইয়া যাইতেছেন, তন্নিমিত্তই ভগবানের বাক্যের অন্তথা ভয়ে এবিষয় আপনাকে স্মরণ করাইয়া দিলাম ।

যম । ( স্বগত ) অহো ! কি ভ্রম আমি কি যথার্থই এরূপ বর প্রদান করিয়াছি, ( কিঞ্চিৎকাল মৌনাবলম্বন করিলেন ) হাঁ হইলেও হইতে পারে পতিব্রতা স্ত্রী কখনই মিথ্যাবাদিনী হইতে পারে না, যাহা হউক ভবিতব্যতানুসারেই এবম্প্রকার মহতীঘটনা সংঘটিত হয় । যাহা হউক সত্যবানকে পরিত্যাগ করত গমন করাই শ্রেয়ঃকল্প ( প্রকাশ্যে ) সাবিত্রি ! অশেষ প্রকার পরীক্ষা দ্বারা জানিলাম, তুমি পতিপ্রাণা পতিব্রতাগণশ্রেষ্ঠা জগতীতলে তোমার গায় পতিব্রতাসতী অতীবধি অবতীর্ণা হয় নাই । বিশেষতঃ তুমি নানাগুণ সম্পন্না এক্ষণে আমার বরে তোমার পতি পুনরায় জীবন প্রাপ্ত হইয়া ধরাধামে শতাদিক বর্ষকাল সুখে সাম্রাজ্য পালনে সম্মত হইবেন, এবং পৃথিবীতলে কি বালক কি যুবা কি বৃদ্ধ সকলেই তোমার গুণ কীর্তন করিবে যদি পতিব্রতাসতীর উপমার প্রয়োজন হয় যদি কামিনী পতি শুশ্রূষণ বিধি শিক্ষা করিতে অভিলাষিনী হন তাহা হইলে তোমার দৃষ্টান্তের অনুগামিনী হইবে ।

গীত ।

রাগিনী কেদারা, তাল চোঁতাল ।

বাগ্মণী ধনেশ্বরী কৃপাকরি দুইজনে ।

তবে গৃহে রবেন সদা বদ্ধ হয়ে নিজগুণে ॥

ভদ্রকুল কামিনী, হয়ে পতি সোহাগিনী,

সতীত্ব রাখিতে যত্ন করিবেন একমনে ।

সাবিত্রী গুণ কীর্তন, করিবেন অমুকণ,

ধর্ম জ্ঞান পরায়ণ, হোক সব প্রজাগণে ॥

( পট প্রক্ষেপণ নিষ্কান্তাঃ সর্কে । )

সমাপ্ত ।

# একেই কি বলে সভ্যতা ?

( প্রহসন )

শ্রীমাইকেল মধুসূদন দত্ত

সন ১২৬৬ সাল

প্রথম অঙ্ক । প্রথম গর্তাঙ্ক

নবকুমার বাবুর গৃহ । নবকুমার ও কালীনাথ বাবু—আসীন ।

কালী । বল কি ?

নব । আর ভাই বলব কি । কর্তা এতদিনের পর বৃন্দাবন হতে ফিরে এসেছেন । এখন আমার আর বাড়ী থেকে বেরনো ভার ।

কালী । কি সর্বনাশ ! তবে এখন এর উপায় কি ?

নব । আর উপায় কি ? সভাটা দেখছি এবলিশ্ কন্ডো হল ।

কালী । বাঃ, তুমি পাগল হলে নাকি ? এমন সভা কি কেউ কখন এবলিশ্ করো থাকে ? এত তুফানে নৌকা বাঁচিয়ে এনে, ঘাটে এসে কি হাল্ ছেড়ে দেওয়া উচিত ? যখন আমাদের সবজিঙ্গল্-লিষ্ট অতি পুয়র ছিল, তখন আমরা নিজে থেকে টাকা দিয়ে সভাটি সেভ্ করেছিলাম, এখন—

নব । আরে ওসব কি আমি আর জানিনে, যে, তুমি আমাকে আবার নতুন করে বলতে এলে ? তা আমি কি, ভাই, সাধ করে সভা উঠিয়ে দিতে চাচ্ছি ? কিন্তু করি কি ? কর্তা এখন কেমন হয়েছেন যে, দশ মিনিট যদি আমি বাড়ীছাড়া হই, তাহলে তখনি ভয় করেন । তা ভাই, আমার কি আর এখন সভায় এটেণ্ড দেবার উপায় আছে । ( দীর্ঘনিশ্বাস ) ।

কালী । কি উৎপাত ! তোমার কথা শুনে, ভাই, গলাটা একবারে যেন শুথিয়ে উঠলো । ওহে নব, বলি কিছু আছে ?

নব । হুঃ ! অত চেষ্টিয়ে কথা কয়োনা, বোধ করি একটা ব্রাণ্ড আছে ।

কালী । ( সহর্ষে ) জষ্ট দি থিং । তা আনোনা দেখি ।



নব। রসো দেখছি। ( চতুর্দিক অবলোকন করিয়া ) কর্তা বোধ করি  
এখনো বাড়ীর ভিতর থেকে বেরোন নি। (উচ্চস্বরে) ওরে বোদে !  
নেপথ্যে। আজ্ঞে যাই।

কালী। আজ রাতে কিন্তু, ভাই, একবার তোমাকে যেতেই হবে।  
( স্বগত ) হাঃ, এবুড়ো বেটা কি অকালের বাদল হয়ে আমাদের  
প্রেজার নষ্ট কত্বে এলো? এই নব আমাদের সন্দার, আর  
মনি-ম্যাটারে এই বিশেষ সাহায্য করে; এ ছাড়লে যে আমাদের  
সর্বনাশ হবে, তার সন্দেহ নাই।

( বোদের প্রবেশ। )

নব। কর্তা কোথায় রে?

বৈজ্ঞ। আজ্ঞে দাদাবাবু, তিনি এখন বাড়ীর ভিতর থেকে বেরোন নি।

নব। তবে সেই বোতলটা আর একটা গ্রাস্ শীঘ্র করে আনতো।

( প্রস্থান )

কালী। ভালো নব, তোমাদের কর্তা কি খুব বৈষ্ণব হে?

নব। ( দীর্ঘ নিশ্বাস পরিত্যাগ করিয়া ) ও দুঃখের কথা ভাই আর কেন  
জিজ্ঞাসা কর? বোধ করি কল্কাতায় আর এমন ভক্ত দুটি নাই।

( বোতল ইত্যাদি লইয়া বোদের পুনঃপ্রবেশ )

কালী। এদিকে দে।

নব। শীঘ্র নেও ভাই। এখন আর সে রাবণও নাই, সে সোনার  
লকাও নাই।

কালী। না থাকলো তো বোয়ে গেল কি! এতো আছে? ( বোতল  
প্রদর্শন ) হা, হা, হা! ( মৃদুপান )।

নব। আরে করো কি, আবার?

কালী। রসো ভাই, আরো একটুখানি খেয়ে নি। দেখ, যে গুড়  
জেনেরেল্ হয়, সে কি সুষোগ পেলে তার গোরিসনে প্রোবিজন  
জমাতে কসুর করে? হা, হা, হা! ( পুনর্মৃদুপান )।

নব। ( বোদের প্রতি ) বোতল আর গ্রাস্টা নিয়ে যা, আর শীগ্গীর  
গোটাকতক পান নিয়ে আর।

( বোদের প্রস্থান )

কালী। এখন চল ভাই, তোমাদের কর্তার সঙ্গে একবার দেখা করা  
যাগ্গে। আজ কিন্তু তোমাকে যেতেই হবে, আজ তোমাকে  
কোন শালা ছেড়ে যাবে।

নব। তোমার পায়ে পড়ি, ভাই, একটু আন্তে আন্তে কথা কও।

( পান লইয়া বোদের পুনঃপ্রবেশ )

কালী। দে, এদিকে দে।

নেপথ্যে। ও বৈষ্ণনাথ।

( বোদের প্রস্থান )

নব। এই যে কর্তা বাইরে আসছেন। নেও, আর একটা পান  
নেও।

কালী। আমি ভাই, পান তো খেতে চাইনে, আমি পান কত্নো চাই।  
সে যা হউক, তবে চল না, কর্তার সঙ্গে সাক্ষাৎ করি গিয়ে।

নব। ( সহাস্ত্র বদনে ) তোমার, ভাই, আর অতো ক্লেশস্বীকার কত্নো  
হবে না। কর্তা তোমার গাড়ী দরোজায় দেখলেই আপনি এখানে  
এসে উপস্থিত হবেন এখন।

কালী। বল কি? আই সে, তোমার চাকর বেটাকে, ভাই, আর একটু  
ব্রাণ্ডি দিতে বলতো; আমার গলাটা আবার যেন শুথ্য়ে উঠছে!

নব। কি সর্বনাশ! দেখছি তোমার একটু যেন নেশা হয়েছে;  
আবার খাবে?

কালী। আচ্ছা, তবে থাকুক! ভাল, কর্তা এখানে এলে কি বলবো  
বলো দেখি?

নব। আর বলবে কি? একটা প্রণাম করে আপনার পরিচয় দিও।

কালী। কি পরিচয় দেব, বল দেখি ভাই? তোমাদের কর্তাকে কি বলবো  
যে আমি বিএরের—মুখটি—স্বকৃতভঙ্গ—সোনাগাছিতে আমার  
শত স্বপ্নর—না না স্বপ্নর নয়—শত শাশুড়ীর আলয়, আর  
উইল্‌সনের আখড়ায় নিত্য মহাপ্রসাদ পাই—হা, হা, হা!

নব। আঃ, মিছে তামাসা ছেড়ে দেও, এখন সত্তি কি বলবে বল দেখি?  
এক কর্ম কর, কোন একটা মস্ত বৈষ্ণব ফ্যামিলির নাম ঠাওরাতে  
পার? তাহলে আর কথাটি কইতে হয় না!

কালী। তা পারবো না কেন? তবে একটু মাটি দেও, উড়ে বেঘারাদের মতন নাকে তিলক কেটে আগে সাধু হয়ে যনি।

নব। নাহে না, ( চিন্তা করিয়া ) গরগহাটার কোন্ ঘোষ না পরম বৈষ্ণব ছিল?—তার নাম তোমার মনে আছে?—ঐ বে ঘর ছেলে আমাদের সঙ্গে এক ক্লাশে পড়তেন?

কালী। আমি ভাই, গরগহাটার প্যারী আর তার ছুকরি বিন্দি ছাড়া আর কাকেও চিনি না।

নব। কোন্ প্যারী হে?

কালী। আরে, গোদা প্যারী। সে কি? তুমি কি গোদা প্যারীকে চেনো না? ভাই, একদিন আমি আর মদন যে তার বাড়ীতে যেয়ে কত মজা করেছিলাম, তার আর কি বলবো! সে যাক, এখন কি বলবো তাই ঠাওরাও।

নব। ( চিন্তা করিয়া ) হাঁ—হয়েছে। দেখ, কালী, তোমার কে একজন খুড়ো পরম বৈষ্ণব ছিলেন না? যিনি বৃন্দাবনে গিয়ে মরেন।

কালী। হাঁ, একটা ওল্ড ফুল ছিল বটে, তার নাম কৃষ্ণপ্রসাদ ঘোষ।

নব। তবে বেশ হয়েছে। তুমি তাঁরি পরিচয় দিও, বাপের নামটা চেপে যাও।

কালী। হা, হা, হা।

নব। দূর পাগল, হাসিস্ কেন?

কালী। হা, হা, হা! ভাল তা হলো, এখন বৈষ্ণব বেটাদের দু'একখানা পুঁথিব নাম তো না শিখলে নয়।

নব। তবেই যে সাবলে। আমি তো সে বিষয়ে পরম পণ্ডিত। রসো দেখি, ( চিন্তা করিয়া ) শ্রীমদুগবদগীতা—গীতগোবিন্দ—

কালী। গীত কি?

নব। জয়দেবের গীতগোবিন্দ।

কালী। ধর—শ্রীমতীভগবতীর গীত, আর—বিন্দা-দৃতীর গীত—

নব। হা, হা, হা! ভায়ার কি চমৎকার মেমারি।

কালী। কেন কেন?

নব। হু! কর্তা আসছেন। দেখ, ভাই, যেন একটা বেশ করে প্রণাম করো।

( কর্তামহাশয়ের প্রবেশ )

কালী । ( প্রণাম ) ।

কর্তা । চিরজীবী হও বাপু, তোমার নাম কি ?

কালী । আজ্ঞে, আমার নাম শ্রীকালীনাথ দাস ঘোষ । মহাশয় আপনি  
কৃষ্ণপ্রসাদ ঘোষ মহাশয়কে বোধ করি জানতেন । আমি তাঁর  
ভ্রাতুষ্পুত্র—

কর্তা । কোন্ কৃষ্ণপ্রসাদ ঘোষ ?

কালী । আজ্ঞে, বাঁশবেড়ের—

কর্তা । হাঁ, হাঁ, হাঁ । তুমি স্বর্গীয় কৃষ্ণপ্রসাদ ঘোষ মহাশয়ের ভ্রাতুষ্পুত্র,  
যিনি শ্রীবৃন্দাবনধাম প্রাপ্ত হন ।

কালী । আজ্ঞে হাঁ ।

কর্তা । বেঁচে থাক, বাপু । বসো ।

( সকলের উপবেশন )

তুমি এখন কি কর বাপু ?

কালী । আজ্ঞে, কালেজে নবকুমার বাবুর সঙ্গে এক ক্লাশে পড়া হয়েছিল,  
এক্ষণে কর্ম কাজের চেষ্টা করা হচে ।কর্তা । বেশ, বাপু ! তোমার স্বর্গীয় খুড়া মহাশয় আমার পরম মিত্র  
ছিলেন । বাবা, আমি তোমার সম্পর্কে জোঁটা হই, তা জান ?

কালী । আজ্ঞে ।

কর্তা । ( স্বগত ) আহা, ছেলেটি দেখতে শুনতেও যেমন আর তেমনি  
সুশীল । আর না হইবে বা কেন ? কৃষ্ণপ্রসাদের ভ্রাতুষ্পুত্র  
কি না !কালী । জ্যেষ্ঠমহাশয়, আজ নবকুমারদাদাকে আমার সঙ্গে একবার যেতে  
আজ্ঞা করুন—

কর্তা । কেন বাপু, তোমরা কোথায় যাবে ?

কালী । আজ্ঞে, আমাদের জ্ঞানতরঙ্গিনী নামে একটা সভা আছে, সেখানে  
আজ মিটিং হবে ।

কর্তা । কি সভা বললে বাপু ?

কালী । আজ্ঞে, জ্ঞানতরঙ্গিনী সভা ।

কর্তা । সে সভায় কি হয় ?

কালী। আজ্ঞে, আমাদের কালেজে থেকে কেবল ইংরাজী চর্চা হয়েছিল, তা, আমাদের জাতীয় ভাষা তো কিঞ্চিৎ জানা চাই, তাই এই সভাটি সংস্কৃতবিদ্যা আলোচনার জন্তে সংস্থাপন করেছি। আমরা প্রতি শনিবার এই সভায় একত্র হয়ে ধর্মশাস্ত্রের আন্দোলন করি।

কর্তা। তা বেশ কর। (স্বগত) আহা, কৃষ্ণপ্রসাদের ভ্রাতুষ্পুত্র কি না! আর এ নবকুমারেরও তো আমার ঔরসে জন্ম। (প্রকাশে) তোমাদের শিক্ষক কে বাপু?

কালী। আজ্ঞে, কেনারাম বাচস্পতি মহাশয়, যিনি সংস্কৃত কালেজের প্রধান অধ্যাপক—

কর্তা। ভাল, বাপু, তোমরা কোন্ সকল পুস্তক অধ্যয়ন কর, বল দেখি?

কালী। (স্বগত) আমলো! এতক্ষণের পর দেখছি সাল্লা! (প্রকাশে) আজ্ঞে—শ্রীমতী ভগবতীর গীত আর—বোপদেবের বিনাদূতী।

কর্তা। কি বলে, বাপু?

নব। আজ্ঞে, উনি বলছেন শ্রীমদ্ভগবদ্গীতা আর জয়দেবের গীত-গোবিন্দ।

কর্তা। জয়দেব? আহা, হা, কবি-কুলতিলক, ভক্তিরস-সাগর।

কালী। জ্যেষ্ঠামহাশয়, যদি আজ্ঞে হয়, তবে এক্ষণে আমরা বিদায় হই।

কর্তা। কেন, বেলা দেখছি এখনো পাঁচটা বাজেনি, তা, তোমরা, বাপু, এত সকালে যাবে কেন?

কালী। আজ্ঞে, আমরা সকাল সকাল কর্ম নির্বাহ করবো বলে সকালে যেতে চাই, অধিক রাত্রি জাগলে পাছে বেমোটেমো হয়, এই ভয়ে সকালে মীট করি।

কর্তা। তোমাদের সভাটা কোথায় বাপু?

কালী। আজ্ঞে সীকদার পাড়ার গলিতে।

কর্তা। আচ্ছা বাপু, তবে এসো গে! দেখো যেন অধিক রাত্রি করো না।

নব এবং কালী। আজ্ঞে না।

(উভয়ের প্রস্থান)

কর্তা। (স্বগত) এই কল্কাতা সহর বিষম ঠাই তাতে করে ছেলেটিকে একলা পাঠয়ে ভাল কল্যেম? (চিন্তা করিয়া) একবার বাবাজীকে

পাঠ্যে দি না কেন, দেখে আশ্চর্য ব্যাপারটাই কি? আমার মনে যেন কেমন সন্দেহ হচ্ছে যে, নবকে যেতে দিয়ে ভাল করি নাই।

[ প্রস্থান ]

—:—

দ্বিতীয় গর্তাঙ্ক।

সিক্‌দার পাড়া ষ্ট্রীট।

( বাবাজীর প্রবেশ )

বাবাজী। ( স্বগত ) এই তো সিক্‌দার পাড়ার গলি, তা কই? নববাবুর সভাভবন কই? রাধেকৃষ্ণ। [ পরিক্রমণ। ] তা, দেখি, এই বাড়ীটাই বুঝি হবে। [ দ্বারে আঘাত ]।

নেপথ্যে। তুমি কে গা? কাকে খুঁজচো গা?

বাবাজী। ওগো, এই কি জ্ঞানতরঙ্গিণী সভার বাড়ী?

নেপথ্যে। ও পুঁটী দেখতোলা, কোন বেটা মাতাল এসে বুঝি দরজায় ঘা মাচ্ছে? ওর মাথায় খানিক জল ঢেলে দে তো।

বাবাজী। ( স্বগত ) প্রভো, তোমারি ইচ্ছে। হায়, এত দিনের পর কি মাতাল হলেম।

নেপথ্যে। তুই বেটা কে রে? পালা, নইলে এখনি চৌকীদার ডেকে দেবো।

বাবাজী। [ বেগে পরিক্রমণ করিয়া সরোষে ] কি আপদ! রাধেকৃষ্ণ! কর্ত্তা মহাশয়ের কি আর লোক ছিল না, যে, তিনি আমাকেই এ কর্ম্মে পাঠালেন? [ পরিক্রমণ ] এ দেখ্‌চি একজন ভদ্রলোক এ দিকে আস্‌চে, তা একেই কেন জিজ্ঞাসা করিনে।

[ একজন মাতালের প্রবেশ ]

মাতাল। [ বাবাজীকে অবলোকন করিয়া ] ওগো, এখানে কোথায় যাত্রা হচ্ছে গা?

বাবাজী। তা বাবু, আমি কেমন করে বলবো?



মাতাল । সে কি গো ? তুমি না সং লেজেচ ?

বাবাজী । রাধেকৃষ্ণ !

মাতাল । তবে, শালা, তুই এখানে কচ্চিস্ কি ? হাঃ শালা ।

[ প্রস্থান ]

বাবাজী । কি সর্বনাশ ! বেটা কি পাষণ্ড গো ? রাধেকৃষ্ণ ! এ গলিতে

কি কোন ভদ্রলোক বসতি করে গো ?—এ আবার কি ?

[ অবলোকন করিয়া ] আহা, স্ত্রীলোক দুটি যে দেখতে নিতান্ত

কদাকার তা নয় । এরা কে ?—হরে কৃষ্ণ, হরে কৃষ্ণ !

[ একদৃষ্টে অবলোকন ]

[ দুইজন বারবিলাসিনীর পশ্চাতে দৃষ্টি করিতে করিতে প্রবেশ ]

প্রথম । ওলো বামা, গুরো পোড়ারমুখোর আক্কেল দেখলি ? আমাদের

সঙ্গে যাচ্চি বলে আবার কোথায় গেল ?

দ্বিতীয় । তবে বুঝি আন্ত্যে আন্ত্যে পদীর বাড়ীতে ঢুকেছে । তোর

যেমন পোড়া কপাল, তাই ও হতভাগাকে রেখেছিস্ । আমি

হলে এতদিনে কুলোর বাতাস দিয়ে বিদায় কর্তুম্ ।

প্রথম । দাঁড়ানা, বাড়ী যাই আগে । আজ মুড়ো খাওয়া দে বিষ ঝাড়বো ।

আমি তেমন বান্দা নই, বাবা ! এই বয়সে কত শত বেটার

নাকের জলে, চোখের জলে করে ছেড়েছি । চলনা আগে

মদনমহন দেখে আসি ; এসে ওর শ্রদ্ধ করবো এখন ।

দ্বিতীয় । তুই যদি তাই পারবি, তাহলে আর ভাবনা কি—ও থাকি, ঐ

মোল্লার মতন কাচাখোলা কে একটা দাঁড়িয়ে রয়েছে, দেখ ?

প্রথম । হ্যা, তো, হ্যা, তো । এই যে আমাদের দিকে আস্চে । ওলো

বামা, ওটা মোল্লা নয় ভাই, রসের বৈরিগী ঠাকুর, ঐ যে কুড়োজালি

হাতে আছে । [ হাস্য করিয়া ] আহা, মিন্ধের রকম দেখ না

—যেন তুলসী বনের বাঘ ।

বাবাজী । [ নিকটে আসিয়া ] ওগো, তোমরা বলতে পার, এখানে জ্ঞান-

তরঙ্গিনী সভা কোথা ?

দ্বিতীয় । তরঙ্গিনী আবার কে ? [ থাকিকে ধারণ করিয়া হাস্য ] । বাবাজী,

তরঙ্গিনী, তোমার বট মীর নাম বুঝি ?



প্রথম। আহা, বাবাজী, তোমার কি বষ্টুমী হারিয়েছে? তা পথে পথে কেঁদে বেড়ালে কি হবে? যা হবার তা হয়েছে, কি করবে ভাই? এখন আমাদের সঙ্গে আসবে তো বল?—কেমন বামা, ভেক্ নিতে পারবি?

দ্বিতীয়। কেন পারব না? পাঁচ সিকে পেলেই পারি। কি বল, বাবাজী?

প্রথম। বাবাজী আর বলবেন কি? চল আমরা বাবাজীকে হরিবোল দিয়ে নিয়ে যাই। বল হরি, হরি বোল।

বাবাজী। [ স্বগত ] কি বিপদ। রাধেকৃষ্ণ! [ প্রকাশে ] না বাছা, তোমরা যাও, আমার ঘাট হয়েছে।

দ্বিতীয়। হেঁ, আমরা যাব বই কি? তোমার তো সেই তরঙ্গিনী বই মন উঠবে না? তা আমরা যাই, আর তুমি এখানে দাঁড়িয়ে দাঁড়িয়ে কাঁদ। [ বাবাজীর মুখের নিকট হস্ত নাড়িয়া ] সাধের বষ্টুমী প্রাণ হারিয়েছে আমার।

[ দুইজন বারবিলাসিনীর প্রস্থান ]

বাবাজী। আঃ, কি উৎপাত! এত যন্ত্রণাও আজ কপালে ছিল!—কোথাই বা সভা আর কোথাই বা কি? লাভের মধ্যে কেবল আমারি যন্ত্রণা সার। [ পরিক্রমণ করিয়া ] যদি আবার আমি ফিরে যাই তাহলে কর্তাটী রাগ করবেন। আমি যে ঘোর দায়ে পড়লেম্! এখন করি কি? [ চিন্তাভাবে অবস্থিতি, পরে সম্মুখে অবলোকন করিয়া ] হেঁ, ভাল হয়েছে, এই একটা মুঞ্চিল-আসান আসচে, ওর পিছনের আলোয় আলোয় এই বেলা প্রস্থান করি—না—ওমা, এজে সারজন সাহেব রোঁদ ফিরতে বেরিয়েচে দেখছি; এখানে চুপ করে দাঁড়ায়ে থাকলে কি জানি যদি চোর বল্যে ধরে? কিন্তু এখন যাই কোথা? [ চিন্তা ] তাই ভাল, এই আড়ালে দাঁড়াই—ওমা, এই যে এসে পড়লো। [ বেগে পলায়ন। ]

( সারজন চৌকীদারের আলোক লইয়া প্রবেশ )

সার। হাল্লো! চওকীডার! এক আড্‌মী ওটার ডোড়্‌কে গিয়া নেই?

চৌকী । নেই ছাব, হাম তো কুচ নেহি দেখা ।

সার । আলবট্ গিয়া, হাম্ ডেকা । টোম্ জল্ভি ডওড়কে যাও, উষ্টরফ  
ডেকো, যাও—যাও—জলভী যাও, ইউ নুওর ।

চৌকী । [ বেগে অন্য দিকে গমন করিতে করিতে ] কোন্ হেয় রে,  
খাড়া রও ।

সার । ড্যাম্ ইওর আইজ্—ইটার, ইউ ফুল ।

চৌকী । [ ভয়ে ] হাঁ ছাব, ইধর । [ বেগে প্রস্থান ] ।

সার । আ ! ইফ্ আই কেন্ কোচ হিম—

নেপথ্যে । [ উচ্চৈঃস্বরে ] পাকড়ো পাকড়ো—উ হু হু হু হু—

নেপথ্যে । আমি যাচ্ছি বাবা, আর মারিস্নে বাবা, দোহাই বাবা, তোর  
পায়ে পড়ি বাবা ।

নেপথ্যে । শালা চোট্টা, তোমারা ওয়াস্তে দৌড়কে হামরা জান্ গিয়া ।

নেপথ্যে । উ হুঁ হুঁ হুঁ হুঁ— বাবা, আমি চোর নই বাবা, আমি ভেক্ধারী  
বৈষ্ণব, বাবা ।

[ বাবাজীকে লইয়া চৌকীদারের প্রবেশ ]

সার । আ ইউ, টোম্ চোট্টা হেয় ?

বাবাজী । [ সত্ৰাসে ] না সাহেব বাবা, আমি জানিনে, আমি—গো, গো,  
গো— ।

সার । হেং ইওর গো, গো, গো, চুপরাও, ইউ ব্লাডি নিগর, ডেক্লাও  
তোমারা ব্যোগ্মে কিয়া হেয় । [ বলপূর্বক মালা গ্রহণ করিয়া  
আপনার গলায় পরিধান ] হা, হা, হা, হা ! বাপ্রে বাপ্,—  
হাম্ বড়া হিও ছয়া—রাতে, কিস্ ডে ! হা, হা, হা !

বাবাজী । [ সত্ৰাসে ] দোহাই সাহেব মহাশয়, আমি গরিব বৈষ্ণব, আমি  
কিছু জানিনে, দোহাই বাবা আমাকে ছেড়ে দাও ।—[গমনোচ্ছত]

চৌকী । খাড়া রও, শালা ।

বাবাজী । দোহাই কোম্পানির—দোহাই কোম্পানির ।

সার । হোলড্ ইউর টং, ইউ ব্র্যাক্ ক্রট্ । ইয়েহ্ ব্যোগ্মে আওর কিয়া  
হেয় ডেকে গা । [ ঝুলি বলপূর্বক গ্রহণ এবং চারি টাকা  
ভূতলে পতন ]

সার। ডাট্‌স্‌ রাইট। 'ইউ স্‌টি ডেভল্‌ কেস্‌' চোরি কিয়া [ চৌকীদারের প্রতি ] ওস্‌কো ঠানে মে লে চলো।

বাবাজী। দোহাই সাহেবের, আমি চুরি করিনি, আমাকে ছেড়ে দেও—  
দোহাই ধর্ম-অবতার, আমি ও টাকা চাইনে।

সার। সো নেই হোগা, টোম্‌ ঠানেমে চলো—কিয়া? টোম্‌ যাগে নেই? আল্‌বট্‌ যানে হোগা।

চৌকী। চল্‌বে, থানে মে চল্‌।

বাবাজী। দোহাই কোম্পানির— আমি টাকাকড়ি কিছুই চাইনে; তুমি বরঞ্চ টাকা নিয়ে যা ইচ্ছে হয় কর বাবা, কিন্তু আমাকে ছেড়ে দেও, বাবা।

সার। [ হাস্তমুখে ] কিয়া? টোম্‌ নেই মাংটা। [ আপন জেবে টাকা রাখিয়া চৌকীদারের প্রতি ] ওয়েল্‌ দেন্‌, হাম্‌ ডেক্‌টা ওস্‌কা কুচ্‌ কস্‌র নেই, ওস্‌কো ছোড়্‌ দেও।

বাবাজী। [ সোলাসে ] জয় মহাপ্রভু!

চৌকী। [ বাবাজীর প্রতি জনাস্তিকে ] তোম্‌ হাম্‌কো তো কুচ্‌ দিয়া নৈহি—আচ্ছা যাও, চলা যাও।

বাবাজী। না দাদা, আমি একবার জ্ঞানতরঙ্গিনী সভায় যাব।

চৌকী। হাঁ হাঁ, ঐ বাড়ীমে—ও বড়া মজা কি জাগ্‌গা হয়।

সার। ডেকো চৌকীডার, রোপেয়াকা বাট্‌—[ ওষ্ঠে অঙ্গুলি প্রদান ]।

চৌকী। যো হুকুম, থাবিন্‌।

সার। মম্‌! ইজ্‌ দি ওয়ার্ড, মাই বয়! আবি চলো।

[ সারজন্‌ চৌকীদারের প্রস্থান ]

বাবাজী। রাধে কৃষ্ণ! আঃ বাঁচলেম্‌; আজ কি কুলগেই বাড়ী থেকে বেরিয়েছিলেম্‌! ভাগ্যে টাকা কটা সঙ্গে ছিল, আর সারজন্‌ বেটারও হাতপাতা রোগ আছে, তাই রক্ষে—নইলে আজকে কি হাজতেই থাকতে হতো, না কি হতো, কিছু বলা যায় না।

[ হোটেল বাক্স লইয়া দুইজন মুটিয়ার প্রবেশ ]

এ আবার কি? রাধা-কৃষ্ণ—কি দুর্গন্ধ! এ বেটারা এখানে কি আনছে? [ অস্তে অবস্থিতি। ]

প্রথম। ইঃ আজ্ যে কত চীজ্ পেটিয়েছে তার হিসাব নাই, মোর গরদানটা যেন বঁকে যাচ্ছে।

দ্বিতীয়। দেখ্ মামু, এই হেঁছ বেটারাই ছুনিয়াদারির মজা করে ছেলে।  
বেটারগো কি আরামের দিন ভাই!

প্রথম। মর বেকুফ্ ও হারাম্‌খোর বেটারগো কি আর দিন আছে?  
ওরা না মানে আল্লা, না মানে দেবতা।

দ্বিতীয়। লেকীন্ কেবল এই গরুখোগো বেটারগো দৌলতেই মোগর পৌঁচঘর এত ফেঁপে ওঠেতেচে; সাম হলেই বেটারা বাছড়ের মাফিক বাঁকে-বাঁকে আসে পড়ে; আর কত যে খায়; কত যে পিয়ে যায়, তা কে বল্‌তি পারে।

প্রথম। ও কাদের মেঁয়া, মোদের কি সারারাত এহানে দেড়িয়ে থাক্‌তি হবে? দরওয়ানজীকে ডাক না! ও দরওয়ানজী! এ মাছুয়া-বাদি শালা গেল কোহানে?—ও দরওয়ানজী; দরওয়ানজী।

নেপথ্যে। কোন্‌ হেয় রে?

প্রথম। মোরা পৌঁচঘরের মুটে গো।

নেপথ্যে। আও, ভিতর চলে আও।

[ মুটিয়াগণের প্রস্থান ]

বাবাজী। [ অগ্রসর হইয়া স্বগত ] কি আশ্চর্য্য! এ সব কিসের বাক্স?

উঃ থু, থু, রাধেকেষ্ট! আমি তো জ্ঞানতরঙ্গিনী সভার বিষয় কিছুই বুঝতে পাচ্ছি না।

নেপথ্যে। বেলফুল।

নেপথ্যে। চাই বরফ্‌।

[ মালী এবং বরফ্‌ওয়ালার প্রবেশ ]

মালী। বেলফুল,— ও দরওয়ানজী, বাবুরো এসেচে?

নেপথ্যে। না, আবি আয়া নেহি, থোড়া বাদ আও।

বরফ্‌। চাই বরফ্‌—কি গো দরওয়ানজী।

নেপথ্যে। তোষি থোড়া বাদ আও।

[ মালী এবং বরফ্‌ওয়ালার প্রস্থান ]

বাবাজী। কি সর্ব্বনাশ্‌, [ স্বগত ] আমি তো, এর কিছুই বুঝতে পাচ্ছি না।

নেপথ্যে দূরে। বেলফুল—চাই বরফ।

[ যন্ত্রিগণ সহিত নিতম্বিনী আর পরোধরীর প্রবেশ। ]

নিত। কাল্ যে ভাই কালীবাবু আমাকে ত্র্যাণ্ডি থাইয়েছিল—উঃ, আমার মাথাটা যেন এখনো ঘুচে। আজ যে ভাই আমি কেমন করে নাচবো তাই ভাবছি।

পয়ো। আমার ওখানেও সদানন্দবাবু কাল ভারী ধুম লাগিয়েছিল। আজ্ কাল্ সদানন্দ ভাই খুব তোয়ের হয়ে উঠেছে। এমন ইয়ার মানুষ আর দুটি পাওয়া ভার।

যন্ত্রি। চল, ভিতরে যাওয়া যাউক। ও দরওয়ানজী।

নেপথ্যে। কোন্ হায়?

পয়ো। বলি আগে ছয়ার খোলো, তার পরে কোন্ হায় দেখতে পাবে এখন্।

নেপথ্যে। ও, আপ্লোক হায়, আইয়ে।

[ যন্ত্রিগণ ইত্যাদির প্রস্থান ]

বাবাজী। [ অগ্রসর হইয়া স্বগত ] একি চমৎকার ব্যাপার? এরাতো কশ্বী দেখতে পাচ্ছি। কি সর্বনাশ! আমি এতক্ষণে বুঝতে পাচ্ছি কাণ্ডটা কি। নবকুমারটা দেখছি একেবারে বয়ে গেছে। কর্তামহাশয় এসব কথা শুন্লে কি আর রক্ষে থাকবে?

[ নববাবুর এবং কালীবাবুর প্রবেশ। ]

নব। হা, হা, হা,— শ্রীমতীভগবতীর গীত! তোমার ভাই কি চমৎকার মেমরী! হা, হা, হা!

কালী। আরে ওসব লক্ষ্মীছাড়া বৈ কি আমি কখন খুলি, না পড়ি, যে মনে থাকবে।

নব। [ বাবাজীকে অবলোকন করিয়া ] একি, এজে বাবাজী হে! কেমন ভাই কালী, আমি বলেছিলাম কিনা যে, কর্তা একজন না একজনকে অবশ্যই আমার পেছনে পেছনে পঠাবেন; যা হউক, একে যে আমরা দেখতে পেলেম এই আমাদের পরম ভাগ্য বলতে হবে।

কালী। বল তো ও বৈষ্ণব শালাকে ধরে এনে একটু ফাউল কট্লেট কি মটন চপ থাইয়ে দি— শালার জন্মটা সার্থক হউক।

নব। চুপ কর হে, চুপ কর। এ ভাই ঠাট্টার কথা নয়। [ অগ্রসর হইয়া ] কি গো, বাবাজী যে ? তা আপনি এখানে কি মনে করে ?

বাবাজী। না, এমন কিছু না, তবে কিনা একটা কর্মবশতঃ এই দিক দিয়ে যাচ্ছিলেম্, ভাব্লেম্ যে নববাবুদের সভাভবনটি একবার দেখে যাই।

নব। বটে বটে ? চলুন, তবে ভিতরে চলুন।

কালী। [ জনান্তিকে নবকুমারের প্রতি ] আরে করিস্ কি পাগল ? এটাকে এর ভেতরে নেগেলে কি হবে ? আমরা তো আর হরি-বাসর কত্বে যাচ্চিনে।

নব। [ জনান্তিকে কালীর প্রতি ] আঃ চুপ কর না। [ প্রকাশে বাবাজীর প্রতি ] বাবাজী, একবার ভিতরে পদার্পণ কল্যে ভাল হয় না।

বাবাজী। আমার অগ্রতরে কর্ম আছে, তোমরা যাও বাবু।

[ প্রস্থান ]

কালী। বল তো শালাকে ধাঁ করে ধরে এনে না হয় যা দুই লাগিয়ে দি।

নব। দরওয়ান।

[ দৌবারিকের প্রবেশ ]

দৌবা। মহারাজ।

নব। ও লোগ সব আয়া ?

দৌবা। জী, মহারাজ !

নব। আচ্ছা তোম্ যাও।

দৌবা। জো হুকুম, মহারাজ !

[ প্রস্থান ]

নব। আজ ভাই দেখছি এই বাবাজী বেটা একটা ভারি হেজাম করে বস্বে এখন। বোধ করি, ও ঐ মাগীদের ভেতর ঢুকতে দেখেছে।

কালী। পুঃ, তুমি তো ভারি কাউয়ার্ড হে ! তোমার যে কিছু মরাল করেজ নেই। ও বেটাকে আবার ভয় ?—চল।



নব। না হে না, তুমি ভাই এসব বোঝনা। চল দেখি গে বেটার  
হাতে কিছু ওকর্ম করে দিয়া যদি মুখ বন্দ কন্তো পারি।

কালী। নন্থেন্থ! তার চেয়ে শালাকে গোটাকতক কিছু দিয়ে  
একেবারে বৈকুণ্ঠে পাঠাওনা কেন? ড্যাম্ দি ক্রট! ও শালাকে  
এ পৃথিবীতে কে চায়? ওরু কি আর কোন মিসন্ আছে?

নব। দূর পাগল, এসব ছেলেমানুষের কর্ম নয়। চল, আমরা দুজনেই  
ওর কাছে যাই।

[ উভয়ের প্রস্থান ]

ইতি প্রথমাক্ষ।



# নীলদর্পণ

নাটক

[ দীনবন্ধু মিত্র ]

ভূমিকা

নীলকর নিকর করে নীলদর্পণ অর্পণ করিলাম । এক্ষণে তাঁহারা নিজ নিজ মুখ সন্দর্শনপূর্বক তাঁহাদিগের ললাটে বিরাজমান স্বার্থপরতা কলঙ্ক-তিলক বিমোচন করিয়া তৎপরিবর্তে পরোপকার শ্বেতচন্দন ধারণ করুন, তাহা হইলেই আমার পরিশ্রমের সাফল্য, নিরাশ্রয় প্রজাব্রজের মঙ্গল এবং বিলাতের মুখ রক্ষা হয় । হে নীলকরগণ ! তোমাদের নৃশংস ব্যবহারে প্রাতঃস্মরণীয় সিড্‌নি, হাউয়ার্ড, হল প্রভৃতি মহানুভব দ্বারা অকলঙ্ক ইংরাজকুলে কলঙ্ক রটিয়াছে । তোমাদিগের ধনলিপ্সা কি এতই বলবতী যে, তোমরা অকিঞ্চিৎকর ধনানুরোধে ইংরাজ জাতির বহুকালাজ্জিত বিমল যশস্তামরসে কীটস্বরূপ ছিদ্র করিতে প্রবৃত্ত হইয়াছ । এক্ষণে তোমরা যে সাতিশয় অত্যাচার দ্বারা বিপুল অর্থলাভ করিতেছ, তাহা পরিহার কর । তাহা হইলে অনাথ প্রজারা সপরিবারে অনায়াসে কালাতিপাত করিতে পারিবে । তোমরা এক্ষণে দশমুদ্রা ব্যয়ে শতমুদ্রার দ্রব্য গ্রহণ করিতেছ, তাহাতে প্রজাপুঞ্জের যে ক্লেশ হইতেছে, তাহা তোমরা বিশেষ জ্ঞাত আছ ; কেবল ধনলাভপরতন্ত্র হইয়া প্রকাশ করণে অনিচ্ছুক । তোমরা কহিয়া থাক যে, তোমাদের মধ্যে কেহ কেহ বিজ্ঞাদানে অর্থ বিতরণ করিয়া থাকেন এবং সুযোগক্রমে ঔষধ দেন ; একথা যদিও সত্য হয়, কিন্তু তাহাদের বিজ্ঞাদান পরিশ্রমী ধেনু-বধে পাছুকাদানাপেক্ষাও ঘৃণিত এবং ঔষধ-বিতরণ কালকূটকুন্তে কীর-ব্যবধান মাত্র । শ্যামচাঁদ-আঘাত-উপরে কিঞ্চিৎ টার্পিন তৈল দিলেই যদি ডিম্পেলসরি করা হয়, তবে তোমাদের প্রত্যেক কুটিতে ঔষধালয় আছে, বলিতে হইবে । দৈনিক সংবাদপত্র-সম্পাদকদ্বয় তোমাদের প্রশংসায় তাহাদের পত্র পরিপূর্ণ করিতেছে, তাহাতে অপর লোক যেমত বিবেচনা করুক, তোমাদের মনে কখনই ত আনন্দ জন্মিতে পারে

না; যেহেতু তোমরা তাহাদের একরূপ করণের কারণ বিলক্ষণ অবগত  
 আছ। রজতের কি আশ্চর্য আকর্ষণশক্তি! ত্রিংশৎ মুদ্রালোভে  
 অবজ্ঞাস্পদ জুডাস্ খৃষ্টধর্ম-প্রচারক যীজস্কে করাল পাইলোট-করে অর্পণ  
 করিয়াছিল, সম্পাদকযুগল সহস্র মুদ্রা লাভপরবশ হইয়া উপায়হীন দীন  
 প্রজাগণকে তোমাদের করাল কবলে নিক্ষেপ করিবে আশ্চর্য কি?  
 কিন্তু “চক্রবৎ পরিবর্তন্তে দুঃখানি চ স্থানি চ”। প্রজাবৃন্দের সুখ-  
 সূর্য্যোদয়ের সম্ভাবনা দেখা যাইতেছে। দাসী দ্বারা সন্তানকে স্তনদুগ্ধ  
 দেওয়া অবৈধ বিবেচনায় দয়াশীলা প্রজাজননী মহারানী ভিক্টোরিয়া  
 প্রজাদিগকে স্বক্ৰোড়ে লইয়া স্তনপান করাইতেছেন। সুধীর সুবিজ্ঞ  
 সাহসী উদারচরিত্র ক্যানিং মহোদয় গভর্নর জেনারেল হইয়াছেন।  
 প্রজার দুঃখে দুঃখী, সুখে সুখী, দুষ্টের দমন, শিষ্টের পালন, গ্রায়পর  
 গ্রান্ট মহামতি লেপ্টেনেন্ট গভর্নর হইয়াছেন, এবং ক্রমশঃ সত্যপরায়ণ,  
 বিচক্ষণ, নিরপেক্ষ ইডেন, হার্মেল প্রভৃতি রাজকার্য্যপরিচালকগণ শতদল-  
 স্বরূপে মিভিল-সার্ভিস-সরোবরে বিকসিত হইতেছেন। অতএব ইহা দ্বারা  
 স্পষ্ট প্রতীয়মান হইতেছে, নীলকর দুষ্টরাহুগ্রস্ত প্রজাবৃন্দের অসহ কষ্ট  
 নিবারণার্থ উক্ত মহাহুভবগণ যে অচিরাৎ সন্ধিচাররূপ সুদর্শন চক্র হস্তে  
 গ্রহণ করিবেন, তাহার সূচনা হইয়াছে।

কশ্চিৎ পথিকশ্চ।

### নাট্যোল্লিখিত ব্যক্তিগণ

পুরুষগণ

গোলোকচন্দ্র বসু

নবীনমাধব ও

বিন্দুমাধব

সাধুচরণ

রাইচরণ

গোপীনাথ দাস

}

গোলোকচন্দ্র বসুর পুত্রদ্বয়

প্রতিবাসী রাইয়ত।

সাধুর ভ্রাতা।

দেওয়ান।

নারীগণ

সাবিত্রী

গোলোকের স্ত্রী ।

সৈরিন্ধী

নবীনের স্ত্রী ।

সরলতা

বিন্দুমাধবের স্ত্রী ।

রেবতী

সাধুচরণের স্ত্রী ।

ক্ষেত্রমণি

সাধুর কন্যা ।

আতুরী

গোলোক বহুর বাড়ীর দাসী ।

পদি

ময়রাণী ।

প্রথম অঙ্ক ।

প্রথম গর্ভাঙ্ক ।

স্বরপুর—গোলোকচন্দ্র বহুর গোলাঘরের রোয়াক ।

গোলোকচন্দ্র বহু এবং সাধুচরণ আসীন ।

সাধু । আমি তখনি বলেছিলাম কর্তা মহাশয়, আর এ দেশে থাকা নয়, তা আপনি শুনিলেন না । কাদালের কথা বাসি হলে খাটে ।

গোলোক । বাপু, দেশ ছেড়ে যাওয়া কি মুখের কথা ? আমার এখানে সাত পুরুষ বাস । স্বর্গীয়কর্তারা যে জমা জমি করে গিয়েছেন, তাতে কখনও পরের চাকরি স্বীকার কত্তে হয় নি । যে ধান জন্মায়, তাতে সম্বৎসরের খোরাক হয়, অতিথিসেবা চলে, আর পূজার খরচ কুলায় ; যে শরিয়া পাই, তাহাতে তেলের সংস্থান হইয়া ষাট সত্তর টাকার বিক্রী হয় । বল কি বাপু, আমার সোণার স্বরপুর, কিছুই ক্লেশ নাই । ক্ষেতের চাল, ক্ষেতের ডাল, ক্ষেতের তেল, ক্ষেতের গুড়, বাগানের তরকারি, পুকুরের মাচ । এমন সুখের বাস ছাড়তে কার হৃদয় না বিদীর্ণ হয় ? আর কেই বা সহজে পারে ?

সাধু । এখন তো আর সুখের বাস নাই । আপনার বাগান গিয়েছে, গাঁতিও যায় যায় হয়েছে । আহা ! তিন বৎসর হয় নি সাহেব পত্তনি নিয়েছে, এর মধ্যে গাঁ খান ছারখার করে তুলেছে ।

মোড়লদের বাড়ীর দিকে চাওয়া যায় না,— আহা! কি ছিল কি হয়েছে। তিন বৎসর আগে ছ'বেলায় ষাট খান পাত পড়তো, দশ খান লাজল ছিল, দাম্‌ড়াও চল্লিশ, পঞ্চাশটা হবে। কি উঠানই ছিল, যেন ঘোড়দৌড়ের মাঠ— আহা! যখন আশখানের পালা সাজাতো, বোধ হতো যেন চন্দন বিলে পদ্মফুল ফুটে রয়েছে। গোয়াল খান ছিল যেন একটা পাহাড়। গেল সন গোয়াল সারাতে না পারায় হুম্‌ড়ি খেয়ে পড়ে রয়েছে। ধানের ভূঁয়ে নীল করে নি বলে, মেজো সেজো দুই ভাইকে ধরে সাহেব বেটা আর বৎসর কি মারটিই মেরেছিল। উহাদের খালাশ করে আনতে কত কষ্ট; হাল গোক বিক্রী হয়ে যায়। ঐ চোটেই দুই মোড়ল গাঁছাড়া হয়।

গোলোক। বড় মোড়ল না তার ভাইদের আনতে গিয়েছিল?

সাধু। তারা বলেছে, ঝুলি নিয়ে ভিক্ষে করে খাব, তবু গাঁয় আর বাস করবো না। বড় মোড়ল এখন একা পড়েছে। দুই খান লাজল রেখেছে তা নীলের জমীতেই যোড়া থাকে। এও পালাবার যোগাড়ে আছে।— কর্তা মহাশয়, আপনিও দেশের মায়া ত্যাগ করুন। গত বারে আপনার ধান গিয়েছে, এইবারে মান যাবে।

গোলোক। মান যাওয়ার আর বাকি কি? পুষ্করিণীটার চারু পাড়ে চাস দিয়াছে, তাহাতে এবার নীল করবে, তা হলেই মেয়েদের পুকুরে যাওয়া বন্ধ হলো! আর সাহেব বেটা বলেছে যদি পূর্ব মাঠের ধানি জমি কয়খানায় নীল না বুনি, তবে নবীনমাধবকে সাত কুটির জল খাওয়াইবে।

সাধু। বড় বাবু না কুটি গিয়েছেন?

গোলোক। সাধে গিয়েছেন, প্যায়দায় লয়ে গিয়েছে।

সাধু। বড় বাবুর কিন্তু ভালা সাহস। সেদিন সাহেব বলে, “যদি তুমি আমিন খালাসীর কথা না শোনো, আর চিহ্নিত জমীতে নীল না কর, তবে তোমার বাড়ী উঠাইয়ে বেত্রাবতীর জলে ফেলাইয়া দিব, এবং তোমারে কুটির গুদামে ধান খাওয়াইব।” তাহাতে বড় বাবু কহিলেন, “আমার গত সনের পঞ্চাশ বিঘা নীলের দাম

চুকিয়ে না দিলে এ বৎসর এক বিঘাও নীল করিব না, এতে প্রাণ পর্যন্ত পণ, বাড়ী কি ছার !”

গোলোক । তা না বলেই বা করে কি । দেখ দেখি পঞ্চাশ বিঘা ধান হলে আমার সংসারের কিছু কি ভাবনা থাকতো ! তাই যদি নীলের দামগুলো চুকিয়ে দেয়, তবু অনেক কষ্ট নিবারণ হয় ।

নবীনমাধবের প্রবেশ

কি বাবা, কি করে এলে ?

নবীন । আজ্ঞে, জননীর পরিতাপ বিবেচনা করে কি কালসর্প ক্রোড়স্থ শিশুকে দংশন করিতে সঙ্কুচিত হয় ? আমি অনেক স্তুতিবাদ করিলাম, তা তিনি কিছুই বুঝিলেন না । সাহেবের সেই কথা, তিনি বলেন পঞ্চাশ টাকা লইয়া ষাট বিঘা নীলের লেখাপড়া করিয়া দাও, পরে একেবারে দুই সনের হিসাব চুকাইয়া দেওয়া যাবে ।

গোলোক । ষাট বিঘা নীল কত্তে হলে অন্য ফসলে হাত দিতে হবে না । অন্ন বিনাই মারা যেতে হলো ।

নবীন । আমি বলিলাম, সাহেব, আমাদিগের লোকজন, লাজল, গোরু সকলি আপনি নীলের জমীতে নিযুক্ত রাখুন, কেবল আমাদিগের সম্বৎসরের আহার দিবেন, আমরা বেতন প্রার্থনা করি না । তাহাতে উপহাস করিয়া কহিলেন, “তোমরা তো যবনের ভাত খাও না” ।

সাধু । যারা পেটভাতায় চাকুরি করে, তারাও আমাদিগের অপেক্ষা সুখী ।

গোলোক । লাজল প্রায় ছেড়ে দিয়েছি, তবু তো নীল করা ঘোচে না ।

নাছোড়্ হইলে হাত কি ? সাহেবের সঙ্গে বিবাদ তো সম্ভবে না, বেঁধে মারে সয় ভাল, কাজে কাজেই কত্তে হবে ।

নবীন । আপনি যেমন অহুমতি করিবেন, আমি সেইরূপ করিব ; কিন্তু আমার মানস একবার মোকদ্দমা করা ।

আদুরীর প্রবেশ ।

আদুরী । মা ঠাকুরাণ যে বকুতি নেগেচে, কত বেলা হলো, আপনারা

নাবা খাবা করবেন না ? ভাত শুকিয়ে যে চাল হয়ে গেল ।

সাধু। ( দাঁড়ায়ে ) কর্তা মহাশয়, এর একটা বিলি ব্যবস্থা করুন, নতুবা আমি মারা যাই। দেড়খানা লাঙ্গলে নয় বিঘা নীল দিতে হলে, হাঁড়ি সিকেয় উঠবে। আমি আসি, কর্তা মহাশয় অবধান, বড় বাবু, নমস্কার করি গো।

[ সাধুচরণের প্রস্থান।

গোলোক। পরমেশ্বর এ ভিটায় জ্ঞান আহার কত্তে দেন, এমত বোধ হয় না।— যাও বাবা, জ্ঞান কর গে।

[ সকলের প্রস্থান।

### দ্বিতীয় গর্ভাঙ্ক।

সাধুচরণের বাড়ী।

লাঙ্গল লইয়া রাইচরণের প্রবেশ।

রাই। ( লাঙ্গল রাখিয়া ) আমিন সুমুন্দি যান বাগ্, যে রোক্ করে মোর দিকে আস্ছিলো, বাবা রে! মুই বলি মোরে বুঝি খালে। শালা কোন মতেই শোন্লে না, জোর করিই দাগ্ মারলে। সাঁপোলতলার পাঁচ কুড়ো ভুঁই যদি নীলি গ্যাল, তবে মাগ্ ছেলেরে খাওয়াব কি। কাঁদাকাটি করে ঢাকবো, যদি না ছাড়ে, তবে মোরা কাজেই ঢাশ্ ছাড়ে যাব।

ক্ষেত্রমণির প্রবেশ।

দাদা বাড়ী এয়েছে?

ক্ষেত্র। বাবা বাবুদের বাড়ী গিয়েচে, আলেন, আর দেবী নেই।

কাকীমারে ডাক্তি যাবা না? তুমি বক্চো কি?

রাই। বক্চি মোর মাতা। একটু জল আনু দিনি খাই, তেষ্ঠায় যে ছাতি ফেটে গ্যাল।— সুমুন্দির যাত করি বল্লাম, তা কিছুতি শোন্লে না।

সাধুচরণের প্রবেশ এবং ক্ষেত্রমণির প্রস্থান।

সাধু। রাইচরণ, তুই এত সকালে যে বাড়ী এলি?



রাই । দাদা, আমিন শালা সাঁপোলতলার জমিতি দাগ্ মেয়েচে । খাব কি, বছেয়ার যাবে কেমন করে । আহা, জমি তো না, যান সোনার চাঁপা । এক কোন্ কেটে মহাজন কাং কভাম্ । খাব কি, ছেলেপিলে খাবে কি, এতড়া পরিবার না খাতি পেয়ে মারা যাবে ! ও মা ! রাত পোয়ালি যে ছ'কাটা চালির খরচ ; না খাতি পেয়ে মরুবো, আরে পোড়া কপাল, আরে পোড়া কপাল ; গোড়ার নীলি কল্লে কি ? য্যা ! য্যা !

সাধু । ঐ ক বিঘা জমির ভরসাতেই থাকা, তাই যদি গ্যালো, তবে আর এখানে থেকে করুবো কি । আর যে দুই এক বিঘা নোনা ফেলা আছে, তাতে তো ফলন নাই, আর নীলের জমিতে লাজল থাকবে তা কারকিতই বা কখন করুবো । তুই কাঁদিস্ নে, কাল হাল্ গোরু বেচে গাঁর মুখে বাঁটা মেরে, বসন্ত বাবুর জমিদারিতে পালিয়ে যাব ।

ক্ষেত্রমণি ও রেবতীর জল লইয়া প্রবেশ ।

জল খা, জল খা, ভয় কি, “জীব দিয়েচে যে, আহাং দেবে সে” ।  
তা তুই আমিনকে কি বলে এলি ?

রাই । মুই বলবো কি, জমিতি দাগ্ মার্তি লাগ্লো, মোর বুকি যান বিদে কাটি পুড়িয়ে দিতে লাগ্লো । মুই পায় ধল্লাম, ট্যাকা দিতে চালাম ; তা কিছুই শুনলো না । বলে, “যা তোরা বড় বাবুর কাছে যা, তোরা বাবার কাছে যা” । মুই ফোজদুরি করুবো বলে সৈসিয়ে এইচি । ( আমিনকে দূরে দেখিয়া ) ঐ দাখ্ শালা আস্চে, পায়দা সঙ্গে করে এনেচে, কুটি ধরে নিয়ে যাবে ।

আমিন এবং দুই জন পেয়াদার প্রবেশ ।

আমিন । বাঁদ, রেয়ে শালাকে বাঁদ ।

[ পেয়াদাঘরদ্বারা রাইচরণের বন্ধন ।

রেবতী । ওমা, ইকি, হ্যাগা বাঁদো ক্যান । কি সর্বনাশ, কি সর্বনাশ !  
( সাধুর প্রতি ) তুমি দাঁড়িয়ে থাক্চো কি, বাবুদের বাড়ী যাও, বড় বাবুকে ডেকে আনো ।



আমিন । ( সাধুর প্রতি ) তুই যাবি কোথা, তোরাও যেতে হবে । দাদন লওয়া রেয়ের কৰ্ম নয় । ঢাৱা সইতে অনেক সইতে হয় । তুই লেখা পড়া জানিস্, তোকে খাতার দস্তখৎ করে দিবে আস্তে হবে ।

সাধু । আমিন মহাশয়, একি কি নীলের দাদন বলো, নীলের গাদন বল্যে ভাল হয় না ? হা পোড়া অদৃষ্ট, তুমি আমার সঙ্গে আছ, যার ভয়ে পালিয়ে এলাম, সেই ঘায় আবার পড়লাম । পত্তনির আগে এ তো রামরাজ্য ছিল, তা “হাবাতেও ফকির হলো, দেশেও মন্বন্তর হলো” ।

আমিন । ( ক্ষেত্রমণির প্রতি দৃষ্টিপাত করিয়া, স্বগত ) এ ছুঁড়ি তো মন্দ নয় । ছোট সাহেব এমন মাল পেলে তো লুপে নেবে—আপনার বুন দিয়ে বড় পেঙ্কারি পেলাম, তা এরে দিয়ে পাব ; তবে মালটা ভাল, দেখা যাক্ ।

রেবতী । ক্ষেত্র, মা তুই ঘরের মধ্যে যা ।

[ ক্ষেত্রমণির প্রস্থান ।

আমিন । চল্ সাধু, এই বেলা মানে মানে কুটি চল্ ।

[ ঘাইতে অগ্রসর হইল ।

রেবতী । ও যে এটু জল খাতি চেয়েলো ; ও আমিন মশাই, তোমার কি মাগ্ ছেলে নাই, কেবল লাজল রেখেছে আর এই মারপিট ! ওমা ও যে ডব্কা ছেলে, ও যে এতক্ষণ দু বার খায়, না খেয়ে সাহেবের কুটি যাবে কেমন করে, অনেক দূর । দোহাই সাহেবের, ওরে চাড্‌ডি খেইয়ে নিয়ে যাও ।—আহা, আহা, মাগ ছেলের জন্তেই কাতর, এখনো চকি জল পড়্‌চে, মুখ শুইকে গেচে—কি করবো ; কি পোড়া দেশে এলাম, ধনে প্রাণে গ্যালাম, হায়, হায়, ধনে প্রাণে গ্যালাম ! ( ক্রন্দন )

আমিন । আরে মাগি, তোরা নাকি স্মর এখন রাখ, জল দিতে হয় তো দে, নয় অমনি নিয়ে যাই ।

[ রাইচরণের জলপান এবং সকলের প্রস্থান ।

## তৃতীয় গর্ভাক্ষ ।

বেণুগবেড়ের কুটি—বড় বাজলার বারেন্দা ।

আই, আই, উড্ সাহেব এবং গোপীনাথ দাস

দেওয়ানের প্রবেশ ।

গোপী । হুজুর, আমি কি কসুর করিতেছি, আপনি স্বচক্ষেই তো দেখিতেছেন । অতি প্রত্যাষে ভ্রমণ করিতে আরম্ভ করিয়া তিন প্রহরের সময় বাসায় প্রত্যাগমন করি, এবং আহারের পরেই দাদনের কাগজ পত্র লইয়া বসি, তাহাতে কোন দিন রাত্রি দুই প্রহরও হয়, কোন দিন বা একটাও বাজে !

উড । তুমি শালা বড় নালায়েক আছে । স্বরপুর, শ্রামনগর, শাস্তি-ঘাটা—এ তিন গাঁয় কিছু দাদন হলো না । শ্রামটাদ বেগোর তোম্ দোরস্ত হোগা নেই ।

গোপী । ধর্মাবতার, অধীন হুজুরের চাকর, আপনি অনুগ্রহ করিয়া পেছারি হইতে দেওয়ানি দিয়াছেন । হুজুর মালিক, মারিলেও মারিতে পারেন, কাটিলেও কাটিতে পারেন । এ কুটির কতকগুলিন প্রবল শত্রু হইয়াছে, তাহাদের শাসন ব্যতীত নীলের মঙ্গল হওয়া দুষ্কর ।

উড । আমি না জানিলে কেমন করে শাসন করিতে পারে । টাকা, ঘোড়া, লাটিয়াল, শড়কিওয়াল, আমার অনেক আছে, ইহাতে শাসন হইতে পারে না ? সাবেক দেওয়ান, শত্রুর কথা আমাকে জানাইতো ।—তুমি দেখি নি, আমি বজ্জাতদের চাবুক দিয়াছি, গোরু কেড়ে আনিয়াছি, জরু কয়েদ করিয়াছি ; জরু কয়েদ করিলে শালা লোক বড় শাসিত হয় । বজ্জাতি কা বাত্ হাম্ কুচ্ শুনা নেই—তুমি বেটা লক্কিছাড়া আমারে কিছু বলি নি ;—তুমি শালা বড় নালায়েক আছে । দেওয়ানি কাম কায়েটকা হায় নেই বাবা—তোম্কে জুতি মারুকে নেকাল ডেকে, হাম্ এক আদমি ক্যাওট্কে এ কাম্ দেগা ।

গোপী । ধর্মাবতার, যদিও বন্দা জাতিতে কায়স্থ, কিন্তু কার্য্যে ক্যাওট, ক্যাওটের মতই কস্ম দিতেছে । মোল্লাদের ধান ভেঙ্গে নীল করিবার জন্ত এবং গোলক বোসের সাত পুরুষে লাখেরাজ বাগান ও রাজার আমলের গাঁতি বাহির করিয়া লইতে আমি যে সকল

কাজ করিয়াছি, তাহা ক্যাণ্ট কি, চামারেও পারে না; তা আমার কপাল মন্দ, তাই এত করেও ঘণ নাই।

উড। নবীনমাধব শালা সব টাকা চুকিয়ে চায়—ওস্কো হাম এক কোড়ি নেহি দেগা, ওস্কো হিসাব দোরস্ত করুকে রাখ;—বাঞ্চ বড়া মামলাবাজ, হাম দেখেগা শালা কেস্তারে রূপেয়া লেয়।

গোপী। ধর্মাবতার, ঐ একজন কুটির প্রধান শত্রু। পলাশপুর জালান কখনই প্রমাণ হইত না যদি নবীন বোস ওর ভিতরে না থাকিত। বেটা আপনি দরখাস্তের মুসাবিদা করিয়া দেয়, উকীল মোক্তার-দিগের এমন সলা পরামর্শ দিয়াছিল যে, তাহার জোরেই হাকিমের রায় ফিরিয়া যায়। এই বেটার কৌশলেই সাবেক দেওয়ানের দুই বৎসর মেয়াদ হয়। আমি বারণ করিয়াছিলাম, “নবীন বাবু, সাহেবের বিরুদ্ধাচরণ করো না। বিশেষ সাহেব তো তোমার ঘর জালান নাই।” তাতে বেটা উত্তর দিল, “গরীব প্রজাগণের রক্ষাতে দীক্ষিত হইয়াছি, নিষ্ঠুর নীলকরের পীড়ন হইতে যদি একজন প্রজাকেও রক্ষা করিতে পারি, তাহা হইলেই আপনাকে ধন্য জ্ঞান করিব; আর দেওয়ানজিকে জেলে দিয়ে বাগানের শোধ লব।” বেটা যেন পাদরি হয়ে বসেছে। বেটা এবার আবার কি ষোটাষোট করিতেছে, তার কিছুই বুঝিতে পারি না।

উড। তুমি ভয় পাইয়াছ, হাম বোলা কি নেই, তুমি বড় নালায়েক আছে, তোম্‌সে কাম্‌ হোগা নেই।

গোপী। ছজুর ভয় পাওয়ার মত কি দেখিলেন; যখন এ পদবীতে পদার্পণ করিছি, তখন ভয়, লজ্জা, সরম, মান, মর্যাদার মাথা থাইয়াছি। গোহত্যা, ব্রহ্মহত্যা, স্ত্রীহত্যা, ঘরজালান অঙ্গের আভরণ হইয়াছে, আর জেলখানা শিওরে করে বসে আছি।—

উড। আমি কথা চাই নে, আমি কাজ চাই।

সাধুচরণ, রাইচরণ, আমিন ও পেয়াদাষের

সেলাম্‌ করিতে করিতে প্রবেশ।

এ বজ্জাতের হস্তে দড়ি পড়িয়াছে কেন?

গোপী। ধর্মাবতার, এই সাধুচরণ একজন মাতব্বর রাইয়ত; কিন্তু নবীন বোসের পরামর্শে নীলের ধ্বংসে প্রবৃত্ত হইয়াছে।

সাধু। ধর্মাবতার, নীলের বিরুদ্ধাচরণ করি নাই, করিতেছি না এবং করিবার ক্ষমতাও নাই। ইচ্ছায় করি আর অনিচ্ছায় করি, নীল করিছি, এ বায়েও করিতে প্রস্তুত আছি। তবে সকল বিষয়ের সম্ভব অসম্ভব আছে; আদ্য আজুল চুক্তিতে আট্ট আজুল বাক্কদ পুরিলে কাজেই ফাটে। আমি অতি ক্ষুদ্র প্রজা, দেড়খানি লাক্কল রাখি, আবাদ হুদ বিশ বিঘা, তার মধ্যে যদি নয় বিঘা নীলে গ্রাস করে, তবে কাজেই চটুতে হয়। তা আমার চটায় আমিই মরুবো, হুজুরের কি!

গোপী। সাহেবের ভয়, পাছে তুমি সাহেবকে তোমাদের বড় বাবুর গুদামে কয়েদ করে রাখ।

সাধু। দেওয়ানজি মহাশয়, মড়ার উপর আর খাঁড়ার ঘা কেন দেন। আমি কোন্ কীটস্ত্র কীট, যে সাহেবকে কয়েদ করুবো, প্রবল প্রতাপশালী—

গোপী। সাধু, তোমার সাধুভাষা রাখ, চাষার মুখে ভাল শুনায় না; গায় যেন ঝাঁটার বাড়ি মারে—

উড। বাক্কৎ বড় পণ্ডিত হইয়াছে।

আমিন। বেটা রাইয়তদিগের আইন পরোয়ানা সব বুঝাইয়া দিয়া গোল করিতেছে, বেটার ভাই মরে লাক্কল ঠেলে, উনি বলেন “প্রতাপশালী”।

গোপী। ঘুঁটেকুড়ানীর ছেলে সদরনায়েব।—ধর্মাবতার, পল্লীগ্রামে স্কুল স্থাপন হওয়াতে চাষা লোকের দৌরাখ্য বাড়িয়াছে।

উড। গবর্ণমেন্টে এ বিষয়ে দরখাস্ত করিতে আমাদিগের সভায় লিখিতে হইবেক, স্কুল রহিত করিতে লড়াই করিব।

আমিন। বেটা মোকদ্দমা করিতে চায়।

উড। (সাধুচরণের প্রতি) তুমি শালা বড় বজ্জাত আছে। তোমার যদি বিশ বিঘার নয় বিঘা নীল করিতে বলেছে, তবে তুমি কেন আর নয় বিঘা নূতন করিয়া ধান কর না।

গোপী। ধর্মাবতার যে লোকসান জমা পড়ে আছে, তাহা হইতে নয় বিঘা কেন, বিশ বিঘা পাট্টা করিয়া দিতে পারি।

সাধু। (স্বাগত) হা ভগ্বান! শুড়ির সাক্ষী মাতাল। (প্রকাশ্যে)

হজুর যে নয় বিঘা নীলের জন্তে চিহ্নিত হইয়াছে, তাহা যদি কুটির লাঙ্গল, গোরু ও মাইন্দার দিয়া আবাদ হয়, তবে আমি আর নয় বিঘা নূতন করিয়া ধানের জন্তে লইতে পারি। ধানের জমিতে যে কারকিত করিতে হয়, তার চার গুণ কারকিত নীলের জমিতে দরকার করে; সুতরাং যদি ও নয় বিঘা আমার চাস দিতে হয়, তবে বাকী এগার বিঘাই পড়ে থাকবে, তা আবার নূতন জমি আবাদ করবো।

উড। শালা বড় হারামজাদা, দাদনের টাকা নিবি তুই, চাস দিতে হবে আমি; শালা বড় বজ্জাত ( জুতার গুতা প্রহার )। শাম-চাঁদকা সাং মূল্যকাত হোনেসে হারামজাদকি সব ছোড় যাগা।

[ দেওয়াল হইতে শামচাঁদ গ্রহণ।

সাধু। হজুর, মাছি মেরে হাত কাল করা মাত্র, আমরা—

রাই। ( সক্রোধে ) ও দাদা, তুই চুপ দে, বা তাকে নিতি চাচ্ছে তাকে দে। ক্ষিদের চোটে নাড়ী ছিঁড়ে পড়লো, সারাদিনডে গ্যাল, নাতিও পালাম না, খাতিও পালাম না।

আমিন। কই শালা, ফৌজদারী করুলিনে? ( কাণমলন )।

রাই। ( হাঁপাইতে হাঁপাইতে ) মলাম, মাগো! মাগো!

উড। ব্লাডি নিগার, মারো বাঞ্চোংকো। ( শামচাঁদাঘাত )।

নবীনমাধবের প্রবেশ।

রাই। বড়বাবু মলাম গো! জল খাবো গো! মেরে ফেলো গো।

নবীন। ধর্ম্মাবতার, উহাদিগের এখন স্নানও হয় নাই, আহারও হয় নাই। উহাদের পরিবারেরা এখনও বাসি মুখে জল দেয় নাই। যদি শামচাঁদ আঘাতে রাইয়ত সমুদায় বিনাশ করিয়া ফেলেন, তবে আপনার নীল বুনবে কে? এই সাধুচরণ গত বৎসর কত ক্রেশে চার বিঘা নীল দিয়াছে, যদি উহাকে একরূপ নিদারুণ প্রহারে এবং অধিক দাদন চাপাইয়া ফেরার করেন, তবে আপনারই লোকসান। উহাদের অণু ছাড়িয়া দেন, আমি কল্যাণ প্রাপ্তে সমভিব্যাহারে আনিয়া, আপনি যেক্রূপ অনুমতি করিবেন, সেইরূপ করিয়া যাইব।



উড। তোমার নিজের চরকায় তেল দাও। পরের বিষয়ে কথা কহিবার কি আবশ্যক আছে?—সাধু ঘোষ, তোম্ মত্ কি তা বল্? আমার খানার সময় হইয়াছে।

সাধু। হজুর, আমার মতের অপেক্ষা আছে কি? আপনি নিজে গিয়া ভাল ভাল চার বিঘাতে মার্ক দিয়া আসিয়াছেন, আজ আমিন মহাশয় আর যে কয়খান ভাল জমি ছিল, তাহাতেও চিহ্ন দিয়া আসিয়াছেন। আমার অমতে জমি নির্দিষ্ট হইয়াছে, নীলও সেইরূপ হইবে। আমি স্বীকার করিতেছি, বিনা দাদনে নীল করে দিব।

উড। আমার দাদন সব মিছে, হারামজাদা, বজ্জাত, বেইমান—

[ শ্রামচাঁদ প্রহার।

নবীন। (সাধুচরণের পৃষ্ঠে হস্ত দিয়া আবরণ করিয়া) হজুর, গরিব ছাপোষা লোকটাকে একেবারে মেরে ফেলিলেন। আহা! উহার বাড়ীতে থাইতে অনেক গুলিন। এ প্রহারে এক মাস শয্যাগত হইয়া থাকিতে হইবে। আহা! উহার পরিবারের মনে কি ক্লেশ হইতেছে; সাহেব, আপনারও পরিবার আছে, যদি আপনাকে খানার সময় কেহ ধৃত করিয়া লইয়া যায়, তবে মেম্-সাহেবের মনে কেমন পরিতাপ জন্মে।

উড। চপ্ৰাও, শালা, বাঞ্চং, পাজি, গোকুখোর। এ আর অমর-নগরের মাজিষ্ট্রেট নয় যে, কথায় কথায় নালিশ করুবি, আর কুটির লোক ধরে মেয়াদ দিবি। ইন্দ্ৰাবাদের মাজিষ্ট্রেট তোমার মৃত্যু হইয়াছে। র্যাসকেল্—এই দিনের মধ্যে তুই ষাট বিঘা দাদন লিখিয়া দিবি তবে তোমার ছাড়ান, নচেৎ শ্রামচাঁদ তোমার মাথায় ভাঙ্গিব। গোস্তাকি! তোমার দাদনের জন্যে দশ খানা গ্রামের দাদন বন্ধ রহিয়াছে।

নবীন। (দীর্ঘনিশ্বাস) হে মাতঃ পৃথিবী! তুমি বিধা হও, আমি তন্মধ্যে প্রবেশ করি। এমন অপমান আমার জন্মেও হয় নাই।  
— হা বিধাতঃ।

গোপী। নবীন বাবু, বাড়াবাড়ি কাজ কি, আপনি বাড়ী যান।



নবীন । সাধু, পরমেশ্বরকে ডাক, তিনিই দীনের রক্ষক ।

[ নবীনমাধবের প্রস্থান ।

উড । গোলামকি গোলাম ।—দেওয়ান, দপ্তরখানায় লইয়া যাও, দস্তুর মোতাবেক দাদন দেও

[ উডয়ের প্রস্থান ।

গোপী । চল সাধু, দপ্তরখানায় চল । সাহেব কি কথায় ভোলে ?

বাড়াভাতে ছাই তব বাড়াভাতে ছাই ।

ধরেছে নীলের যমে আর রক্ষা নাই ॥

[ সকলের প্রস্থান ।

### চতুর্থ গর্ভাঙ্ক ।

গোলোক বহুর দরদালান ।

সৈরিক্রী চুলের দড়ী বিনাইতে নিযুক্ত ।

সৈরিক্রী । আমার হাতে এমন দড়ী এক গাছিও হয় নি । ছোট বউ বড় পয়মস্ত । ছোট বোয়ের নাম করে যা করি, তাই ভাল হয় । এক পণ ছুট করেছি, কিন্তু মুটোর ভিতর থাকবে । যেমন একটাল চুল, তেমনি দড়ী হয়েছে । আহা চুল তো নয়, শ্যামা-ঠাকুরগের কেশ । মুখখানি যেন পদ্মফুল, সর্বদাই হাস্য-বদন । লোকে বলে, “যাকে যায় দেখতে পারে না” ; আমি তো তার কিছুই দেখি নে । ছোট বোয়ের মুখ দেখলে আমার তো বুক জুড়িয়ে যায় । আমার বিপিনও যেমন, ছোট বউও তেমন । ছোট বউ তো আমাকে মায়ের মত ভালবাসে ।

সিকাহস্তে সরলতার প্রবেশ ।

সর । দিদি, তুমি দেখি, আমি সিকের তলাটি বুনতে পেরেছি কি না ?  
— হয় নি ?

সৈরিক্রী । ( অবলোকন করিয়া ) হ্যাঁ, এই বার দিকি হয়েছে ! ও বোন, এই খান্টি যে ডুবিয়েছো, লালের পর জরদ তো খোলে না ।

সর । আমি তোমার সিকে দেখে বুঁছিলাম—

সৈরি। তাতে কি লালের পর জরদ আছে ?

সর। না, তাতে লালের পর সবুজ আছে। কিন্তু আমার সবুজ সূতা ফুরিয়ে গিয়েছে, তাই আমি ওখানে জরদ দিয়েছি।

সৈরি। তোমার বুঝি আর হাটের দিন পর্য্যন্ত ভর সইল না। তোমার বোন সকলি ভাড়াভাড়ি,— বলে

“বুন্দাবনে আছেন হরি।

ইচ্ছা হলে রইতে নারি ॥”

সর। বাহবা! আমার কি দোষ, হাটে কি পাওয়া যায়? ঠাকুরগেল হাটে মহাশয়কে আন্তে বলেছিলেন, তা তিনি পান নি।

সৈরি। তবে ওঁরা যখন ঠাকুরপোকে চিটি লিখবেন, সেই সময় পাঁচ রজের সূতার কথা লিখে দিতে বলবো।

সর। দিদি, এ মাসের আর ক দিন আছে গা?—

সৈরি। (হাস্তবদনে) যার যেখানে ব্যথা, তার সেখানে হাত। ঠাকুরপোর কালেজ বন্ধ হলে বাড়ী আসবার কথা আছে,— তাই তুমি দিন গুণ্‌চো। আর বোন, মনের কথা বেরিয়ে পড়েছে।

সর। মাইরি দিদি, আমি তা ভেবে জিজ্ঞাসা করি নি— মাইরি।

সৈরি। ঠাকুরপোর আমার কি সূচরিত্র! কি মধুমাথা কথা! ওঁরা যখন ঠাকুরপোর চিটিগুলিন পড়েন, যেন অমৃত-বর্ষণ হইতে থাকে। দাদার প্রতি এমন ভক্তি কখন দেখি নি। দাদার বা কি স্নেহ, বিন্দুমাধবের নামে মুখে লাল পড়ে, আর বুকখানি পাঁচহাত হয়। আমার যেমন ঠাকুরপো, তেমনি ছোট বউ।— (সরলতার গাল টিপে) সরলতা তো সরলতা।— আমি কি তামাক পোড়ার কটোটা আনি নি, যেমন একদণ্ড তামাক পোড়া নইলে বাঁচি নে, তেমনি কটোটা যেন আগে ভুলে এসিছি।

আছুরীর প্রবেশ।

ও আদর, তামাক পোড়ার কটোটা আননা দিদি।

আছুরী। মুই গ্যাকন কনে খুঁজে মরবো?

সৈরি। ওরে রামাঘরের রকে উঠতে ডান দিকে চালের বাতায় গৌজা আছে।

আছরী। তবে খামাতে মোইখান আনি, তা নলি চালে ওটবো  
ক্যামন করে।

সর। বেশ বুঝেছে।

সৈরি। কেন, ওতো ঠাকুরগের কথা বেশ বুঝতে পারে? তুই বক  
কারে বলে জানিস্ নে, তুই ডান বুঝিস্ নে?

আছরী। মুই ডান হতি গ্যালাম ক্যান্। মোগার কপালের দোষ,  
গরিব নোকের মেয়ে যদি বুড়ো হলো আর দাঁত পড়লো, তবেই  
সে ডান হয়ে ওটলো। মাঠাকুরগিরি বলবো দিনি, মুই কি ডান  
হবার মত বুড়ো হইচি।

সৈরি। মরণ আর কি! ( গাত্রোখান করিয়া ) ছোট বউ বসিস্, আমি  
আস্চি, বিছাঙ্গারের বেতাল শুন্বো।

[ সৈরিকীর প্রস্থান। ]

আছরী। সেই সাগর নাড়ের বিয়ে দেয়, ছ্যা!— নাকি দুটো দল হয়েছে;  
মুই আজাদের দলে।

সর। ই্যা আছরী, তোর ভাতার তোরে ভাল বাসতো?

আছরী। ছোট হালদাণি, সে খ্যাদের কথা আর তুলিস্নে। মিন্সের  
মুখখান মনে পড়লি আজো মোর পরাণডা ডুক্রে কেঁদে ওটে।  
মোরে বড়ি ভাল বাসতো। মোরে বাউ দিতি চেয়েলো—

পুঁইচে কি এত ভারি রে প্রাণ, পুঁইচে কি এত ভারি।

মনের মত হলি পরে, বাউ পরাতি পারি ॥

ছাখ দিনি খাটে কি না।— মোরে ঘুমতি দিত না, বিমুলি  
বলতো “ও পরাণ ঘুমুলে?”

সর। তুই ভাতারের নাম ধরে ডাকতিস?

আছরী। ছি! ছি! ছি! ভাতার যে গুরুনোক, নাম ধন্তি আছে?

সর। তবে তুই কি বলে ডাকতিস?

আছরী। মুই বলতাম, ছাদে ওয়ো শোন্চো—

সৈরিকীর পুনঃ প্রবেশ।

সৈরি। আবার পাগলিকে কে খ্যাপালে?

আছরী। মোর মিন্সের কথা শুচ্ছেন, তাই মুই বলতি নেগেচি।

সৈরি । (হাস্তবদনে) ছোট বোয়ের মত পাগল আর ছুটি নাই, এত জিনিস থাকতে আছুরীর ভাতারের গল্প ঘাঁটিয়ে ঘাঁটিয়ে শোনা হচ্ছে ।

রেবতী ও ক্ষেত্রমণির প্রবেশ ।

আয়, ঘোষ দিদি আয়, তোকে আজ্ ক দিন ডেকে পাঠাচ্ছি, তা তোয় আর বার হয় না ।—ছোট বউ এই নাও, তোমার ক্ষেত্রমণি এসেছে, আজ্ ক দিন আমারে পাগল করেছে, বলে—দিদি, ঘোষেদের ক্ষেত্র শ্বশুরবাড়ী হতে এসেছে তা আমাদের বাড়ী এল না ?

রেবতী । তা মোদের পত্তি এম্নি কেৰুপা বটে । ক্ষেত্র, তোয় কাকি মাদ্দের পরণাম কর ।

[ ক্ষেত্রমণির প্রণাম ।

সৈরি । জন্মায়তি হও, পাকা চুলে সিঁদূর পর, হাতের ন ক্ষয় থাক, ছেলে কোলে করে শ্বশুরবাড়ী যাও ।

আছুরী । মোয় কাছে ছোট হালদাণির মুখি খোই ফুটতি থাকে, মেয়েডা গড় কল্লে, তা বাঁচো মোরো কথাও কলে না ।

সৈরি । বালাই সেটের বাছা ।—আছুরী, যা ঠাকুরগকে ডেকে আন্ গে ।

[ আছুরীর প্রস্থান ।

পোড়াকপালী কি বলিতে কি বলে তা কিছু বোঝে না ।—ক মাস হলো ?

রেবতী । ও কথা কি আজো দিদি পরূকাশ করিচি । মোয় যে ভাঙ্গা কপাল, সত্যি কি মিথ্যে তাই বা কেমন করে জান্‌বো । তোমরা আপনার জন তাই বলি,—এই মাসের কড়া দিন গেলি চার মাসে পড়্বে ।

সর । আজো পেট বেরোই নি ।

সৈরি । এই আর এক পাগল, আজো তিন মাস পূরি নি, ও এখনি পেট ডাগর হয়েছে কি না তাই দেখছে ।

সর । ক্ষেত্র, তুমি ঝাপটা তুলে ফেলেছ কেন ?

ক্ষেত্র । মোয় ঝাপটা দেখে মোয় ভাঙ্গুর খাপা হয়েলো, ঠাকুরগিরি বলে, ঝাপটা কাটা কস্‌বিদের আর বড় নোকের মেয়েগার সাজে ।

মুই শুনে নজ্জায় মোরে গ্যালাম, সেই দিনি বাপ্টা তুলে  
ফ্যালাম।

সৈরি। ছোট বোট, যাও দিদি, কাপড়গুলো তুলে আন গে, সন্ধ্যা  
হলো।

আতুরীর পুনঃ প্রবেশ।

সর। ( দাঁড়ায়ে ) আয় আতুরী ছাদে গিয়ে কাপড় তুলি।

আতুরী। ছোট হালদার আগে বাড়িই আনুক, হা, হা, হা।

[ সরলতার জিব কেটে প্রস্থান।

সৈরি। ( সরোষে এবং হাস্তবদনে ) দূর পোড়াকপালি, সকল কথাতেই  
তামাসা।—ঠাকুরকণ কই লো ?

সাধিত্রীর প্রবেশ।

এই যে এসেছেন।

সাধি। ঘোষবোট এইচিস, তোর মেয়ে এনেচিস বেস করেচিস—বিপিন  
আকার নিচলো, তাকে শাস্ত করে বাইরে দিয়ে এলাম।

রেবতী। মাঠাকুরকণ পরণাম করি।—ক্ষেত্র, তোর দিদিমারে পরণাম  
কর।

[ ক্ষেত্রমণির প্রণাম।

সাধি। স্মৃথে থাক, সাত বেটার মা হও—( নেপথ্যে কাশী )—বড় বোট  
মা, ঘরে যাও, বাবার বুঝি নিদ্রা ভেঙ্গেছে।—আহা! বাছার  
কি সময়ে নাওয়া আছে, না সময়ে খাওয়া আছে, ভেবে ভেবে  
নবীন আমার পাতখানি হয়ে গিয়েছে—( নেপথ্যে “আতুরী” )—  
মা যাও গো, জল চাচ্ছেন বুঝি।

সৈরি। ( জনান্তিকে আতুরীর প্রতি ) আতুরী, দেখ তোরে ডাকছেন।

আতুরী। ডাকছেন মোরে, কিন্তু চাচ্ছেন তোমারে।

সৈরি। পোড়ার মুখ—ঘোষদিদি, আর একদিন আসিস্।

[ সৈরিকীর প্রস্থান।

রেবতী। মাঠাকুরকণ, আর তো এখানে কেউ নেই,—মুই তো বড় আপদে  
পড়িচি, পদী ময়রাণী কাল মোদের বাড়ী এয়েলো—

সাবি। রাম্! রাম্! ও নচ্ছার বেটিকেও কেউ বাড়ী আস্তে দেয়,—  
বেটির আর বাকি আছে কি, নাম লেখালেই হয়।

রেবতী। মা, তা মুই কর্বো কি, মোর তো আর ঘেরা বাড়ী নয়,  
মরুদেরা ক্ষ্যাতে খামারে গেলি বাড়ী বল্লিই বা কি, আর হাট  
বল্লিই বা কি; গস্তানি বিটি বলে কি—মা মোর গাড়া কাঁটা দিয়ে  
ওট্চে—বিটি বলে, ক্ষেত্রকে ছোটসাহেব ঘোড়া চেপে যাতি যাতি  
দেখে পাগল হয়েছে, আর তার সঙ্গে একবার কুটির কামরান্দার  
ঘরে যাতি বলেছে।

আহুরী। থু! থু! থু! গোন্দো! পঁয়াজির গোন্দো! সাহেবের কাছে  
কি মোরা যাতি পারি, গোন্দো থু! থু! পঁয়াজির গোন্দো!—  
মুই তো আর একা বেরোব না, মুই সব সহিতে পারি, পঁয়াজির  
গোন্দো সহিতি পারি নে—থু! থু! গোন্দো! পঁয়াজির গোন্দো!

রেবতী। মা, তা গরিবের ধর্ম কি ধর্ম নয়? বিটি বলে, টাকা দেবে,  
ধানের জমি ছেড়ে দেবে, আর জামাইরি কর্ম করে দেবে;—  
পোড়া কপাল টাকার! ধর্ম কি ব্যাচ্বার জিনিস, না এর দাম  
আছে। কি বল্বো, বিটি সাহেবের নোক, তা নইলি মেয়ে  
নাতি দিয়ে মুখ ভেঙ্গে দেতাম। মেয়ে আমার অবাক হয়েছে,  
কাল থেকে ঝম্কে ঝম্কে ওট্চে।

আহুরী। মা গো যে দাড়ি! কথা কয় যেন বোকা ছাগলে ফ্যাবা মারে।  
দাড়ি পঁয়াজ না ছাড়লি মুই তো কখনই যাতি পার্বো না; থু!  
থু! থু! গোন্দো, পঁয়াজির গোন্দো।

রেবতী। মা, সর্বনাশী বলে, যদি মোর সঙ্গে না পেটিয়ে দিস, তবে  
নেটেলা দিয়ে ধরে নিয়ে যাবে।

সাবি। মগের মুল্লুক আর কি।—ইংরেজের রাজ্যে কেউ নাকি ঘর ভেঙ্গে  
মেয়ে কেড়ে নিয়ে যেতে পারে।

রেবতী। মা, চাসার ঘরে সব পারে। মেয়ে লোক ধরে মরুদদের কায়দা  
করে, নীল দাদনে এ কত্তি পারে, নজোরে ধলি কত্তি পারে না?  
মা, জান না, নয়দারা রাজিনামা দিতি চাই নি বলে ওদের মেজো  
বোউরি ঘর ভেঙ্গে ধরে নিয়ে গিয়েলো।

সাবি। কি অরাজক! সাধুকে এ কথা বলেছ?



রেবতী । না, মা, সে য্যাকিই নীলির ঘায় পাগল, তাতে এ কথা শুনে  
কি আর রক্ষে রাখবে, রাগের মাথায় আপনার মাথায় আগনি  
কুড়ুল মেরে বসবে ।

সাবি । আচ্ছা, আমি কর্তাকে দিয়ে এ কথা সাধুকে বলবো, তোমার  
কিছু বলবার আবশ্যক নেই ।—কি সর্বনাশ ! নীলকর সাহেবেরা  
সব কত্তে পারে, তবে যে বলে সাহেবেরা বড় স্থবিচার করে,  
আমার বিন্দু যে সাহেবদের কত ভাল বলে ; তা এরা কি  
সাহেব না, না এরা সাহেবদের চণ্ডাল ।

রেবতী । ময়রাণী বিটি আর এক কথা বলে গ্যালো, তা বুঝি বড় বাবু  
শুনিন নি ;—কি একটা নতুন ছকুম হয়েছে, তাতে নাকি কুটেল  
সাহেবরা মাচেরটক্ সাহেবের সঙ্গে যোগ দিয়ে যাকে তাকে  
ছমাস ম্যাদ দিতি পারে । তা কর্তা মশাইরি নাকি এই ফাঁদে  
ফ্যালবার পথ কচ্ছে ।

সাবি । ( দীর্ঘ নিশ্বাস ফেলিয়া ) ভগবতীর মনে যদি তাই থাকে, হবে ।

রেবতী । মা, কত কথা বলে গ্যালো, তা কি আমি বুঝি পারি, নাকি  
এ ম্যাদের পিল্ হয় না—

আছুরী । ম্যাদেরে বুঝি পেটপোড়া খেবিয়েচে ।

সাবি । আছুরী, তুই একটু চুপ কর বাছা ।

রেবতী । কুটির বিবি এই মকদ্দামা পাকাবার জন্তি মাচেরটক্ সাহেবকে  
চিঠি ল্যাকেচে, বিবির কথা হাকিম নাকি বড্ডো শোনে !

আছুরী । বিবির আমি দেখিচি, নজ্জাও নেই, সরমও নেই,—জ্যালার  
হাকিম মাচেরটক্ সাহেব, কত নাজাপাকড়ি, তেরোনাংল ফির্তি  
থাকে,—মাগো নাম কল্লি প্যাটের মধ্য হাত পা সৈঁদোয়,—এই  
সাহেবের সজ্জি ঘোড়া চেপে ব্যাড়াতি এয়োলো । বউ মান্‌সি  
ঘোড়া চাপে—কেশের কাকী ঘরের ভাণ্ডারির সজ্জি হেসে কথা  
কয়েলো, তাই লোকে কত নজ্জা দেলে, এ তো জ্যালার হাকিম ।

সাবি । তুই আবাগি কোন্ দিন মজাবি দেক্‌চি ;—তা সন্ধ্যা হলো,  
ঘোষবউ তোরা বাড়ী যা, দুর্গা আছেন ।

রেবতী । ঘাই মা, আবার কলু-বাড়ী দিয়ে তেল নিয়ে যাব, তবে সঁজ  
জল্বে ।

[ রেবতী ও ক্ষেত্রমণির প্রস্থান ।

সাবি । তোর কি সকল কথার কথা না কইলে চলে না ?

সরলতার কাপড় মাথায় করিয়া প্রবেশ ।

আছুরী । এই যে ধোপাবট কাপড় নিয়ে আলেম ।

[ সরলতার জিব কেটে কাপড় রাখল ।

সাবি । ধোপাবট কেন হতে গেল লা, আমার সোণার বউ, আমার রাজলক্ষ্মী ।—( পৃষ্ঠে হস্ত দিয়া ) হ্যাগা মা, তুমি বই কি আর আমার কাপড় আনিবার মানুষ নাই, তুমি কি এক জায়গায় এক-দণ্ড স্থির হয়ে বসে থাকতে পার না ;—এমন পাগুলির পেটেও তোমার জন্ম হয়েছিল ।—কাপড়ডায় ফালা দিলে কেমন করে ? তবে বোধ করি গায়েও ছড় গিয়েছে ।—আহা ! মার আমার রক্তকমলের মত রঙ, একটু ছড় লেগেচে যেন রক্ত ফুটে বেরোচ্ছে । তুমি মা, আর অন্ধকার সিঁড়ি দিয়ে অমন করে যাওয়া আসা করো না ।

সৈরিকীর প্রবেশ ।

সৈরি । আয়, ছোট বউ ঘাটে বাই ।

সাবি । যাও মা, দুই যায়ে এইবেলা বেলা থাকতে থাকতে গা ধুয়ে এস ।

[ সকলের প্রস্থান ।

# প্রণয়পরীক্ষা নাটক

মনোমোহন বসু

পুরুষ ।

শান্তবাবু	...	মানগড় প্রদেশের জমীদার
সদারং	...	শান্তবাবুর বয়স্ক ও ধর্মভ্রাতা
নটবর	...	ঐ ভগ্নীপতি

স্ত্রীলোক ।

মহামায়া	...	শান্তবাবুর প্রথম স্ত্রী
সরলা	...	ঐ দ্বিতীয়া স্ত্রী
সুশীলা	...	ঐ ভগ্নী
চন্দ্রকলা	...	সুপকারিণী
কাজলা	...	মহামায়ার দাসী

## প্রস্তাবনা

[ নটের প্রবেশ ]

( মঙ্গলাচরণ গীত )

রাগিণী ইমনকল্যাণ—তাল চৌতাল ।

ভাব নিত্য নিরঞ্জন, সত্যরূপী সনাতন ।

অরূপ অমূপ স্বস্বরূপ নিখিল অখিল কারণ ॥

অব্যয় অক্ষয় অভ্রান্ত, অজরামর অশ্রান্ত,

অনাদি পূর্ণ অনন্ত,

পরমাত্মা পুরঞ্জন ॥ ১ ॥

মানস-কমল-দলে, পবিত্র ভকতি-জলে,

অপদ-লীপদতলে, কররে অর্পণ ।

প্রণয়-পীযুষ-পূরিত, সধর্ম সাধু চরিত,

উদ্দেশে কর অর্পিত,

মঙ্গল হবে সাধন ॥ ২ ॥

নট ।

এ সভা উজ্জল বটে ! ওহে সহৃদয়,  
সদয় বৃন্দমণ্ডলি ! সদয় হৃদয়ে,  
প্রসন্ন নয়নে, আর করুণ শ্রবণে,  
করুন শ্রবণ দরশন—হংস সম,  
নীর-ত্যাগী ক্ষীর-ভোগী হ'য়ে—বক্ষ্যমাণ  
“প্রণয়-পরীক্ষা নাটকের” অভিনয় ।  
বর্ণ কি বর্ণিতে পারে, হায় ! যত দোষ,  
বহুবিধ দোষাকর বহু-পরিণয়ে ?  
“পরিণয়” এই বাক্য অতি সুধাময় !  
“বহু” শব্দ যোগে কিন্তু বিষময় হয় !!  
প্রথম মথনে সিন্ধু দিয়াছিল সুধা ;  
গরল দ্বিতীয় বারে ! হায়, সেই মত,  
প্রথম বিবাহে সুখ ; দ্বিতীয়ে বিষাদ ;  
তৃতীয়, চতুর্থ, পঞ্চে ক্রমে পরমাদ !  
সুখ-দ্রোহী “বহু বিভা” রাক্ষস দুর্ব্বার,  
সঙ্গে ল'য়ে হিংসা, রাগ, বিরাগ, কলহ,  
কুমন্ত্রণা, পক্ষপাত, ঘৃণা, হত্যা আদি,  
সোণার সংসার কত দিল ছারখার !  
বহু নারী এক পতি ; কি অশ্রায় কথা !

[ নটীর প্রবেশ ]

নটী ।

কেন, অশ্রায় বা কিসে ?  
ভেবে ভেবে শেষে হারালে কি দিশে ?  
বহু ফুলে দেখ—এক মধুকর !  
বহু চাতকিনী—এক জলধর !  
বহু নদীপতি—একই সাগর !  
বহু লতা-কাস্ত—এক তরুবর !  
বহু রাজ্যপতি—এক নরবর !  
বহু তারানাথ—এক শশধর !

এক সূর্য্য জায়া—ছায়া আর দিবা !

বহু নারী তবে অসাজস্তু কিবা ?

নট । হা হা প্রিয়ে ! নারীবুদ্ধি ! অতি অল্প ঘটে !

তুমি কি বুঝিবে তায় যত মন্দ ঘটে !

নটী । বটে তাতে মন্দ ঘটে, কিন্তু কার দোষে ?

যে না জানে স্নকোশলে রাখিতে সন্তোষে—

সম ভাবে জনে জনে—সেই দুঃখ পায়—

তাহারি সে দোষ—বহু বিবাহের নয় !

যে আগুনে জগতের এত হিত হয়,

সেই করে গৃহ দাহ । কিন্তু দোষ কার ?

আগুনের ? কিম্বা যে না জানে ব্যবহার ?

নিপুণ সারথি, যথা, করয়ে চালন,

একরথে এক হাতে, বহু অশ্বগণ ;

সে রূপ, নিপুণ যেই পতি মতিমান ;

শত খণ্ড হ'য়ে রাখে শত ভার্য্যামান—

তিল তিল প্রেমধন বাঁটিয়া সমান !

নট । ( সহাস্তে ) হা হা প্রিয়ে ! কোথা তুমি

এ কথা শিখিলে ?

এই সভ্য কালে হেন কেমনে कहিলে ?

কি বলিবে সুশিক্ষিত জন, এ শুনিলে !

মজ্জালে মজ্জিলে—ছি ছি মজ্জালে মজ্জিলে ।

বহু-নারী-প্রেমিকের বুদ্ধি-পারাবারে—

তার মূর্থতা পাথারে,

শুধু মূর্থতা পাথারে,

বটে এইরূপ তর্ক-তরঙ্গ উথলে,

শুধু তুফানের বলে,

ভ্রাস্তি তুফানের বলে !

কিন্তু সে তরঙ্গ-রঙ্গ ভঙ্গ করিবারে—

সেই সিদ্ধু তরিবারে,

তর্ক-সিদ্ধু তরিবারে,

“প্রণয়-পরীক্ষা” নামে নব নাট্য-তরী,

আজ্ পেয়েছি সুন্দরি,

আমি পেয়েছি সুন্দরি !

অভিনয় ছলে, এস, করি আরোহণ ;  
হবে ভ্রান্তি বিমোচন,                      তব ভ্রান্তি বিমোচন !

নটী । সে নাটকে কি আছে তা বল ?  
নট । বহু বিবাহের যত বিষময় ফল !  
নটী । তবে সে নাটক দেখা চাই !  
নট । তবে চল, গীত গেয়ে সজ্জা ঘরে যাই !

( নটের গীত )

রাগিনী কেদারা—তাল টিমা তেতাল।  
প্রণয়-বারিধি মাঝে সুখনিধি যদি চাহ ।  
এক জনে মন সঁপে তাহারি হইয়া রহ ॥

একান্তে যে একে মজে—

কভু না দ্বিতীয় ভজে—

পবিত্র সুখ-সরোজে,

বিরাজে সে অহরহ ! ১ ॥

নতুবা যে অহুরাগে, অংশ করে ভাগে ভাগে,

বিরাগ তার ঘটে মোহাগে,

যাতনা সহে দুঃসহ ! ২ ॥

[ উভয়ের প্রস্থান ।

( পটক্ষেপণ )



## প্রথম অঙ্ক

### প্রথম গর্ভাঙ্ক

কাশীপুর—শান্তবাবুর অন্তঃপুর।

[ মহামায়া ও কাজলা উপস্থিত ]

মহা। আর কি রকম জানে ?

কাজ। আর এক রকম ব'লে, ভেড়ার পিত্তি দে খাওয়াতে হয়, তাতে নাকি পুরুষ একেবারে ভেড়া হ'য়ে থাকে।

মহা। তার কাছে কি আর কোনো রকম নেই ?

কাজ। কেন এটা কি ভাল না ?

মহা। না, ওটা বড় মনঃপুত হয় না, পিত্তি মিত্তি এনে খাওয়ানো বড় দায়। ও ছাড়া আর কিছু আছে ?

কাজ। আছে বৈ কি ! এক রকম আছে, ছাতু দে আর দৈ দে খাওয়াতে হয়, তাতে খুব বশ হয়।

মহা। হরিবোল হরি ! তবেই হ'য়েছে—সাত জন্মে ছাতুও খায় না, দৈও খায় না !

কাজ। তবে আর এক রকম আছে ; শুধু গাছড়া, বলে পানের সঙ্গে সঙ্গে দিলে স্থপুত্রির মত কষা লাগে।

মহা। দূর ! দূর ! সে যে শুনেছি, যে খাওয়ায় তার ভাল কিছুই হয় না, লাভে হ'তে যারে খাওয়ায়, সে পেটের ব্যামোতে মারা পড়ে।

কাজ। তবে আর এক রকম জানে, বড় চমৎকার, কিন্তু পাবে কোথা ?

মহা। কি রকম ?

কাজ। বলে ভুঁইকম্পের সময় উলঙ্গ হ'য়ে সে শেকড় তুলতে হয়। তার পর রাজা সূতো দে যা মনে ক'রে গলায় প'র্বে, তাই হবে।

মহা। তবেই হ'য়েছে ! ভুঁইকম্প কবে হবে, তদ্বিন বাঁচি কি মরি, তার ঠিক কি !—আর কিছু স্থবিদে মতন জানে তো বল, নইলে এ লেঠায় আর কাজ নেই।

কাজ। আর কি ব'লবো ? সবই তো ব'লেছি, কেবল একটা বাকী ; সেটায় যে ছাই কি হবে, তা ব'লতে পারিনে।

মহা। সেটা কি ?

কাজ । সে এক রকম গুঁড়ো, হৃদয়ের সঙ্গে খাওয়াতে হয় ।

মহা । তাতে হয় কি ?

কাজ । তাতে হয় এই ; যে দিন যারে খাওয়াবে, সে দিন সে রেষের বেলা ঘুমুতে ঘুমুতে উঠে বেড়াবে, যারে ভালবাসে তারির কাছে যাবে, আর কোথাও যাবে না । কিন্তু ঐ দিন থেকে দু তিন দিন তার মাথা ধ'রে থা'কবে ।

মহা । এ যে বরং ভাল ।

কাজ । এ আর ছাই ভাল কি ?

মহা । এতে জা'ন্তে পা'কোঁ কারে ভালবাসে ?

কাজ । তা কি আ'জো জান না ? ছোট মাঠাকরুণ একে সোমত্ব, তায় এত রূপসী, বাবু কি তাঁরে ভাল না বেসে তোমায় বা'স্বেন ?

মহা । ওরে তা নয় ; তিনি নাকি গুমোর করেন, যে, আমার কাছে উঁচু নীচু নেই—আমি দুজনকেই সমান দেখি, যখনি এ কথা ওঠে, তখনি বলেন, লোকে দুই বে ক'রে কেন যে এত জ্বালাতন হয় ব'লতে পারিনে, কিন্তু আমি তো দেখছি দুজনকে সমান বড়, সমান সোয়াগ, সমান আদর ক'লে কখনই কোনো গোল হয় না । সেই জন্তে যার কথায় কথায় এই শ্লোকটা ব'লে থাকেন ;—

“প্রেমের করাতে মন চিরিয়ে সমান,

“সমভাবে রব আমি দুজনার স্থান !”

ছোট বোকে বে কর্কার আগেও ধর্ম কড়ার ক'রে গিচ্ছিলেন, যে, বে কল্লমিট বা, তুমি আমার যেমন আছ, তার চেয়েও বড় হ'য়ে থা'কবে—তোমায় এখন যেমন ভালবাসি, তখনও তেমনি বা'স্বো । সেইটে সত্যি কি মিথ্যে, একবার পরক ক'রে দেখবো ।

কাজ । হায় ! হায় ! বড় মা ! তুমি বুঝি ঐ কথায় ভুলেছিলে ? এও কি কারো কখনো হ'য়ে থাকে গা ? মন কি কখনো চেরা যায় ? একটা বৈ তো দুটা নয় ; এক জিনিষ কি একেবারে দু ঠাই থা'কতে পারে ? তাঁর শরীরে কি এতই রস, যে, এক পুকুর ছাপিয়ে উঠে আর এক পুকুর পূরে যাবে ? ছি বড় মা ! তুমি যে এমন হাবা মেয়ে তা আমি এদিন জা'ন্তেই না, তখন বাবুকে বে ক'ন্তে দেওয়াই তোমার অন্তায় হ'য়েছে ।

মহা। ওরে সাধ ক'রে কি দিছুলেম ? তখন ঠাকুরগণ বেঁচে, তিনি তো জানিস্ আমায় হাতে ক'রে মাহুষ ক'রেছেন ব'লেই হয় ; আমার ছেলে বেলা মা মরেন, কিন্তু ঠাকুরগণের লালন পালনে মার দুঃখ কক্ষণো পাইনি ; তাঁরেই মা ব'লতেম, তিনিও আমাকে পেটের সম্ভানের চেয়ে ভাল বা'সতেন । তিনি এসে হাতে ধ'রে কাঁদতে কাঁদতে ব'লেন, “মা ! এ বেতে তুমি মত না দিলে তোমার শ্বশুরের বংশটি যায় ।”

কাজ। কেন তখন তোমার বয়েস কত ?

মহা। এই দেখনা কেন ; এই আশ্বিনে আমার সাত গণ্ডা এক বছর হ'য়েছে, আর ছোট বোর বে হ'য়েছে ঠিক পাঁচ বছর, তা হ'লে তখন আমার বয়েস ঠিক ছগণ্ডা ছিল ।

কাজ। ওমা ! ইহঁতেই কি তোমার ছেলে হবার বয়েস গিছুলো গা ? কত নোক যে গণ্ডা ছেড়ে আদ্ পোন বয়েসে বিয়েন ধরে—মুখ্যোদের মংলার কি হ'লো ?

মহা। সে যে কুলীনের মেয়ে লো, তার বিয়েই তো বুড়ো বয়েসে হ'য়েছে ।

কাজ। তবে ঐ কায়েত কামিনী ?

মহা। তার স্বামী যে বিদেশে ছিল ।

কাজ। তা হ'ক্, তোমার তখন ছেলে হবার বয়েস যায় নি !

মহা। যাই হ'ক্, মা এসে অমন ক'রে কাত্রালেন, তার পর উনিও কত কাকুতি মিনতি ক'ল্লেন—দু দিন দু রা'ত্ ধ'রে কত কড়ার মাদার ক'রে কত বোজালেন, আমার নামে এক খান তালুক লিখে দিলেন, তাতে কেমন মন ভিজ়ে গেল, আর “না” ব'লতে পা'ল্লেন না ।

কাজ। কিন্তু এক সুবিদে এই হ'য়েছে, ছোট মা তোমার খুব বশে আছেন ।

মহা। আছে বটে, আমিও মনে করি তারে মার পেটের ব'নের মতন দেখি, কিন্তু তবু—কে জানে ছাই কি—তার মুখ দেখলে যেন বুক শুকিয়ে যায় !

কাজ। তা আর যাবে না গা, একি কম জালা ? নোকে অগ্নিই যার বলে—

সতিন্ সতিন্ সতিন্ । পরী হ'লেও পেতিন্ !

সতিন্ সতিন্ সতিন্ । স্বজন হ'লেও ছতিন্ !

তবু তোমরা যেই বড় ভাল, তাই এখনও বজায় আছে ।

মহা । সে বজায় এই পরক দেখা পর্য্যন্ত ! যে অমুদের কথা ব'ল্লি, যদি তা এনে দিতে পারিস্, তবে যা থাকে কপালে খাইয়ে একবার দেখ্বো, কারে ভালবাসে ? এ অমুদের গুণে আমরা দু সতিনে যেন নিক্তির তৌলে উঠ্বো, আর তাঁর মন যেন সেই নিক্তির কাঁটা হবে, সেই কাঁটা যদি আমার দিকে ঝাঁকে, তবে সব বজায় থাকবে ; যদি সমান থাকে, তাতেও থাকবে, আর যদি ছোট-বোর দিকে ঝাঁকে, তবে সব ম'জবে !

কাজ । সে অমুদ তো আ'জুই পাব অকন ।

মহা । কৈ এখনো যে এলো না ?

কাজ । আ'স্বে বৈ কি—তারা বেদের মেয়ে, টাকার নোভ পেয়েছে, কা'ল্ যখন ব'লে গেছে আ'জু আ'স্বে, তখন আ'স্বেই আ'স্বে । রাস্তার দিকে কাণ পেতে থাকি ; এলো ব'লে—

( নেপথ্য—ব্যথা ভাল কো—দাঁতের পোকা বা'র কো— )

ঐ এয়েছে ; ঐ রাস্তায় কত কি ব'ল্ছে, শোনো ।

( নেপথ্য ) ব্যথা ভাল কো—দাঁতের পোকা বা'র কো—আর যদি ভাতার সো হবি, তবে আয়, মোর সাথে বনে যাবি, একটা জড়ির গাছ দেখিয়ে দেব, এলো চুলে তুল্বি—তারে ধুবিনে ডুবিয়ে নিবি—ছেঁচুবিনে ঠক্কাকাবি—বা'টুবিনে ঘস্ঘসাবি, গলাজলে উল্বি—ছাদামালায় গুল্বি—টোঁক ক'রে গিল্বি, আর ওস্তাদ ব'লে মা'ন্বি ! আর এক কাম ক'রবি—একটা পদ্মফুল আ'ন্বি—পুরুষ ভোমরা ধ'রবি—নজ্জাবতীর নতা দে ঐ ছটোকে বা'টবি—বেটে দোরের মাথায় না'গাবি, ভাতারের বেটা ভাতার অমনি ছমাসের পথ থেকে, গয়নার বাক্স নে, ভোঁ ভোঁ ক'রে ডিগ্বাজী থেয়ে, ঘুরে এসে প'ড়বে !

গীত।

রাগিণী বেহাগুড়া—তাল ধেম্‌টা।

ভাঙা মন যোড়া দিতে কার আছে আয় লো ছুটে।

বার মেসে আড়া আড়ি, এক নিমিষে যাবে টুটে ॥

এসি মোর গাছ গাছড়া, তেলপড়া আর জাড়ি জাড়া,

সতিন হ'য়ে ভাতার ছাড়া, মরে বেটী মাথা কুটে!

এ অষুদ মোর ছুঁতে ছুঁতে, হড়কো বৌ যায় আপনি শুতে,

বা'রু ফটকা পুরুষ যারা, আঁচল ধরা হ'য়ে ওটে!

মহা। কাজলা! তুই যা, ওরে থিড়কী দে পুরোণো রান্না বাড়ীতে নে  
যা, আমি এ দিক্‌দে যাচ্ছি।

[ উভয়ের প্রস্থান।

( পটক্ষেপণ )

## প্রথম অঙ্ক

## দ্বিতীয় গর্ভাঙ্ক

বনহুগলি—শান্ত বাবুর বাগান।

[ শান্ত বাবু ও সদারং বাবু উপস্থিত ]

শান্ত। দেখ ভাই সদারং! এই এক মেরাপে দু রকম লতা উঠে কি  
চমৎকার শোভাই হ'য়েছে! ইটী কাঞ্চন লতা, উটী অপরাজিতা।  
আবার এক স্থানে তাদের দু রঙের দু প্রকার ফুল ফুটে যে বাহার  
হ'য়েছে, তার আর তুলনা নাই!

সদা। তুলনা ঘরে আছে, দেখলেই হয়; যেমন এক শান্ত বাবুতে মহামায়া  
আর সরলা!

শান্ত। ( সহাস্তে ) লতার তুলনা স্বীকার, ফুলের কৈ?

সদা। এক স্বামীতে দুজনের দু প্রকার প্রণয়—হ'লো না?

শান্ত। না, হ'লো না; তারা দুজনেই আমায় সমান ভাবে।

সদা। তবে দুজনের প্রতি তোমার যে দু রকম প্রেম, তাই না হয় ফুলের  
উপমা হ'ক!

শাস্ত। এবারেও হ'লো না ; প্রণয় আবার দু রকম কি ? আমার দুই সমান !

সদা। তোমার আপনার মনকে দেবে ফাকি, এতে আর ক'রোঁ কি ?

শাস্ত। বা সদারং ! বাহবা কি বাহবা ! মাঝে মাঝে রাম ব'স্ হতেও ঘে সাধ যায় !

সদা। রাম ব'স্ হই আর না হই, কিন্তু রাম ব'স্ ঘে আমার মতের পোষক, তার আর সন্দেহ নাই ; তাঁর একটা গানে আছে—

“আমার একটা যে মন, দুজনকে তা দিব কেমনে ?”

শাস্ত। ( সলজ্জভাবে ) বেস বেস ! এখন এস, আমার সাধের মাধবী-কুঞ্জে খানিক বসি। ( উভয়ে পরিক্রমণ ) এই কুঞ্জে আমার সরলার সঙ্গে এক নিশি যাপন হ'য়েছে—এই কুঞ্জেই সেই মানময়ীর মান-ভঞ্জন ক'রিছি।

সদা। তবে আর এরে “মাধবীকুঞ্জ” বল কেন ? “মানকুঞ্জ” বলাই উচিত !

শাস্ত। আ'জ্ অবধি নয় তাই ব'লবো !

সদা। শুধু তা ব'লেই হবে না ; মানকুঞ্জের ইতিহাসটাও এখনি ব'লতে হবে।

শাস্ত। তুমি শুন্তে চাও, আমার রাধার মান কিসে হ'লো আর কিসে গেল ?

সদা। রাধার মানের মূল চন্দ্রাবলী বৈ আর কি হবে !

শাস্ত। প্রকৃত নয়, কল্পিত বটে।

সদা। কল্পিত কেমন ? আমি তো মহামায়াকেই লক্ষ্য ক'রে চন্দ্রাবলীর নাম ক'রেছি, তিনি ছাড়া আরো একটীর আশঙ্কা হ'য়েছিল নাকি ?

শাস্ত। আমার পরিহাসে সরলার হ'য়েছিল বটে।

সদা। কিরূপ শুনি ?

শাস্ত। এমন কিছুই নয়, অতি সামান্য কথা ;—তুমি তো জানো, সরলাকে নিয়ে আমি মাঝে মাঝে বাগানে থাকি। গত রাস-পূর্ণিমার রাত্রে এই মাধবীকুঞ্জে—

সদা। আবার মাধবী ?

শাস্ত। ( সহাস্তে ) অভ্যাস এমনি বস্তু !—ভাল, এই মানকুঞ্জে ব'সে দুজনে



কপোত কপোতীর গায় কতই হান্ত কোতুক রসালোপে মগ্ন ছিলেম। একে শরতের শেষ, তায় পৌর্ণমাসী—নির্মল আকাশ, নির্মল বাতাস, নির্মল জলের ধার, নির্মল প্রেম, সুখও যত দূর নির্মল হ’তে পারে, তাই হ’চ্ছিল। এমন সময় আমার গ্রহ-দোষে, কিম্বা সূর্যের একশেষ হ’লেই নাকি দুঃখ স্বভাবতঃই এসে থাকে, যে কারণেই হ’ক, আমি কথায় কথায় পরিহাস ক’রে ব’ল্লেম “দেখ সরল! আমার পুত্র কতাই হয় নাই, এই জন্তই পুনর্ব্বার বিবাহ ক’রে তোমা হেন অমূল্য রত্ন পেয়েছি! কিন্তু ভয় করে, যদি তুমিও পুত্রবতী না হও, তবে পাঁচ জনে মিলে আমাদের এমন প্রণয়-রাজ্যে এক ভাগীর উপর আবার আর একটা ভাগী বা জুটিয়ে দেয়; তাই বলি, এই বেলা বুঝে সূঝে চল!”

সদা। ছি ছি! এমন কথাও ব’লতে আছে?

শান্ত। ভাই ব’ল্লে না প্রত্যয় যাবে, যেই এই কথাটা ব’লেছি, অগ্নি সেই বিশাল চক্ষু দুটা কপালে তুলে আমার সরলা একেবারে বিহ্বলা হ’য়ে এই মার্কেলের উপর প’ড়ে গেল। তখন হায় হায় করি, আর বলি কি কষ্ট! “সুখে থা’ক্কে ভূতে কিলোয়” আমার সেই দশা হ’লো যে!

সদা। তাই তো, কি বালাই! তখন ক’ল্লে কি?

শান্ত। কি আর ক’র্ব্বো ভাই! দৌড়ে গে পদ্মপাতা ক’রে জল এনে মুখে বুকে ছিটে দিতে দিতে চৈতন্য হ’লো। নিশ্বাসে বুঝ্লেম চৈতন্য হ’য়েছে, কিন্তু বাক্যও নাই—চেয়ে দেখাও নাই। হৃদে আলতা ঠোঁট দুটি শুকিয়ে গিয়ে ঈষৎ কাঁপছে। মূর্ছার সময় চ’কে জল মাত্র ছিল না, এখন দু কোণে দুটা মুক্তার গায় দেখা দিলে, তার পর দু ধারে দুটা ধারা! ক্রমে দু গণ্ড দে দর দর ক’রে প্রবাহিত। সেই ধারা শতধা হ’য়ে হৃদয়ে শতেশ্বরী হারের শোভা ধারণ ক’ল্লে! কিন্তু সরলা তখন এগ্নি আচ্ছন্ন—এগ্নি বিবর্ণ, যে, দেখে ভয় হ’তে লা’গলো।

সদা। ভয়েরি তো কথা—

শান্ত। কিন্তু তখন যে তার চমৎকার রূপখানি দেখেছি, তেমন আর

কখনো দেখ্লেম না ! সেই দিন ভাই নিশ্চয় জেনেছি কবিদের বর্ণনা কিছুই মিছে নয়—কিছুই বাড়ানো নয় ; কেননা সরলাকে দেখে ঠিক বোধ হ'লো, যেন স্থির বিদ্যুৎ প'ড়ে র'য়েছে, কি স্বকোমল স্বর্ণলতা আশ্রয়-তরু থেকে ছিন্ন হ'য়েছে !

সদা । এ বর্ণনা তো তোমার এখনকার বিজ্ঞা, মান ভাংতে তখন কি বিজ্ঞা খাটা'লে তা বল ?

শাস্ত । মান ভাংতে যে যে বিজ্ঞা চাই, তার আর কিছু বাকী রাখি নাই ; ভারতচন্দ্রের মানের পালা—ঈশ্বর গুপ্তের মানের পালা, যা যা মনে এলো, সব খাটা'লেম । নিধুবাবুর মত গান গাইলেম—আপনিও গোটা দুই নূতন বেঁধে গেয়ে দিলেম, তবু ভাই বিষ উঠলো না, কেবল আকার দেখে বোধ হ'লো ভাবখানা যেন ফিরেছে ।—

সদা । তবে আরো গান গাইতে হয় ; গানে যেমন স্ত্রীলোক ভোলে, এমন আর কিছুতেই না !

শাস্ত । সে তো গাইয়ের কর্ম, আমরা কি তা পারি ? তবে ভালবাসার মুখে মন্দও ভাল লাগে, এই জ্ঞেই যা পারি, তার আর কণ্ডর করি নি !

সদা । তার পর ?

শাস্ত । তার পর আপনার ঘরাও বক্তৃতা ধ'ল্লেম ; ব'ল্লেম “তোমার মন বুঝতেই ব'লেছি, মনের কথা তা নয় ।” আবার পুনঃ পুনঃ শপথ ক'রে ব'ল্লেম, “বংশ থা'ক, বা যা'ক প্রিয়ে ! আর আমি বিবাহ ক'র্কে না । তোমার পুত্র হয় বড় সুখ, না হয় তোমার পোষ্যপুত্র ক'রে দেব—সেই আমার বংশধর হবে—সেই আমার বিষয় রক্ষা ক'র্কে ।”

সদা । বোধ হয়, এই কথাতেই মান দান পেলো ?

শাস্ত । এতে মান পেলেম, কিন্তু মন পেলেম না !

সদা । কেন ?

শাস্ত । ওরে ভাই ! তপ্ততেলে জল ঢেলে রাঁধুণীর যেমন বিপদ হয়, আমরা তাই হ'লো ; সরলার দুর্জয় মান প্রতপ্ত ঘৃণের ন্যায়, আমার পুত্রকামনা আর বিষয়-চিন্তারূপ জল পেয়ে একবারে দপ্

ক'রে জ'লে উঠলো! তাতে আমার হৃদয় আরো দগ্ধ হ'তে লাগ'লো!

সদা। কেন? সরলার তো কটু কথার মুখ নয়, তবে তোমায় এমন কি কথা ব'লে, যে, তোমার এত গাত্রদাহ হ'লো?

শাস্ত। আমায় সম্ভাষণ ক'রে কোনো কথা নয়, আপনাকে আর ঈশ্বরকে সম্বোধন ক'রে যে কটী কথা ক'য়েছিল, তা জন্মে কখনো ভুলবো না।

সদা। কি কথা শুনি?

শাস্ত। ঠিক এই কটী কথা;—“হা নির্বোধ মন! হা দুরাশা! হা সরলার সরল হৃদয়! তোমরা বিষয়-প্রেমিককে প্রেমের রক্ষক ক'রে কি সর্বনাশই ক'রেছ! আ'জ্ দেখসে, তোমাদের সেই বিশ্বাসী রক্ষক বিষয় তক্ষকের ন্যায় আমার জীবনভক্ষক হ'য়ে ব'সেছে!—হা নিদারুণ বিধি! তোমার মনে এই ছিল! নিতাস্ত নৃতনের ভক্ত—নিতাস্ত রস-শূণ্য বিষয়-রসের রসিক, এমন নিষ্ঠুরের সঙ্গে নির্বন্ধ ঘ'টিয়ে, নিতাস্ত পতি-প্রেম-ভিকারিণী দুঃখিনী সরলার সকল সাধ—সকল সুখ নষ্ট ক'রে দিলে, তবে আর এ ছার প্রাণ রেখে ফল কি?” আহা! এই বলে আর চ'কের জলে বুক ভেসে যায়!

সদা। তা তো হবেই—বড় গ্রীষ্মের পর বৃষ্টি হওয়া স্বাভাবিক—তাতে উপকারও অনেক—

“বৃষ্টি হলে রিষ্টি যায় সৃষ্টি রক্ষা পায়।”

শাস্ত। তাই হ'লো। তবে কিনা,

“—লঘু মধ্য মান নয়, তা হইলে ভাস্কিত কথায়।”

আসল গুরু মান—জা'ত্ সাপ। স্ততরাং তার যা ঔষধ, তাই প্রয়োগ ক'ল্লে'ম; রসিক চুড়ামণি সুন্দর যে পথ দেখিয়ে দিয়ে গেছেন, শেষে সেই দৃষ্টান্তক্রমে, “পায় ধরি ভাস্কিহু কন্দল।”

সদা। আর আমিও জা'ন'লে'ম, তোমার সরলা রমণীরত্ন; যেমন রূপবতী, তেমনি রসবতী, তেমনি যথার্থ প্রেমবতী! ফলতঃ সুন্দরের গুণবতী বিজ্ঞার চেয়ে কোনো গুণে কম নন্। কিন্তু তোমার বড় গৃহিণী মহামায়া যিনি, তিনি সাক্ষাৎ মহামায়া—মায়ার পুতুল!

শাস্ত । আ'জ্ তার ঘরে আমার বিশেষ নিমন্ত্রণ !

সদা । “বিশেষ” কেমন ?

শাস্ত । চুপি চুপি একা খেতে হবে—তুমিও নও !

সদা । তবে বুঝি দানপত্র প্রস্তুত হ'য়ে আছে !

শাস্ত । কিসের দানপত্র ?

সদা । তালুকের !

শাস্ত । কোন্ তালুকের ? কার তালুকের ?

সদা । তোমার তালুকের ! কোন্ তালুক তা তিনিই জানেন, কিন্তু “মানগড়েরি” হ'ক্, আর “প্রাণগড়েরি” হ'ক্, একখান তালুক যে আজ্ সই ক'রে দিতে হবে, তার আর ভুল নেই !

শাস্ত । সে কি ? তুমি কিছু শুনেছ না কি ?

সদা । এ আর শুন্তে হবে কেন ? এত যত্ন যেখানে—রুদ্ধদ্বারের মধ্যে ব'সে থাওয়ানো—হয় তো মুখে তুলেও দেওয়া হবে—সেখানে ও রকম একটা না হ'য়ে যায় না !

শাস্ত । ( সহাস্তে ) তবু ভাল, তামাসা !

সদা । তামাসা ! আচ্ছা, দেখবেন আমি মানুষ চিনি কিনা ?—যাই এখন গাড়ি তৈয়ার ক'র্তে বলিগে ।

[ প্রস্থান ।

শাস্ত । ( স্বগত ) বড় মিছেও বলে নি ; সরলাকে বে ক'র্তে যাবার আগে একখানি তালুক লিখে নে তবে সম্মত হ'য়েছিল । কিন্তু আ'জ্ তা নয়—আ'জ্ আর একখানা কি আছে । ভাল ! আর একখানাই বা কি থা'ক্বে ? মন্দই বা ভাবি কেন ? থামকা শত্রুকেও মন্দ ভা'বতে নেই, এ তো অর্দ্ধাঙ্গরূপিণী স্ত্রী ! না, তবে এ কিছুই না—সে সব কিছুই না ; এ কেবল তৃপ্তির জন্ত—প্রেমের জন্ত—নির্জ্জন সুখের জন্ত !

[ প্রস্থান ।

( পটক্ষেপণ )

## প্রথম অঙ্ক

### তৃতীয় গর্ভাঙ্ক

কালীপুর—সরলার গৃহ।

[ সরলা সূচিকর্মে এবং সুনীলা একখানি হস্তাকর পুস্তক পাঠে নিযুক্তা ]

সুনী। ( পাঠান্তে ) ছোট বো ! তুমিই ভাই সার্থক লেখা পড়া শিখেছিলে, আমাদের মিছে শেখা !

সর। কেন ঠাকুরি ?

সুনী। কেন আর কি—আমরা কি বিষয় কর্মের জন্য শিখি ? এমন ক'রে কবিতা র'চতে না পা'ল্লে' আর মেয়ে মানুষের লেখাপড়া শেখা কি ?

সর। এমন কথা ব'লো না ভাই। সকলেই কি কবিতা লিখবে ? বিद्या-শিক্ষার ফল যেটা, সেইটা হ'লেই হ'লো ; ভাল মন্দ বুঝবে, উচিত অশুচিত জা'ন্বে, জেনে তার মতন কাজ ক'র্বে ।

সুনী। তার দৃষ্টান্ত ?

সর। কেন ? ঘেঘ হিংসা ভুলবে ; কৌদল কচকচি ছা'ড়বে ; পরের ভালতে থা'কবে, মন্দ ক'র্বে না ; পরের যশ গাবে, নিন্দে ক'র্বে না ; ঘরকর্মার কিসে ভাল হয়, দেখবে ; যদি ছেলে মেয়ে থাকে, তাদের মানুষ ক'র্বে—সুনীত্ শেখাবে ; গুরুলোককে সেবা ভক্তি ক'র্বে ; আর যিনি প্রাণের প্রাণ, তিনি যাতে সুখে থাকেন, একান্ত মনে তার চেষ্টা পাবে—এই সব ক'র্তে পা'ল্লে'ই মেয়েমানুষের লেখাপড়া শেখা সার্থক হয় ।

সুনী। তাতো বটেই, কিন্তু আবার যে যুবতী এমন ক'রে বিধাতার কাছে মনের গুপ্ত ভাবটা প্রকাশ ক'র্তে পারে, তার গৌরব তো রাখ'বার স্থান নাই !—আমরি ! কি লেখাই লিখেছ ;— ( পাঠ )

কমলের খেদ ।

১

বালিকা কলিকা আছিল যখন,

ভ্রমর-ঝঙ্কার-রবেতে তখন,

হ'তো না হ'তো না মন উচাটন,  
অলি-সক-আশা ছিল না ।

অন্য ফুল-গত দেখিলে ভ্রমরে,  
ডুবিত না মন রিশের সাগরে,  
সরল-স্বভাব-সলিল উপরে,  
ভাসিতাম নব ললনা !

২

মিলনেরি সুখ, বিরহ-বেদন,  
প্রেম-আকিঞ্চন, যতন কেমন ;  
সুখা কি গরল, তার আশ্বাদন,  
ভেদাভেদ-জ্ঞান ছিল না ।  
সে কলি ফুটিল—সৌরভ ছুটিল,  
প্রিয় মধুরত গৌরব করিল,  
প্রেম-সুখাশ্বাদ-জ্ঞান সঞ্চারিল,  
উপজিল সুখ-বাসনা !

৩

গিয়েছে সে দিন, সকলি নূতন,  
নবভাবে, মন মগন এখন,  
কাছে কাছে থাকে, সাধ সর্বক্ষণ,  
তিল আধ ছাড়া সহে না ।  
আমার রতন, আমারি রহিবে ;  
আমারি হৃদয়ে আসন করিবে ;  
কে জানে কুমুদী ভাগিনী হইবে,  
এ তাপে কি তরু দহে না ?

৪

বলনা হে, বিধি ! এ কেমন বিধি—  
অনেকের নিধি, এক গুণ-নিধি !  
তাহাতে উথলে বিষাদ-বারিধি ;  
এ শুধু তোমারি ছলনা !



হায় ! কেন হেন নিদয় হইলে ?

এত সুখে কেন এত দাগা দিলে ?

অবলা ব'ধিয়ে কি সুখ পাইলে ?

কি যশঃ বাড়িল বল না ?

এ তো, ভাই ! কমলের খেদ নয়, সরলার খেদ বলাই উচিত !

সর। ( সহাস্ত্রে ) কিন্তু সরলার আর এক মূর্তি যে সুশীলা, তার জন্তে  
যে এমন ক'রে খেদ ক'র্তে হ'লো না সেও পরম সুখ !

সুশী। সুশীলার যে খেদ আছে ভাই, তাই যথেষ্ট !

সর। অমন কথাটা ব'লো না ঠাকুরি ! অবলার যত জালাই থা'ক, এর  
কাছে কিছুই নয় ! তোমার পতি না হয় একটু অরসিক ।

সুশী। একটু ?

সর। ভাল না হয়, খুব অরসিক—না হয় লেখা পড়াও অল্প জানে ।

সুশী। জানে ?

সর। না হয় জানেই না—আর না হয়, দেখতেও তত সুন্দর নয় ।

সুশী। তত ?

সর। না হয় সে কুৎসিত, অরসিক, মূর্থ ; এ বৈ তো আর কিছু না !  
কিন্তু সে তো “তোমারি !”

সুশী। তাই বা কেমন ক'রে ? আমারি কি সতিন নেই ?

সর। বালাই !—রোগ ডেকে আন নাকি ?

সুশী। কেন ? ডেকে আন্বো কেন ? আমার সতিন আছে, তা কি  
তুমি জান না ?

সর। ওমা ! সে কি ? তোমার আবার সতিন কে ?

সুশী। কেন—“গুলির আড্ডা !”

সর। এই সতিন ! তবু ভাল ! সতিনের নাম শুনে আমি আর  
ছিলুম না !

সুশী। কেন ভাই ! উড়িয়ে দেও কেন ? সেই কি আমার সামান্য  
সতিন ! তোমার বা কি ! তোমার সতিন তো পালার দিন  
সারারাত্ ছেড়ে দেয়, আমার সতিন যে প্রতিদিন সারারাত্ টী  
রেখে কেবল ভোরের বেলা আমার কাছে ঘুমুতে ছেড়ে দেয় !  
—ভাগীদারের কাছে, তুমি তবু সমান ভাগ পাও, বরং পাইটে

পোনটো বেশী—কেননা, দিনের বেলা দাদা প্রায় তোমারি—  
আমার যে আনা ছেড়ে কড়াকাস্তিতে ঠেকেছে !

সর। কেন, দিনের বেলা ঠাকুরজামাই তো আর বেরোন না।

সুশী। বেরোন না, ঝিমোন !

সর। ঝিমোন কি ?

সুশী। দেখনি ?—হঁকো হাতে ক'রে ব'সে কেবল ঝিমুনি—দেখে গা  
জ'লে যায়—কেমন ধারা ফ্যাল ফ্যাল ক'রে চাউনি—গেড়িয়ে  
গেড়িয়ে কথা—চ'কে যেন কালী ঢেলে দেছে—ঠোট ছুটী যেন  
পুড়ে গেছে—নীচের ঠোট উন্টে যা'চ্ছে—সকল মুখ তেল চুক  
চুক ক'চ্ছে—পোড়া কপাল ! পোড়া কপাল !

সর। আমি আরো বলি, তোমার যত্নে ঠাকুরজামাই এখন সুধরেছেন।

সুশী। সুধরেছেন আমার মাথা—তখন দিনে রেতে পাকা খেতেন ;  
এখন দিনে কাঁচা, রেতে পাকা—সোধরাবার মধ্যে এই !

সর। পাকা কাঁচা কি লো ?

সুশী। তাও বুঝি জান না ?—সাত জন্মে যেন জা'ন্তেও হয় না !—তবে  
বলি শোনো। কথকের কথা শুনেছ তো ?

সর। সে কথা এলো কেন ?

সুশী। বলি, আর বৎসর মানগড়ের বাড়ীতে মা যে কথা দিচ্ছিলেন তা  
তো শুনেছিলে ?

সর। হ্যাঁ।

সুশী। যে দিন সমুদ্র-মহনের পালা হয়, সে দিন তো ছিলে ?

সর। ছিলেম।

সুশী। যখন শ্রীকৃষ্ণ মোহিনীবেশে দৈত্যদের কাছ থেকে অমৃত এনে  
দেবতাদের বেঁটে দেন, তখন এক দৈত্য ছদ্মবেশে সেই অমৃত  
খেয়েছিল ; এ কথা মনে আছে তো ?

সর। আছে।

সুশী। তখন চক্রপানি চক্র দে সেই দৈত্যকে কেটে ছুখও করেন, বটে  
তো ?

সর। হ্যাঁ।

সুশী। তার এক খণ্ডের নাম ?

সর। রাহু।

সুশী। আর এক খণ্ডের নাম?

সর। কেতু।

সুশী। সেই এক রাহু দুটো হ'য়ে যেমন জগতের নানান্ খানা অমঙ্গল ঘট'ছে, এই পোড়া দেশে তেয়ি এক আফিং দুই মূর্তি ধ'রে সর্বনাশ ক'র্ছে! ব'লতে ঘণাও করে, পেয়ারার পাতা, গোলাপের পাপড়ি, কি পানের সঙ্গে ভাজা হ'য়ে যে মূর্তিটা হন, তিনিই “পাকা”—তাঁর ডাক নাম “গুলি!” আর যে মূর্তিতে ভাজা টাজা না হ'য়ে অগ্নিই থাকেন, তিনিই “কাঁচা”—তাঁর ডাক নাম “আফিং!”—এখন বুঝলে তো?

সর। ছি ছি ছি! ঠাকুরজামা'র যে এত নীচ প্রবৃত্তি, তা আমি জা'ন্তেই না। এমন সরল লোকের এমন গরল খাওয়া বড় দুঃখের কথা। আ'জু তাঁরে খুব তিরস্কার ক'র্কো—যাতে এ কাজ ছেড়ে দেন, তার চেষ্টা পেতে হবে—আপনি পারি, বা তোমার দাদাকে দে পারি, নিবারণ ক'র্তেই হবে।

সুশী। (সহাস্ত্রে) ছোট বো! গোবিন্দ অধিকারীর যাত্রায় একটা গান গায়, যে,—

“বল বল আবার বল;

ভাল কথার মিছেও ভাল!”

তেয়ি আ'জু তোমার মুখে মিছামিছি একটা ভাল কথা শুনেও মনটা অনেক ভাল হ'লো!—যা'ক্ সে কথায় আর কাজ নেই—এখন দেখি, তুমি আর কিছু নূতন লিখেছ কিনা?—(দৃষ্টি পূর্বক) এই যে আবার একটা কবিতা—

সর। (সহাস্ত্রে) কবিতা নয়, ভাই, উটী গান।

সুশী। (দেখিয়া) গানই তো বটে।—বা! বা! গান বা'ধতেও যে শিখেছ! কার কাছে শিখ'লি ভাই?

সর। কে আর শেখাবে ভাই, আপনার কথা আপনিই যুড়ে তেড়ে নিয়েছি!

সুশী। সুর পেলে কোথা?

সর। কেন ? আমাদের বামুনঠাক্করণের কাছে ।

সুশী। আহা ! বামুনঠাক্করণ কি মিষ্ট গায় ভাই ! যেন মধু ঢেলে দেয় !  
মেয়ে মান্বে যে এমন গাইতে পারে, তা আমি জা'ন্তেই না—  
যেন শেখা বিজ্ঞা !

সর। শেখাই তো ।

সুশী। গৃহস্থের মেয়ে, কার কাছে শিখলে ভাই ?

সর। কেন ? ওর স্বামীর কাছে ।

সুশী। ওর স্বামী এখন কোথায় ?

সর। আহা ! ঐ দুঃখেই তো মরে । সে যে কোথায় নিরুদ্দেশ হ'য়ে  
র'য়েছে—আছে কি নেই—তার কোনো ঠিকানাই পায় না ।

সুশী। সে কি হঠাৎ বিবাকী হ'য়ে গেছে, না আর কোনো কারণ আছে ?

সর। না, বিবাকী না, আপন ইচ্ছাতেও নয়, বড় বিপদে প'ড়েই  
ছাড়াছাড়ি ।

সুশী। কি বিপদ ?

সর। ওর স্বামী ওরে নিয়ে পশ্চিমে ছিল । সেখানে ভাল চাকরী  
ক'র্ত্তো । বলে বড় সোখিন পুরুষ, নিজেও গানবাজনা শিখতো  
ওরেও শেখাতো । তার পর যখন সেপাইয়ের হেঙ্গামা উঠলো—  
সেই যে একবার চা'রুদিকে সেপাই টেপাই থেপে উঠে কত  
ইংরেজ, কত বিবীকে কেটে ফেলেছিল শোনা গেছে—যারে বলে  
“সেপাই বিদ্রোহ”—সেই হেঙ্গামাতে ওর স্বামীকে তারা ধ'রে  
নিয়ে গেল, আর ওর বাড়ী ঘর লুটতে আরম্ভ ক'লো । ও তখন  
করে কি ; জা'ত্ মানের ভয়ে ওর সেদেশী একজন চাকরানী ছিল,  
তারির পোষাক প'রে তারির সঙ্গে পালিয়ে গেল । বলে, তিন  
চা'রু দিন জনারের ক্ষেতের ভিতর লুকিয়ে ছিলেম ।

সুশী। ঈস্ ! শুনেই যার বুক ধড়্ফড়্ করে, ও যে বেঁচে ছিল এই  
তারিপ । তার পর কি হ'লো ?

সর। তার পর, এক বৃদ্ধ ব্রহ্মচারী ওর দুঃখ দেখে, দয়া ক'রে ওরে সঙ্গে  
নিয়ে কাশীতে রেখে যান । সেখানে নাকি অত গোল ছিল না,  
আর বাঙালীও অনেক । প্রায় দুই তিন বছর সেই কাশীতেই  
থাকে । পরের বাড়ী ভাত রোধে, কিছু সঙ্গতি ক'রে দেশে এলো ।

এসে দেখে, পৃথিবীর মধ্যে যারা আপনার ব'লতে ছিল, তারা আর কেউ নেই।

সুশী। কারা ছিল ?

সর। এক মা, আর একটি ছোট ব'ন্;—মা মাগী ম'রে গেছে, ছোট ব'ন্টার কোন্ বড় মানুষের ঘরে বে হ'য়েছে।

সুশী। তবে সেখানেই কেন গেল না ?

সর। যাবে কি, ওর ব'ন্ ওরে চেনে না—আর ও তো তারে কচি দেখে গেছে।

সুশী। পরিচয় দিলেই তো হ'তো ?

সর। বলে, কুটুম্ববাড়ী গে থা'ন্তে লজ্জা করে।

সুশী। বাড়ী কোথায় ?

সর। ওর এত কথা কেন জিজ্ঞাসা ক'চ্ছিষ্ ঠাকুরি ?

সুশী। কারণ আছে, বলনা ওর বাড়ী কোথা ?

সর। শান্তিপুর।

সুশী। এখানে জুটলো কেমন ক'রে ?

সর। সদারং বাবুর পিসীও পশ্চিমে থা'ন্তেন কিনা, তাই তাঁর সঙ্গে কিরূপ জানা শুনা ছিল। তিনি তাঁর গুরুর বাড়ী শান্তিপুরে গে ওরে দেখতে পান। ওর দুঃখ শুনে সঙ্গে ক'রে এনে বাবুকে ব'লে ক'য়ে রাখিয়ে দেছেন।

সুশী। তিনি অবশ্য ওরে ভাল জেনেই এনেছেন ?

সর। ওর সুখ্যাতির সময়, তাঁর এক মুখ ঘুচে শত মুখ হয়।

সুশী। আমিও দেখছি, লোকটী বড় ভাল—মনটী খুব সাদা—এত ক্লেশ তবু সদাই হাস্যমুখ। আবার হা'সবার সময় মুখের আদলখানি ঠিক তোমার মতন দেখায়।—ভাল, ছোট বো! তোমারও না বাপের বাড়ী শান্তিপুর ?

সর। ( দীর্ঘনিশ্বাস ত্যাগপূর্বক ) হ্যাঁ ভাই, এক কালে ছিল বটে !

সুশী। ভাল! তোমার এক দিদীও না তাঁর স্বামীর সঙ্গে ওদেশে ছিলেন ? তার পর দুজনেই না নিরুদ্দেশ হন ?

সর। ওরে ভাই ! তুমি যা ব'লবে, তা কি আমি ভাবিনি ; ওর কাহিনী আর আমার মেজ্দিদীর কাহিনী—যা মার মুখে শুনেছি—তাতে

এক চুলও তফাত নেই। সেই জন্মেই তো ক দিন ঘেঁটিয়ে ঘেঁটিয়ে সব শুন্‌চি। কিন্তু নামে নামে মেলে কৈ ?

সুশী। তাঁর কি নাম ছিল ?

সর। তাঁর নাম ছিল “তরলা।” মা ব’লতেন ছেলেবেলা মেজ্‌দিদী আমার বড় অভিমানিনী ছিলেন—কথায় কথায় চ’কের জলে বুক ভেসে যেতো, তাই বাবা সাধ ক’রে নাম রেখেছিলেন “তরলা।” তার পর আমি হ’লে আমার নাম “তরলার” মিল “সরলা” রাখলেন।

সুশী। যদি নাম ভাঁড়িয়ে থাকে ?—বাপের নাম কেন জিজ্ঞাসা ক’ল্লেনা ?

সর। তাও মেলে না !

সুশী। আমার তো বেস ঠাহর হ’চ্ছে, নাম ভাঁড়িয়েছে !

সর। ভাঁড়া’ক্ আর যা করুক, আমি সহজেই ওরে যে ভালবেসেছি, আর যে মাগু করি, আমার সেই দিদী হ’লেও এর বেশী হ’তো না !

সুশী। তুমি কারেই বা না ভালবাস ? কারেই বা না মাগু কর ?

সর। তা নয় ভাই ! ওরে যে আমি কি চক্ষে দেখেছি, তা ব’লতে পারিনে ;—আমি কা’ল্ থেকে ওর রান্নার চাকরী ছাড়িয়েছি—আপনার যেমন সাধ্য, তার মতন দু এক খানা কাপড় চোপড় দিয়েছি—আ’জ্ আবার দু চা’রখানা গয়না প’রিয়ে, চুলটী বেঁধে, টিপ্‌টী কেটে, মুখখানি তুলে যেমন দেখ্‌লেম, অগ্নি ফিক্ ক’রে হা’স্‌লে, দেখে বড় সুখ হ’লো, কিন্তু তখনি অগ্নি একটা দীর্ঘ নিশ্বাস ফেল্‌ল, তাতে বড় দুঃখ হ’লো !

সুশী। রান্নার চাকরী ছাড়িয়েছ বেস করেছ, কিন্তু দাদাকে ব’লে ক’ল্লেনা কেন ? বড় বৌ পাছে বেজার হন, সেই ভয়।

সর। তাঁরে না ব’লে কি ক’রেছি ? সেদিন রাত্রে বেস ক’রে বুঝিয়ে ব’ল্লেম, যে, নূতন ব্রাহ্মণীটী বড় ভাল, সে যে কাজ ক’র্তে এসেছে তার যোগ্য নয়—তার চেয়ে উঁচু লোক ;—তার এমন গুণ আছে—সে কারিকুরী গান বাজনা বেস জানে, আমার ইচ্ছে, তারে আর রাঁধুনী না রেখে আমার প্রিয়সঙ্গিনী করি।

সুশী। তাতে দাদা কি ব’ল্লেন ?



সর। তাঁর যেমন কথা জানই তো—

সুশী। হ্যাঁ! বুঝি! তিনি আর কি ব'লবেন? ব'ল্লেন;—“সরলার যায় মত শাস্তচৌধুরীর সাধ্য কি তায় অমত করেন?” কেমন এই না?

সর। ভেলা! ভেলা! ভেলা! অবাক ক'ল্লে' ভাই! ভা'য়ের ব'ন্ কিনা, সকল তাতেই রং! সে যা হ'ক্ গে, এস ভাই, আ'জ্ থেকে ব্রাহ্মণীকে নিয়ে আমোদ প্রমোদ গান বাজনা করা যা'ক্।

সুশী। তবে ডাকাও। তোমার নিজের বাঁধা এই গানটা দিয়েই শুরু করা যা'ক্। আগে তো প'ড়ে দেখি, গানটাই কি? (পাঠ)

চাতকিনীর আক্ষেপ গীত।

রাগিণী পিলুবারোঁয়া।—তাল টিমা তেতাল।

না চাহিতে নীর, অকালে উদয় কান্ত—নব নীরধর।

নিরথিয়ে চাতকিনীর প্রফুল্ল অন্তর ॥

প্রেমানন্দে চমকিত, আশাতে বিমোহিত,

সুখাবেশে সকম্পিত, অঙ্গ থর থর! ১ ॥

হেন কালে, হায়! হায়! প্রলয়-ঋতু-প্রায়,

প্রবল পবন তায়, করিল অন্তর! ২ ॥

এ গানের মানে তো বুঝ্লেমও বটে, বুঝ্লেমও না।

সর। যত দূর বুঝেছ, সেই ভাল!

সুশী। তা হবে না, ভেঙে ব'লতে হবে।

সর। লজ্জা করে যেণ!

সুশী। আমার কাছে তোমার লজ্জা! এই বুঝি ভালবাসা?

সর। তবে ব'লতেই হ'লো;—কা'ল্ রাত্রে, ভাই, এক কাণ্ড হ'য়ে গেছে;—কা'ল্ তো ও ঘরের পালা, আমি একা, তবু অনেক রা'ত্ পর্যন্ত ঘুমুইনি। যে কবিতাটা আগে প'ড়্লে, ঐটে লিখ্ছি ব'সে, এমন সময় বারাগুয় তাঁর মতন পার শব্দ শুনে চ'ম্কে উঠ্লেম। উঠে গিয়ে মাসীদে দেখি, তিনিই বটেন, এই ঘরের দিগেই আ'স্ছেন—

সুশী। তাই বুঝি—“না চাহিতে নীর, অকালে উদয় কান্ত নব নীরধর!”

সর। (সহাস্ত্রে) শেষটা শোনো আগে ;—দেখ্লেম, ঠিক যেন ঘুমুতে ঘুমুতে আ'স্ছেন !

সুশী। সাসীদে, রেতের বেলা, এত সূক্ষ্ম দৃষ্টি !

সর। বারাণ্ডায় সারি সারি লাঠন জ'ল্ছে, দেখ্‌বার ভাবনা কি ? দেখে, দৌড়ে দোর খুলতে যাই আর কি, এমন সময় দেখি, দিদী এসে তাঁর হাত ধ'রে ফিরিয়ে নে গেলেন ! ঠিক বুঝতে পা'ল্লে'ম না, রাগ ক'রে এসেছিলেন, কি লুকিয়ে আ'স্ছিলেন !

সুশী। রাগ ক'রেই আ'স্ছিলেন ।

সর। না, তা হ'লে হাত ধর'বামাত্রই যেতেন না—আমার বোধ হয় লুকিয়ে আসা ! তা দিদী খুব সজাগ্‌ কিনা, অগ্নি টের পেয়ে ধ'রে নে গেলেন । আহা ! না জানি তার পর কত গঞ্জনাই পেয়েছেন !

সুশী। তাই বুঝি “হেন কালে হায় হায়, প্রলয় ঋতু প্রায়, প্রবল পবন তায়, করিল অন্তর !” খাসা বেঁধেছ ।

সর। বা'ধ্লেম আর কি ভাই, ভাব দেখে ঐ ভাবের কথা আপনিই এসে যোগালো, লিখে রাখ্লেম । সকাল বেলা চন্দ্র দেখতে পেয়ে একটা সুরের সঙ্গে মিল্‌ জুল ক'রে নে গাইলে ।

সুশী। ব্রাহ্মণীর নাম বুঝি চন্দ্রমণি ?

সর। না চন্দ্রকলা ।

সুশী। ও বুঝি লেখাপড়াও জানে ?

সর। বেস জানে ।

সুশী। তাই তো ভাই, চন্দ্রকলা যে যথার্থ ই শুক্লপক্ষের চন্দ্রকলার মত দিন দিন আমাদের কাছে বা'ড়্‌তে লা'গ্‌লো !

সর। আমি তারে কা'ল্‌ অবধি চন্দ্রদিদী ব'লে ডা'ক্‌ছি ।

সুশী। তবে তো দাদার আবার পালা খাটনী বেড়ে গেল !

সর। কেন ব'ন্‌, তোমাকেও তো দুসন্ধ্যা দিদী আর ব'ন্‌ ব'লে থাকি, তাতে যদি তাঁর পালা খাটা বেড়ে থাকে, তবে এতেও বা'ড়্‌বে !

সুশী। এবার ভাই আপনার কথায় আপনিই ঠকেছি—আপনিই স্বীকার ক'র্ছি, হেরে গেলেম—ভাল এর শোধ নেব !

সর। ঐ আমার চন্দ্রদিদী আ'স্ছেন—

সুশী। আমিও তবে দিদী ব'লে ডা'ক্‌বো ।

[ চন্দ্রকলার প্রবেশ ]

এস, দিদি এস। ( উঠিয়া হস্তধারণ )

সর। এস দিদি এস, তোমায় দেখলেই প্রাণ যুড়োয় !

চন্দ্র। ( স্বগত ) আ! এ আহ্লাদ রাখি কোথা !

সুশী। ও কি ? চ'কে জল ?

চন্দ্র। ( অশ্রু মুছিয়া ) না দিদি, তা নয়, এ আহ্লাদের জল !

সুশী। ( সরলার প্রতি ) ও কি ? তোমার চ'কুও যে ছল ছল ?

সর। কারোর আহ্লাদ দেখলে কি আহ্লাদ হয় না ?

সুশী। চন্দ্র দিদি ! ওসব কথা থা'ক, এই গানটা ভাই আগে গাও তো। ( পুস্তক দান এবং চন্দ্রকলা কর্তৃক ঐ গীত গাওয়া )

[ গান সমাপ্তি কালে নটবরের প্রবেশ ]

নট। বা! বা! বেস হ'চ্ছে! কি আশ্চজ্জি! মেয়ে মা'ন্সে গান গা'চ্ছে!

সুশী। ( জনাস্তিকে ) এই এলেন হাড় জা'লাতে।

সর। কেন ঠাকুরজামাই, এতে আর দোষ কি ?

নট। দোষ কি ? তবে যাও বুমুরের দল কর গে!

সর। বুমুর কি ঠাকুরজামাই ?

নট। তাও আ'জো জান না? তবে দেখ, ( উরুদেশের দুই পার্শ্বে চাপড়-বাঁচপূর্বক ) এই বাঁ, বাঁ, ব্যানর, ব্যানর, ব্যানর, ব্যানর বাঁ! ব্যানর ব্যানর বাঁ! ব্যানর ব্যানর বাঁ! এম্মি ক'রে বাগ্‌দী খুলী খোল বাজাবে, তোমরা সেই সঙ্গে তালে তালে না'চবে, আর এম্মি ক'রে চিতেন মা'র্কে;—( দক্ষিণ বাহু উর্দ্ধে তুলিয়া উঠে:স্বরে )

“আমার ভাগ্যে ওমা দুগগে জেগে ঘুমিও না!”

“কিস্ কিসিন্দে কিসের কথা, আর কথা মনে এলো না।”

( মুখে অঞ্চল দানপূর্বক সরলা ও চন্দ্রকলার হাস্য )

সুশী। ছি, ছি, ছি, গলায় দড়ি! গলায় দড়ি!

সর। ছি ঠাকুরজামাই! আমাদের কাছে কি অমন ক'রে অসভ্যতা ক'র্তে হয় ?

নট । এ কি অসভ্যতা ? তবে রসিকতা করে বল ? আমি যার এই সব রকম সকম দেখিয়ে নোকণুনোকে হাসিয়ে মারি ; এই সব রকমে আড্ডায় কত বাহবা পাই—আমায় যার তারা “রসিক নটবর” ব’লে ডাকে !

সর । তুমি আর আড্ডায় মাড্ডায় যেও না মেনে ।

নট । যাব না তো কোথায় যাব—বেশ্মসভায় যাব বুঝি ? হা ! হা ! হা !

সর । তাই তো প্রার্থনা !

নট । বেশ ব’লেছ ! তোমার কথায় বাপ পিতোমোর নাম ডুবুই—বাম্‌নাই ছেড়ে মোগ্লাই ধরি—তা হ’লেই হয় আর কি ?

সর । এতে যে তোমার নিন্দে হয় ।

নট । নিন্দে করে কে ?

সর । সকলেই করে—ঠাকুরঝিও কত কাঁদে ।

নট । উনি এম্মি নেমোখারামই বটে ; আমি নাকি বিষ্ণুঠাকুরের সন্তান হ’য়ে কুল ভেঙে গুঁরে বে ক’রেছি, আর গুঁর জন্তে নাকি কত নোকের কত সাধা পাড়াতেও আর বে কল্লুম না, তাই গুঁর এত গ্যাঁদা ! তবে দেখবে মজা—দেখবে একবার বেরিয়ে গে কটা বে ক’রে আসতে পারি ?

সর । না, না, আমার মাথা খাও, ও কথাটা ব’লো না । ঠাকুরঝি তোমায় যে ভালবাসে, তাতে কি আর ও নাম ক’র্তে আছে ?

নট । ( সহাস্তে ) তা অধ’শ্বে কথা ব’লবো না—সেবা ভক্তিটা করে বটে !

সর । তবে ?

নট । তা, আমি বুঝি ভালবাসিনে ?

সর । তুমি যদি ভালবা’সতে, তা হ’লে গুঁর কথাও শুন্তে ।

নট । আবার কেমন ক’রে শুন্তে হয় ? গুঁর কথাতেই তো দিনের বেলা এত হাই ওঠে, তবু যাইনে !

সর । শুধু হাই—আবার না কি ঝিমোও ?

নট । তা একটু ঘুমবো না—রেতে জাগবো, দিনেও জাগবো ?

সর । রেতেই বা জাগ কেন ? না বেকলেই তো হয় ?

নট । আমি তো ঠাঁর দাদার গমস্তা নই, যে, এত নিকেশ দেব ! আমার খুসি !—উঃ ! কি আশ্লাদ রে ! দিনে থাক, আবার রোতে থাক—পায়ের ঘুমুর হ'য়ে থাক—তোড় জোড় হ'য়ে থাক—চাটি খেতে দেন ব'লে একেবারে গোলাম হ'য়ে থাক ! আমি যেমন একটীকে নে আছি, কুলীনের ছেলে হ'য়ে এমন কোন্ শালা থাকে বল দেখি ?—তারে শালা ব'লে ব'লছি—সাত বছরে শবুর-বাড়ী একবার মাড়ায় না !

সর । ঠাকুরজামাই ! রাগ ক'রো না, আমি ভাল ভেবেই ব'লছি—ঠাকুরঝিও তোমার ভালর জন্তে বলে । এই দেখ দেখি সে দিন কাঁচের গ্লাসের উপর প'ড়ে গে, গা কেটে সারা হ'লে ! আহা ! স্বামীর এ দশা দেখেও কি স্ত্রীর মনে দুঃখ হয় না গা ? স্বামী যে কি পদার্থ, তা সাধ্বী স্ত্রী বৈ আর কে জা'নবে ?

নট । ছোট বোঁ ! আমি তোমায় ভালবাসি ব'লেই এত বরদাস্ত ক'চ্ছি ; নইলে বিষ্ণুঠাকুরের সন্তান নটবর মুখুয্যেকে এমন শক্ত শক্ত কথা বলে কার সাধ্যি ?

সর । কেন, আমি তোমাকে কি শক্ত কথা ব'ল্লেম ?

নট । ব'ল্লেনা ? “মাগের পদাত্ত” ব'লে, আবার শক্ত কথা করে বলে ? আমি যেন “বোদোদয়” বই পড়িনি, যে, “পদাত্ত” কাকে বলে বুজতে পারিনে !

সর । করে বলে বল দেখি ?

নট । কেন, জন্তকে বলে—তবে বুঝি আমি তোমার ঠাকুরঝির জন্ত ?

সর । ( স্বগত ) বড় মিছেও নয় ! ( প্রকাশে ) তা হ'লেই বা—আর কারুর তো নও—শয্যাগুরু, তায় দোষ কি ?

নট । ছি ! ছি ! আর তোমার সঙ্গে কথা কব না ; আবার তুমি ওরে আমার “গুরু” ক'রে দিচ্ছ ? ও গুরুনোক, না আমি গুরুনোক ? এই বুঝি তোমার বিদ্যে হ'য়েছে—ইহঁতিই বুঝি সবাই তোমায় ভাল বলে !

সর । ( মহাশ্বে ) ঠাকুরজামাই ! রাগ ক'রো না, আমি তামাসা ক'চ্ছি ! তোমার সঙ্গে যে আমার ঠাট্টা করবার সম্পর্ক, তা কি জান না ?

নট । তবে আমিও ঠাট্টা করি ?

সর। কর না কেন ?—আমাদের কথায় কে না আমোদ করে ?

সুশী। ( জনাস্তিকে ) ওরে না না ! এখনি কি ব'লতে কি ব'লে ফেলবে !

সর। ( জনাস্তিকে ) কি বলে, শোনাই যা'ক না।

নট। আ ! ছোট বোর কি মিষ্টি কথা—যেন গোলাপী জাহ্ন ! সেই জাহ্ন দে, ঠাট্টার খোলায় কড়া কড়া ক'রে আমায় ভা'জছেন, তবে তো মজা “গুলি” পা'চ্ছেন ! ( সকলের হাস্য )

সুশী। ছি ! ছি ! ছি !

সর। ( জনাস্তিকে ) এ কথা উড়িয়ে দিই। ( নটবরের প্রতি ) ভাল ঠাকুরজামাই ! তুমি ছেলেমানুষ নও—এত বড় সোমত্ব মিন্বে—তবে কেমন ক'রে সে দিন প'ড়ে গেলে ?

নট। কেমন ক'রে দেখবে ? এই এম্মি ক'রে, উবু হ'য়ে খাটের ওপর ব'সে তামাক খাচ্ছি আর ঝিমুচ্ছি ; ঝিমুতে ঝিমুতে বাঞ্চ মাথাটা ঝুঁকে ঝুঁকে এত নীচে প'ড়ে গেল, যে, আর সামলাতে পারলুম না, একেবারে এমিন্ ধারা ( প্রদর্শন ) ডিগ্বাজি খেয়ে উন্টে প'ড়ে গেলুম।

সুশী। ছোট বো ! আমি আর সহিতে পারিনে—আর আমি এখানে থা'ক্কে চাইনে—

[ টাপার প্রবেশ ]

টাপা। ছোট মা ! এখানে রঙ্গ ক'চ্ছো কি ? বাবুর ভারি ব্যামো হ'য়েছে—কা'ল রা'ত্ থেকে মাথার কামড়ে একেবারে খুন হ'য়ে যা'চ্ছেন—কত ডাক্তার, কত ক'ব্রেজ আ'স্ছে ; দেওয়ানজী আর সদারং বাবু কত অবুদ খাওয়াচ্ছেন—কত বেলেক্তারা দিচ্ছেন, কিছুতেই কিছু হ'চ্ছে না।

সর। সে কি ?—( দ্রুত প্রশ্ন )

[ সকলের প্রশ্নান।

( পটক্ষেপণ )



# নয়শো রূপেয়া

[ শিশিরকুমার ঘোষ ]

প্রথম অঙ্ক

প্রথম গর্তাঙ্ক ।

রামধন মজুমদারের বাটী । রঞ্জন আসীন ।

রঞ্জন । সরলা ! সরলা ! বাহিরে এসো । সরলা ! সরলা ! ( সরলার বাহিরে আগমন । ) এখন আর তোমাকে দশবার না ডাকিলে পাওয়া যায় না । হয়েছে কি ?

সরলা । কম্ফর্টার বুনিতে শিখে কি হবে ? আমাকে পিরাণ শেলাই করিতে শিখাও ।

রঞ্জন । তুমিত বল্লে শিখাও, আমি নিজ্জে আগে শিখি ।

সরলা । ছোটকাকা বল্লেন যে ও সমুদায় বিলাতি সামগ্রী শিখিয়া কি হবে ? পিরাণ শিদ্ধাইতে শিখিলে কাজে লাগিবে ।

রঞ্জন । সে ঠিক কথা । আচ্ছা তোমাকে শিখাইতে আমি শিখিব । আমি দু এক দিনের মধ্যেই যাইব । তাই তোমাকে পড়া দিয়া যাব ।

সরলা । কেন, তুমি কোথায় যাবে ? আমার বড় শিখিতে ইচ্ছা করে ।

রঞ্জন । আমারও তোমাকে বড় শিখাইতে ইচ্ছা করে । দেখ না, আমার আর কোন কাজ নাই । তোমার যে বয়স ইহাতে তুমি যাহা শিখিয়াছ সেই খুব আশ্চর্য্য । আমার জীবনের সাধ যে তোমাকে পৃথিবীর মধ্যে সর্বাপেক্ষা ভাল করিব ।

সরলা । তা পারবে না, পারবে না । দেখ, শশীর মা আমার চেয়ে কত বেশী জানেন । সব শব্দ কথার মানে বলতে পারেন ।

রঞ্জন । কিন্তু তিনি তোমা চেয়ে কত বড় । আমি আরো তোমাকে পড়াইতে পারি, কিন্তু তুমি এখন বড় হয়েছে যেন লজ্জা লজ্জা করে ।

সরলা । রঞ্জন দাদা, ঠিক কথা, আমারও এখন আস্তে কেমন ধারা করে ।

রঞ্জন। আমি যে তোমাকে এরূপ করে পড়াই, ইহাতে তোমার মা বাপ  
ত মনে মনে রাগ করেন না ?

সরলা। ছোটকাকার ইচ্ছা আমি খুব লেখাপড়া শিখি। আর তিনি  
বাবাকে বুঝান যে আমি লেখাপড়া শিখিলে তাঁর ভাল হবে।

রঞ্জন। অর্থাৎ তোমাকে খুব অধিক দরে বিক্রি করিতে পারিবেন ?  
সরলা, আমি চলিলাম। আমি বড় দুঃখে, আমি তোমাকে যেমন  
পড়াইতেছি এমনি চিরকাল পড়াতে পারি তবে আমার দুঃখ  
যায়।

সরলা। তুমি কবে আসিবে ?

রঞ্জন। তা বলিতে পারি না, শ্রীভগবান জানেন। আমি গেলে তুমি  
কি পড়িবে ?

সরলা। ঠাকুর পূজা করিব।

রঞ্জন। তোমার সেই চিত্রপট ?

সরলা। তারে চিত্রপট বলা না। তিনি কেমন চেয়ে থাকেন, যেন  
হাসেন।

রঞ্জন। আচ্ছা, তুমি কিরূপে পূজা কর বল দেখি ?

সরলা। তা বলবো কেন ?

রঞ্জন। তবু শুনি ? চুপ করলে যে, বল না ?

সরলা। পূজা কি আমি জানি ? শঙ্খ বাজাই, ঘণ্টা বাজাই, আর ফুল  
দেই, আর প্রণাম করি।

রঞ্জন। দেখ তুমি পূজা করিতে ভাল বাসো জানিয়া আমি তোমার জন্তে  
একটা স্তব লিখিয়া আনিয়াছি, ইহাই পড়িয়া পূজা করিও।

সরলা। কই দেখি।

( স্তব হস্তে প্রদান ও সরলা পড়িতে উচ্চত। )

রঞ্জন। এখন উহা পড়ো না, বেশ স্পষ্ট করিয়া লেখা, পূজার সময়  
ভক্তিপূর্বক পাঠ করিও। আচ্ছা তুমি যে এরূপ আপন মনে  
বেড়াইয়া বেড়াও, কাজ কর্ম কর না, ইহাতে তোমার মা বাপ  
বকেন না ?

সরলা। কিছু বলেন না, কেবল রোদ না লাগাই, আর আমার বর্ণ ময়লা  
না করি, তাই শাসন করেন। ঐ ছোটকাকা আসছেন।

( গাঁজার হাঁকা হাতে সাতুলালের প্রবেশ । )

সাতু । ( স্বগত ) লব্ কচ্ছো, বেশ ! বেশ ! বেশ ! একটা নায়ক ও নায়িকা হলো, এখন দিব্য একখানা নাটক হয় । ( প্রকাশ্যে ) বলি রঞ্জন মেয়েদের লেখাপড়া শিখাইয়া কি লাভ হয় ?

রঞ্জন । বলবো ? রাগ করবেন না ত ?

সাতুলাল । বলো না বাবা, আমার কি রাগ আছে, আমি আমার পঞ্চেন্দ্রিয় শ্রীমতী গঞ্জিকাদেবীর পাদপদ্মে বলিদান করিয়াছি ।

রঞ্জন । আর একটা কথা বলবো ?

সাতু । বলো না ।

রঞ্জন । আপনি গাঁজা খান কেন ?

সাতু । গাঁ—জা—খা—ই—কে—ন ? এ বিষম সমস্যা । খাবো না কেন ? গাঁজা খেয়ে বেশ আছে । তোমরা আমাকে ঘৃণা কর, তায় কি ? আমি তোমাদের ভক্তি করি । হি ! হি ! গাঁজা খাই বলে বেঠিক পাবে না, বাবা । আমার রাগ নাই, ঘেঁষ নাই, মিথ্যা কথা বলি না, কাহাকে যন্ত্রণা দিই না, সাধ্যমত লোকের উপকার করি, খেলাম বা একটু গাঁজা ? এখন বল বাপ, মেয়েরা লেখাপড়া শিখলে কি হয় ?

রঞ্জন । মেয়েরা লেখাপড়া শিখিলে অবিক দরে বিক্রী হয় ।

সাতু । হি ! হি ! হি ! বুঝলেম্, তা তোমার এই ঠেশ বাক্যের পরিশোধ আমি লইব । শুন রঞ্জন, আমি প্রচারক হইব ।

রঞ্জন । কি প্রচারক ? ব্রাহ্ম প্রচারক ?

সাতু । তা না, আমি “ব্রাহ্মণবংশ অধঃপতন” এই ধূয়া তুলিয়া দেশে দেশে বেড়াইব । কিন্তু ছুঃখের মধ্যে আমার বক্তৃতা আইসে না ।

রঞ্জন । অভ্যাস করুন, ক্রমে পারিবেন ।

সাতু । উত্তম পরামর্শ, তবে এখনই অভ্যাস করি । তোমরা আমার শ্রোতা হও, আর আমি বক্তৃতা আরম্ভ করি । ( কয়েক খান ইষ্টক সাজাইয়া তাহার উপর দণ্ডায়মান হইয়া হস্ত তুলিয়া ) হে বন্ধুগণ ! হে ভ্রাতৃগণ ! হে—( সরলার গমনোচ্চোগ ) সরলা, যাইন্ না, দাঁড়াইয়া শোন্ । আর যেখানে আমার কথা ভাল লাগে সেখানে আনন্দধ্বনি কর্বি, অর্থাৎ হাতে মুহুমুহ তালি দিবি । হে

ব্রাহ্মণগণ ! তোমরা গেলে, গেলে, গেলে । কোথা গেলে ? মন্দির  
না ; কাশীতে না ; বৃন্দাবনে না ; তবে—তবে—

রঞ্জন । অধঃপাতে ।

সাতু । ঠিক ! অধঃপাতে । তোমাদের এদিকে মেয়ের বিয়া হয় না,  
এদিকে ছেলের বিয়ে হয় না, তবে ব্রাহ্মণবংশ রক্ষা পাবে কি  
করে ? ( রঞ্জনের করতালি । ) অতএব হে ব্রাহ্মণগণ ! ধিক !  
শত ধিক—( ইষ্টক সরিয়া সাতুলালের মূর্তিকায় পতন, এবং রঞ্জন  
সাতুলালকে ধরিয়া উত্তোলন । ) বাপ্‌রে মলুম, হে ঈশ্বর !  
আমার পরমাত্মা গ্রহণ কর ।

রঞ্জন । আপনার কি অন্তিমকাল উপস্থিত ? ঈশ্বরকে আত্মসমর্পণ  
করিতেছেন ? অতঃ এই পর্য্যন্ত থাক । সাতু ( মাঝা ধরিয়া উঠিয়া )  
বাপ্‌রে, প্রথম বক্তৃতায় মাঝা ভাঙ্গিয়া গেল । শুন রঞ্জন, তোমার  
চারি মামাকে আমার এই সভার সভ্য করিতে হইবে ।

রঞ্জন । কোন্ সভা ।

সাতু । এই যে বল্লেম, ব্রাহ্মণ পতিত উদ্ধারিণী সভা ।

রঞ্জন । পতিত উদ্ধারিণী সভা নয়, “ব্রাহ্মণবংশ অধঃপতন” ।

সাতু । ঠিক । তোমার চারি মামাই বেশ সভ্য হইবার উপযুক্ত ।

[ সকলের প্রস্থান ।

## দ্বিতীয় গর্ভাঙ্ক ।

সরলার পূজার স্থান । সম্মুখে শ্রীকৃষ্ণের চিত্রপট, এবং ফুল,  
চন্দন, শঙ্খ, ঘণ্টা, ফুলের মালা প্রভৃতি পূজার সজ্জা ।

( সরলা যোগাসনে আসীন । )

সরলা । কৃষ্ণকৃষ্ণ, হরেকৃষ্ণ ( প্রণাম ) । কৃষ্ণকৃষ্ণ, হরেকৃষ্ণ ( ফুল প্রদান,  
শঙ্খ লইয়া বাজ ) । ( করযোড়ে ) কৃষ্ণকৃষ্ণ হরেকৃষ্ণ । ঠাকুর,  
আমি পূজা জানি না । ভাল কথা, সেই স্তব ত পড়িতে হইবে ।  
( স্তব সম্মুখে রাখিয়া পাঠকরণ । )

হে কৃষ্ণ করুণাময় কৃপা কর মোরে ।  
 অবোধ বালিকা তোমায় ডাকিছে কাতরে ॥  
 নাহি জানি তত্ত্ব মন্ত সাধন ভজন ।  
 নিজগুণে দাও প্রভু ও রাজ্য চরণ ॥  
 ধ্রুবকে করিলে কৃপা বালক বলিয়া ।  
 আমাকে করহ কৃপা বালিকা জানিয়া ॥  
 একেত বালিকা পরাধীন নারী জাতি ।  
 তোমা বিনা কে রক্ষিবে হে গোলকপতি ॥  
 সৎপাত্র হস্তে অর্পণ কর দীনবন্ধু ।

( লজ্জায় ব্যস্তপূর্বক কাগজ উন্টাইয়া রাখা । একটু পরে আবার  
 স্তব পড়িতে চেষ্টা, কিন্তু আবার লজ্জায় অভিভূত । )

( নেপথ্যে ) সরলা ! সরলা !

সরলা । কি, মা ডাকছো ?

সরলার মা । এ দিকে আয় ।

সরলা । আমি যেতে পারি না, আমি পূজা করছি । মা তুমি একটু  
 এসো না ।

( সরলার মার প্রবেশ । )

সরলার মা । বা, এ যে বেশ পূজা হচ্ছে ! তোর ঠাকুরকে দেখে যে ভক্তি  
 হয়, আমার প্রণাম করতে ইচ্ছা কোরছে । ও মা, তুই কাদছিস্  
 না কি ?

সরলা । কৈ, না মা । , মা, তুমি একটু বাঁজ বাজাও, আমি শঙ্খ ও ঘণ্টা  
 বাজাই । ( সরলার মার বাঁজ বাজন ও সরলার শঙ্খ ও ঘণ্টা  
 বাজন । )

সরলার মা । ( বাঁজ রাখিয়া ঠাকুরকে প্রণাম । ) ঠাকুর ! তুমি সরলাকে  
 সৎপাত্র সমর্পণ কর । ঠাকুর ! আমার সরলা নিতান্ত সরলা ।  
 আমার সরলাকে তুমি ভাল ঘর বর জুটাইয়া দাও । সরলা, তুই  
 ঠাকুরকে ফুল দে, আর বল যে, “ঠাকুর ! আমাকে ভাল ঘর  
 বর দেও ।”

সরলা । ( স্বগত ) তোমারও ঐ কথা । ( প্রকাশ্যে ) মা, ঐ দেখ,

ঠাকুর হাসছেন ; ঐ দেখ, আমি সত্যি বলছি ; ঐ দেখ মা, ঠাকুর  
আমার দিকে চেয়ে আছেন ; ঐ দেখ, ঠাকুর যেন কি বলছেন ।

( উভয়ের গলায় বসনে প্রণাম । )

[ যবনিকা পতন ।

### তৃতীয় গর্ভাঙ্ক ।

রামধন মজুমদারের বাটী । রামধন তামাক সেবন অবস্থায় আসীন ।

( হলধর মুখুয্যের প্রবেশ । )

হলধর । রামধন মজুমদারের এই বাড়ী ?

রামধন । হাঁ, আসুন, কোথেকে আসছেন ?

হল । বলছি । ( উপবেশন ) নমস্কার ! আমার নিবাস বনগ্রাম ।

রাম । ( ছ'কা হস্তে প্রদান করিয়া ) তামাক ইচ্ছা করুন । নমস্কার !

হল । আপনার একটি বয়স্থা অবিবাহিতা কণ্ঠা আছে না ?

রাম । আছে ।

হল । সম্বন্ধ কি স্থির হয়েছে ?

রাম । হচ্চে যাচ্ছে ওর ঠিক কি । কিন্তু কোথাও এখন স্থির হয় নাই ।

হল । আমি একটি সম্বন্ধ এনেছি ।

রাম । কত টাকা ?

হল । কত টাকা ! আগে ঘর বর কেমন, তা শুনুন ।

রাম । ঘর বর ভাল হয়, তাতে আমার কিছু মাত্র আপত্তি নাই । কিন্তু  
আপনি কত টাকা দিতে পারবেন ?

হল । ঘর বর ভাল হওয়াকে কি আপনি দুর্ভাগ্য মনে করেন ? আপনি  
বলিতেছেন “আপত্তি নাই”, ইহার মানে কি ?

হল । কথা কি, আগে টাকা, তাহার পরে অন্য কথা । মেয়ের বিবাহের  
নিমিত্ত কচ্কটী করে করে ত্যক্ত বিরক্ত হয়েছি । টাকার কথা  
ঠিক হলে পরে আর আর কথা ।

হল । আপনি চান্ কত ?

রাম । আমার মেয়ের বয়স্ এই ষোল বছর । দেখতে সুশ্রী, তা দেখে



নেবেন্। তা, এই সকাল বেলা আপনাকে আর দর না বলে ঠিক কথা বলে দিচ্ছি। ১২ শ বলি আর ১৫ শ বলি, হাজার টাকার কমে আমি মেয়ে ছাড়ব না।

হল। হাজার টাকা!

রাম। হাঁ, হাজার টাকা, চম্কে গেলে যে? প্রতাপকাটার মুখুয়োরা ৭৩০ টাকা বলে গেছেন, আমি তাতে মেয়ে ছাড়িনি। এই গ্রামের বড় মুখুয়ো ৮০০ টাকা দিতে চেয়েছেন, তাতেও মেয়ে দিইনি; হাজার টাকার কমে যে ছাড়ব না, তাহা স্থিরই আছে।

হল। কিছু কমাবেন না?

রাম। কিছু না।

হল। দুই একশো?

রাম। কত বার বল্‌ব, আমি হাজার টাকার এক পয়সা কমে ছাড়ব না। যে আসে সেই বলে কমাও। বাড়াও এ কথা কেউ বলে না। এ রাজ্যের ধারাই এইরূপ।

হল। আপনার এ কেমন ধারা পণ? হাজার টাকার কমে ছাড়বেন না। এমন ঘর বর দেখেও কি কিছু বিবেচনা করবেন না? আমি যে ঘরে সম্বন্ধের কথা বলছি, এ বড় মানুষের ঘর, এক দিন্কার কথা নয় সেই ঘরে মেয়ের বে দিলে চিরকাল প্রতিপালন হতে পারবেন, এটা বুঝছেন না?

রাম। আমি ও সব বুঝি না। যেমন মাল তেমনি দাম। দাম ফেল মাল লও, আমার কাছে স্পষ্ট কথা। হাজার টাকা যে বলেছি সে দর বলিনি, খাঁটি দাম বলেছি। হাজার টাকার এক পয়সা কমে ছাড়বো না।

হল। কেমন ঘর তা আগে শুনু। শত্ৰু মুখোপাধ্যায়ের—

রাম। আপনার অত কষ্ট নিতে হবে না, যেখানে আসল কথার সাব্যস্ত হল না, সেখানে আর ঘর বরের কথা শুনে কি হবে।

হল। পাত্রটির বয়স সবে এই কুড়ি বৎসর, দেখতে—

রাম। আমার তাতে কিছু আপত্তি নাই।

হল। দেখতে দিব্য স্ত্রী, গৌরবর্ণ—

রাম। আমার তাতেও কিছু মাত্র আপত্তি নাই।

হল। আবার লেখাপড়ায় বেশ তৎপর, ইংরেজি বাঙ্গলায়—

রাম। বেশ, আমার তাতেও কিছু মাত্র আপত্তি নাই। হাজার টাকা ত দিতে পারবে ?

হল। ( স্বগত ) বেটা বলে কি ! বলে আমার আপত্তি নাই। এমন পাষণ্ড ত কখন দেখি নাই ! টাকা ছাড়া এ আর কিছু বুঝে না। এ কাজ হইবার নয়, কিন্তু বেটা যেমন পাজি, তেমনি গোটা কয়েক কথা শুনিয়া দে যাই। ( প্রকাশে ) হাজার টাকার কমে কি ছাড়বেন না ?

রাম। না, না, না।

হল। বলি, মাল মাচ্চা ত ?

রাম। তাতো বলছি, দেখে নাও।

হল। মাল কিন্বার আগে কিন্তু মাচ্চা কি বুটো বাজিয়ে নেবো।

রাম। হাজার টাকা দিতে পারবে ?

হল। আর একটা কথা, মাল তাজা আছে ত ? বাসি ত না ?

রাম। তাজা বাসি কি ? আপনি দেখে নিন্।

হল। কেমন মাল, লাট দাগি হয়নি ত ?

রাম। ঠাট্টা করছো নাকি ? লাট দাগি আবার কি ?

হল। রাগ করেন কেন, হাজার টাকার জিনিস, দেখে শুনে নিতে হয় না ?

রাম। তাতো বলছি দেখে নাও।

হল। জাঁকড় রেখে দিতে পারবেন ত ? এত টাকা দিয়া মাল খরিদ কোরে শেষে যদি না মুনাসেফ হয়, আর তখন আপনি বলবেন যে, মাল লাট কোরেছ ফেরত নেবো না।

রাম। যা যা, ঠাট্টা যুড়ে দিয়েছে।

হল। আপনি কটু বলে খন্দের বিগড়ে দিচ্ছেন, আপনি ত ব্যবসা বুঝেন না, মাল বেচবেন কেমন করে ? এর পর ও পচা সড়া মাল নেবে কে ?

রাম। নেবে কে ! বেটা পাজি, নেবে কে ! পড়তে পার না তা নেবে কে ? ভাত ছড়ালে আবার কাকের অভাব ! যদি ৮০০ টাকায় ছাড়ি, এখনি লোকে তিল তিল করে নে যাবে ; মাল নেবে কে !

কথাটা শুন্লে ? বাড়ীর উপর বসে বেটা মর্যাস্তিক কথা বলে, বলে নেবে কে । পাজি বেটা নেবে তোরা বাবা । নেবে কে !  
হল । ( গাত্রোখান করিয়া ) আট শ টাকা দর হয়ে গেছে, আচ্ছা আর  
বিশ টাকা পাবেন, এখন মালটা ছাড়ুংগে ।

রাম । কত ?

হল । বিশ টাকা ।

রাম । বিশ টাকা ! বেটার কি নজর রে, আমার নবাবপুত্র এলেন ।  
নেবে কে !

হল । এই কথাটাই বুঝি মর্যাস্তিক হয়েছে ? নমস্কার, তুমি বেচ বোসে,  
যে মাল তা খরিদারের অভাব কি ?

[ প্রস্থান ।

( সাতুলালের প্রবেশ । )

সাতু । দাদা, কেবল সম্বন্ধ ফিরাচ্চ, তারপরে ?

রামধন । তারপরে কি রে ?

সাতু । মেয়ের বয়স ষোল বৎসর, কবে লব্ হয়ে যাবে, আর গাঙগোলে  
পড়বে ।

রামধন । লব্ কি রে বানর ?

সাতু । হি ! হি ! হি ! দাদা লব্ করে বলে জানেন না, তা তুমি  
নবেল পড়নি, তোমার অপরাধ কি । আচ্ছা, রঞ্জনের সঙ্গে বে  
দিলে হয় না ?

রামধন । সে টাকা পাবে কোথা ?

সাতু । টাকা নিয়ে কি করবে ?

রামধন । তোর বে দেব ।

সাতু । আমি বে করতে চাহি না । আমি শ্রীমতী গঞ্জিকাদেবীর পাণি-  
গ্রহণ করেছি । দাদা, বেয়াদবী করলেম, রাগ করো না ।

রামধন । যা, যা, বাঁদরামি করিস্ নে ।

সাতু । আমাদের যে কিছু ব্রহ্মোত্তর ছিল, তাহা বেচিয়া বিবাহ করিলে ।  
তুমি বলেছিলে তোমার মেয়ে হইলে তাহাকে বেচিয়া আমার  
বে দিবে । তোমার ও আমার অতীব সৌভাগ্যক্রমে তোমার

একটা দিব্য স্ত্রী কন্যারত্ন হয়েছেন। আমি এখন তোমার প্রতিজ্ঞা হইতে অব্যাহতি দিলাম। তুমি রঞ্জনের সহিত মেয়ের বিবাহ দাও, আমি স্বচ্ছন্দে সজ্জানে তোমাকে অনুমতি দিলাম।

রামধন। গাঁজা খেয়ে খেয়ে ভায়ার বুদ্ধি ক্রমেই ফুটিতেছে। হাজার টাকার মেয়েটী এমনি ছেড়ে দি! কি বুদ্ধি!

সাতু। গাঁজা খেয়ে আমার বুদ্ধি ক্রমেই তীক্ষ্ণ হইতেছে। তাই আমার বুদ্ধি সূচ্যগ্র অপেক্ষা তীক্ষ্ণ, ক্ষুরধার হইতে খরতর। দাদা, যাই কর, এই গেঁজেলের কথা শেষে থাকবে, দেখিও। (গাঁজায় দোম।)

রামধন। যখনি মেয়ের সম্বন্ধ আসে, তখনি তুই বাধা দিতে আসিস্।

সাতু। দাদা, শুন আমি পরামর্শ দেই। মেয়েটাকে দাও, আমি কল্‌কাতায় নিয়া যাই। একটা বুড়ির মধ্যে বসাইয়া মাথায় করিয়া রাস্তায় রাস্তায় ডাকিয়া বেড়াইব। আমি বেশ ডাকিতে পারি। এই শুন,—“ভালে আম্-ম্-ম” “ভালে আম্-ম্-ম”।

রামধন। এই বুঝি দোম্ দিয়া মাতলামি আরম্ভ করলি?

সাতু। না দাদা, আর একটা শুন। “বোতল বিক্রি-ই-ই-ইয়া।” শুন দাদা, মেয়েটাকে মাথায় করিয়া রাস্তায় রাস্তায় “ভাল মেয়ে বিক্রিই ই-ইয়া” বলিয়া বেড়াইব। দেখ দেখি, আমি তোমাকে কেমন সুবিধা করে বিক্রি করে দেই। তুমি এক হাজার বল, আমি পাঁচ হাজার টাকায় বিক্রি করিব।

রামধন। তা নাকি আবার হয়! পাঁচ হাজার টাকা দিয়া কেহ কি মেয়ে কেনে?

সাতু। কেন দাদা, যদি একটা সোণার বেণের নজরে পড়ে যায়, তবে বিচিত্র কি?

রাম। তুই বলিস্ কি রে বানর? সোণার বেনেকে মেয়ে দিব কি করে?

সাতু। তাতে তোমার আপত্তি কি? তুমি ত বলে থাকো যে ঘর বর দেখিবার প্রয়োজন নাই।

রামধন। তুই কি অত বড় মেয়ে সরলাকে মাথায় করে নিয়ে যেতে পারিস্?

সাতু । না হয় একখানা গরুর গাড়িতে নিয়ে যাবো । সে ত আরো ভাল ।  
রামধন । ( স্বগত ) পাঁচ হাজার টাকা ! পোড়া দেশ, সমাজ ছরস্তু,  
স্ব ইচ্ছায় কিছু করিবার যো নাই । ( প্রকাশ্যে ) যা আর এ  
কথায় কাজ কি, যা হবে না তাহা লইয়া ভাবিলে কি হবে ?

সাতু । দাদার মন একেবারে নরম হয়ে গিয়াছে । দেখ দেখি গৌজেলের  
বুদ্ধি আছে কি না । এই সময় ডাকিতে অভ্যাস করি “মেয়ে  
বিক্রি—ই—ই—ই—য়া” “মেয়ে বিক্রি—ই—ই—ই য়া”, মেয়ে—  
রামধন । চুপ কর, চুপ কর, ঐ দেখ্ কারা আসছে ।

[ ববনিকা পতন ।

### চতুর্থ গর্ভাঙ্ক ।

গোপীমোহন ভট্টাচার্য্যের বাড়ীর দালান ।

বামার মা ও বামা আসীনা ।

বামার মা । ( বামাকে ধরিয়া ) চল্ মা ঘরে চল্, ছি ! অমন করো  
না । ও কিও, জামাই কি মনে কোরবেন ? এত দিন পরে  
এসেছেন । চল । যাবে না ? তুমি ত আর খুকি নও ? এখন  
কাচপণা জুড়ে দিলি ?

বামা । মা, আমার লজ্জা করে ।

বামার মা । তুমি ত আর ইচ্ছে করে যাচ্ছে না । যাও মা যাও, রাত্রি  
ডের হয়েছে ।

বামা । আমার মুখ দেখাতে লজ্জা করে ।

বামার মা । কেন মা, তুমি কি বিস্ত্রী ?

বামা । তা না মা ।

বামার মা । তবে কি ? বল, চুপ করে থাকলে যে ? মুখ দেখাতে  
লজ্জা করে কেন ?

বামা । মা—

বামার মা । বল, চুপ করলে কেন ?

বামা । আমার জন্তে সর্বস্ব গেছে । আমার জন্তে পথের ফকির  
হোয়েছে । ( অভিমানের সহিত ক্রন্দন । )

বামার মা। চুপ কর মা, ছি! কেঁদ না। তা বামুনের বে করতে  
গেলেই টাকা লাগে, তাকি স্খু জামাই বাবাজির লেগেছে?

বামা। মা, তাইতে আমার মুখ দেখাতে লজ্জা করে।

বামার মা। আমার বাপ ত অমনি করে আমাকে বেচে টাকা নিয়েছেন,  
তাতে ত আমার এক দিনও মুখ দেখাতে লজ্জা করে নি?  
তাইতে বোলতেম্, বামা, তুই পুঁথি পড়িস্নে। টাকা ত আর  
তুমি নাও নি, টাকা নিয়েছেন তোমার—

বামা। আবার বাবা রাগ করবেন।

বামার মা। তুমি ঘরে গেলে তিনি রাগ করবেন?

বামা। তা না, তিনি বোলে থাকেন যে বাকী টাকা বুঝে না পেলে  
আমাকে পাঠায়ে দেবেন না।

বামার মা। ও রাগ কোরে বলেন, আর তুমি তাই ধোরে বোসো।  
যাও মা ঘরে যাও, রাত ঢের হোয়েছে।

( বামার ঘরে প্রবেশ, বামার মার নিজ ঘরে প্রবেশ। )

( গোপীমোহনের প্রবেশ। )

গোপীমোহন। ব্রাহ্মণী, ব্রাহ্মণী, ( দুয়ারে আঘাত ) দুওর খোল।

বামার মা। কিও।

গোপী। বলে, কিও, দুওর খোল না। ( সজোরে দুয়ারে আঘাত ) শীঘ্র  
দুওর খোল, নির্বংশের বেটী, দেখ, এখনো খোলে না।

বামার মা। দাঁড়াও খুলছি।

গোপী। দাঁড়াও খুলছি, বড় আরাম করে শুয়ে আছেন, এদিকে যে  
সর্বনাশ উপস্থিত তা জানেন না। ওরে দুওর খোল, তোর  
বাপের মুখে গু, শীঘ্র দুওর খোল।

বামার মা। ( দ্বার খুলিয়া ) কি, বড় রাগ দেখছি যে? কথাটা কি?  
কথায় কথায় গালি দেও কেন?

গোপী। রাগ দেখছো বটে, বলি তোর হাতে এই ডাকাতি!

বামার মা। হয়েছে কি?

গোপী। হয়েছে কি! ( রাগ ভরে ) উত্তরের ঘরের দোর দেওয়া প্রদীপ  
জলছে কেন?



বামার মা। চুপ কর, আন্তে আন্তে ও ঘরে মেয়ে জামাই। বলি, হয়েছে কি ?

গোপী। ( ব্যঙ্গস্বরে ) জামাই !

বামার মা। হাঁ জামাই।

গোপী। ( ব্যঙ্গস্বরে ) জামাই !

বামার মা। হাঁ জামাই, তুমি ওরূপ কচ্ছো কেন ? বলি, হয়েছে কি ?

গোপী। হয়েছে তোমার মুণ্ড, আর আমার মুণ্ড, নির্বংশের বেটা।

আমার মাথাটা ভাল করে খাও। হা গুরু, এখন আমি করি কি !

বামার মা। বলি, হয়েছে কি ?

গোপী। তুই কার কথায় মেয়ে ঘরে যেতে দিলি ? আমি বাঁড়ুঘোদের বাড়ী বের সভায় গে দেখি বেটা বরযাত্র হয়ে এসেছে ; একটু পরে দেখি আর সেখানে নাই। তখনি আমার মনে ডেকে বলেছে, বেটা তলে তলে এই কাণ্ড করতে এসেছে।

বামার মা। তুমি হলে কি, ক্ষেপলে নাকি ? চুপ কর, চুপ কর, ছি ! ছি ! মেয়ে জামাই ঘরে গেলে, কি তুমি রাগ কর ?

গোপী। জ্যাখ, তোর অদৃষ্টে আজ বড় দুঃখ আছে। ব্যাটা আমার বাকি টাকাগুলি দিক্, দিয়ে আমার মেয়ে নিরে যা ইচ্ছে তাই করুক। বাকি টাকা দেবে না, বেটা শুতে এসেছে। তুই ত ষত নষ্টের মূল !

বামার মা। ওগো, চুপ কর, চুপ কর।

গোপী। বের সময় টাকা জুটাতে পারে না বলে ভদ্রতা করে বাড়ী বাগান বন্দক রেখে বে দিলাম, বেটা যো পেয়ে গেল, আর টাকাগুলো দিলে না। আরে লালিস কর্তে গেলাম, তা উকীল গুয়াটারা রহশ্বেই মত্ত, আমাকে তাড়িয়ে দিলে।

বামার মা। ও গো, চুপ কর, চুপ কর, তোমার টাকা পাবে। ও মা আমার কি হলো ! মিন্সে ক্ষেপেছ নাকি ? জামাই কি মনে করবেন ?

গোপী। রেখে দে তোর জামাই, জামাই। ও জামাই না আমার— আর বল্লম না। পণের টাকা দিতে পারে না, আমার জামাই।

ও আমার কিসের জামাই রে ? আমি ও মেয়ের ফের বে দেব ।  
আমার টাকা না দিলে আমার মেয়ে নিয়ে শুতে পারবে না ।

বামার মা । ও গো ক্ষমা দাও, এ রাতটা ষাউক, লোকে—

গোপী । তুই মার খেলি দেখছি । এ রাতটা ষাক, তবেই তোদের  
মনস্কামনা সিদ্ধি হবে, আর ও মেয়ে কে বে কোরবে ? তুই—

বামার মা । ওগো চুপ কর, লোকে হাসবে ।

গোপী । লোকে হাসবে, লোকে হাসতে কি আর বাকি আছে ? সকলি  
আমার মুখে মুৎছে । ও ব্যাটার দোম্বাজির কথা যে শুনে সেই  
আমার মুখে মুতে । রামকৃষ্ণ চক্রবর্তীর মেয়েটার দুই বার বে  
দিলে, দিয়ে টাকা নিলে, আমার এক বারের টাকা গুলাও  
ফাঁকিতে গেল । ( উচ্চৈঃস্বরে ) বেটা ছাখ্ ! এখনো ঘরে রয়েছে ।

বামার মা । তোমার পায়ে পড়ছি, ক্ষমা দাও । আমি কি খুন হয়ে  
মরবো ?

গোপী । ছেড়ে দে, নচ্ছার বেটি, কি আপদেই পলেম । ও মেয়ে নিয়ে  
শেষে আমি কি কোরব রে ? আমি যদি মেয়েটা এত দিন রেখে  
দিতাম, তবে এখন মেয়ের ঘেরূপ বাজার, অনায়াসে ৭৮শ টাকা  
পেতাম । আমি ও মেয়ের ফিরে বে দেব । আমার মেয়ের গায়ে  
হাত দিস্নে, আমি ও মেয়ের ফিরে বে দেব । বেরো বেটা,  
ঘরের থেকে বেরো । ( একটু অপেক্ষা করিয়া ) ছাখ্, এখন  
বেরল না ? বেরো, শীঘ্র বেরো, নইলে আমি দোর ভেঙ্গে ঘরে  
টুকে গর্দান দিয়া বের করবো এখন । ( একটু থামিয়া ) দেখেছ ?  
বড় আরাম পেয়েছে বুঝি, আর বের হতে চায় না । ওরে বামা !  
তুই নয় বেরো । আরে মেয়েটাও তেমনি, আর বুঝি দেরি সইল  
না, ওকে দেখে দৌড়ে গিয়ে পোড়েছেন, এখন বুঝি আর উঠতে  
ইচ্ছা কচ্ছে না । তোমার আর—এক আসছেন এই—( উত্তর  
গৃহাভিমুখে অগ্রসর ) বেরো, শীঘ্র বেরো । ঘরে না ঢুকলে বের  
হবে না দেখছি ।

বামার মা । ( বলপূর্বক ধারণ করিয়া ) করো কি, কোথা যাও ? একেবারে  
জাত্ গেল । আমি তোমাকে ছেড়ে দিব না ।

গোপী । ছেড়েদে, ছেড়েদে, হাত ভেঙ্গে গেল । সব নষ্ট হোয়ে গেল ।

( চীৎকার করিয়া ) ওরে বেটা বেরো, ওরে গুওটা বেরো, ওরে বামা তুই নয় বেরো, ওরে এই জন্তে কি তোরে প্রতিপালন করি? আরে কলিকাল, আমার একটা মেয়ে, সেও আমারে ত্যাগ করলে! এমন পোড়া পাড়ার লোকও দেখি নাই। ডাকাত পোলেও কেউ কারুর তল্লাস নেয় না। এক জন বা আসে। ওরে তোরা আয়রে। ও—ও—ও রাম কুমার দা—দা—আ! ও—ও—ও রাম কুমার দাদা—আ—আ—

( সাতুলালের প্রবেশ। )

সাতু। কি গো গোপীমোহন দাদা, ব্যাপার কি?

( গোপীমোহনের দ্বীর পলায়ন। )

গোপী। ভাই এসেছ? দেখ, অত্যাচার দেখ? ব্যাটা ঘরে গিয়াছে, অথচ ( বৃদ্ধাঙ্গুলি নাড়িয়া ) টাকার নামে ঢু ঢু।

সাতু। কোন্ ব্যাটা, কার ঘরে, কেন গিয়াছে, কোন্ টাকা, কেন ঢু ঢু, কিছু না বলিলে বুঝবো কিরূপে?

গোপী। ওরে বুঝাইবার কি আমার সময় আছে? জামাই বেটা ঐ ঘরে গিয়াছে। টাকা সব দেয় নাই তাত জান। মেয়েটাও ঘরে গিয়াছে। এখন তোমরা পাড়ায় পাঁচ জন ভদ্র লোক আছ, আমার উপায় কি বল। আমি যেয়ে ব্যাটাকে জোর করিয়া বাহির করিয়া দিতাম, কিন্তু ব্রাহ্মণী শর্মাকে জানো ত, জোরে পারিলাম না, হাত ধরিয়া রাখল।

সাতু। এ বড় বিষম সমস্যা। ইহার প্রতিকার আমি বলিতেছি। কল্য প্রভাতে জামাইচন্দ্রকে অর্দ্ধচন্দ্র প্রদান অর্থাৎ গৃহ হইতে বহিষ্কৃত করিবে। টাকা আদায় করার ভাবনা কি? মেয়ে পাঠাইও না। মেয়ের মেয়ে হইলে তাকে অধিকার করিয়া লইও। যখন একবার ঘরে ঢুকেছে তখন কি আর বাহির হবে। কখন নয়, তা খুন হলেও নয়।

গোপীমোহন। ( জামাইকে সম্বোধন করিয়া ) আচ্ছা থাক, কল্য সকালে যেন তোার মুখ দেখতে না হয়। আর বাকি টাকা না দিয়া যদি এ মুখ হইন্ ত তোার বাপের মুখে গু।

সাতু। এই উত্তম যুক্তি। এখন বিয়ের বাড়ী চল, সেখানে জলপান প্রস্তুত। (গোপীমোহনের হাত ধরিয়া অগ্রসর) পথে যাইতে যাইতে তোমাকে অতীব অদ্ভুত সংবাদ বলিব। তোমার স্ত্রীর গর্ভরূপ ক্ষীরোদ সমুদ্রে বহুল পরিমাণে কন্যারূপ নিধি সৃষ্টি কর, তাহা হইলে তোমার দুঃখ ঘুচিয়া যাইবে। হি! হি! হি! দাদা, কিছু বুঝিলে না, অর্থাৎ তোমার স্ত্রীকে বল যে মেলা কন্যা প্রসব করুন। যদি বল তাহা কিরূপে হবে। শ্রবণ কর। ঔষধ প্রয়োগ কর, ধাই বুড়ীর কাছে মেয়ে হইবার উত্তম ঔষধ আছে।

[ উভয়ের প্রস্থান। ]

( সাতুলালের পুনঃ প্রবেশ ও যে ঘরে জামাই শয়ন করিয়া আছে, তাহাতে অল্প আঘাত করণ। )

সাতু। জামাই বাবু, উঠে দুয়ার খুলিয়া কথা শুন। শীঘ্র গাত্রোখান কর। তোমার ভয়ের কোন কারণ নাই, যেহেতু সাতু বাবু, যিনি পরম দয়াল, দুঃখিত জীবগণের বন্ধু, তিনি তোমাকে ডাকিতেছেন। ( জামাতার দ্বারোদঘাটন। সাতু দ্বারের নিকট দাঁড়াইয়া চুপে চুপে ) শুন জামাই, শুন বামা, বিয়ের বাড়ী পাকী বেহারা আছে। আমি তাদের আনিতেছি, বামাকে তাহাতে লইয়া তোমরা দুজনে প্রস্থান কর। শুনলি বামা, বের হয়ে পড়, স্বামীর সঙ্গে যাবি তার কি? এই আমি পাকী আনিতেছি, তোমরা প্রস্তুত হও।

[ প্রস্থান। ]

## দ্বিতীয় অঙ্ক

### প্রথম গর্ভাঙ্ক।

কানাই ঘোষালের বাটীর দালান। কানাই ঘোষালের বড় স্ত্রী

আসীনা। ( সরলার প্রবেশ। )

সরলা। হ্যাঁগা শশীর মা, আমাকে যে পড়াতে চেয়েছিলে, আজ কি তোমার অবকাশ আছে?

শশীর মা। কে মা, সরলা? আয় বাছা আর, ঐ পিঁড়ির উপর বোস, তুই এলে মা, তবু দুদণ্ড কথায় বার্তায় অন্তমনস্ক থাকি। আমার অবকাশ আছে জিজ্ঞাসা করছ? বাছা, আমার কাজই বা কি, অবকাশই বা কি, এক সন্ধ্যা চারিটা চাল জাল দেওয়া, তা যখন হয় হবে এখন। আমার ত সংসারের জালা নাই।

সরলা। কেন বাছা, এক সন্ধ্যা খেয়ে খেয়ে শরীরকে অমন কষ্ট দিচ্ছ। কার ক্ষতি করছো? কার বাজছে বল দেখি? আপনি মারা পড়ছো। আর ওটা করো না, যাই হোক সকল স্থখেতে বঞ্চিত হচ্ছে। কেন, দুবেলা খেতে থাকতে তা হতে বঞ্চিত হও? আমার মুখে বুঝি বুড়ম মত লাগে, লোকে বলে ওটা অলক্ষণ।

শশীর মা। অলক্ষণ না বাছা, সুলক্ষণ। না থাকলে মনকে প্রবোধ দেওয়া যায়, থেকে বঞ্চিত আর চোখের উপর এই গুলি দেখা, সে আর সওয়া যায় না।

সরলা। দেখ শশীর মা, আমি তোমাকে আর বোঝাব কি? এদেশে সতীন নিয়ে অনেকেই ঘর কোরছে। অনেকের কথা শুন্তে পাই, নাকি সতীনকে বোনের মত ভাল বাসে।

শশীর মা। বাছা, তুই ছেলে মানুষ, তাই লোকে বলে আর তাই শুনিম্ যে, সতীনকে বোনের মত ভাল বাসে। সর্বস্ব যাক, স্বামী মরে যাক, তাও প্রাণে সয়, হাসতে হাসতে স্বামীর ভাগ দেয়, না জানি সে কেমন মেয়ে। সরলা মা, তুই আমার সন্তানের বয়সী, আমার শশী থাকলে এই তোর মত হত, তবু আমার মনের কথা দুটি একটা তোকেই বলি, তোকে বলে যেন আমার তৃপ্তি হয়। বাছা, সকল জিনিষের ভাগ দেওয়া যায়, স্বামীর ভাগ দেওয়া যায় না। আহা! আমার স্বামী, আমার বড় সাধের স্বামী!

সরলা। শশীর মা!

শশীর মা। আহা! আমার বড় সাধের স্বামী! আজও তার জন্তে প্রাণ কান্দে, আজও তার জন্তে প্রাণ পোড়ে, আহা! আমার তার উপর রাগ আসে না। (ক্রন্দন।)

সরলা। (অঞ্চলের দ্বারা চক্ষু মুছাইয়া) শশীর মা, পাগল হলে নাকি?

শশীর মা। পাগল হলে ত বাঁচতুম। (ক্রন্দন।)



সরলা। চুপ কর, চুপ কর, আর চোখের জল ফেলো না।

শশীর মা। আর যন্ত্রণা সহিতে পারি না। ( চক্ষু মুছিয়া ) না বাছা, আর কান্দছি নে, আর চোখের জল ফেলছি নে, কার জন্যে আর কান্দবো? তবু পোড়া মন বুঝে না। হায়! হায়! হায়! এই কপালে ছত্র দণ্ড, এই কপালে লণ্ড ভণ্ড। আমার কথা বলবো কি মা, জন্ম অবধি আনন্দ সাগরে ভেসেছি, আমার দিন কেবল আমোদে গিয়াছে। লোকে বলে, দাঁত থাকতে দাঁতের মর্যাদা বোঝা যায় না, আমি ত বরাবর জেনে এসেছি আমার মত স্মৃথী বুঝি আর নাই। শেষে কপাল ভেঙ্গে গেল, ছেলেটী হয়ে মরে গেল, মেয়েটীও গেল, আমার জ্ঞান হলো বুঝি আমার মত হতভাগিনী আর নাই। শোকে দিন রাত কান্দতে লাগলেম। আবার ওর কষ্ট হবে বলে ফুকরাইয়া কান্দতে পারি না, তাতে যেন আরো বুক ফেটে যেত, শেষে একেবারে জ্ঞানশূন্য হোলেম। বিধাতা বোল্লে, বটে? তোর বড় শোক লেগেছে, এর বাড়া দুঃখ আর নাই? দেখাচ্ছি তোকে। এই বোলে আমার বুকে এমনি শেল হেনেছে যে, সেই অবধি আমি আর দোম্ ছাড়তে পারলেম না।

সরলা। কি বোল্লে শশীর মা, একি তোমার ছেলে মেয়ের শোক চেয়েও বড় হয়েছে?

শশীর মা। তাই যে বোল্লেম বাছা, তোরা ছেলে মামুষ বুঝি কি। লোকে বলে বটে, পুত্রশোক বড় শোক, কিন্তু এত কষ্ট বুঝি আর কিছুতেই নাই। স্বামী মলেও এত কষ্ট হয় না। বাছা, স্বামী অনেক রকমের আছে, আমার ত স্বামী নয়, আমার খেলার সাথী। যখন আমার বয়স পাঁচ বছর তখন ওর বয়স নয় বছর। আমাদের বাড়ী, ঐ ভিটা দেখ্‌ছিস, ওখানে ছিল। আমরা দু জনা সমস্ত দিন একত্রে খেলা কর্তেম, রাতটুকু ছাড়াছাড়ি হোত, সে অনেক কষ্টে। শেষে একত্র পাঠশালায় লিখতে আরম্ভ কোরলেম। ওর কেবল দৃষ্টি ছিল, আমি কখন কি চাই, কিসের জন্যে আমার কষ্ট হচ্ছে, কি কোরলে আমি খুসি হই। আমারও তেমনি কেবল মাত্র চিন্তা ছিল, ওকে কিসে তুষ্ট কোরব। ও খুসি



হবে মনে করে আমি মন দিয়ে লেখাপড়া শিখতেম, গুরু মহাশয় যা বোলে দিতেন, তখনি তাই শিখতে পারতেম। ও আবার আমি খুসি হবো বলে মন দিয়ে লেখাপড়া কোরত। গুরু মহাশয়ের আমাদিগকে কোন দিন সাজা দিতে হয় নাই। আমাদের এই প্রণয়ের কথা গ্রামে না জান্তো এমন লোক নাই, কত জনে আমোদ কর্তো। আমি অপরাধ করেছি, গুরু মহাশয় ওকে নিয়ে ধম্কাতেন। আবার এতেই এমন শাসন হোয়ে যেতো যে, বোধ করি যদি আমাকে মার্তেন তা হোলেও আমার অমন শাসন হত না। আমাদের বয়সের মিল, বিশেষতঃ এই প্রণয় দেখে, মা বাপে সাধ কোরে বে দিলেন।

সরলা। বে হবে, যখন এই কথাবার্তা হয়, তখন তোমাদের মনে বড় আহ্লাদ হোত, না?

শশীর মা। তখনকার কথা স্বপনের গায় বোধ হয়।

সরলা। আচ্ছা, বে হোলে আর দিনের বেলা কথা কইতে না, ঘোমটা দিয়া বেড়াতে?

শশীর মা। না মা, বরং ঘোমটা দিতে লজ্জা কোরত। বে হয়েও আমাদের সেই আমোদ, সেই আহ্লাদ, সেই একত্রে খাওয়া, একত্রে খেলা, একত্রে লেখাপড়া। পূর্বে রাতটুকু ছাড়াছাড়ি ছিল, এখন অবধি রেতেও একত্রে থাকতেম।

সরলা। ভাল, তোমাদের এত প্রণয় দেখে তোমার শাশুড়ী রাগ কর্তেন না? আমি অনেক শাশুড়ীকে দেখেছি ছেলে বোতে প্রণয় দেখলে রাগ করে।

শশীর মা। আমরা তখন ছেলে মানুষ ছিলাম, দেখে রাগ করবার কোন কারণ ছিল না, বরং সকলে আমোদ কোরত। বিশেষ আমার শাশুড়ী বড় লক্ষ্মী ছিলেন, অমন শাশুড়ী হতে নাই। তার পর বাছা বোল্ছিলাম, এইরূপ আমোদে দিন যেতে লাগলো, ক্রমে শেয়ানা হোলেম, নিতি নূতন আমোদ, শেষে কপাল ভাঙতে আরম্ভ হোলো। ছেলেটা হোয়ে মরে গেল, শেষে একটি মেয়ে হোল, সেটিও বিধাতা নিলেন।

সরলা। তোমাদের আগেকার কথা গুলি যেন উপকথার মত লাগে।

আমরা অনেকের কাছে ও গল্প শুনে থাকি, তোমাদের বড় প্রণয় ছিল, ঘোষাল মহাশয় তোমাকে বড় ভাল বাসতেন।

শশীর মা। উ হু হু হু, সরলা, চুপ্ কর, চুপ্ কর, ও কথা বলিস্নে, বলিস্নে! আমি ও শুনতে পারি না! বুকে শেল বিদ্ধে আছে থাকুক, ওর উপরে আর আঘাত করিস্নে। আমায় ভাল বাসতো! আহা আ, আরে পুরুষ মানুষ! তোরাই না বলিস্নে মেয়ে মানুষ অবিখ্যাতী জাত। আমি ছেলে মেয়ের শোকে জালাতন। আমি আর বলতে পারিনে, আহা আ, সে ছেলে মেয়ে তোরও ত! তোর লাগলো বের আমোদ! অনেকে বংশরক্ষার জন্তে ফিরে বে করে থাকে, না করলে নয়, লোকের উপরোধ ছাড়াতে পারে না বোলে করে, আমার কি ছেলে হবার বয়স গিয়েছিল? বলবো কি মা, এইত শোক পেলাম, এর মধ্যে আবার ওর পায়ে ধরে কেঁদে বলি, দেখ, তুমি একটি বছর ক্ষান্ত থাক, যদি আমার ছেলে না হয় তুমি বে কোরো। আমায় প্রবোধ দিলে, তুমি পাগল, তোমার যদি ছেলে নাও হয় তবু কি আর আমি বে করি? লোকে বোলছে বলুক না। চল, তোমায় আমায় কালীবাসী হইগে। মা, এই বোলে দাড়ি রাখলে, হবিষ্টি কোরুতে লাগলো, মাঘ মাসে যাবো কথা স্থির হোলো। এর মধ্যে ঘরে বসে আর এক কালীকে পেয়ে গয়া কালী সব চুলোয় গেল। বাছা, বোলব কি সে বের আমোদের কথা, আমাকে কোরেও যদি তোর দয়া মায়া না থাকে, তবু ছেলে মেয়েটার কথা মনে কোরেও কি এতটুকু দুঃখ হয় না? আমোদ এলো ত? আমি শোকে বিহ্বল হয়ে পড়ে আছি, এর মধ্যে শুনলেম ও নাকি বে কোরে আসছে!

সরলা। আগে তুমি এর কিছুই জানতে পাও নি।

শশীর মা। কিছুই না। গুরুতর শোক পেলে লোকে অন্য শোক ভুলে যায়। আমি ছেলে মেয়ের শোক ভুলে গেলাম, আমি শুক্ক মত হোলাম, একেবারে জ্ঞানহারী দিশেহারী মত হোলাম; কি সর্বনাশ! কি সর্বনাশ! এমন কি হবে? মিছে কথা। লোকে আমাকে জালাতন কোরেছে, আমার স্থখ সকলের চক্ষুশূল হোয়ে-

ছিল তাতেও লোকের মনোবাঞ্ছা পূর্ণ হয় নি, তাই আমরা জ্বালার উপর জ্বালা দিয়া আমোদ দেখ্ছে। একটু পরে দেখি একজন খবর নিয়ে এসে উপস্থিত। বললে ঠাকুরগণ, উলু দাও, বাবু বে কোরে আস্ছেন। সরলা! সে কথা মনে করলে আমার এখনও হৃৎকম্প হয়। আমার মাথায় একেবারে হাজার বাজ পোলো। যখন আমার মেয়েটী যায়, কবিরাজ জবাব দিলে, তাও আমার কাছে তত ভয়ানক বোধহয় নি।

সরলা। আহা হা। তুমি বেঁচে আছ কি কোরে? আমোদ কোরে আবার এই সম্বাদ পাঠায়, আমার শুনে বুক ফেটে যাচ্ছে।

শশীর মা। শোন বাছা, এখন কি হয়েছে? আমি শুন্বা মাত্র ঘুরে পোলেম। বামা এসে চোখে মুখে জল দিয়া বাতাস কোরতে কোরতে আমার চেতনা হোলো, হৃৎকণ্ঠ শুথিয়ে গ্যাছে, কথা সোরছে না, বামা একটু জল এনে দিলে, এক ঢোক খেতে জল আর গলা দে নামে না, কষ্টে শ্রুটে গলাটা ভিজিয়ে নিয়ে গেঙ্গড়ে গেঙ্গড়ে বোল্লেম, বামা! কি শুনছি যে? বামার মুখ দিয়ে আর কথা সরে না, সেও অমনি গেঙ্গড়ে গেঙ্গড়ে বোল্লে, তাই ত শুনছি। আমি বলিলাম, তবে কি সত্তি? বামা বোল্লে, তারা আস্ছেন, এতক্ষণ অর্ধেক পথ। এই কথা শুনে আমার আপনার উপর একটা ঘৃণা হোলো। ধিক্ আমাকে! সে আমার সঙ্গে এই ব্যবহার কোরলে, আমি আবার তারই জন্তে কাতর হচ্ছি! কখনই না, যাতে ও জঙ্গ হয় তাই কোরবো। আমি ওকে দেখাবো যে, ও যেমন আমাকে মনে কোল্লে না আমিও তেমনি ওর জন্তে কিছু মাত্র দুঃখিত নই। আপনি উঠতে পারিনে, বামাকে বোল্লেম, বামা, তুই আমাকে ত্যাগ করিস্ না, যা বলি তাই কর, ঘরে জিনিষ পত্র যা যেখানে আছে, সব এনে আমার এই ঘরে পোর। বামা আমা বই আর জানে না, যা বোল্লেম তাই কোল্লে। আমি সমস্ত দিন নাইনি খাইনি, ঘরে দোর দিয়ে পোড়ে থাক্লেম। মা সরলা! লোকে বলে মেয়ে মানুষের মন বড় কঠিন, বকলু, লোকে বলুক, আমি জানি মেয়ে মানুষের মন কত নরম। ভালবাসা মেয়ে মানুষের প্রাণ। মেয়ে

মানুষ ভাত না খেয়ে থাকতে পারে, ভাল না বেলে থাকতে পারে না। আমার এই যে বুকে ছুরি দিয়াছে, তবু শুয়ে ভাবছি, যা কোরেছে তা আর কি হবে? না বুঝতে পেরে লোকের পরামর্শ শুনে কোরেছে, বাড়ী এলে আগে আমার কাছে দৌড়িয়ে আসবে এখন। একটা কেন দশটা বে করুক না, তবু, ভাল আমা ছাড়া আর কাহাকে বাসবে না, সত্তি কি চিরকালে প্রণয় একেবারে ভুলে যাবে? সে তেমন লোক নয়, তার মন তত কঠিন নয়। এসেই দেখছি আমার পায় ধোরে কান্দবে এখন। সে সরল মানুষ, লোকের কুপরামর্শ শুনে এক কুকর্ম করেছে, তাই বোলে কি আমি তাকে ত্যাগ করতে পারি? ছেলে মোলে যেমন লোকে দুবার একবার মনে করে, সে হয় ত আবার বেঁচে আসবে এখন। আমি শুয়ে সেইরূপ নানা রকম ভাবছি, এর মধ্যে দেখি বাজনা বাজিয়ে ভারি আমোদ কোরে আসছে। সেই বাজনা শুনে আমার প্রাণ আর ধড়ে থাকলো না। একবার উবুড় হই, একবার কাত হই, এর মধ্যে এক জন এসে দোরে ঘা দিচ্ছে, মা ঠাকরুন, শীত্র ঝুট, বৌ ঠাকুরাণীকে বরণ করে নেও। সরলা, তখন যে আমার মন কি করতে লাগলো, তা আর আমি বোলব না, বোলতে পারি না। যতক্ষণ আশা থাকে, ততক্ষণ হাজার কষ্টও সহ্য হয়, কিন্তু হতাশ যে কাকে বলে, তা বাছা তোমরা জান না। ভগবান করেন যেন তোমাদের তা কখন না জানতে হয়।

সরলা। ( মুখ নত করিয়া দীর্ঘনিশ্বাস ফেলিয়া ) তার পর?

শশীর মা। আমি উঠলেম না, কথার উত্তর দিলেম না, সে বাইরে যেয়ে বোল্লে। বাছা, মিসে কোল্লে কি, বাহির হতে গর্জ্জাতে গর্জ্জাতে লোকের মাঝে খান দিয়ে বাটীর ভিতর এল, এসে বোল্ছে কি— উঃ বাছা সে আর বোলতে পারি না,—শেষে বোল্ছে কি, আমি কালই কাশীর জন্ত সমুদয় জিনিষপত্র কিনে এনে দেব, দেখি, ও কি করে। আমি কালই কাশীর জন্ত নূতন ঘরের বোনেদ কোরবো। আমার যত আশা ভরসা ছিল, সেই দিন সমুদয় শেষ হোল। তখনি আমার মনে উদয় হোল, কেন এর চেয়ে বিধবা হোলেম না। পৃথিবীর আশা ভরসা ঘুচে গেলে সেই অনাথ-নাথের

প্রতি দৃষ্টি পড়ে। আমার তখন জ্ঞানের উদয় হোল, মনে কোল্লেম, এ সমুদয় বিষয় আর মনে ঠাই দেব না। কিন্তু সে কি ইচ্ছার কথা? আমি যদি কষ্টে অষ্টে মনকে স্থির কোরতে যাই, তা ওরা দেবে কেন? মিন্সের বয়স পঁয়তাল্লিশ হোল, যেন ফিরে নব বাহার হোয়েছে! এদের আমোদ, এদের হাসি তামাসা, আরও আমাকে দেখিয়ে দেখিয়ে! আমাকে কষ্ট দিতে পারিলেই যেন ওদের বেশী আমোদ। বল বাছা, আমার অপরাধ কি? আমাকে ভাল বাসিস্ না, আমাকে কেটে কেটে ছুন পুরিস্ কেন? আমাকে দেখছি বনে যেতে হোলো। বাছা, ভালবাসা কাকে বলে তাকি বুঝেছ?

সরলা। ( অধোবদনে দীর্ঘনিশ্বাস ত্যাগ। )

শশীর মা। ও এমনি জিনিষ যে, আমি তোমাকে যতখানি ভালবাসি তুমি যদি তা চেয়ে একটু কম বাস, আমি তোমাকে না দেখে যত কষ্ট পাই তুমি যদি তত কষ্ট না পাও, তাতে মর্মান্তিক দুঃখ লাগে। ভালবাসা এমনি জিনিষ। এখন বাছা দেখ দেখি আমার প্রাণ কেমন ভাবে আছে?

সরলা। তুমি আমাকে যা বোল্লে, এই কথাগুলি এক দিন ঘোষাল মহাশয়কে শুনাতে পার? আমি তবে এখন যাই।

শশীর মা। এসো বাছা।

[ উভয়ের প্রস্থান। ]

### দ্বিতীয় গর্ভাঙ্ক।

রামধন মজুমদারের বাটী। সাতুলাল আসীন।

( কান্না মুখ্যে ও ঘটকের প্রবেশ। )

কান্না। রামধন মজুমদার মহাশয়ের এই বাড়ী?

সাতু। কোথেকে আসছেন?

কান্না। রাঘবপুর থেকে আসছি; বিশেষ প্রয়োজন আছে, মজুমদার মহাশয় কোথায়?



সাতু । আর বোলতে হবে না বাবা, বুঝতে পেরেছি; কিন্তু সে সাদা চোখের কাজ নয় ।

কানু । আপনি কি মনে কোরছেন ?

সাতু । সে কি আর বুঝতে বাকি থাকে ? আমরা কল্কেতা ঘোঁটা ছেলে, চোখ দেখলে মানুষ চিনি ।

কানু । আপনার নিবাস ?

সাতু । ভয় পেয়েছ, মনে করেছ বাদী জুটেছে, সে ভয় নাই বাবা । আমার নিবাস এই, আমি আমার দাদার ছোট ভাই, আমার নাম শ্রীযুক্ত বাবু সাতু লাল মজুমদার মহাশয় । কেমন নামটী, মিষ্টি না ? ঠিক কথা বোলবে বাবা ?

কানু । বেশ নামটি । কিন্তু দাদার ছোট ভাই বোলে চিন্বে কেমন কোরে ?

সাতু । আমার দাদার নাম করি নি ? হি ! হি ! হি ! আমার দাদা রামধন মজুমদার ।

কানু । বটে, তার পর আপনি কি বোলছিলেন, কি বুঝলেন খুলে বলুন না কেন ?

সাতু । বলি, একি আর বুঝতে বাকি থাকে ? শুড়ীর দোকানে কেহ কি হবিষ্টি কোরতে যায় ? কিন্তু বাবা সে সাদা চোখের কাজ নয় । অত টাকা দিতে পারবে ?

কানু । তা হবে এখন মজুমদার মহাশয়—

সাতু । ভয় কি বাবা ? বোলে ফেল না ? আমি ত তোমাকে বোলেছি, আমি বাদী নই । অত টাকা পাব কোথা, বোলে ত হয় না ?

কানু । কত টাকা চাই ?

সাতু । হাজার টাকা । তা টাকায় পায় কি, আহা ! হা ! সে চন্দ্রবদন !

কানু । ( স্বগত ) কি বলে গেঁজেল বেটা । ( প্রকাশে ) হাজার টাকা পেলে কি আপনি ভাইঝিকে বে করেন ? আর আপনার দাদা আপনাকে বে দেন ?

সাতু । আরে কথার কথা বোলেম । ( কানের কাছে মুখ নিয়ে মৃদুস্বরে ) কিন্তু ভাই টাকা পেলে দাদার বড় কসুর যায় না ।



কান্নু । ( স্বগত ) এটা ত গৌজেল, এর সঙ্গে ভাব কোরে কথাগুলি বের করে নেওয়া যাক । ( প্রকাশে ) হাজার টাকা !

সাতু । হাজার টাকার নামে চম্কে গেলে বাবা ! তাইত বোল্লেম, ও সাদা চোখের কাজ নয়, তেমনি ডায়মনকাটা প্রাণ হয়, তখন শুধু সেই ঝাঁপটাকাটা দেখে বাবা বোলে দু হাজার টাকার নজর ধরে । সে আড় নয়নের চাউনিতে কত লোকের ভিটায় ঘু ঘু চরে । হাজার টাকা দে গেলে ত বেঁচে গেলে ।

ঘটক । আর বার শুনেছিলেম যে ৭ শ টাকা ?

সাতু । সে যে বাবা এক বছরের কথা, তার পর আর এক বছর গিয়েছে । বাবা, দানা খরচ লেগেছে, মাল তৈয়ারি কোরতে খরচ লেগেছে, টাকার স্ফদ আছে, শুধু বল্লে ত হয় না ।

কান্নু । তাতেই এত দর বেড়ে গেছে ?

সাতু । হাঁ আরও বাড়বে, পার ত বাজার নরম থাকতে থাকতে এই সময় মাল হাতে কর বাবা ।

কান্নু । হাজার টাকার কিছু কমে হবে না ?

সাতু । বাবা, কন্ কন্ কোচ্ছ, এ ধে তোয়েরি মাল, দুদিন রেখে বেচলে দেড় হাজার টাকায় পড়তে পাবে না । আমার দাদা এক কথার মানুষ, তিনি এ বৎসর যে ১লা কান্তিক পড়েছে, অমনি রাইট করে দর বেক্কে দিয়াছেন । এ বৎসর হাজার টাকার কমে তিনি মাল ছড়বেন না, তা পোচে গেলেও না ।

( রামধনের প্রবেশ । )

এই যে আমার দাদা আসছেন । দাদা, একটা খদ্দর, তা আমি বলেছি, সে সাদা চোখের কাজ নয় ।

রামধন । আপনাদের নিবাস ?

ঘটক । মুখ্য মহাশয়ের নিবাস বিষ্ণুপুর, এঁরা অতি প্রধান বংশ, ওঁর জ্যেষ্ঠ পুত্রের বিবাহ দিবেন । আপনার কনিষ্ঠা কন্যার সম্বন্ধ কি স্থির হয়েছে ?

রাম । না মহাশয়, এ গ্রামের মুখ্য মহাশয়েরা ৮০০ টাকা বলেছেন, রামনগেরর চাটুয্যেরাও ঐ ৮০০ টাকা বোলে গ্যাছেন, কিন্তু ৮০০ টাকায় আমি মেয়ে দিব না ।

ঘটক । প্রতাপকাটী হোতে যাঁরা এসেছিলেন ?

রাম । তারা অতি ছোট লোক ।

ঘটক । মহাশয় বলেন কি ? প্রতাপকাটীর মুখ্যোরা ছোট লোক ! তাঁরা অতি প্রধান বংশ ।

রাম । আহা হা হা, তাঁরা ৭০০ টাকা দিয়া ছেলের বে দিতে আসেন্ !

ঘটক । আপনি চান কত ?

সাতু । ১২শ টাকা সরকারি ডাক ।

ঘটক । দেখুন, দর বলবেন না, উচিত যা নেবেন তাই বলুন ।

রাম । আমার কাছে এক কথা, আমি দর ফর বুঝি না, ১২শ বলি আর ১৪শ বলি, হাজার টাকার কমে ছাড়ব না ।

ঘটক । বৌনি বেলা বোলে তবে অনেক খাতির করুলেন ! সে যা হয় হবে এখন, আগে মেয়েটী একবার দেখান ।

রাম । যে আজ্ঞা মহাশয়, একটু বসুন, আমি মেয়ে আনি ।

[ রামধনের প্রস্থান ।

সাতু । সে বড়া সরেস মাল বাবা, সে আর দেখতে হবে না ।

ঘটক । আমাদের পক্ষ হোয়ে আপনার দাদাকে গুটী কয়েক কথা বলতে হবে ।

সাতু । ভেবেছ আমি গঁজেল, গোটা দুই মিষ্টি কথা বলে আমাকে হাত করবে ? বাবা, আমি গাঁজা খাই বটে, কিন্তু বেঠিক পাবে না । আমি ঠিকই আছি । জানো, আমি তোমাদের বিপক্ষ লোক ?

কাহ্নু । কেন সাতু বাবু, আমাদের অপরাধ ?

সাতু । প্রথম তোমরা গাঁজা খাও না, আর হি ! হি ! হি ! ঐ দেখ দাদা আস্ছেন, আর আমার মা সরলাকে গলায় দড়ি দিয়ে টেনে আনছেন । দাদা, আর একটু এদিকে টেনে নিয়ে এস, খদ্দের দেখুক, মাল না দেখলে খোদ্দের বাড়বে কেন ?

( রামধন ও সরলার প্রবেশ । )

রামধন । এই দেখুন মেয়ে, রামনগরের বাঁড়ুঘোরা ৮০০ টাকা বোলে গ্যাছেন —

সাতু । ঐ দেখুন, মেয়ের ৮০০ টাকা ডাক দর হোয়ে গ্যাছে, খদ্দের কেউ

থাকেন বাড়ুন—বড়া মাল যাতাহে, আটশো রুপেয়া—আটশো  
রুপেয়া এক—আটশো রুপেয়া দো—বাড়হ বাড়হ—আটশো  
রুপেয়া—আটশো রুপেয়া, আটশো রুপেয়া এক—

কান্ন। নয়শো।

সাতু। নয়শো রুপেয়া, নয়শো রুপেয়া, বেরি গুড্ মাল—গুড্ আইজ্, গুড  
নোজ্—যাতাহে—নয়শ রুপেয়া, নয়শ রুপেয়া এক—নয়শ রুপেয়া  
দো—বাড়হ বাড়হ—নয়শো রুপেয়া—বাড়হ বাড়হ—নয়শ রুপেয়া  
এক—ভাল মাল যাতাহে, নয়শো রুপেয়া—

রাম। ( বেগের সহিত সাতুর নিকট গমন করিয়া ) ও কি রে বানর ?  
( এদিকে সরলার অন্তঃপুরে প্রস্থান । )

সাতু। দাদা, ব্যাজার হোলে নাকি ? অমন না কোলে কি দর বাড়ে ?  
তুমি মেয়ে আমার সঙ্গে দাও, আমি টালার নিলাম ঘরে নিয়ে  
যাই, আমি যদি তোমাকে ৫০০০ টাকা এনে দিতে না পারি তবে  
কি বোলেছি। আমি বেশ নিলাম ডাকতে পারি,—নয়শো  
রুপেয়া, নয়শো রুপেয়া, নয়শো রুপেয়া এক, নয়শো রুপেয়া দো,  
বাড়হ বাড়হ, নয়শো রুপেয়া, ভাল মাল যাতাহে, নয়শো রুপেয়া,  
তৈয়ারি মাল যাতাহে।

রাম। ওরে চুপ কর, ওরে চুপ কর, বানর ! জাত্ মারলি, কি  
গেঁজেলের হাতেই পোলাম, ওরে চুপ কর—

সাতু। নয়শো রুপেয়া, নয়শো রুপেয়া, নয়শো রুপেয়া এক, নয়শো রুপেয়া,  
হি ! হি ! হি ! খোদেঁর নাই তার হবে কি ? দাদা, দাও  
তোমার পায় পোড়েছি, টালার নিলামে নিয়ে যাই।

রাম। যা, তুই আর বানরামী করিস্নে। একেবারে জাত মারলি আর  
কি, বানরামী কোরে ২০০ টাকার খোদেঁরটা বিগ্ড়ে দিবি নাকি ?  
( স্বগত ) গেঁজেল হউক, আর মাতাল হউক, কথাটী বোলেছে  
কিন্তু মন্দ নয়। ( ঘটকের প্রতি ) মেয়ে আপনারা দেখলেন।  
হাজার টাকা দিতে পারেন আপনাদের সহিত কাজ করিতে প্রস্তুত।

কান্ন। আমরা মেয়ে দেখলাম, এখন পরামর্শ করে আপনাকে সংবাদ  
দিব। ঘটক মহাশয়, চলুন।

রাম । বানরামী করে আবার একটা খন্দের বিগড়ে দিলি ।

সাতু । দাদা, ওরা ত আমাকে বে করবে না ? গরজ থাকে আবার আসবে । তুমি সরলাকে দাও, আমি টালা নিলামে লইয়া যাই ।

রাম । ( স্বগত ) নিলামে পাঠাতে পারলে ত বেশ হয়, কিন্তু তা করবে কি করে ? দেশে আচার নাই, বিচার নাই, ধর্ম নাই, কর্ম নাই, পোড়া দেশে দ পড়ুক । সকলি মোড়ল, যার প্রাণে যা চাই আর তাই বলে । এখনি দেশের লোকে হাত তালি দেবে, ছকা পর্য্যন্ত বন্ধ করবে । যাক, যা হবে না তা ভেবে আর কি হবে ? যে ছরমুসে কপাল, তা ঘটবে কেন ?

সাতু । দাদা, ভাবছো কি ? রঞ্জনের সঙ্গে বে দাও ?

রাম । টাকা ?

সাতু । ও টাকা ত আমার, আমি টাকা চাই না ।

রাম । ( স্বগত ) বানর ছাড়বে না রে । ( প্রকাশে ) বানর ! তোমার কাণ্ডজ্ঞান নাই, সম্পর্কে যে বাধে ?

সাতু । ভমরা । এই বল নিলামে দেবে, এখন সম্পর্কে বাধলো ? সম্পর্কে বাধে ! এ দিকে যে ব্রাহ্মণবংশ অধোঃপাতে যান ? সম্পর্কে বাধে, বিদ্যাভূষণকে কিঞ্চিৎ উৎকোচ দিলেই হবে ।

[ যবনিকা পতন ।

### তৃতীয় গর্ভাঙ্ক ।

কাস্তিচন্দ্র মজুমদারের বাড়ী ।

কাস্তিচন্দ্র, ও তাহার তিন ভ্রাতা আসীন ।

( সাতুলালের প্রবেশ )

সাতু । তোমার ভাগিনেয় রঞ্জন কি প্রত্যাগমন করিয়াছেন ?

কাস্তি । কি ?

সাতু । বুঝলে না ? আচ্ছা, সরল ভাষায় বলি । রঞ্জন কি বাড়ী ফিরে এসেছে ?

কাস্তি । না, বোধহয় আজ কাল আসিবে ।

সাতু । বিন্দু দিদির খবর কি ?

কাস্তি । খবর মাথা আর মুণ্ড । তোমার বিন্দু দিদি আমার ভগ্নী, তাহাকে আমার নিন্দা করিতে নাই । তার জন্তে আমি যা করেছি তাহা ভগবান জানেন । তিনি কাশীতে আছেন । তিনি কারু নয় ।

সাতু । তার এক মাত্র পুত্র রঞ্জন, তারে মোটে কাছে যাইতে দেন না । ছেলে সর্ব গুণের, তাহার প্রতি নারাজ । যা কিছু ছিল সব উড়াইতেছেন, তাহার ভাব কি বল দেখি ?

কাস্তি । তার কথা বলো না ।

সাতু । খাওয়া দাওয়া গৃহকর্ম সব হয়ে গেছে ?

কাস্তি । হবে না কেন ? চারি ভাই ভাগে যোগে কাজ করি । কেও তরকারী বানাই, কেও জল আনি, কেও রান্ধি । বাড়ীতে মেয়ে মানুষ নাই, ছেলেপিলেও নাই । কয় ভাই স্বখে সচ্ছন্দে আছি ।

সাতু । গৃহলক্ষ্মী ঘরে নাই, তা বাড়ী দেখলে বুঝা যায় । এ দিকে ছাই, ওদিকে ভস্ম, এ যেন শ্মশানভূমি । বলি কাস্তি দা, চারি চারিটা ভাই, এ কি কারও বংশ থাকিবে না ?

কাস্তি । করি কি ? টাকা পাবো কোথা যে বে কোরবো ? যা ছিল, বেচে কিনে বিবাহ কোরলাম । কথা হইল এই যে, আমার মেয়ে হলে তাহা বেচে ভায়াদের বে দেব । তা মেয়ে হবার আগে গৃহশূন্য হোলাম ।

দ্বিতীয় ভাই । শুন সাতু, আমি দেখেছি বিধবা বিবাহ না হলে আমাদের বংশ থাকবে না । আমি বিজ্ঞানাগরের নিকট যাওয়া আসা করে থাকি ।

তৃতীয় ভাই । যা না হবার সেই কথা । রাঁড়ের বে নাকি আবার হয়ে থাকে । আমি ভেক লব, বৈরাগী হবো । ইহকালও হবে, পরকালও হবে ।

সাতু । ইহকালের কি ভাল হবে ?

তৃতীয় ভাই । কেন, সংসারধর্ম করিব ? ভাল দেখে একটা বৈষ্টমী সেবা দাসী কোরব ।

কাস্তি । ছি ! ও কথা বলে না । বামুন হয়ে বৈষ্টম হবি কেন ? তোর ভাব দেখে বোধহয় যে বৈরাগী বেটাদের সঙ্গে মিশবি ?

তৃতীয় । তা ত আমি মিশ্বেই । আমি বুঝি চিরকাল এখানে বসে ভাত  
রান্ধবো ?

চতুর্থ । এ পরামর্শ কিছু ভাল নয় । আমি কিন্তু ব্রাহ্ম হবো । হয়ে  
ব্রাহ্মিকা বে করবো । বৈরাগীরা সমাজে অপদস্থ । ব্রাহ্মদের বেশ  
পদ আছে । আর সেই জন্যে আমি দাড়ী রেখেছি, আর চোখ  
বুঁজে প্রার্থনা করে থাকি ।

সাতু । একজন বিজ্ঞানাগরের অমুগত, তিনি একটি বিধবার লোভে  
ঘুরছেন । একজনের একটি বৈষ্ণবী পেলেই হয় । একজন ব্রাহ্মিকা  
পা'বার আশায় ব্রাহ্ম হবেন । কান্তি দাদা, তুমি কি আর করবে ?  
তুমি কলমা পড় ।

কান্তি । আমার ভরসা কলাগাছ ।

সাতু । আজ তোমাদের এখানে মহাভারতের কথা হবে । ( সুর করিয়া )

মহাভারতের কথা অমৃত সমান ।

কাশীরাম দাস কহে শুনে পুণ্যবান ॥

কই বিছানা ইত্যাদি পাতা হয় নি যে ?

কান্তি । মহাভারতের কথা, সে কি ?

সাতু । আমি পাড়ার কতক কতক নিমন্ত্রণ করে এসেছি, তাহারা আগত-  
প্রায় । আমার নিমন্ত্রণের উদ্দেশ্য এই যে, কান্তিচন্দ্র মজুমদারের  
বাটীতে আজ অপরাহ্নে মহাভারতের কথা হইবে, আপনারা রূপা  
করিয়া শুনিতে আসিবেন । এই যে শ্রোতাগণ আসিতেছেন ।

( কুলিন ভুবন মুখ্যের চারি অবিবাহিতা কন্যার প্রবেশ । জ্যোষ্ঠার  
বয়স ত্রিংশৎ ও কনিষ্ঠার বিংশতি । )

জ্যোষ্ঠা কন্যা । কই সাতু, মহাভারত কই, কোন উদ্যোগ তো দেখছি নে ?

সাতু । উদ্যোগ সবই আছে । ( কান্তির প্রতি ) এঁরা আমার নিমন্ত্রণ  
ক্রমে তোমার বাড়ী মহাভারত শুনিতে এসেছেন ।

কান্তি । এ আবার কি রঙ্গ ?

সাতু । রঙ্গ কিছু নয় । আমি একখানা নাটক লিখবো । নাটক বলে, বুঝবে  
না, মহাভারত লিখবো, তাহাতে ঘটনা চাই, তাই এ সমুদায়  
উদ্যোগ ।



কাস্তি । কিছু বুঝ্লেম না ।

সাতু । তোমরা চারি ভাই আদমরা হয়ে আছ । তোমরা অবশ্য মনে ভাব তোমাদের মত পোড়াকপালে জগতে আর নাই । তাই, শ্রীভগবান যে নিরপেক্ষ তাই দেখাবার জন্ত ঐ চারি পোড়াকপালি একত্র করে তোমাদের সম্মুখে আনলুম ।

জ্যেষ্ঠা কন্যা । ( মুখে বসন দিয়া ) সে কি রে ড্যাকরা ?

সাতু । আপনারা বুঝ্লেম না । কাস্তি দাদা আর ভাতৃগণ ভাবেন যে তাঁহারা বড় হতভাগ্য, তাঁহাদের সংসার হইল না, এ জীবন বিফলে গেল ।

কাস্তি । তাই কি ?

সাতু । আবার, আমার এই দিদি ঠাকুরাণীগণ, ইহারাও চারি জন । ইহারা ভাবেন যে, ইহারা কুলিন কন্যা, ইহাদের বিবাহ হইল না । ইহাদের গায় হতভাগিনী ত্রিভুবনে আর নাই । তাই আপনারা পরস্পরকে নিরীক্ষণ করিয়া শান্ত হউন ।

জ্যেষ্ঠা কন্যা । ( মুখে বসন দিয়া হাসিতে হাসিতে ) ড্যাকরা, এই কি তোমার মহাভারত ?

সাতু । হ্যাঁ, এখন আরম্ভ করি, শ্রবণ কর । অগ্রে উদ্বোধন করি । ( করযোড় করিয়া উর্দ্ধ মুখ হইয়া ) হে জগৎপতে ! তোমার লীলা বুঝা ভার । এই এক গ্রামে চারি পোড়াকপালের ও চারি পোড়াকপালির একত্র বাস । চারি পোড়াকপালে চান স্ত্রী, আর চারি পোড়াকপালি চান স্বামী । অথচ কাহার পোড়াকপাল ঘোচে না । তাই বলি, তোমার লীলা বুঝা ভার ।

জ্যেষ্ঠা । মরণ আর কি ! এই শূন্যে আমাদের ডেকেছিস্ ?

সাতু । ( স্মর করিয়া )

মহাভারতের কথা অমৃত সমান ।

কাশীরাম দাস কহে শুনে পুণ্যবান ॥

( স্বাভাবিক স্বরে ) চল, তোমরা আমার সঙ্গে চল, চারি পোড়াকপালে ও চারি পোড়াকপালি । যেখানে ব্রাহ্মণ সমাজ আছে, সেখানে ডকা বাজাইতে বাজাইতে যাইব । এইরূপ নগরে প্রান্তরে

ভ্রমণ করিয়া ব্রাহ্মণগণকে তোমাদিগকে দেখাইব, আর বলিব  
'হে ব্রাহ্মণগণ । তোমরা নাকি সকল বর্ণের গুরু, তোমরা নাকি  
ব্রহ্মকে জানিয়াছ, এই শ্রী, এই চারি পোড়াকপালে ও চারি  
পোড়াকপালি তোমাদের কীর্তি ।'

কাস্তি । কুলধর্ম যে রাখিতে হয় ।

সাতু । কুলধর্মের মুখে ছাই, ইহাদের বাবার মুখে ছাই, ব্রাহ্মণ জাতির  
মুখে—মুখে—গাঁজা ( গাঁজায় দম্ ) । এই চারি পোড়াকপালে ও  
চারি পোড়াকপালি একত্র কোরলাম । এখন আপনারা যাহা  
ভাল বুঝেন তাই করুন ।

জ্যোষ্ঠা । বাবাকে বলবো এখন, তোমায় মজা দেখাবেন ।

সাতু । শুন, আমি নাটক লিখবো ও তাহার মধ্যে চারি পোড়াকপালে  
ও চারি পোড়াকপালি ঢুকাইয়া ব্রাহ্মণগণের সম্মুখে উহার  
অভিনয় করিব, করিয়া বলিব যে তোমাদের মুখে আগুণ ।

[ যবনিকা পতন ।

—

# শরৎ-সরোজিনী

[ উপেন্দ্রনাথ দাস ]

প্রথম অঙ্ক

প্রথম গর্ভাঙ্ক

কলিকাতা, বহুবাজার, শরৎকুমারবাবুর বাসাবাটী।

শরৎকুমারবাবু টেবিলে বসিয়া পত্র লিখিতেছেন।

শরৎ। ( পত্রলিখন সমাপ্ত করিয়া ) বড় তাড়াতাড়ি লেখা হয়েছে, একবার পড়ে দেখি কি লিখলেম।

( পত্রপাঠ )

কলিকাতা,

২রা ফাল্গুন, সন ১২৮০ সাল।

সরোজ,

তোমরা ভাল আছ শুনিয়া অত্যন্ত সুখী হইলাম। আমিও এক প্রকার ভাল আছি। আগামী শনিবারে আমাদের বিজ্ঞানালোক-বিস্তারিণী সভার অধিবেশন। সেই দিন হরিদাসবাবু—ইনি কলিকাতার একজন প্রসিদ্ধ বিদ্বান—“মনুষ্য কপি-বংশোদ্ভূত” এই বিষয়ে একটি সুদীর্ঘ রচনা পাঠ করিবেন। অনেক তর্কবিতর্ক হইবার সম্ভাবনা। আমাদেরই মতের বিরোধী। আমার নিজের মতের কিছু স্থির নাই। তর্কে কি সিদ্ধান্ত হয় পরে লিখিব। ইহার পরের অধিবেশনে বোধ হয় আমাকে রচনা পাঠ করিতে হইবে।

আমার পাগলা ভগ্নীটি কি এখনও সেই রকম আছে? সেই প্রকার পূর্বের গায় চঞ্চল?

বোধহয়, আমরা যত ভয়ঙ্কর হইবে আশঙ্কা করিয়াছিলাম, তত ভয়ঙ্কর হইবে না। ইহার প্রতিকারের নিমিত্ত গবর্ণমেন্ট সাতিশয় চেষ্টা পাইতেছেন। কিন্তু যেরূপ আড়ম্বর ও অর্থব্যয় হইতেছে, তদনুরূপ কার্য হইতেছে না, ইহা বলা বাহুল্য মাত্র। আমাদের

গ্রামে যদি লোকের অভাবে কষ্ট হয়, যতদূর পার সাহায্য করিবে ; বিশেষতঃ স্ত্রীলোকদিগের এবং বালকদিগের । আমি ভগবান্ সরকারকে লিখিয়াছি, তুমি তাহাকে ধেরূপ করিতে বলিবে, সে তাহাই করিবে ।

নিত্য শুভাকাজ্জী ভ্রাতা,

শরৎকুমার দত্ত

পুনঃ চঃ । আমি এখানে প্রায় সর্বদাই নানা কর্মে ব্যস্ত থাকি । সকল কথা, সব সময়ে, মনে নাও থাকিতে পারে । তোমাদের যখন যাহা প্রয়োজন হইবে, আমাকে তৎক্ষণাৎ জানাইবে— আমি পত্র পাইবামাত্র ক্রয় করিয়া পাঠাইয়া দিব ।

শরৎ ।

( পত্র বন্ধ করণ )

বেহারী ?

( বেহারার প্রবেশ )

শরৎ । এই চিঠিঠো ডাকমে দে আও ।

বেহারী । বহুৎ আচ্ছা

[ বেহারার পত্র লইয়া প্রস্থান ।

শরৎ । সরোজ বড় বুদ্ধিমতী মেয়ে । কোথায় কি হচ্ছে না হচ্ছে জানবার জন্য বড়ই উৎসুক । ছ সাত বৎসর দেখে দেখে আমার ওর উপর সত্য সত্যই ভাইএর স্নেহ জন্মে গিয়েছে । আমি স্কুমারীকে যেমন ভালবাসি, সরোজকেও তেমনি ভালবাসি । দুজনেই ভাল, তবে স্কুমারী কিছু চঞ্চল, সরোজ ধীর ও শাস্ত ।

বেচারামের প্রবেশ ।

বেচা । দু'জন বাবু দেখা করতে এসেছেন ।

শরৎ । নিয়ে আয় ।

[ বেচারামের প্রস্থান ।

বিপিন ও নন্দবাবুর প্রবেশ ।

শরৎ । ( গাত্ৰোত্থানপূর্বক ) আস্তে আস্তা হয়, আস্তে আস্তা হয়,—  
বসুন । আপনারা ভাল আছেন ত ?

( সকলের উপবেশন )

শরৎ । তবে, আজ অল্পগ্রহ কি মনে করে ?

মন্দ । না, এমন কিছু মনে করে নয় । —আজ অভিনয় দেখতে যাবেন কি ? বিপিনবাবুতে আর আমাতে ত যাচ্ছি ।

শরৎ । আজ্ঞে না, আজ যেতে পারব না । একটা কাজ আছে । আপনারা কোথায় অভিনয় দেখতে যাচ্ছেন ? অভিনয়-মন্দিরের ত আজকাল ছড়াছড়ি ।

বিপিন । কোন্টায় যাব, তা এখনও ঠিক করি নি । যেটায় ভাল বোধ হয়, সেইটেতেই যাব ।

মন্দ । আমাদের দেশে অভিনয় দেখতে যাওয়া নাকি নূতন প্রথা আরম্ভ হয়েছে, লোকে মনে করে যে যেটায় হোক একটায় গেলেই হয় । ভালমন্দ বিবেচনা নাই । কোনটায় হয়ত দৃশ্যপট নেই বল্লেই হয়, খানকতক ছেঁড়া নেকড়া মাত্র । কোনখানে বা ঐক্যতান বাজের এমনি স্তমধুর ধ্বনি উঠছে, যে কাণে গেলে, আমরা ত আমরা, মড়া মানুষ পর্য্যন্ত সেখান থেকে উঠে পালায় । আবার কোনটায় হয়ত অভিনেতা একজন এমনি মদ খেয়ে আসরে নেবেছেন যে মুখ দিয়ে বাবুর কথা সরছে না, ঢলে পড়তে পড়তে রয়ে যাচ্ছেন । এ পাশ ও পাশ থেকে অণু অণু অভিনেতার কত ধমকাচ্ছে, আর গালাগালি দিচ্ছে, কেবল মারতে বাকী রেখেছে বল্লেই হয়—দর্শকেরা পর্য্যন্ত তা শুনতে পাচ্ছেন, কিন্তু বাবুটির কিছুতেই সংজ্ঞা হচ্ছে না । ( শরৎবাবুর প্রতি ) ছবিটে বেশি ভুল হল কি ?

শরৎ । আমার মহাশয়, অভিনয় দেখতে বড় একটা যাওয়া আসা নেই ; আমি বলতে পারি নে কোন্টা ভাল, কি কোন্টা মন্দ—কি কার কি দোষ ।

বিপিন । কেন, আপনি কি একেবারে অভিনয় দেখতে যাওয়াই মন্দ বলেন না কি ?

শরৎ । না, তা ঠিক বলিনে বটে, কিন্তু তারই কাছাকাছি । আমাদের নাটক-লেখকেরা আর অভিনেতারা এক প্রণয় নিয়েই ব্যতিব্যস্ত । তাঁদের আদিতে প্রণয়, মধ্য প্রণয়, অন্তে প্রণয় । প্রণয়, প্রণয়, প্রণয় ।

বিপিন । কেন বিস্ময় প্রণয়ের অভিনয় কি মন্দ ?

শরৎ । প্রণয়ের অভিনয় কেন, আমার মতে প্রণয়ই মন্দ ।

নন্দ ও বিপিন । ( সবিস্ময়ে ) সে কি, আপনি বলেন কি । আশ্চর্য্য করলেন যে ! জিজ্ঞাসা করি, আপনি কি কখন বিবাহ করবেন না ?

শরৎ । না, কখন না, জীবন থাকতে না । আচ্ছা, সে কথা এখন যাক্, আপনাদের প্রশ্ন করি, যে পচা পুরাণ প্রণালীতে অভিনয়-মঞ্চে আজকাল প্রণয়ের শ্রদ্ধা করা হয়, তাতে কি উপকার দর্শে ? সেই কোকিল, সেই চন্দ্র, সেই রতিপতি, সেই পঞ্চস্বর, সেই বসন্তকাল, সেই মলয়পবন—আর যার নাম শুনলে গায়ে জ্বর আসে, সেই মানভঞ্জন । বন্ধুবর নবগোপালবাবুর কথাটা মনে পড়ে গেল, বলতে হাঁসি পায় ! তিনি বলেন কি, যে আজকাল কি অভিনয় হয়, না—“বিধুমুখি, তোমার মুখ-চন্দ্র দেখে আমার মনঃপুষ্প প্রস্ফুটিত হল !” মহাশয়েরা, এ দেখে কি হয় ?

নন্দ । নাটকে প্রণয়ের মূর্ত্তি যে এত অধিক অঙ্কিত দেখতে পাওয়া যায়, তার নিগূঢ় কারণ আছে । আপনার স্মরণ রাখা কর্তব্য, প্রণয় আমাদের সর্বপ্রধান মনোবৃত্তি ।

শরৎ । পশুদের হতে পারে, মানুষের নয়—অন্ততঃ হওয়া উচিত নয় । আর তাই যেন হল, প্রণয়ে মত্ত হবার কি এই সময় ? আমাদের ঘৃণা নাই ? গরু গাধার মত দিবারাত্র শাসিত হচ্ছে, তা কি মনে থাকে না ? পদে পদে ইংরাজদের বিজাতীয় অহঙ্কার দেখেও কি রক্ত ধমনীতে বিদ্যুতের মত ধাবিত হয় না ? শরীর উত্তপ্ত হয় না ? মনে ধিক্কার জন্মায় না ? এখন অগ্নি ইচ্ছা ? অগ্নি অভিলাষ ?—

নন্দ । তবে বন্দুক ধরুন না কেন ?

শরৎ । ( দীর্ঘনিশ্বাসের সহিত ) এখনও সময় হয় নি

নন্দ । শীঘ্র হবে ?

শরৎ । আমরা যে হতভাগা কাপুরুষের জাত, দুশ—তিনশ বৎসরের মধ্যে যে হবে এমন আশাও মনে স্থান পায় না ! কিন্তু যতদিন না ভারতে স্বাধীনতা-সূর্য্য পুনরুদয় হয়, যতদিন না অত্যাচারের লোহিত মুণ্ড আমরা পদতলে লুণ্ঠিত, দলিত, করতে পারি,



ততদিন যে, প্রণয় কি অথ কোন পশুপ্তির অনুসরণ করবে, সে  
কৃতঘ্ন—পামর—নরাধম—দেশের কুসন্তান।

নন্দ। ( ব্যঙ্গস্বরে ) প্রণয়ও করবে না, বন্দুকও ধরবে না! তবে লোকে  
এখন কি করবে? কেবল বসে বসে ঘোড়ার ঘাস কাটবে  
না কি?

শবৎ। ( ঈষৎ বিরক্তভাবে ) মহাশয়, ইতর ভাষা প্রয়োগ না করলে যে  
কথাবার্তা কওয়া যায় না, তা জানতেম না!—কেন, সকলে সমবেত  
হয়ে, জাতীয় অজ্ঞানান্ধকার দূরীকরণের চেষ্টা করবে—দেশীয় কৃষি,  
বাণিজ্য ও শিল্পের উন্নতি করবে—ভারতাস্তরীণ সৌহার্দ্য সংস্থাপন  
ব্রতে ব্রতী হবে। প্রেমের ক্রীতদাস দ্বারা এ সকল সুসম্পন্ন হওয়া  
অতিশয় কঠিন।

বিপিন। আপনার ওটা বিষম ভ্রম। যার স্ত্রীপুত্র আছে, তার দেশের  
প্রতি যতটা মমতা জন্মায়, রাজা কোন অত্যাচার করলে, অথায়  
রকম কোন কর স্থাপন করলে, তার যতটা আন্তরিক, মর্মভেদী  
কষ্ট উপস্থিত হয়, একজন অপ্রণয়ী, অবিবাহিত পুরুষের ততটা হয়  
না—হতে পারে না।

শবৎ। আপনাকে—

নন্দ। ( ঘড়ি দেখিয়া, ব্যস্তভাবে, বিপিনের প্রতি ) ভাই, ৬।০টা হল,  
আজ এইখানেই বেদব্যাসের বিশ্রাম হোক; আমাদের আবার  
নীলকমলবাবুর বাড়ী হয়ে যেতে হবে। আর একদিন এসে শবৎ-  
বাবুর সঙ্গে এ-বিষয়ে ভাল করে তর্ক করা যাবে।

শবৎ। আমাদের সুভায় একদিন এই বিষয়টা উত্থাপন করলে হয় না?

নন্দ ও বিপিন। সেই ভাল কথা, তা আজ আমরা এখন আসি। (উত্থান)

শবৎ। ( উত্থানপূর্বক ) আস্থন।

[ সকলের প্রস্থান।

## দ্বিতীয় গর্ভাঙ্ক ।

কলিকাতা—ইড্‌ন্‌ গার্ডন ।

কজন গায়নের প্রবেশ ।

গায়ন ।

গীত

রাগিণী-পুরবী—তাল আড়া ।

বাজিল হৃদয়-বীণা হেরি উজান-সুন্দর ।  
আনন্দ-নিবারণ-রূপে সেজেছে ধরণী মনোহর ॥  
মোহিনী প্রকৃতি-সতী, ফুল কুমুদ, মালতী,  
সুধাংশু-রক্ত-ভাসে, হাসিছে সদা মৃদু মধুর ।  
যত বৃটন-সন্তান, সহ দারা পুত্রগণ,  
আনন্দে মগন হয়ে, মিলে সবে করিছে বিহার ॥  
রণবাণ ভীম-রোলে, সুরভি-বায়ু-হিল্লোলে,  
ঘোষিছে বীর-গরবে, ইংরাজের বিক্রম অপার ।  
হায় মম দেহ, মনঃ, ব্যথিত রে নিশিদিন ;  
কে পারে ভুঞ্জিতে সুখ, পায় যার দাসত্ব-নিগড় ॥

[ গায়নের প্রস্থান ]

শরৎ বাবুর প্রবেশ ।

শরৎ । বেস্ বাতাস আসছে, এইখানে একটু বেড়াই ।—নন্দ আর  
বিপিনটার সঙ্গে তর্ক করে মাথা ধরে গিয়েছে । ( পরিক্রমণ )  
বাঃ, কি মনোহর ! ( দীর্ঘনিশ্বাসের সহিত ) কিন্তু এসব  
মহাপুরুষদের অগ্রগৃহে ভোগ করছি মাত্র । ইচ্ছা হলেই দেবতারা  
নিয়ম করতে পারেন, বেলা ৫টা থেকে ৭টা পর্যন্ত ধবল মূর্তি ভিন্ন  
আর কেউ এখানে বেড়াতে পারবে না ।—চতুর্দিকেই বিজাতীয়  
প্রভুত্বের চিহ্ন দেদীপ্যমান । ( দক্ষিণমুখ হইয়া ) সম্মুখে ফোর্ট  
উইলিয়মের ভীষণ মূর্ত্তা—বঙ্গের জীবন্ত পরীবাদ বিরাজমান ।  
যেন কাপুরুষ বঙ্গসন্তানদের তারস্বরে বলছে—“সাবধান, ভ্রমে  
স্বপ্নেও স্বাধীন হ’তে অভিলাষ কর না—কি যদিও কর, প্রকাশ  
কর না । আমার নির্মাতারা বিশ্বদর্পহারী—ভুবনবিজয়ী—বঙ্গ-

বিদ্যুৎপানি। যদি প্রহারিত মারমেয়ের জ্বাশ, যদি ক্রীতদাসের বেশে আমার নিকট আসিতে চাহ, আইস,—আপত্তি নাই। কিন্তু বিদ্রোহীভাবে—অস্ত্রহস্তে—আমার নিকট আসিতে কদাচ সাহস করিও না। নিমেষ-মধ্যে তোমাদের সমুপস্থ রক্ত শীতল হইবে।” (দীর্ঘনিশ্বাসের সহিত) ফোর্ট উইলিয়ম! যদি আমরা নিতান্ত স্বার্থপর ও ইন্দ্রিয়পরায়ণ না হয়ে কিয়ৎপরিমাণেও মনুষ্য নামের অধিকারী হতাম, তাহলে তোমার এই উদ্ধত বাক্য এতদিন সহ্য করতে হত না, তুমি কোন্‌কালে ভূমিশায়ী হতে,—তোমার একখানি ইষ্টকের উপর আর একখানি থাকত না। কিন্তু যারা দেশের শোচনীয় অবস্থার বিষয় সপ্তাহান্তেও একবার করে ভেবে থাকেন, তাঁদের সংখ্যা আঙ্গুলে গণনা করা যায় বল্লেও বোধ হয় বড় অত্যাুক্তি হয় না। শিক্ষার অভাবে আর কুসংস্কার-বশে জন্মভূমির অঙ্গ-প্রত্যঙ্গ একেবারে স্পন্দহীন হয়ে পড়েছে। এ উৎকট রোগের প্রতিবিধান করতে যে কত বৎসর, কত শতাব্দী লাগবে, তা বলা যায় না। (দীর্ঘনিশ্বাস পরিত্যাগ)।—ভারতের অবনয় এত গভীর ও সর্বগ্রাসী যে এই ঘৃণিত পরাধীনতার স্থায়িত্বই এখন আমাদের ভাবী উন্নতির একমাত্র পথ হয়ে দাঁড়িয়েছে। সমাজের অন্তঃস্থল পর্যন্ত ভীষণ ব্যাধি-সমাচ্ছন্ন। এ অবস্থায় ইংরাজরাজের বিরুদ্ধে অস্ত্র ধারণ করতে যে পরামর্শ দেয়, বা ইচ্ছা প্রকাশ করে, সে শুদ্ধ মূঢ় অবিবেচক নয়—দেশের শত্রু।

হরিদাস বাবুর প্রবেশ।

শরৎ। আস্তে আস্তে হয়, বেড়াতে আসা হয়েছে?

হরি। আস্তা হাঁ তাও বটে, আর আপনার সঙ্গে দেখা করবার জন্তও বটে।

শরৎ। আমি এখানে এসেছি, তা আপনি জানলেন কেমন করে?

হরি। আপনার বাসায় গিয়েছিলেম, আপনার একজন চাকর বলে দিলে।

শরৎ। আপনার রচনা কতদূর প্রস্তুত হল?

হরি। প্রায় শেষ হয়েছে।

শরৎ । বাস্তবিকই কি, মহাশয়, আমরা বাদরের বংশ ?

হরি । তার কিছুমাত্র সন্দেহ নাই । এর স্বপক্ষে এক সহস্র প্রমাণ দেওয়া যেতে পারে, বিপক্ষে একটিও না । আপনাকে আমি এখনি বুঝিয়ে দিচ্ছি । মানুষ যে বাদর—

শরৎ । ( স্বগত ) বাবারে তরঙ্গ ওঠে বুঝি ! ( প্রকাশ্যে ) আজ আমার ক্ষমা করুন, আমার বড় মাথা ধরেছে, আর একদিন শুনব ।

হরি । ও কিছু নয় । আপনার মস্তিষ্কে একটু অধিক রক্ত গিয়েছে মাত্র, খানিক বেড়ালেই নেবে যাবে এখন । মানুষ যে—

শরৎ । মহাশয়, ইংরাজেরা বাদর এইটে প্রমাণ করে দিতে পারলে, আপনার কাছে বড় বাধিত হই ।

হরি । এর আর আশ্চর্য্য কি ? এত পড়েই রয়েছে ।

মল্লু মার্কট-গোত্র :

ইংরাজেরা মল্লু :

অতএব,

ইংরাজেরা মার্কট-গোত্র ।

এত যুক্তিশাস্ত্রের প্রথম সিদ্ধান্ত-দ্বারাই জানা যাচ্ছে । এখন শুনুন—

শরৎ । আবার একটা “গোত্র” রেখে দিলেন কেন ? ইংরাজেরা “মার্কট-গোত্র” না বলে, তারা মার্কট, এইটে সপ্রমাণ করতে পারলে আরও ভাল হয় ।

হরি । আপনার ইংরেজদের উপর এত বিদ্বেষ কেন ? ইংরাজেরা উৎকৃষ্ট সভ্যজাতির মধ্যে পরিগণিত, বিশেষ তাঁরা বিজ্ঞানের সমধিক উন্নতি-সাধন করেছেন ।

শরৎ । আজ্ঞা হাঁ, ভারতবর্ষের শাসন ইংরাজি সভ্যতার আর ইংরাজি বিজ্ঞানের জাজল্যমান উদাহরণ—স্বর্ণময় ফল । সে দিন কি হয়ে গিয়েছে, শোনেন নি ? অনন্তপুরে একজন খেতকান্তি ম্যাজিষ্ট্রেট আছেন । তাঁর কাছারির সম্মুখে একটি পুকুরিগীতে একজন স্ত্রীলোক নিত্য জল নিতে আসত । স্ত্রীলোকটি দেখতে বড় সুন্দরী নয়, কিন্তু যুবতী । প্রতিদিন তাকে দেখে দেখে মহাপুরুষ একদিন হঠাৎ— । ( ক্রোধ-বিকম্পিত-স্বরে ) তার পর— । হতভাগা স্ত্রীলোকটার স্বামী ম্যাজিষ্ট্রেট বাহাদুরের নামে

উচ্চতর বিচারালয়ে অভিযোগ করলে। অভিযোগ অগ্রাহ্য হল—প্রমাণাভাব। শুধু তাই হয়ে শেষ হল না। সত্যপরায়ণ, ক্রীষ্টধর্মাবলম্বী, নিষ্পাপ-দেহ—সাহেব ম্যাজিস্ট্রেটের নামে মিথ্যা অভিযোগ করেছে বলে, সেই স্ত্রীলোকটার আর তার স্বামীর তিন মাস করে কঠিন পরিশ্রমের সহিত কারাবাসের আজ্ঞা হল। হরি। আমি জানি না, আপনি যা বলেন তা সত্য কি মিথ্যা। কিন্তু সত্য হলেও, একজনের দোষের জন্য সমস্তজাতিকে কিম্বা সমগ্র গবর্ণমেন্টকে দোষী করা অন্যায়। যুক্তিশাস্ত্রের নিয়ম-বিরুদ্ধ।

শরৎ। আচ্ছা আরও শুনুন—

হরি। বিজ্ঞানের চর্চা বৃদ্ধি হলেই ওসব সেরে যাবে। এখন শুনুন, মনুষ্যে আর শাখামৃগে—

শরৎ। মহাশয়, রাত্রি হল, এখন বাড়ী যাওয়া যাক, চলুন।

হরি। আচ্ছা চলুন, পথে যেতে যেতেই আপনাকে বুঝিয়ে দেব এখন। মানুষ যে প্লবঙ্গের অবতার, এটি জগতের একটি গুরুতম সত্য, আর এর প্রথম প্রমাণ এই যে—

শরৎ। ( ঈষৎ হাস্তের সহিত ) যে মানুষে বাঁদরের মত কলা খেতে ভালবাসে ?

হরি। মহাশয়, এ সব উচ্চ বিজ্ঞানের প্রশ্ন, পরিহাসের উপযুক্ত নয়।

[ সরোবে প্রস্থান।

শরৎ। ( আলজ্জিত ভাবে ) আজ্ঞা না, আমার অপরাধ হয়েছে, অপরাধ হয়েছে—

[ হরিদাস বাবুর পশ্চাৎ পশ্চাৎ প্রস্থান।

### তৃতীয় গর্তাঙ্ক।

আনন্দপুর, মতিলাল বাবুর বাটী।

মতিলাল বাবু খট্টকোপরি শয়ন করিয়া আলবালায় ধূমপান করিতেছেন।

এক জন ভৃত্য পদসেবা করিতেছে—নিকটে বিনয় দণ্ডায়মান।

মতি। এই পাটা টেপ্, এই পাটা টেপ্—আরে বেটা ভাল করে টেপ্।

ভাত খাস্ নে না কি?—উহঃ হঃ, বেটাচ্ছেলে মেরে ফেলেছে



গো, বেটাচ্ছেলে মেরে ফেলেছে। ( ভৃত্যকে এক চপেটাঘাত পূর্বক ) বেটাচ্ছেলে, পাজি, ছবছর আমার বাড়ি রয়েছিস, এখনও পা টিপতে শিখলি নে? বেটাচ্ছেলে, পাজী—ই—ই? ( ভৃত্যের অশ্রমোচন )। হাঁ, হাঁ, অমনি করে টেপ্, তোর মাইনে বাড়িয়ে দেব। ( চক্ষু মুদ্রিত করিয়া ) আঃ বেশ হচ্ছে, বেশ হচ্ছে। ঐ খানটা টেপ্। আঃ। ( স্থানান্তর ও মধ্যে মধ্যে আলবাল টানন )। ( কিয়ৎবিলম্বে ) অরে, ঘটকী মাগী ঋষড়ে গিয়েছে?

ভৃত্য। সে ত অনেক ক্ষণ গিয়েছে।

বিনয়। আমার উপর কি আজ্ঞা হয়? আমাকে কি কালই যেতে হবে?

মতি। হাঁ, কাল প্রাতেই তোমাকে যেতে হবে। তোমাকে আমি এত দিন খেতে পরতে দিয়েছি—আর অনর্থক তোমাকে পুষতে পারি নে। তোমার জন্ত আমার অনেক টাকা খরচ হয়েছে। তোমার বাপের সঙ্গে আমার একটু আলাপ ছিল বই ত নয়? মরবার সময় তিনি ত আর তোমার জন্ত টাকা কড়ি কিছু রেখে যান নি?—তা কঁাদলে আর কি হবে, বাপু—কঁাদলে ত আর টাকা আপনি এসে তোমার পায় গড়িয়ে পড়বে না?

বিনয়। আজ্ঞা না, তার জন্ত কঁাদছি না। ( অশ্রমোচন )। আপনার আশ্রয়ে এতদিন প্রতিপালিত হয়েছি, এখন আপনাদের ছেড়ে যেতে হচ্ছে, তাই মন কেমন করছে।

মতি। তা, বাপু, এখন বিদায় হও। কাল সকালে দেখা না হলেও হতে পারে, আমার ঘুমটা কিছু বেলায় ভাঙ্গে, জানইত। সর্বদা কাগজ পত্র দেখতে হয়, আর তা ছাড়া অন্য কাজকর্মও আছে।

ভৃত্য। ( স্বগত ) কাজকর্ম ত কতই, কেবল বসে বসে ভড়র ভড়র করে শটকে টানা, সঙ্গে হলেই পা টেপান, ...। যে চড়টা মেরেছে, গালটা একেবারে ফুলে উঠেছে।

বিনয়। ( মাশ্রনয়নে ) তবে আমি বিদায় হই। আপনার কাছে কত অপরাধ করেছি,—মার্জনা করবেন।

[ ভূমিষ্ঠ হইয়া প্রণাম ও প্রস্থান। ]

মতি। ( গাত্রোথানপূর্বক ) মাংস তয়ের হল কিনা দেখে আয়। যা, শীগ্গির যা, যা না বেটা।



ভৃত্য। ( প্রস্থান করিতে করিতে স্বগত ) লাফিয়ে যাব না কি ? বড়-মাল্লুষ বাবুদের একবার বিধেতাপুরুষ গরিব করে ফেলে, আর আমাদের মত খেটে খেতে হয়, ত বাবু ভেয়েরা টেরটা পান। এই রকম করে দিন রাত্তির খাটায়, মুখ খিচায়, আর মারধর করে বলেই ত আমাদের মন ভেঙ্গে যায়, আপনার মনীব বলে একটা মায়া থাকে না, জিনিষ টিনিষ অপচ আর চুরি চামারি করতে ইচ্ছে যায় ?

[ প্রস্থান। ]

অপর পার্শ্ব হইতে গোপীনাথের প্রবেশ।

মতি। ( তীব্রভাবে ) কিরে গুপে, দেখেছিস্ ত ভাল করে ? চিনে নিতে পারবি ?

গোপী। ( শিরঃ সঞ্চালনপূর্বক ) হাঁ—।—। :। যাকে আমি একবার দু চক্ দিয়ে দেখেছি, তাকে হজম করেছি।

মতি। নজরে রাখিস্, কোথায় যায়, কি করে। বুঝেছিস্ ত ?

গোপী। হুঁ, হুঁ !

মতি। দু দিন চার দিন অন্তর আমাকে খবর দিবি। কিন্তু হুকুম না পেলে কিছু বাড়াবাড়ি করিস্ নে। যা যা বলে দিয়েছি, সব যেন মনে থাকে। ( গোপীনাথকে অর্থপ্রদানপূর্বক ) এখন এই নে। যেমন কাজ দিবি, তেমনি পাবি।

গোপী। আচ্ছা, তার জন্তে ভাবনা নেই, আমার ঠেঁয়ে ব্রহ্মাস্তর আছে।  
( হস্তস্থিত লগুড়া প্রদর্শন )।

মতি। তবে এখন যা, চাকর বেটারা আবার কে কখন এসে পড়বে।

[ গোপীনাথের প্রস্থান। ]

মতি। ( সাহ্লাদে ) ছোড়াটার টাকা খুব হাত করেছি, যা হোক।—কি করবে আমার ছোড়া ? হুঁঃ। যাই এখন, দু দিন হবিষ্টি করে আছি বল্লই হয়।—আজ একবার কামিনীর কুঞ্জে যেতে হবে। ভুবনমোহিনীকে আর ভাল লাগে না। চিরকাল কি একজনকে ভালবাসা যায় ? এ যে প্রকৃতির নিয়ম-বিরুদ্ধ, বাবা ! ( পরিক্রমণ ও চিন্তা )। কিন্তু আগুন নেবে না কেন ? সুখ

হাতে পেয়েও পাই নে কেন? ওয়ার্ড্‌স্ ইনিষ্টিটিউসনে যখন ছিলাম, সেই সময় থেকেই ত সকল বিজ্ঞান পারদর্শী হয়েছি, সুখের সাগর ক্রমাগত মগ্নন করছি, কিন্তু পিপাসা নিবৃত্তি হয় কই? আর তা ছাড়া মনটা কখন কখন এরকম চঞ্চল হয় কেন? কিছুই যেন ভাল লাগে না?—আঃ, দূর ছাই, আর ভাবতে পারি নে। দারু পিয়ো, বাবা, সব চলা যাগা। কালিদাস ভায়া ঠিক বলে গিয়েছেন,

“শ্রয়তে হি পুরালোকে বিষম্ম বিষমৌষধং।”

মদ আর মেয়েমানুষেই ব্যাধি চিন্তা জন্মায়, আবার তাতেই যায়।—সবই ফক্কিয়ার, বাবা, চক্ বুজলে আর কিছুই নয়। কেবল মাত্র সত্য—সংখ্যা এক। দু এক বেটা লেখা পড়া শিখে আবার “দেশহিতৈষী” হতে আরম্ভ করেছেন! আরে আমার দেশহিতৈষীয়ে! মরে গেলে বুঝি “দেশহিতৈষিতা” সঙ্গে যাবে? “জলবন্তুরলং।” যতক্ষণ আছে, বাবা, খাও দাও, মজা করে নেও।—কিন্তু তার পর?—তার পর আবার কি? যত গেঁজার ভেলকী। আমি ওসব মানিনে।—কিন্তু বাস্তবিক কি আমি সুখ ভোগ করছি, না কেবল সুখ পাবার আশায় এ দিক্ ও দিক্ ছট ফট করে বেড়াচ্ছি?—নাঃ, মিছি মিছি কতকগুলি ভাবলে আর কি হবে? পেটে “অগ্নিজল” পড়লেই সব সেরে যাবে এখন। যাই বল আর যাই কও, বাবা, এমন ওষুদ আর কিছু নেই।

দুই জন নর্তকীর প্রবেশ।

মতি। আরে, এ যে বিনা মেঘে বৃষ্টি!!

নর্তকীদ্বয়। আপনিই আমাদের মনে রাখেন না, তা বলে কি আর—  
আমরা আপনাকে ভুলতে পারি?

নৃত্য ও গীত।

রাগিনী খান্ধাজ,—তাল ঝুংরি।

তেরি পালংগ পরে কংকণ টুটা।

কর নেহি টুটা মেরি কংকণ টুটা॥

কংকণকো শোচমে, ভয় হয় বাওরি,  
শাস, ননদীকো, মিলন ছুটা।

মতি। বাঃ, কেয়াবাং হায়! চল, চল, বড় নাচঘরে চল। ও সব গান  
কি এখানে জমে?

[ সকলের প্রস্থান।

### চতুর্থ গর্ভাঙ্ক।

আনরপুর, মতিলাল বাবুর বাটীর অন্তঃপুর। বিনয় ও বিন্দুবাসিনীর প্রবেশ।

বিনয়। মা, আমি আপনার কাছে বিদায় হতে এসেছি।

বিন্দু। ( দুঃখিত স্বরে ) বাবা, নিতান্তই যাবে? কবে যাবে, বাবা?

বিনয়। মা, এখনই যাব।

বিন্দু। এখনই যাবে, বাবা?

বিনয়। হ্যাঁ, মা।

বিন্দু। ( অঞ্চলে চক্ষু মুছিয়া ) তুমি আমাকে কেমন করে ছেড়ে যাবে,  
বাবা? তুমি ছাড়া আমাকে মা বলে ডাকবার আর কেউ নেই  
যে, বাবা?

বিনয়। ( অশ্রুপূর্ণ নয়নে ) মা, বছর দুই পরে আবার আপনার সঙ্গে এসে  
দেখা করব।

বিন্দু। বাবা, ততদিন আর আমি বাঁচলে ত? বাবা, আমাকে মা বলে  
ডাকবার বুঝি এই শেষ হল। আমার ছেলে পিলে কিছু হয় নি।  
( অশ্রুত্যাগ পূর্বক ) তোকে মানুষ করে বিনয়, আর তোর মুখে  
মা মা শুনে, আমি সে দুঃখ এতদিন ভুলে ছিলাম। তোকে  
পেটের ছেলের মত দেখতেম। বাবারে আমার সে নেবান  
আগুন আজ আবার জলে উঠল। বাবারে, আর আমাকে ত  
কেউ মা বলে আমার কাছে আসবে না? আর ত আমাকে  
কেউ মা বলে ডাকবে না?

বিনয়। ( গদগদস্বরে ) মা, আপনি এত উতলা হবেন না। আমি  
আপনার পা ছুঁয়ে শপথ করছি, আমি আবার আসব। শীঘ্রই  
আসব। এখন আশীর্বাদ করুন, বিদায় হই।

বিন্দু। একটু দাঁড়াও বাবা, আমি আসছি।

[প্রস্থান।

ভুবনমোহিনীর প্রবেশ।

ভুবন। (দ্রুতভাবে) বাছা, যাবার আগে তুমি একবার আমার সঙ্গে দেখা করে যেও। আমার মাথা খাও, অতি অবিশ্রি একবার দেখা করবে।

বিনয়। (সঙ্কোচের সহিত) আপনার কাছে যেতে—

ভুবন। তোমার লজ্জা করে। (চক্ষু মুছিয়া) আমি অসতী বলে আমাকে সকলেই ঘৃণা করে। (বিনয়ের হস্ত ধরিয়া) বাবা, তোমার হাতে ধরে বলছি, একটবার আমার কাছে যাবে। তোমারই ভালর জন্ত বলছি।

বিনয়। (শাস্তর্থে) আমার ভালর জন্ত!

ভুবন। ই্যা বাছা, তোমারই ভালর জন্তে। তোমাকে এক জন প্রাণে নষ্ট করবার চেষ্টায় ফিরছে।

বিনয়। (সভয়ে) অ্যা, সে কি?

ভুবন। সে অনেক কথা, বাছা। (সশঙ্কিতভাবে) এখানে তা বলতে পারিনে। সে টের পেলে, তোমাকেও প্রাণে রাখবে না, আমাকেও না।

বিনয়। সে কে?

ভুবন। একটু আস্তে কথা কও, বাছা। কি জানি কোন শত্রুর, কোন খান দিয়ে শুনতে পেয়ে সর্বনাশ বাধিয়ে দেবে। যেও, বাছা, একবার আমার কাছে, সব জানতে পারবে। মদের মুখে আমাকে বলে ফেলেছে।

বিনয়। আ—চ্ছা যা—ব।

ভুবন। তোমার মুখে ফুল চন্দন পড়ুক।

[ভুবনমোহিনীর প্রস্থান।

বিনয়। লোকের কাছে মুখ দেখায় কেমন করে? মতিলাল বাবু সম্পর্কে দেবর, তারই—।—যাব কি? নাঃ, যাব বলেছি একবার যেতেই হবে।—ভয়ও হচ্ছে। কিন্তু আমার ত কেউ শত্রু নেই? কে

আমার অনিষ্ট আচরণ করবে? প্রয়োজনই বা কি? গরিবের সঙ্গে শত্রুতা করে লাভ?

বিন্দুবাসিনীর পুনঃপ্রবেশ।

বিন্দু। বাবা, এই টাকাগুলি নেও। তোমার পথের খরচে লাগবে।  
( দীর্ঘনিশ্বাস পরিত্যাগ পূর্বক, স্বগত ) বাবা, তোমারই টাকা তোমাকে দিচ্ছি।

বিনয়। আমার টাকা আছে যে, মা!—এই দেখুন। আর আমি টাকা নিয়ে কি করব, মা?

বিন্দু। তোমার ওতে কোন না কোন সময়ে উপকার হতে পারে। আমি ব্যগ্রতা কচ্ছি, বাবা, টাকাগুলি নেও। ফিরিয়ে দিও না, লক্ষ্মী বাবা আমার।

বিনয়। মা, আপনি আমাকে এমন করে বলছেন কেন? আমি কি কখন আপনার কথা অবহেলা করেছি? মা, জ্ঞান হয়ে অবধি আপনাকেই মা বলে জানি। আপনার কথা কি কখন অবহেলা করিতে পারি? এই দেখুন, আমি টাকাগুলি নিলেম।

বিন্দু। বাবা, তোর জন্তে আমার পোড়া মায়াটা বেড়ে উঠেছে যে, বাবা! আর আমাকে কে এমন করে কথা বলবে, বাবা? ( রোদন )।

বিনয়। ( সশ্রনয়নে ) মা, একটু ধৈর্য ধরুন। বেলা হল, আমাকে আশীর্বাদ করে বিদায় দিন।

বিন্দু। তোমাকে আর কি আশীর্বাদ করব, বাবা? এই আশীর্বাদ করছি, যে দেব-ব্রাহ্মণে যদি আমার ভক্তি থাকে, আমি যদি একমনে পতিসেবা করে থাকি, তোমার কখন কোন বিপদ হবে না, আর যদিই হয় ত থাকবে না, কেটে যাবেই যাবে।

বিনয়। মা, আমার ভয় হচ্ছে, এই বাড়ী থেকে বেরুলেই আমার কি একটা বিপদ হবে, কিন্তু আপনার আশীর্বাদ কখন বৃথা হবে না। মা, তবে এখন বিদায় হই। আহা, মা কথাটা কি মধুর! দেশে বিদেশে, বিপদে আপদে, রাজপ্রাসাদে কি কারাগারে, একবার মুখে উচ্চারণ করলেই মনের অর্ধেক দুঃখ লাঘব হয়। ( অশ্রু মুছিয়া ) মা, তবে আসি।

বিন্দু। ( সরোদনে ) চল বাবা, তোমাকে দরজা পর্যন্ত এগিয়ে দিয়ে  
আসি বাবা, তোকে ছেড়ে কেমন করে থাকব, বাবা, কেমন  
করে থাকব রে ? ( অতিশয় রোদন )।

[ উভয়ের প্রস্থান। ]



# হামির

[ সুরেন্দ্রনাথ মজুমদার ]

হামির	চিতোরের ভূতপূর্ব রাণা ভীম সিংহের পৌত্র ।
কুঞ্জর সিংহ	হামিরের মন্ত্রী ।
সুরতান	} ঐ পারিষদ ।
জলন্ধর	
উদয় ভট্ট	
মালদেব	চিতোরের শাসনকর্তা
জাল	মালদেবের মন্ত্রী ।
বীলন দেব	মালদেবের পিতৃব্য
বনবীর	} ঐ পুত্রদ্বয়
হরি সিংহ	
শ্রীগণ	
কমলা	মালদেবের স্ত্রী
লীলা	ঐ কন্যা
বীরণ	লীলার সখী
পান্না	ঐ ধাত্রী

## দ্বিতীয়াক্ষ ।

কেলবারা পর্বতের অধিত্যকায় হামিরের বাসস্থান ।

( হামির, সুরতান ও জলন্ধর আসীন )

হামি । না সুরতান ! জলন্ধর যা বলছে সে সত্য ; চিতোর আক্রমণের সময় এখনও উপস্থিত হয় নাই ।

সুর । মহারাজ ! সময় কাকে বলেন ? শুভ তিথি নক্ষত্র সংযোগের নাম সময় ; না সময়ের অর্থ আর কিছু ?

জল । ঘটনা সংযোগের নাম সময় । অনুকূল ঘটনার সংযোগ না পেলে কোন কার্যই সিদ্ধ হয় না ।

হামি । সুরতান ! পিতৃব্যের পরলোক গমনের সময় তোমার স্মরণ হয় কি ?

সুর । আজ্ঞে বিলক্ষণ স্মরণ হয় ।

হামি । ( দীর্ঘনিশ্বাস ত্যাগে ) আঃ ! পিতৃব্যের উদার মূর্তি আমি সর্বদাই যেন দেখতে পাই । পিতৃব্য অন্তিম সময়ে আমার মস্তকে হস্তার্পণ করে বলেছিলেন “বৎস ! তুমি চিরজীবী হও, কুললক্ষ্মী অবশ্যই তোমাকে রূপা করবেন—চিতোরের নিমিত্ত তোমার পিতা, পিতামহ, পিতৃব্যেরা প্রাণার্পণ করেছেন—বাপ্পার বংশে তুমি একমাত্র সন্তান রৈলে—বৎস ! চিতোরের কথা যেন কখন ভুল না হয়” ।

জল । হা অজয়মল্ল ! সেরূপ মহাপুরুষ আর হবে না ।

হামি । পিতৃব্য আমাকে অতি গুরুতর কার্যের ভার দিয়ে গিয়েছেন,—যাবৎ সে কার্য সিদ্ধ না হচ্ছে তাবৎ আমি ঋণগ্রস্ত রয়েছি সুরতান ।

সুর । সেই জন্যই বলছি, যত সত্ত্বর সে ঋণ পরিশোধ হয় ততই সুরের বিষয় । মহারাজ ! এই কেলবারা হতে যখন যখন চিতোরের প্রতি দৃষ্টিপাত হয়, তখন শরীরে অগ্নিজ্বালা উপস্থিত হয় ।

হামি । সুরতান ! আর অল্পকাল অপেক্ষা কর, চিতোরে এখনও প্রচুর পরিমাণে পাঠান সেনা রয়েছে ।

সুর । মহারাজের সেনা সমুদয় মিবারে পরিপূর্ণ রয়েছে ;—দশম বর্ষের বালক অবধি অশীতিপর বৃদ্ধ পর্য্যন্ত কোন্ প্রজা হামিরের অনুগত নয় ? আপনার আদেশ মাত্রে যারা পৈতৃক বাসস্থান ছেড়ে, কোন কষ্টকে কষ্ট জ্ঞান না করে, দলে দলে এই সকল আহারহীন পর্বতে আসছে, চিতোর উদ্ধারের কার্যে তারা প্রাণ পর্য্যন্ত ব্যয় করতেও প্রস্তুত হবে, তাতে কিছুমাত্র সংশয় নাই ।

হামি । সুরতান ! যারা আমার জন্তে প্রাণ ব্যয় করতে প্রস্তুত, তাদের প্রাণের প্রতি আমার বিশেষ দৃষ্টি রাখতে হয় ;—তাদের প্রাণ ব্যয়ের দ্বারা আমার কার্যসিদ্ধ হবে কি না, আগে সে বিষয়ের মীমাংসা করা উচিত । পাঠানেরা অসভ্য বটে, কিন্তু রণদক্ষ ;—কতকগুলি অশিক্ষিত কৃষী প্রজাকে তাদের প্রতিকূলে প্রয়োগ

করে কেবল আমাকে প্রজাহত্যার পাপভাগী হতে হবে মাত্র।  
স্বরতান! আমার মনে স্থির বিশ্বাস আছে, পিতৃব্যের অন্তিম  
সময়ের আশীর্বাদ কখনই বিফল হবে না। কুলদেবতা আমাকে  
অবশ্যই কৃপা করবেন; চিতোর উদ্ধারের অমুকুল ঘটনা, স্বরতান!  
আমার অন্তরে অনুভূত হচ্ছে যেন এলো এলো;—আর অধিক  
অপেক্ষা নাই।

জল। মহারাজ! আপনি এমন প্রজাবৎসল না হলে, প্রজাদেরই বা  
আপনার প্রতি কেন এত অনুরাগ হবে? এই তিন দিন মাত্র  
ঘোষণা প্রচার করা হয়েছে—এর মধ্যে মিবারের সমুদয় প্রজাপল্লী  
জনশূন্য হয়েছে।

( কুঞ্জর সিংহের প্রবেশ )

হামি। কাকাজী সংবাদ কি?

কুঞ্জ। মহারাজ! সংবাদ সমস্তই মঙ্গল—প্রায় কোন পল্লিতেই আর  
প্রজা নাই। কেলবারায় সমুদয় সংকুলান হবে না বলে অধিকাংশ  
পশ্চিমের পর্বতে পাঠিয়ে দিয়েছি।

হামি। তাদের সব বন্দেজ করে দেওয়া হয়েছে?

কুঞ্জ। আজ্ঞে তা সব দেওয়া হয়েছে।

হামি। কাকাজী! আজ কাল চিতোরের কোন সংবাদ পেয়েছো?

কুঞ্জ। আজ্ঞে পেয়েছি;—এইমাত্র উদয় ভট্ট চিতোর থেকে এনেছেন।

হামি। উদয় ভট্ট কোথা?

কুঞ্জ। মহারাজের অনুমতির অপেক্ষায় বাইরে আছেন।

হামি। যাবৎ চিতোর উদ্ধার না হবে, তাবৎ হামিরের এক কাজ ভিন্ন অণু  
কাজ নাই;—কোন ভোগ বিলাসও নাই,—সুতরাং হামিরের  
কাছে আস্বের কালাকাল নাই। কাকাজী! উদয়কে ডাক।

[ প্রতিহারীর প্রস্থান। ]

হামি। এইমাত্র স্বরতান বলছিলেন যে চিতোর আক্রমণ করার কার্যে  
আমাদের আর কালগৌণ করা উচিত নয়, কাকাজী তোমার কি  
ইচ্ছা?

কুঞ্জ। ইচ্ছা আর কর্তব্য এ দুয়ের কদাচ মিল হয়। চিতোর এইক্ষণেই

হস্তগত হক্ এ ইচ্ছা কার নয়, কিন্তু তাই বলে এইকণেই চিতোর আক্রমণ করা উচিত হয় না। বজ্রবিহীন অশ্ব, আর বিবেক-বিহীন বীরত্ব এ দুয়ের গতি অনিশ্চিত;—কোথায় দাঁড়াবে কিছুই বলা যায় না।

( প্রতিহারী সহ উদয় ভট্টের প্রবেশ )

হামি। ভট্টরাজ ! সংবাদ কি ?

ভট্ট। মহারাজ ! সেই পুরাতন সংবাদ, চিতোর যবনের হস্তগত রয়েছে।

হামি। তুমি চিতোর হতে আসছো ?

ভট্ট। আজ্ঞে।

হামি। যবনাধম মালদেব কি অবস্থায় আছে ?

ভট্ট। আজ্ঞে, বোধ হলো মালদেব বড় সুখে নাই।

হামি। কিরকম ? তুমি কিরূপে তার অসুখের কথা জ্ঞাত হলে ?

ভট্ট। মহারাজ ! চতুর লোকে চিত্র চাপতে চেষ্টা করে,—কিন্তু তা হয় না। চোখে সব ব্যক্ত করে দেয়, নয়নমুকুরে মনের প্রতিবিম্ব স্পষ্টই প্রকাশ পায়;—রোগ, শোক, হর্ষ, বিষাদ, চোখে এ সকলি বলে দেয়, এমন ঘরের শত্রু আর নাই।

হামি। ভট্টরাজ ! যারা কপটতার কপাট এটে থাকে, তাদের চোখে কি মনের প্রতিবিম্ব পড়তে পায় ?—যারা মনে কান্দে মুখে হাসে তাদের মন দেখা বড় কঠিন।

ভট্ট। মহারাজ ! যারা চিত্র চর্চায় প্রবীণ হয়েছে, তাদের কাছে কপটতার কপাট অতি স্বচ্ছ আবরণ। যার হৃৎপদ্য অপ্রসন্ন তার মুখপদ্য কিছুতেই প্রফুল্ল হয় না, সে হাসতে পারে না,—দাঁত দেখায় মাত্র। মালদেবেরও সেইরূপ অবস্থা;—বাইরে প্রচুর সুখ সম্পত্তির ভান,—কিন্তু অন্তরের ভাব অতি মলিন;—বোধ হয় পাঠানদের সঙ্গে মালদেবের সদ্ভাব নাই।

হামি। ভট্টরাজ ! চিতোরে পাঠান সেনা কত দেখেচ ?

ভট্ট। পাঠান সেনা পাঁচ হাজার আছে। মহারাজ ! চিতোরে কিছু অর্থ উপার্জনও হয়েছে।

হামি। চিতোরে অর্থ উপার্জন হলো কিরূপে ?

ভট্ট। কোন একটা উপলক্ষ না হলে কিরূপে সব সংবাদ আহরণ করি, এইজন্তে শার্ঙ্গী বাজিয়ে পথে পথে ঘরে ঘরে গান করে বেড়াই। চিত্তোরে নাম হয়েছে পাগলা ভাট। যেখানে জীলোক প্রাচীন বা বালক দেখি, সেই খানেই বসে গান করি, এইরূপে সংবাদ সংগ্রহও হয়েছে, কিছু অর্থও হাত লেগেছে। প্রার্থনা ভৃত্যের আহরণ রাজভাণ্ডারে লওয়ার অনুমতি হয়।

হামি। এ কত টাকা ?

ভট্ট। মহারাজ ! দুইশতের কিছু কম।

হামি। এটাকা তুমিই গ্রহণ কর ; তোমার ত অর্থের প্রয়োজন আছে।

ভট্ট। মহারাজ ! আমার বিশেষ প্রয়োজন নাই ; আমার একমাত্র উদর—কালক্রমে তারও তাদৃক অগ্নি নাই, দিনান্তে একবার আহার হলেই যথেষ্ট।

( অদূরে কোলাহল শ্রবণ )

হামি। কাকাজী ! দেখ এসকল কোথাকার প্রজা আসছে।

( প্রজাগণের প্রবেশ )

প্রজাগণ। জয় হামির মহারাজের জয়।

১ম প্র। মহারাজ ! আমরা এমনি গাঁ ছারখার করে আগুণ লাগিয়ে এসেছি, এখন আমাদের কি গতি করবে কর।

২য়। ( সরোদনে ) আমাদের কাচ্ছাবাচ্ছা বেগর আহারে মরে গেল।

হামি। তোমাদের কোন ক্লেশ হবে না, আমি তোমাদের থাকবের স্থান, আহারের সামগ্রী এ সব প্রস্তুত করে রেখিছি।

৩য়। হায় ! হায় ! খেতের জোয়ান ফসলে আগুণ দিয়ে এসেছি, কারু যুগ্মী বেটা মলে বুঝি এমন শোক হয় না। ( রোদন )

প্রাচীনা স্ত্রী। বাবা মহারাজ ! তুমি আমাদের মা বাপ বেটা পুত্রুর ; আমাদের আর কেউ নাই।

১ম। হায় হায় সোণার মিমার ছারখার হয়ে গেল।

হামি। তোমরা কেন্দ না—কিছু চিন্তা কোরো না,—অতি অল্প দিনের মধ্যে তোমরা সব পাবে, যার যেখানে যেমন ঘর ছিল, সেইখানে তার তেমনি ঘর প্রস্তুত করে দেব—যার যে ভূমি ছিল, পাঁচ

বৎসরের জন্তে সেই ভূমি তাকে নিকর দেওয়া বাবে। এহলে তু তোমরা সন্তুষ্ট হবে? দেখ যবনের অধিকারে বাস কল্লো পরকাল নষ্ট হয়।

প্রজাগণ। না বাবা! আমাদের প্রাণ যায় থাক; কিন্তু পরকাল খোয়া-  
বোনা;—মোছলমানের রাজ্যে বাস করবোনা।

হামির। কিছু দিনের জন্তে তোমরা এইখানে বাস কর, তার পরে আবার সব পাবে। কাকাজী! তুমি এদের নিয়ে যেয়ে সমুদয় বন্দেজ করে দেও।

কুঞ্জর। এসো তোমরা আমার সঙ্গে এসো।

[ প্রজাগণের সহিত কুঞ্জর সিংহের প্রস্থান। ]

প্রজাগণ। জয় বাগ্মা কি জয়, জয় খোমানকা জয়! জয় হামির কি জয়।

হামির। যারা রাজা হয় তারা কি স্বার্থপর। সহস্র ব্যক্তিকে কষ্ট দিয়ে, সহস্র ব্যক্তির প্রাণ নষ্ট করে তারা আপনাদের প্রয়োজন সাধন করে। এই সকল বালক বৃদ্ধ স্ত্রীলোক, এরা পরম স্থখে ছিল, আমিই এদের ক্লেশের কারণ হলেম।

( কুঞ্জর সিংহের প্রবেশ )

কুঞ্জর। মহারাজ! আমাকে ফিরে আসতে হলো।

হামির। কেন কাকাজী?

কুঞ্জর। মহারাজ! চিতোর থেকে একজন দূত এসে উপস্থিত।

হামির। চিতোরের দূত,—কর প্রেরিত?

কুঞ্জর। মালদেবের প্রেরিত।

হামির। তার বক্তব্য কিছু ব্যক্ত করেছে?

কুঞ্জর। তার বক্তব্য অতি আশ্চর্য্য বিষয়।

হামির। কিরূপ?

কুঞ্জর। মালদেবের এক কন্যা আছে; সেই কন্যার সঙ্গে মহারাজের বিবাহ দেওয়ার মানসে মালদেব দূতের দ্বারা নারিকেল পাঠিয়ে দিয়েছে!

( সকলের নীরবে অবস্থান )



ভট্ট। মহারাজ ! আপনি নারিকেল গ্রহণ করুন, মালদেবের কন্যাকে আমি স্বচক্ষে দেখেছি, কন্যা লক্ষণাক্রান্ত—আমার হৃদয়ে বলছে এ প্রস্তাব আপনার পক্ষে শুভসূচক।

কুঞ্জর। শুভসূচক কি অশুভসূচক তা কে বলতে পারে ? ভট্টজি ভবিষ্যতের উদর অন্ধকারাচ্ছন্ন, তাতে কার দৃষ্টি চলে ?

স্বর। এটি নিশ্চিত জালের দূরভিনক্ষির জাল ;—তব্বর গৃহস্থের সঙ্গে যে আত্মীয়তা করতে চায়, এর তাৎপর্য কি ?

হামির। জলধর তোমার মত কি ?

জল। মহারাজ আমি কিছুই বুঝতে পাচ্ছি নে, কার্যের ফল শুভ হবে কি অশুভ হবে, সে দৈবায়ত্ত, কিন্তু মানুষের বিবেচনা করে কার্য করা উচিত।

হামির। কাকাজী কিছু অবধারিত কর।

কুঞ্জর। এবিষয়ের কর্তব্য অবধারণে অধিক চিন্তার আবশ্যক হচ্ছে না। মালদেবের কন্যার পাণিগ্রহণার্থে আপনাকে চিত্তোরে যেতে হবে,—অন্ততঃ একরাত্র আপনাকে মালদেবের আশ্রয়ে অবস্থান করতে হবে ; এইটী স্মরণ করলেই ও বিষয়ের কর্তব্য আপনিই অন্তরে উদয় হবে।

হামির। তবে নারিকেল গ্রহণ করা কাকাজী তোমার অভিপ্রেত নয়।

কুঞ্জর। আজ্ঞে না।

হামির। স্বরতান, জলধর, ভট্টরাজ তোমাদের মতামত ব্যক্ত কর।

স্বর। মালদেবের কন্যা কি, ইন্দ্রের ইন্দ্রাণী পেলেও আপনার শত্রুর গৃহে যাওয়া হয় না।

( হামিরের জলধর প্রতি দৃষ্টি )

জল। মহারাজ ! আমারও ঐ মত।

ভট্ট। মহারাজ ! আমার অপরাধ ক্ষমার আজ্ঞা হয় ; —আমি সামান্য ব্যক্তি,—রাজমন্ত্রীও নয়,—রাজপারিষদও নয়,—সন্ধিবিগ্রহের জটিল পন্থার পথিকও নয়, কিন্তু মহারাজ ! আমার সরল হৃদয়ে বলছে যে এ বিবাহের প্রস্তাব আপনার পক্ষে অনুকূল ঘটনা ; আপনি অসংশয়ে নারিকেল গ্রহণ করুন।

কুঞ্জর। সেকি ভট্টরাজ ! একরূপ মন্ত্রণা প্রদান করা তোমার উচিত হয়

না। এক রমণীর নিমিত্ত চিতোর ছারখার হয়েছে ; সেই চিতোর উদ্ধারের এক আশা অবশিষ্ট আছে মাত্র, মহারাজ ! সামান্য রমণীর নিমিত্ত সে আশার মূলচ্ছেদ করবেন না।

হামি। ( ঈষৎ হাস্য ) কাকাজী ! হামিরের চিন্তে চিতোর ভিন্ন আর কোন চিন্তাই নাই। পৃথিবীতে রমণী অনেক আছে, কিন্তু চিতোর এক ভিন্ন আর নাই। কাকাজী ! স্বপ্নেও আমার অন্তরে ভোগ বাসনার উদয় হয় না। আমি মিবারের সমুদয় প্রজাকে ভোগ সুখে বঞ্চিত করেছি, আমার চিন্তে সে চিন্তা চির প্রদীপের ন্যায় জ্বলছে।

কুঞ্জ। আমার বক্তব্যের সে মর্ম নয়। আমি মহারাজকে ভৎসনা করি নাই।

হামি। কাকাজী ! তুমি অবশ্যই ভৎসনা করতে পার। পিতৃব্য আমাকে তোমাদের হস্তে সমর্পণ করে গিয়েছেন—বিশেষত তুমিই আমার শিক্ষা বিধানের কর্তা। আমার বক্তব্য এই যে,—মালদেবের সঙ্গে আমাদের যেরূপ সম্বন্ধ, তাতে এরূপ প্রস্তাব কিরূপে উঠলো ? বালকেও বুঝতে পারে যে এ সম্বন্ধের প্রস্তাব অসম্বন্ধ প্রলাপ। আমি বিবাহের প্রস্তাবে পুলকিত হয়ে পরম শত্রুর গৃহে যাবো, মালদেব স্বয়ং অতি নির্কোষ না হলে আর আমাকে এরূপ নির্কোষ স্থির করতে পারে না। কিন্তু আমি জানি মালদেব অতি চতুর। তার কর্মচারী জালেরও প্রশংসা শুনেছি। নারিকেল গ্রহণ করা না করা পরের কথা, আগে তার অভিসন্ধি অবধারণ করার আবশ্যক।

কুঞ্জ। পরের চিন্তা অন্ধকার ঘর, তার ভিতর কি আছে কি বলতে পারি ? তবে এই বলা যেতে পারে যে মালদেবের অবশ্যই কোন ছুঁট অভিসন্ধি আছে।

হামি। ভট্টরাজ ! বলতে পারো যে সকল পাঠানেরা চিতোরে আছে তাদের সঙ্গে মালদেবের সম্ভাব আছে কি না ?

ভট্ট। আজ্ঞে মালদেবের সঙ্গে পাঠানদের সম্ভাব নাই।

হামি। হঁ—তুমি বলছিলে যে মালদেবের কন্যাকে তুমি দেখেছো ?

ভট্ট। আজ্ঞে দেখেছি।

হামি। কোথায় দেখেছো ?

ভট্ট। মালদেবের অন্তঃপুরে।

হামি। মালদেবের অন্তঃপুরে কি উপলক্ষে প্রবেশ কল্যো ?

ভট্ট। আজ্ঞে মালদেবের কন্যাকে গান শোনাতে।

হামি। কি গান শোনালে ?

ভট্ট। আজ্ঞে পদ্মিনীর গীত।

হামি। মালদেবের কন্যার কাছে তখন আর কেউ ছিল ?

ভট্ট। আজ্ঞে তাঁর সহচরী এক জন ছিল।

হামি। গান শুন্বের সময়ে তারা পরস্পর কিছু কথা বার্তা কইলে ?

ভট্ট। আজ্ঞে না, মালদেবের কন্যা পাশাণপ্রতিমার গায় নিশ্চল ভাবে গান শুনলেন। গান শেষ করে আমি চেয়ে দেখলেম যে তাঁর বিশাল লোচনযুগল জলে পরিপূর্ণ হয়েছে।

হামি। ( কিঞ্চিৎকাল স্থিরভাবে থাকিয়া ) কাকাজী ! দূতকে ডাক,— আমি নারিকেল গ্রহণ করবো। আমার হৃদয় বলছে, এ প্রস্তাব শুভ ঘটনাসূচক। আমার অদৃষ্টে শত্রুর গৃহে মৃত্যু বা বন্দিভাব বা ঘটনা হবার হক, আমি তাতে কিছুমাত্র ভীত নই। চিতোর আমার পিতৃপুরুষের স্থান, এই উপলক্ষে অন্ততঃ একবার সে পিতৃতীর্থও আমার দর্শন করা হবে। আমি জন্মাবধি মাতুল-কুলে বাস করেছি—পিতাকে স্মরণ হয় না,—চিতোর কেমন কখনই দেখি নাই,—অতএব এই উপলক্ষে একবার চিতোর দর্শন করি ; কাকাজী ! তুমি অসম্ভব হৈও না।

কুঞ্জ। মহারাজ ! বিচার পূর্বক কার্য্য না করলে পরে পরিতাপ পেতে হয়।

হামি। কাকাজী ! চিতোর-লুক্কচিত্ত এই প্রস্তাব শুনে চিতোর দর্শনে অতিশয় ব্যাকুল হয়েছে ;—আর তার বিচার করুবার শক্তি নাই। কাকাজী ! দৈবের গতি অতি জটিল ;—আমার পিতামহ অতি বিচক্ষণ ব্যক্তি ছিলেন, ধন জন কিছুরই অপ্রতুল ছিল না, কিন্তু কিছুতেই চিতোর রক্ষা হলো না। যদি কুলদেবতা কৃপা করেন, তবে নিঃসহায় হামির অতি অবিবেচনার কার্য্য করেও চিতোর উদ্ধার করিতে পারবে। কাকাজী ! দূতকে ডাক।

[ প্রতিহারীর প্রস্থান।

ভট্ট । মহারাজ ! চিতোরের লোকের কাছে আমার পরিচয় ব্যক্ত হওয়া উচিত হয় না । অতএব অজুমতি হলে আমি এক্ষণে বিদায় হই ।  
হামি । ভালো ভট্টরাজ ! সময়ে আবার সাক্ষাৎ হবে ;—আমি তোমারি মন্ত্রণা অবলম্বন করলেম ।

[ ভট্টের প্রস্থান ।

( দূতের প্রবেশ )

দূত । মহারাজের জয় হোক ।

হামি । আপনি ব্রাহ্মণ ?

দূত । আজ্ঞে ।

হামি । প্রণাম, আসন গ্রহণ করুন ।

( দূতের উপবেশন )

আপনি মালদেবের প্রেরিত ?

দূত । আজ্ঞে ।

হামি । আপনি কি উদ্দেশে এসেছেন ? মালদেবের সঙ্গে আমাদের যেরূপ সম্বন্ধ, তাতে আপনার মুখ থেকে কোন শুভ প্রস্তাব শুনবের প্রত্যাশা নাই । আপনি দূত—বিশেষত ব্রাহ্মণ, নির্ভয়ে মালদেবের বক্তব্য ব্যক্ত করুন ।

দূত । মহারাজ ! ক্ষত্রিয়দিগের পরস্পর ব্যবহার বুদ্ধির অগম্য । আজ যাদের প্রবল বিগ্রহ, কাল তাদের মধ্যে বিবাহের উৎসব ।

হামি । ক্ষত্রিয়দের পরস্পর এইরূপ ব্যবহার আবহমান চলে আসছে বটে, কিন্তু মালদেবকে ক্ষত্রিয়ের মধ্যে গণনা করা যায় না ।

দূত । মহারাজ ! অগ্নি সন্তুত চোহান, ক্ষত্রিয় নয়, এ কথা কিরূপ ?

হামি । এই কারণে বলছি ; জাতির মূল আচার । সকল মনুষ্যেরই একরূপ অবয়ব, কেবল কার্যের প্রভেদ জাতি প্রভেদের কারণ । গলে সূত্র ধারণ করুল্যেই কি ব্রাহ্মণ হয় ? না ব্রহ্ম উপাসনাই ব্রাহ্মণত্বের কারণ ।

দূত । আজ্ঞে সে সত্য ।

হামি । ক্ষত্রিয় জাতির কার্য কি ? চতুর্দিকের ধর্ম রক্ষা, দুষ্টের দমন, দুর্বলের পালন, দান, যজ্ঞ, এই সকল কার্য যে করে, সেই ক্ষত্রিয় কি না ?

দূত । আজ্ঞে, ক্ষত্রিয়ের এই সকল কার্য্যই বটে ।

হামি । যে যবনের দাসত্ব স্বীকার কল্লে, সে ত স্বয়ংই বিধর্ম্মী, সে অশ্রের ধর্ম্ম রক্ষা করবে কি ? মোছলমানেরা সাক্ষাৎ কলির সন্তান ;— ভারত-ভূমির ধর্ম্ম লোপ করার উদ্দেশ্যেই এদের জন্ম । এরা ভারতের কি দুরবস্থা না করেছে ?—এরা যেখানে যায় সেই খানেই লোকের হাহাকার । ভারত-ভূমির এই বিভ্রাটের প্রতিকার করা কার কুলত্রত ? সে কার্য্য ধ্যানপরায়ণ ব্রাহ্মণের নয়,—অর্থ-গ্রাহী বৈশ্যের নয়,—সেবাচারী শূত্রের নয় ;—অজ্ঞধারী ক্ষত্রিয়ের প্রতিই বিধাতা সে কার্য্যের ভারপর্ণ করেছেন । আমার পূর্ব্ব পুরুষ সমরসিংহ সেই কর্তব্য কার্য্যের পালনে কাগ্গার নদী-তটে যবনের সমরে প্রাণার্পণ করেছেন, তাঁর বংশধর খোমানের যবন দমনের কীর্ত্তি ভুবনবিখ্যাত রয়েছে ;—আমার পিতামহ, পিতা, পিতৃব্যোরা—সকলেই সেই কর্তব্যের পালনে কলেবর পরিহার করেছেন ;—আমিও সেই কুলত্রত ধারণ করেছি ;—যাবৎ ভারতে যবন থাকবে, তাবৎ আমার বংশের এই কার্য্য, অতএব যে ব্যক্তি সেই যবনের দাস, তাকে আমি ক্ষত্রিয় বলতে পারি না ।

দূত । মহারাজ ! আপনি যা বলছেন সে সকলি সত্য, কিন্তু কালের প্রভাব অনিবার্য্য । কলিকালে স্নেহেরা পরাক্রান্ত হবে, জ্ঞানচক্ষু ঋষিগণ এ কথা পূর্ব্বই বলে গিয়েছেন, এখন কার্য্যেও তাই ফলছে,—কে .রোধ করতে পারে ? উচ্ছলিত সাগরের তরঙ্গ কর প্রসারণ করে কখনই রোধ করা যায় না । যিনি কালের প্রতিকূলচারী হন, তাঁকে পরিতাপের সঙ্গে পরিণামে অবশ্যই পরাভব পেতে হয় । যারা কালজ্ঞ, তারা নীরবে কালের কার্য্য সহ করেন ; কালকৃত কার্য্যের দোষ গুণ তারা অশ্রের প্রতি আরোপ করেন না । মহারাজ ! জীব নিতান্ত পরতন্ত্র, তার শক্তি কি ? তৃণক্ষেত্র যে তরঙ্গিত হয়, সে ইচ্ছাধীন নয়, অলক্ষ্য বাতাবীন যাত্র ।

হামি । বোধ হয় আপনি অনেক শাস্ত্র পড়েছেন, তাতেই এরূপ জটিল যুক্তির সঞ্চার হচ্ছে । আমাদের অনিক্ষিত সরল মনের সংস্কার



এই যে কালের কার্য যা হবার তাই হক্, আমার কার্য আমার সম্পাদন করা উচিত কি না, কাল আমার কর্তব্যের বৈরী হন হউন, কালের সঙ্গে সমরে আমি পরাভব পাই তাতেও কতি নাই; কার্য সফল হবে কি না সে চিন্তা আমার পক্ষে অনধিকার চর্চা, কারণ ফলাফল আমার আয়ত্ত নয়। কলিকাল এসেছে বলে কি কর্তব্য কার্যের অবসান হয়েছে? আপনি কি আর সক্ষ্যাবন্দনা করেন না?

কুঞ্জ। মহারাজ! ধর্মশাস্ত্রের বিচার করবের সময় আপনার এখন নয়; এখন উপস্থিত বিষয়ের আলোচনা করুন।

হামি। আপনার বক্তব্য বলুন।

দূত। মালদেব আপনাকে এই বাক্যে সম্ভাষণ করেছেন যে, বিষয় ব্যাপার সম্বন্ধে আপনার সঙ্গে তাঁর যে ভাব, কারণ বশত তাঁকে সে ভাব বিম্বৃত হতে হয়েছে। তিনি অগ্নির সন্তান,—আপনি সূর্যের পুত্র, আপনাদের উভয়ের মিলন নিতান্ত প্রার্থনীয়। উত্তম পাত্রে যে দান সেই দানই পুণ্যপ্রদ হয়, বিশেষত কন্যাদান সকল দান অপেক্ষা উৎকৃষ্ট, এই বিবেচনায় তিনি সকল বৈরভাব বিসর্জন করে এই প্রার্থনা কচ্ছেন যে মহারাজ তাঁর কন্যার পাণিগ্রহণ করেন। সেই উদ্দেশে কৌলিক প্রথানুসারে এই নারিকেল পাঠিয়ে দিয়েছেন।

হামি। তাঁর কন্যার পাণিগ্রহণার্থে আমাকে চিত্তোরে যেতে হবে?

দূত। আজ্ঞে তা ভিন্ন কিরূপে পাণিগ্রহণ করবেন?

হামি। পশু পক্ষীরাই লোভ বশতঃ জালে পড়ে,—মানুষ ত তত জ্ঞানহীন নয়।

দূত। মহারাজ! এ বিষয়ে আপনি কোন ছলনা চাতুরীর আশঙ্কা করবেন না। বিপক্ষের কন্যা বিবাহের উদাহরণ কল্লিয়ের মধ্যে অনেক দেখতে পাওয়া যায়,—বৈবাহিক ক্রিয়ার উপলক্ষে বৈষয়িক বিরোধের সম্বরণ করা কল্লিয়দের ব্যবহারসিদ্ধ ধর্ম।

হামি। সে সত্য, কিন্তু আলাউদ্দিন অতিশয় প্রবঞ্চক ছিল, মালদেব তারি প্রিয়পাত্র। বিবাহ উপলক্ষে কি আমাকে একাকী চিত্তোরে যেতে হবে?



দূত। পাঁচ শত সেনা সঙ্গে নিয়ে যেতে পারেন, কিন্তু তার অধিক না হয়।

হামি। চিত্তোরে পাঠান সেনা কত আছে ?

দূত। পাঁচ হাজার।

হামি। হুঁ ; ভালো তাই হবে। আমি নারিকেল গ্রহণ কল্লম। কাকাজী !  
ইহাকে উচিত মত পরিতোষিক প্রদান কর। বিবাহের দিন  
স্থির হয়েছে ?

দূত। আজ্ঞে আগামী কল্য শুভ লগ্ন আছে, যদি তাতে মহারাজের  
মত না হয় অন্য দিন স্থির করে সংবাদ পাঠান যাবে।

হামি। “শুভশ্রু শীঘ্রং” ভালো আগামী কল্যই আমি সন্ধ্যা সময়ে চিত্তোরে  
উপস্থিত হবো। কাকাজী ইহাকে পারিতোষিক দিয়ে বিদায় কর।

[ দূত ও কুঞ্জর সিংহের প্রস্থান।

স্বরতান। জলধর ! তোমরা অসন্তুষ্ট হইও না, একবার আমাকে অদৃষ্ট  
পরীক্ষা করিতে দেও।

স্বর। মহারাজ ! আপনার সকল কার্য্যেই আমাদের সন্তুষ্ট থাকা উচিত।

হামি। চল, যে সকল প্রজারা এসেছে, তাদের কি ব্যবস্থা হলো দেখা  
যাক।

[ সকলের প্রস্থান।

যবনিকা পতন।

তৃতীয়াক্ষ।

—:::—

প্রথম গর্ভাক্ষ।

চিত্তোর—মালদেবের বাটীর ভোরগসন্মুখে।

( মালদেব ও হরির প্রবেশ। )

মাল। হরি ! তবে আমি নিশ্চিত রইলুম। বরকে অভ্যর্থনা করে  
আনার ভার তোমার পর রইলো—আমি পাঁচ কাষে ব্যস্ত,—  
মাজে মাজে অস্তঃপুরে যেতে হচ্ছে।

হরি। যে আজে, অভ্যর্থনার জন্তে আপনি উদ্বিগ্ন হবেন না।

মাল। তোমরা বালক, এসব কাজ কখন করো নি, লৌকিক নিয়ম সব ভালো করে জান না, তাই বলে দিচ্ছি, অতি বিনয়-ভাবে বর-যাত্রীদের সম্ভাষণ করবে। অতি সামান্য ব্যক্তিকেও আমন্ত্রণ করে আপনার বাড়ীতে আনলে তাকে রাজার শ্রায় সম্মম করতে হয়, আর হামিরত রাজপুত্র,—বাগ্গার সম্ভান,—সূর্য্যবংশীয়।

হরি। আজে তা জানি।

মাল। তাই বলছি যেন কিছুতে ক্রটি না হয়। প্রসন্নবদনে, প্রিয়বাক্য, বিনয় ব্যবহার—লোকে এতে যত তুষ্ট হয়, পান ভোজনে বা ধন রত্ন দানে তত তুষ্ট হয় না।

হরি। আজে, অভ্যর্থনার বিষয়ে আপনি নিশ্চিত থাকুন, আমি অগ্রেই দূত নিযুক্ত করে রেখেছি, বরযাত্রীরা দূরে থাকতেই সংবাদ পাবো, আর অভ্যর্থনা করতে আমার সঙ্গে যারা যাবেন, তাঁহারাও সব প্রস্তুত আছেন।

মাল। ভালো ভালো, সকল কার্যেই এইরূপ উদ্যোগী হবে;—অগ্রে এইরূপ বন্দেজ করে রাখবে, আমি তবে যাই।

[ প্রস্থান। ]

হরি। মানুষ যত বড় হয়, তত এক রকম হয়,—এক কথা ফিরে ফিরে একশ বার। ( পরিশ্রম করিতে করিতে ) এ বিবাহও চমৎকার ! দেশে হামির ছাড়া আর বর ছিল না, কথা না, বার্তা না, একেবারেই বিবাহের সমুদয় স্থির হয়ে গেল।

( বনবীরের প্রবেশ )

বন। হরি কি বলছো ?

হরি। আজে বাবার কথা বলছিলাম।

বন। বাবার কথা কি বলছিলে ?

হরি। বাবা ফিরছেন, ঘুরছেন, আর এক এক বার এসে আমাকে বলছেন, “হরি দেখ যেন, অভ্যর্থনার ক্রটি না হয়।”

বন। হরি ! মানুষের বয়ঃক্রম যত পরিণত হয়, ততই আশঙ্কার ভাগ বৃদ্ধি হয়;—এটি স্বভাবসিদ্ধ নিয়ম।

হরি। তা যাই হক্, আপনাকে জিজ্ঞাসা করি, এ বিবাহ কি রকমে হলো ?  
বন। কেন হরি ? গিহলোটকুল, চোহানদিগের করণীয় ঘর,—অসংলগ্নত  
কিছুই হয় নি।

হরি। আজ্ঞে তা বলছি না। বলছি যার সঙ্গে প্রাণান্তিক বৈর, তার  
সঙ্গে সহসা বিবাহ সম্বন্ধ এ কি রকম ব্যবহার ? বিশেষতঃ  
আপনার অভিপ্রায় জেনেছিলেন কি না, বলতে পারি না,  
আমাকেত আগে কিছুই বলেন নাই। কাল সন্ধ্যার সময় শুন্লেম  
যে, কাল সন্ধ্যার সময়ে হামিরের সঙ্গে লীলার বিবাহ। যে শুন্ছে,  
সেই অবাক হয়ে, দুই চক্ষু স্থির করে থাকছে।

বন। হরি ! আমাদের এ সকল বিষয়ের আন্দোলন করবার প্রয়োজন  
নাই, কন্যা পিতার সম্পত্তি, কন্যার বিবাহে পিতার সম্পূর্ণ  
অধিকার ;—আমাদের পিতৃ আজ্ঞা পালন মাত্র কর্তব্য।

হরি। তাই হক্,—আমি অন্য বিষয়ের চিন্তা করছি।

বন। অন্য বিষয় কি ?

হরি। আমি চিতোরের কথা ভাবছি। হামির চিতোরে প্রবেশ করলে  
পরে কোন বিভ্রাট না হয়।

বন। ভাই ওসব চিন্তা ছেড়ে দেও। সম্পত্তি যত দিন যার ভোগে  
থাকবে, ততদিন অবশ্যই থাকবে, কিছুতেই যাবে না, তার পরে  
হস্তান্তর হবেই, কিছুতেই রক্ষা হবে না। এই চিতোর  
গিহলোটেরা পুরুষানুক্রমে ভোগ করেছে, এখন তোমরা ভোগ  
কচ্ছো, পরে কে ভোগ করবে, কে বলতে পারে ? যত বয়স  
হবে,—যত সংসার ব্যাপার দেখবে ততই লক্ষ্মীর লীলা কিরূপ  
বিচিত্র বুঝতে পারবে। ( কিঞ্চিৎ পরে ) বর আসবের সময়  
প্রায় আগত ;—তুমি প্রস্তুত হও।

হরি। আজ্ঞে এখনও কিঞ্চিৎ বিলম্ব আছে ; সূর্য্যদেব যদিও অলক্ষ্য  
হয়েছেন, তথাচ এখনও পৃথিবী পরিষ্কার রয়েছে,—রজনীর  
তামসিভাব অল্পভব হচ্ছে না। ( আকাশে দৃষ্টি করিয়া ) দেখুন  
বৃক্ষের পত্রাদি এখনও পৃথক পৃথক দেখা যাচ্ছে।

বন। আঃ—নীরস বিষয় ব্যাপার নিয়েই লোকে দিবা রাত্রি ব্যস্ত,—দিবা  
রাত্রির ভাব একবারও লক্ষ্য করে না। এক দিবা রাত্রির মধ্যে

জগৎ সংসারে কত নূতন নূতন ভাবের পরিবর্তন হচ্ছে, মনঃসংযোগ করে দেখলে অন্তরে অপূর্ব আনন্দের সঞ্চার হয়। দেখ দেখি, এই সন্ধ্যা সময়ের কেমন মধুর ভাব! গগনমণ্ডলের নীলিমা কেমন স্বচ্ছ,—কেমন স্নিগ্ধ! পশ্চিম দিকে প্রদোষ তারা প্রকাশ পাবার চেষ্টায় কেমন সজীবভাবে নিমেষ উন্মেষের অভিনয় দেখাচ্ছে! দেখে বোধ হচ্ছে, কেমন, যেন শ্যামলা সন্ধ্যা ছায়াপটে সর্বত্র ঢেকে একটি মাত্র চক্ষু বিকসিত করে সস্নিগ্ধভাবে দেখছেন যে, সূর্য্যদেব অন্তর্গত হলেন কি না। সন্ধ্যা সময়ের প্রতি নিমেষেই অনুভব হচ্ছে যে,—দিন যাচ্ছেন, রজনী আসছেন;—প্রতি নিমেষেই জগতে যামিনীর আধিপত্য পর পর প্রগাঢ় বলে প্রতীয়মান হচ্ছে,—দেখ, পর্ব্বতের শিরোভাগ ক্রমশই ধূমপুঞ্জের ন্যায় দেখাচ্ছে; তরুপত্রের অবকাশ সমূহ আর লক্ষ্য হয় না;—বস্তু সকলের আর সে পৃথক ভাব নাই;—সকলই পরস্পর বিজড়িত,—বিঘোর—বিলুপ্ত হয়ে আসছে। ছিদ্রতল নৌকা ক্রমে ক্রমে জলপূর্ণ হয়ে যেমন মগ্নমান হয়,—ক্রমে অন্ধকারাচ্ছন্ন পৃথিবীরও সেই ভাব অনুভূত হচ্ছে। দিগ্গল ক্রমশই নিম্প্রভ, নীরব, দিবাভাগের কোলাহল পূর্ণ প্রভাময়ী সে পৃথিবী এখন কোথায়! আহা! এ সকল কেউ দেখেনা,—এ সকল নির্বিকার আনন্দের উপভোগ কেউ করে না!

( ভূত্যাগণের প্রবেশ )

( তোরণের আলোক প্রজ্জ্বলিত করণ )

হরি। দেখিস্নরে, যেন তোরণের শিশি ভাঙেনা।

বন। এই যে, তোরণসজ্জা সমুদয়ই হয়েছে। তোরণতোড় ব্যবহার রাজপুত ভিন্ন অন্য কোন জাতিরই নাই; কেমন, হরি! আর কোন জাতির এ ব্যবহার আছে কি?

হরি। আজ্ঞে না। এমন ব্যবহার কোন জাতিরই থাকা উচিত নয়। আমার যদি কখন কন্যা সন্তান হয়, তবে তাকে স্বহস্তে মেরে ফেলতে হয় সেও স্বীকার, তথাচ তার বিবাহে এ অঘণ্ড ব্যবহার হতে দেব না।

বন। হরি! মনে কল্পেই জঘন্ট, নৈলে কিছুই জঘন্ট নয়।

( মালদেবের প্রবেশ )

মাল। এই যে বনবীরও এখানে আছে; হরি! কই তুমি অভ্যর্থনা করতে যাও নাই?

হরি। আজ্ঞে বর না এলে কার অভ্যর্থনা করতে যাবো?

মাল। কেন? সময়ত হয়েছে—হামির এত বিলম্ব করছেন কেন?

( বীর সহ কন্যাগণের প্রবেশ )

তোমরা এসেছো সব, ভালো ভালো, কিন্তু দেখ বাছাসকল বেশি গুণগোল করো না।

বীর। সে কি? আপনার জামাই ভুবনবিখ্যাত বীর, তাঁর সঙ্গে বেশি গুণগোল না করলে হবে কেন?

হরি। আমি আগে বলে রাখছি, যিনি খারাপ গান করবেন, তাঁর মাথাটি এই খানে থাকবে।

১ম কন্যা। ওভাই সে কি? চল তবে আমরা ফিরে যাই।

( কন্যাগণের গমনের উপক্রম )

মাল। আরে না না, হরি! তুমি অতি অবোধ, মঙ্গলকাজ,—কুলাচার, এতে কি ওসব কথা বলতে আছে? ( কন্যাগণের প্রতি ) না না তোমরা যেও না, তোমাদের যা ইচ্ছা হয় করো, কেউ কিছু বলবে না।

বন। দেখি তোমরা লড়ায়ের কি অস্ত্র শস্ত্র প্রস্তুত করলে, এগুলি কি? তীর, বাঃ অতি সুন্দর হয়েছে, এসব কি?

২য় কন্যা। এ ফাগ।

৩য় কন্যা। ভাই! তোরণ বড় উচু হয়েছে, আমি হয়তো উঠতে পারবো না।

৪র্থ কন্যা। সে কিরে ছুঁড়ী, সিঁড়ি দিয়ে উঠবি তার ভয় কি?

( দূতের প্রবেশ। )

দূত। মহারাজ! বরযাত্রীরা নিকটবর্তী।

মাল। হরি যাও, তোমার দলবল কোথায়? বাত্বকরেরা কই?

হরি। আজ্ঞে সকলি প্রস্তুত আছে। (দূতের প্রতি) তুমি যাও, আমার বৈঠকখানায় ভগবন্তকে সব সমেত আসতে বল।

[ দূতের প্রস্থান। ]

বীর। (কন্যাগণের প্রতি) চল এই বেলা আমরা উপরে যাই।

(কন্যাগণের তোরণোপরি আরোহণ)

(বান্ধুভাও আলোক মালা সহ হরিসিংহের দলবলের প্রবেশ)

মাল। হরি। উত্তম আয়োজন হয়েছে, যাও আর বিলম্ব করো না।

[ বান্ধু করিতে করিতে দলবল সহ হরিসিংহের প্রস্থান ]

বনবীর! কন্যাদায়ের চেয়ে আর দায় নাই—নির্বিব্রে লীলার বিবাহটি নির্বাহ হলে আমি নিশ্চিন্ত হই।

বন। তার সন্দেহ কি? কিন্তু লীলাকে আপনি শত্রুর হস্তে সমর্পণ করলেন।

মাল। বনবীর! হামির তোমার শত্রু, আমার শত্রু কিন্তু লীলাকে যখন বিবাহ করলে, তখন আর লীলার শত্রু রৈল না। কন্যা সৎপাত্রে সমর্পণ করিতে হয়, আমি তাই করলেম।

বন। নানা জনে নানা প্রকার আশঙ্কা করছে।

মাল। কেন আশঙ্কা কি?

বন। একে অচিন্তনীয় ঘটনা,—তায় সহসা হলো। লীলার বিবাহের দিনে সবাই শুন্লে যে আজ লীলার বিবাহ।

মাল। শোন বনবীর! জন্ম মৃত্যু বিবাহ এ তিনটি নিত্যস্ত দৈব ব্যাপার। কার উদরে কার ঔরসে কে কবে জন্মগ্রহণ করবে, কেউ বলতে পারে না, মৃত্যু কোন্ সময়ে কি উপলক্ষে এসে কাকে ধরবেন আগে কেউ জাণ্তে পায় না;—চিররোগী শয্যায় পড়ে, সকাতরে মৃত্যুকে আবাহন কচ্ছে, মৃত্যু তার কাছে না যেয়ে হয়ত যে তাকে একবারে ভুলে গেছে, সহসা তারি কাছে যেয়ে উপস্থিত হন। বিবাহও সেইরূপ দৈবের নির্বন্ধ। লীলার বিবাহ হামিরের সঙ্গে দৈব অবধারিত করে রেখেছেন, আমি কি করবো? দৈবের লিপি অখণ্ডনীয়।



বন। আজ্ঞে তা বটে। বরষাত্রীরা এসেছেন ;—বাণের শব্দ ক্রমশই নিকটবর্তী হচ্ছে।

মাল। লগ্ন সময়েরও আর অধিক অপেক্ষা নাই।

( ভৃত্যবর্গের ইতস্ততঃ ব্যস্তসমস্ত ভাবে ধাবমান )

১ম কণ্ঠা। ঐ দেখ ভাই! বরকে দেখা যাচ্ছে।

২য় কণ্ঠা। এই এলো আর কি?

মাল। আমরা এইখানে থাকুবো না, চল আমরাও একটু অগ্রসর হয়ে যেয়ে আবাহন করি।

( মালদেব ও বনবীরের অগ্রসর হইয়া গমন )

( বাণভাণ্ড সহ বরষাত্রী প্রভৃতির তোরণ সমীপে আগমন )

মাল। ওহে বাণকরেরা! একটু থাম, ( বাণ নিরুত্তি ) ( করপুটে হামিরের প্রতি ) মহারাজ! কোন প্রকার ক্রটি গ্রহণ করবেন না।

কুঞ্জ। শিষ্টাচারের কিছুই ক্রটি হয় নাই।

মাল। কুঞ্জর সিংহ! আস্থন্ আস্থন্ ;—আসূতে আক্রা হয়।

সুর। বাহুল্য শিষ্টাচারের আবশ্যক নাই ;—মহারাজ! সময় উপস্থিত ;—আর অপেক্ষা কি? তোরণ ভগ্ন করুন।

মাল। মহারাজ! লগ্নের সময় নিকটবর্তী ;—কৌলিক ক্রিয়া নির্বাহ করুন।

হামি। সুরতান্! তবে প্রবৃত্ত হই।

সুর। আজ্ঞে আর বিলম্ব কি? তোরণ রক্ষা করবেন যারা তাঁরা কোথায়? আসিবারে এসে বরের ভল্লের বল পরীক্ষা করুন।

( কণ্ঠাগণের দর্শন দান অন্ত্রপাত ও গীত )

পাহাড়ী পিলু—ধেম্টা।

জোর করে সাধের তোরণ ভাঙতে কে পারে।

কেন এ পাশ ও পাশ এ ধার ওধার কচ্ছে মিছে বারে বারে ॥

ঘুরিয়ে নেব তাগ পাবে না,

ফিরিয়ে নেব বাগ হবে না,

কার শাদি ছুঁতে অমতেতে, যা দিতে গে দেবতা হারে ॥

( হামিরের তোরণ ভাঙিতে চেষ্টা কিন্তু কণ্ঠাগণের কোশলে পরাভব )

স্বর। মহারাজ! একি, আপনাকে যে কষ্ট দিলে।

হামি। স্বরতান! প্রতিদ্বন্দী সব কেমন! এক এক জনের দৃষ্টিতে  
সৃষ্টি টলে।

( কন্যাগণের গীত )

ধাওয়া—ধেমটা।

এ সমরে কে পারে কে জিনে।

এ রণ শেখাতে কে জানে নারী বিনে ॥

মিছে হানাহানি,

ওহে গুণমণি,

মান পরিহার,

এতে নাহি হার,

জোরে নারিবে নেও নেওহে অমনি কিনে ॥

হামি। বাঃ বাঃ! এরা কি চতুর! আমি যতবার ভুলের আঘাত কচ্ছি  
একবারও তোরণে স্পর্শ হতে দিচ্ছে না।

জল। মহারাজ! সত্বর হউন।

( হামিরের ত্বরিতবেগে ভল্ল চালন )

( কন্যাগণের গান করিতে করিতে তোরণ রক্ষা। )

মাল। ( কন্যাগণের প্রতি ) তোমরা ক্ষান্ত হও, লগ্নের সময় অতীত  
হয়।

১ম কন্যা। আপনার জামাই এই বীর!

২য় কন্যা। ওহে বর! গলিত ঘর্ম হয়েছে নাকি?

৩য় কন্যা। নানা ভাই আর না, বর কান্দছে।

২য় কন্যা। ওহে বর! গলবস্ত্র হয়ে প্রার্থনা কর, তবে তোরণ ভাঙতে  
দেই।

( ইত্যবকাশে একাধাতে হামিরের তোরণ ভগ্ন করণ,

বরযাত্রীগণের জয়ধ্বনি। )

মাল। মহারাজ! সময় অতীত হয়, প্রবেশ করুন।

হামি। ( প্রবেশ করিতে করিতে ) স্বরতান! হাতে ভল্ল তোরণও  
ভাঙলেম, রুধিরের পরিবর্তে অঙ্গে আবীর;—চিতোরের রাজ  
প্রাসাদেও প্রবেশ কচ্ছি, কিন্তু এত সকলি খেলা মাত্র;—  
স্বরতান! এসকল কবে না জানি কার্যত সত্য হবে। আমার

এসকলের কিছুতেই স্তম্ভ বোধ হচ্ছে না। এই না আমার পিতামহ ভীম সিংহের প্রাসাদ ?

স্বর। হাঁ মহারাজ !

হামি। হায় ! আমার তুল্য হতভাগ্য আর কে আছে ? পরের আবাহনে পিতামহের প্রাসাদে প্রবেশ করছি।

কুঞ্জ। মহারাজ ! সমরোচিত ব্যবহার করুন।

হামি। কাকাজী ! আমি কোথায় ? এই না চিতোর ?

কুঞ্জ। মহারাজ ! ধৈর্য্য ধারণ করুন।

[ সকলের প্রস্থান।

### দ্বিতীয় গর্ভাঙ্ক।

চিতোর।—মালদেবের অন্তঃপুর।

বাসর গৃহ।

( হামির শয্যায় উপবিষ্ট—অনতিদূরে ভূমিতে লীলা আসীনা। )

হামি। স্নন্দরি ! নিকটে এসো, এতদিন তুমি আমি পৃথক্ ছিলাম, এখন তোমায় আমায় এক শরীর,—তবে আর দূরে কেন ?  
( করপ্রসারণ )

লীলা। ( পশ্চাতে সরিয়া ) মহারাজ ! আমাকে স্পর্শ করবেন না, আগে আমার বক্তব্য বিষয় শ্রবণ করুন।

হামি। কি বক্তব্য ? তোমার সহচরীরা অন্তরাল থেকে পরিহাস করবে তাই বলছেন ?

লীলা। মহারাজ ! তানয়। আমার পিতা মাতার ইচ্ছা নয় যে সে কথা আপনার কর্ণগোচর হয় ; কিন্তু কি করি আমার হৃদয়ের মধ্যে ঝড়ের ব্যাপার হচ্ছে।

হামি। এমন কি গোপনীয় কথা বল। কিন্তু দেখ যা বলবে তার কোন অংশ অপ্রকাশ রেখোনা। বাসর ঘরে যে স্ত্রী পতিকে প্রতারিত করে, সে ভবিষ্যতে কি না করতে পারে ?

( লীলার নীরবে অবস্থান )

যে কথা বলতে হবে তাতে আর বিলম্ব কেন ? তোমার পিতার কোন ষড়যন্ত্র আছে কি ?—আমাকে বলী করবে ?—না আমাকে

প্রাণে মারবের চেষ্টা আছে ? এই গোপনীয় কথা বলবে ? তার জন্তে চিন্তা কি ? আমি পরম বৈরীর ঘরে এসেছি ; তখন আগেই সে বিষয়ের চিন্তা করেছি । হামির নিরস্ত্র নাই ( অস্ত্রের উপরিতন আবরণ উন্মোচন করিয়া ) এই দেখ সকল অস্ত্র শস্ত্রই রয়েছে । ( করবাল করে ধরিয়া ) যার কাল পূর্ণ হয়েছে, সেই করবালহস্ত হামিরের সম্মুখীন হবে ।

লীলা । আমার পিতার সঙ্গে পূর্বাধি আপনার শত্রুতা আছে, তাতেই আপনি এরূপ আশঙ্কা করছেন, কিন্তু স্বরূপত তা নয় । নিশ্চিত জানবেন আপনার সম্বন্ধে তাঁর কোন অসৎ অভিমুখি নাই । আমার বক্তব্য বিষয়, মহারাজ ! অহুমানের দ্বারা অবগত হবার নয় ।

হামি । তবে তুমিই বল ।

লীলা । মহারাজ ! আমিও সে ভয়নাক কথা বলতে প্রস্তুত হয়েছি । যে ব্যক্তি আত্মহত্যার প্রতিজ্ঞায় পর্বত শিখরে দাঁড়ায়, সেও পড়বের পূর্বে ক্ষণকালের জন্য স্থগিত হয় ;—কতদূর নীচে পড়তে হবে একবার তার পরিমাণ দেখে নেয় । আমারও সেই অবস্থা উপস্থিত । ( ক্রিয়ৎক্ষণ পরে নতজানু ও বদ্বাজলি হইয়া ) মহারাজ ! আপনি বলুন যে আমার যে কিছু দোষ থাকে আপনি ক্ষমা করবেন ।

হামি । এইমাত্র আমি তোমার পাণিগ্রহণ করেছি,—এই অল্পকালের মধ্যে তুমি কি দোষ করেছে। আমি কিছুই বুঝতে পারিনি ।

লীলা । অগ্রে বলুন আপনি ক্ষমা করবেন ।

হামি । ক্ষমার যোগ্য হয়, অবশ্যই ক্ষমা করবো । এখন বলবের কথা যা থাকে, তাই বল ;—অধিক ভূমিকার আবশ্যক নাই ।

লীলা । মহারাজ ! আপনি কাকে বিবাহ করেছেন, তা জানেন ?

হামি । ( সবিস্ময়ে ) “কাকে বিবাহ করেছি” সে কি কথা—? ( ক্রিয়ৎক্ষণ চিন্তা করিয়া ) হাঁ বুঝেছি, নরাধম মালদেব হৃদয়ে করবালের আঘাত অপেক্ষা অতি গুরুতর আঘাতে আমাকে আহত করেছে । আমার কুল কলঙ্কিত করবের অভিপ্রায়ে নিশ্চিত কোন নীচ জাতির কন্যার সঙ্গে এই বিবাহ দিয়েছে । ( সহসা অসি নিষ্কাশিত করিয়া ) তুমি কোন্ জাতি ; কার কন্যা ?

লীলা। মহারাজ! রাজপুত্রের কন্যাকে মরণের ভয় দেখান কেবল অলীক আড়ম্বর করা মাত্র।

হামি। তুমি রাজপুত্রের কন্যা?

লীলা। হাঁ মহারাজ!

হামি। সত্য বলছো?

লীলা। মিথ্যা বলবের কোন প্রয়োজন নাই।

হামি। বোধ হয় তুমি মালদেবের কন্যা নও।

লীলা। এ হতভাগিনী মালদেবেরই কন্যা।

হামি। দেখো;—আমার স্ত্রী বধ করবের ইচ্ছা নাই।

লীলা। বধ করলেও আমার মিথ্যা বলবের ইচ্ছা নাই;—ষাদের অতি নীচ প্রকৃতি, তারাই ক্ষণিক বিরামের জন্তে মিথ্যার মায়ায় আশ্রয় গ্রহণ করে,—সে আশ্রয় অধিক ক্ষণ থাকে না।

হামি। হুঁ,—নীচ জাতির এরূপ উন্নত বুদ্ধি অসম্ভব।

( শয্যা উপবেশনান্তে লীলার দিকে চাহিয়া ) তবে তুমি মালদেবের কন্যা?

লীলা। তাতে কিছু মাত্র সংশয় নাই।

হামি। তবে কেন বলছিলে যে, “আপনি কাকে বিবাহ করেছেন তা জানেন।”

লীলা। মহারাজ! আমার বক্তব্য বিষয়টী অতি ভয়ানক কথা;—আপনি স্বামী, আপনার কাছে কোন কথা গোপন করা আমার উচিত নয়। এই নিমিত্ত বলতে প্রস্তুত হয়েছি বটে, কিন্তু সমুদয় একেবারে বলতে পাচ্ছি না;—বলতে গেলে, কণ্ঠ রোধ হয়, আপনিও সহসা উতলা হয়ে উঠলেন। আপনি স্থির হয়ে আগে আত্মোপাস্ত গুহুন, পরে আপনার যা অভিক্রটি হয়, তাই করবেন।

হামি। ভালো তাই হোক, তুমি আত্মোপাস্ত বল, আমি কিছুতেই আর উতলা হবো না।

লীলা। আমি মালদেবের কন্যা, মহারাজ! তাতে আপনি কিছুমাত্র সংশয় করবেন না। আপনি কোন নীচ জাতির কন্যার পাণি-গ্রহণ করেন নাই।

হামি। তোমার বক্তব্য গোপনীয় কথাটি কি, আগে তাই বল।

লীলা। মহারাজ! আমি বলছি, ব্যস্ত হবেন না। পিতার পাঁচ পুত্র, আমি একমাত্র কন্যা,—পিতা চিতোরের আধিপত্য গ্রহণ করলে, তার এক বৎসর পরে আমি ভূমিষ্ঠ হই। পাঁচ পুত্রের মধ্যে আমি একমাত্র কন্যা; বিশেষতঃ সর্ব কনিষ্ঠা, এই কারণে বাল্যাবধি সহোদরগণ অপেক্ষা আমিই পিতা মাতার অধিক স্নেহের ভাজন। কিন্তু দৈবের গতি বুদ্ধির অগম্য। পিতামাতার স্নেহভাজন হয়েও আমি জন্মাবচ্ছিন্নে এক দিনের নিমিত্তেও সুখী হলেম না,—পিতা মাতাও আমার জন্তে সর্বদা অসুখী।

হামি। কেন?

লীলা। যখন আমার চারি বৎসর বয়স, সেই সময়ে এক জন ভট্টবংশীয় সরদার পিতার সঙ্গে সাক্ষাৎ করতে চিতোরে এসেছিলেন।

হামি। তার পর?

লীলা। রাজপুত্রের কন্যা দায়ের পর দায় আর নাই;—সংপাত্রে আমাকে সমর্পণ করবেন, পিতার এই চিন্তাই ছিল।

হামি। ভালো।

লীলা। সেই ভট্ট সরদারের সঙ্গে পিতা আমার বিবাহের প্রস্তাব করায় তিনিও তাতে সম্মত হলেন।

হামি। তার পর,—বল।

লীলা। তার পর,—আর কি বলবো, সেই চারি বৎসর বয়সে সেই সরদারের সঙ্গে অতি গোপনে আমার বিবাহ হয়, পিতা মাতা পুরোহিত আর আমি ভিন্ন একথা আর কেউ জানে না, বিবাহের এক মাস পরেই পিতা সন্ধ্যা পেলেন সংগ্রামে ঐ সরদারের প্রাণান্ত হয়েছে।

হামি। যথেষ্ট হয়েছে!—আর না,—আমি বিধবা বিবাহ করেছি!

( গমনোচ্ছত )

লীলা। ( হামিরের পদ ধারণ করিয়া ) মহারাজ! কোথায় যান, আমার অপরাধ কি?

হামি। দেখ, আমাকে স্ত্রী হত্যার পাপে লিপ্ত করো না—বাধা দিও না,—আমি এই রাত্রিতেই এ অপমানের প্রতিশোধ প্রদান করবো।



লীলা। মহারাজ ! আশ্ব বিস্মৃত হবেন না। এখানে আপনার অনেক শত্রু, ধৈর্য্য ধারণ করুন।

হামি। ধৈর্য্যের সীমা ছাড়িয়ে গিয়েছে,—এ অবস্থায় ধৈর্য্য ধারণ কাপুরুষের লক্ষণ। আমাকে যেতে দেও, আপনার মৃত্যুকে কেন আপনি আবাহন কর।

লীলা। মহারাজ ! অন্ততঃ দিবার অপেক্ষা করুন, রজনী প্রভাত হলে যে কর্তব্য হয় করবেন।

হামি। দিনের আলোকে সেনা সামন্তগণের চোখ চেয়ে আমি এ অপমানের কথা বলতে পারবো না। অন্ধকার রাত্রিই এর উপযুক্ত সময়।

লীলা। আপনার সেনা সামন্ত এসময়ে সকলি নিদ্রিত—আপনি অপেক্ষা করুন।

হামি। তারা সকলেই জেগে আছে, তারা আমা অপেক্ষা বুদ্ধিমান,—সকলেই নিশ্চিত জানে এ বিবাহে বিভ্রাট ঘটবে। আমি ভূত গ্রস্ত হয়ে, সকলের অমতে এ বিবাহে সন্মত হয়েছিলাম।

লীলা। মহারাজ ! ক্ষান্ত হউন,—আপনি আমার বক্তব্য আছোপাস্ত শুন্তে প্রতিজ্ঞা করেছিলেন।

হামি। আর কি আছে, বল।

লীলা। আপনি বহ্নন, আমি সমুদয় বলি। (হামিরের শয্যায় উপবেশন)

হামি। আর কি বক্তব্য আছে, বল। যা বলবে সংক্ষেপে বল।

লীলা। মহারাজ ! অভাগিনী লোকের নিয়মে দোষী, না, বিধাতার নিয়মানুসারে ত্যাজ্য ?

হামি। এই তোমার বক্তব্য ? না আর কিছু আছে ?

লীলা। যখন আমার বিবাহ হয়, তখন আমার বয়স্ক্রম চারি বৎসর, ভীষণ স্বপ্নের গ্রাস স্মরণ হয় মাত্র,—রাজপুত্র গ্রাসপরায়ণ মহারাজ ! এ বিবাহ কি বিবাহ ?

হামি। কন্যাদানের নাম বিবাহ—পিতা শাস্ত্রানুসারে কন্যাকে দান করলেই বিবাহ সিদ্ধ হয়। শাস্ত্রেরও এই মত,—লোকেরও এই মত।

লীলা। বিধাতারও কি এই মত ? ভাল, সেই মতই থাকুক। সম্প্রতি আমি এই বলছি যে, বিপদ উপস্থিত হলে, তার প্রতিকারের

উপায় করা উচিত। এ গোপনীয় কথা আমি, আর আমার পিতা, মাতা, ভিন্ন অন্য কেউ জানে না। আপনি এখন গোল-যোগ কল্লে, গ্রানির কথা ব্যক্ত হবে মাত্র।

হামি। আমি যা করবো, তাতে লোকে এ অপমানের কথা শুন্তে পাবে বটে ;—কিন্তু বলতেও পারবে যে, অপমানের উচিত প্রতিশোধ দেওয়া হয়েছে।

লীলা। তা না করে, এ গ্রানি গোপন রাখাই উচিত।

হামি। ( ব্যঙ্গভাবে হাস্য করিয়া ) তুমি মনে করেছো যে, আমি এ কথা গোপন করে, তোমাকে জ্ঞী বলে গ্রহণ করবো—তা কখনই হবে না। হিন্দু কখন উচ্ছিষ্ট পাত্রে ভোজন করে না।

লীলা। মহারাজ ! আমার রাণী হবার অভিলাষ নাই। আপনার সঙ্গে পূর্বের কখন দেখা সাক্ষাৎ হয় নাই। লোক মুখে আপনার গুণ-গ্রাম শুনেছি মাত্র, তথাচ আমি আত্মবিস্মৃত হই নাই ;—যখন যখন হৃদয় স্পন্দিত হতো, তখন তখন আমিও বলেছি, “হৃদয় ! স্থির হও,—উচ্ছিষ্ট দ্রব্য দেবভোগ্য হয় না।” আত্মসমর্পণ,—মন প্রাণ অর্পণ,—আত্মবিস্মরণ,—এতেও কি কোন ফল নাই ? গায়বান্ রাজপুতহৃদয় কি এত কঠিন,—যে আত্মবিসর্জন,—সর্বস্ব অর্পণেও অবলা নারী দোষী হয়। মহারাজ ! কেবল মাত্র বলে দিন্ যে, সেই বিস্মৃত সর্দার ও আপনি উভয়ের মধ্যে কে আমার স্বামী ? পতিপূজা নারীর পরম ধর্ম। মহারাজ ! দাসীকে ত্যাজ্য্য কল্লে,—অভাগিনীকে শিথিয়ে দিন্, কার মূর্ত্তি আমি দিবা রাত্রি হৃদয়ে পূজা করবো। মহারাজ ! মৃত সর্দারের মূর্ত্তি মনে নাই,—পূর্ব্বেইত বলেছি যে, স্বপ্নের ছায়া মাত্র ;—দূরে আঁকার মাত্র।

হামি। তুমি অনেক অলীক আড়ম্বর করে আমার সময় নষ্ট কচ্ছে। তোমার বক্তব্য আর কিছু থাকেত বল। গায় অগ্নায়ের উপদেশ শুন্তে আমার প্রতিজ্ঞা নাই।

লীলা। মহারাজ নারী নন্,—আমার অবস্থাপন্ন নন্—আমার অবস্থা মহারাজ বুঝবেন কেমন করে ?—ভাল সে যাই হোক, আপনি এই ক্ষণেই অপমানের কি প্রতিশোধ প্রদান করবেন ?

হামি। যারা এই অপমানের কারণ, তাদের সবংশে নিপাত করবো।

লীলা। আপনি উতলা হবেন না, স্থির হয়ে বিবেচনা করুন। তাতেই বা অপমানের কি প্রতিশোধ হবে? আমার পিতা ভ্রাতা আত্মীয়েরা কলিয়, সমরে শরীর ত্যাগ করে স্বর্গে গমন করবেন। আপনি আমার কথায় কর্ণপাত করুন,—আমাকে কেলবারায় নিয়ে চলুন, সেখানে আপনার বেরূপ ইচ্ছা হয়, আমার সঙ্গে সেইরূপ ব্যবহার করবেন;—আমি প্রেমসী হতেম,—না হয় দাসী হয়ে থাকবো।

হামি। তাতেই বা আমার কি উপকার হবে? অধিকন্তু এই অপমানের স্মৃতি পত্রের স্বরূপ তোমাকে সর্বদাই চোখের উপর দেখতে হবে।

লীলা। এ অপমানের প্রতিশোধ কি আর কিছুতেই হয় না?

হামি। আর কিছুতেই নয়।

লীলা। মহারাজের গুণগ্রাম অনেক শুনেছি, আমি ত্যাজ্যা, কিন্তু চিতোর-ব্রষ্ট গিহোলোটবংশীয়ের কি চিতোরের প্রতি দৃষ্টি নাই?

হামি। সে কথা কেন? তোমার বিবেচনায় কি আমি নারীলালসায় এখানে বিবাহ কর্তে এসেছি, আমি চিতোর দর্শনের নিমিত্তই এই স্থানে এসেছি। শত্রুগৃহে—যবনদাসগৃহে—আমি কি বিবাহ করতে আসতেম? কেবল পিতৃধাম,—স্বর্গীয় পিতৃতীর্থ,—দর্শন করতেই এসেছি। যখন চিতোরে পদার্পণ কল্লেম, তখন আমার হৃদয়ে সহস্র ভাবের উদ্বেক হতে লাগলো,—যখন স্ত্রী জানে তোমাকে সর্ঘোধন করেছিলাম, তখনো সেই নানা ভাবের উদ্বেক হৃদয়ে ছিল; এত অপমানেও হৃদয়চ্যুত হয় নাই—নচেৎ এখনো আমি মোচন করি নাই। তুমি কি মনে কর, চিতোর ভিন্ন আমার জীবনে অন্য উদ্দেশ্য আছে; চিতোর ভিন্ন অন্য কিছু আমার হৃদয়ে স্থান পায়?

লীলা। কণিক কোপের বশবর্তী হয়ে চিরদিনের সে উদ্দেশ্য বিফল করা কি উচিত হয়? আপনি চিতোর পেলে এ অপমান বিন্মত হতে পারেন?

হামি। তোমার পিতা কি আমাকে চিতোর ঘোঁড়ুক দেবেন? (হাস্তের

সহিত ) আমি ভিক্ষুক নয় ;—ভিক্ষা করে চিতোর গ্রহণের ইচ্ছা নাই। চিতোরে তোমার পিতার অধিকারই বা কি ? তোমার পিতা পাঠানের দাস বৈত নয়।

লীলা। মহারাজ ! চিত্তের অস্থির ভাব থাকলে, কোন কথাই স্থান পায় না। আপনি স্থির হয়ে শুধুন। আপনি আজ চিতোর আক্রমণ করে কোন মতেই হস্তগত করতে পারবেন না,—আপনার পাঁচ শত বই সেনা নাই,—চিতোরে এখন পাঁচ হাজার পাঠান সেনা আছে। আপনার চিতোর হস্তগত করার চেষ্টা একবার বিফল হলে, আর সফল হওয়া সুকঠিন ;—সেনা সামন্ত সকলেই ভয়োত্তম হবে,—শত্রুপক্ষেরও সাহস বৃদ্ধি হবে। অতএব সুগম নিশ্চিত পথ থাকতে, আপনি কেন অনিশ্চিত দুর্গম পথ অবলম্বন করেন। আপনাকে চিতোর ভিক্ষা করে নিতে হবে না,—অন্য উপায় আছে।

হামি। তোমার বাক্‌চাতুরি বিস্তর। কি উপায় আছে ?

লীলা। মহারাজ ! যে হতভাগিনীর পাণিগ্রহণ করে আপনার এত গ্লানি উপস্থিত হয়েছে, সে সেই উপায় সংঘটন করে দিতে পারে,—যদি তার কথায় আপনি নির্ভর করেন।

হামি। চিতোর উদ্ধারের উপায় ?—তোমা হতে ?

লীলা। আমি হতে।

হামি। সত্য ?

লীলা। আমি মিথ্যাবাদিনী হলে আপনার সর্বনাশের কথা, আপন মুখে ব্যক্ত করতেম না।

হামি। ( স্বগতঃ ) এ কথা সত্য, আত্মদোষ ইচ্ছাপূর্বক ব্যক্ত করা অতি বলবান্ হৃদয়ের লক্ষণ, ( প্রকাশ্যে ) তোমা হতে যদি চিতোর উদ্ধার হয়, তবে জান্‌লেম, তুমি গিহোলোটবংশের কুললক্ষ্মী—হামিরের আরাধ্য দেবতা ;—হামির তা হলে তোমাকে হৃদয়-সিংহাসনে স্থাপিত করে, চিরজীবন তোমার পূজা করবে।

লীলা। মহারাজ ! কান্ত হউন, আর কেন আমার চিত্তকে চঞ্চল করেন ?—আমার দুর্দশার মেঘে আর দুরাশার বিজুলি খেলার প্রয়োজন নাই।

হামি। ( লীলার কর ধারণ করিয়া ) তুমি ওসকল কথা আর কিছুই মনে  
করো না। চিতোর উদ্ধারের কি উপায় বল দেখি ?

লীলা। ( দ্বিষৎ হান্তে ) মহারাজ ! এত ব্যগ্রতাব কেবল অবিশ্বাসের  
লক্ষণ, আমার কথায় আপনার কিছুমাত্র প্রত্যয় হয় নাই।

হামি। না না তা নয়, তবে কি জান, জলের শব্দ শুনেও ভ্রমিত পথিকের  
প্রাণ নীতল হয়।

লীলা মহারাজ ! জাল নামে আমার পিতার এক কর্মচারী আছে।  
প্রাতে যৌতুক গ্রহণের সময় পিতার কাছ থেকে যৌতুক স্বরূপে  
সেই জালকে চেয়ে নেবেন, জাল হস্তগত হলেই জানবেন যে  
চিতোর দুর্গ আপনার হস্তগত হলো।

হামি। জালের দ্বারা কিরূপে চিতোর হস্তগত হবে ? জাল এক জন  
প্রসিদ্ধ বীর নয়,—আয় ব্যয় ইত্যাদি অর্থসংক্রান্ত একজন কর্মচারী  
মাত্র, তবে শুনেছি সে ব্যক্তি বুদ্ধিমান বটে।

লীলা। মহারাজ ! কা হতে কোন্ কাজ হতে পারে না পারে তা কে  
বলতে পারে ? আপনার পূর্বপুরুষ রামচন্দ্র বানরের সাহায্যে  
রাবণের লক্ষা জয় করেছিলেন।

হামি। তা বটে।

লীলা। মহারাজ ! আমার কথায় প্রত্যয় করুন, এসকল বিষয়ের মন্ত্রণার  
উপযুক্ত স্থান চিতোর নয়, কেলবারায় যেয়ে সবিশেষ শুনে আমার  
কথা যদি প্রবঞ্চনা বোধ হয়, তখন যে দণ্ড করতে ইচ্ছে হয় করবেন।

হামি। না না তোমার কথায় আমার অবিশ্বাস নাই। ভালো কেল-  
বারায় যেয়েই সবিশেষ শুনবো। কিন্তু জিজ্ঞাসা করি যে চিতোর  
কতদিনের মধ্যে হস্তগত হবে ?

লীলা। মহারাজ ! সম্ভবই হওয়ার সম্ভব। দেখুন নীচজাতীয়া কণ্ঠার  
দ্বারা যদি আপনার কোন কার্য সাধন হয়, না হয়, করবালত  
কাছেই আছে, খুলতে কত ক্ষণ।

হামি। প্রিয়ে ! ওসকল কথা বিশ্বৃত হও।

লীলা। মহারাজ ! ও আর বিশ্বৃত হবার নয়।

হামি। যখন এই চিতোরে বাগ্মীর সিংহাসনে বসবে তখন অবশ্যই ভুল  
হবে।



লীলা। মহারাজ ! আপনি জীলোকের চিত্ত কিছুই জানেন না। ছত্র, দণ্ড, সিংহাসন এতে জীলোকের মন ভোলে না ; জীলোকে এ সকল নিয়ে কি করবে। পতির প্রেম ভিন্ন জীলোকে আর কিছুই চায় না, রাজার রাণী,—ভিখারির ভিখারিণী,—সকল রমণীর একই আশা,—একই লালসা,—জীর প্রতি পুরুষের প্রেম দশ কাজের এক কাজ, জীলোকের প্রেম সেরূপ নয় ;—জীলোকের যে প্রেম সেই প্রাণ। বিষয়ব্যস্ত পুরুষে তা বোঝে না ;—বুঝলে জীজাতির এত দুর্গতি হতো না।

হামি। এ কথা সত্য পুরুষের অপেক্ষা জী জাতির প্রকৃতি যে কোমল তাতে আর সংশয় নাই। প্রিয়ে এসো, বিশ্রাম করা যাক।

লীলা। না মহারাজ ! কলহের রাত্রি অবসান হয়েছে। ঐ দেখুন, গবাক্ষের অবকাশে আকাশ দেখা যাচ্ছে।

হামি। তা হোক, সমস্ত রাত্রি জেগে তোমার অতিশয় কষ্ট হয়েছে ; একটু বিশ্রাম কর।

লীলা। মহারাজ ! আর বিশ্রামের প্রয়োজন নাই। এমন বাসরের রাত্রি যেন কোন হতভাগিনীর ভাগ্যে না ঘটে !! ( রাজপথে প্রভাতসূচক গীত )

ভৈরো—আড়াঠেকা।

জাগো বিলাসি।

প্রিয়জন পরিহরি, বীরভূষা পরি বিদায় মাগিছে হাসি ॥

ভাঙ্গিল স্বপন,

পরাদীন জন,

এবে অধীনতা দুখরাশি ॥

দেশ অকুরাগে,

বীর ধীর জাগে,

জাগে জন্মভূমি স্মৃথপ্রয়াসী ॥

পবন গাইছে শুন,

সজ্জীত সক্ররুণ,

পদ্মিনী-কাহিনী হে চিতোরবাসী ॥

তপন আলোকে,

প্রকাশিছে লোকে,

বীর শোণিত স্রোত বৈরিবিনাশি।

ধীর বীর জাগো,

বিদায় মাগো,

কার্য্য কাল হ'লো উদয় আসি ॥



লীলা। এ গীত আর কার নয়,—এ সেই পাগলা ভাট।

হামি। পাগলা ভাট কে ?

লীলা। এক জন ভিখারি ভাট আছে, সেই রাস্তায় রাস্তায় গেয়ে বেড়ায়।

হামি। ( স্বগত ) ধন্য উদয়ভট্ট ! তোমার এ প্রভুভক্তির উচিত পুরস্কার  
কিসে হবে, কিছুই বুঝতে পারিনে।

( নেপথ্যে । ) হাঁরে বীরণ ! তুই কমনে গেলি ?—অর্ধেক সিঁড়িতে  
তুলে রেখে হাত ছেড়ে দিলি ?—ওরে আমি পড়ে মলেম।

হামি। ও কে কথা কয় ?

লীলা। মহারাজ ! আমার খাত্তী অতি প্রাচীনা হয়েছে—বীরণ বলে  
আমার এক সখী আছে, সে সর্বদাই বুড়ির সঙ্গে পরিহাস করে,  
সেই অর্ধেক সিঁড়িতে তুলে হাত ছেড়ে দিয়েছে;—তাই ডাকছে।

( বীরণ ও পান্নার প্রবেশ )

পান্না। বাবা, বাবা, ছুঁড়ী তোকে আর বিশ্বাস নাই ;—তুই কবে আমাকে  
পাতকুঁয়ায় ফেলে দিবি।

বীর। ( জনান্তিকে ) মর বুড়ী, চুপ কর ;—এখানে যে বর কণ্ঠা রয়েছে।

পান্না। ওমা লীলা কই তুমি—মা ! আমাকে একখানা পাখা দেও—  
তোমার বীরুণী আমাকে খুন করেছে।

( লীলার পাখা লইয়া পান্নাকে ব্যজন )

পান্না। ( স্তম্ভ হইয়া লীলার গাত্র স্পর্শ করিয়া ) মা ! রাজে ঘুম  
হয়েছিল তো ? আমার বাবা কোথায় ?—বাবা ঘুমুচ্ছে কি ?

বীর। ( লীলাকে জনান্তিকে ) কি পাপ সাতে করেই এনেছি !

পান্না। বাবা বসে আছে বটে বীরণ ? ( উঠিয়া ধীরে ধীরে হামিরের  
নিকট গমন ) বাবা ! তোমার হাজার বছর পরমাই হোক,  
তুমি বড় ঘরের বেটা,—তোমার বাপ দাদাকে খেয়ে আমরা  
মাহুষ। বাবা ! তোমার মুখখানি দেখি, ( মুখের নিকট অবনত  
হইয়া ) বীরণ ! জান্‌লাটা খুলে দে না, একটু আলো হোক,  
ভালো করে দেখি।

বীর। মরণ আর কি, জানলা খোলা রয়েছে যে।

পান্না। খোলা রয়েছে, ওমা তাই ত ( পুনর্বীর নিরীক্ষণ করিয়া ) এই

হে দিখি মুখখানি, বাবা আমি বসি ;—তোমার সাত বেটা হোক ।  
বীর । বেটা করে কি গো ।

পান্না । চুপ কর ছুঁড়ী মেলা বকিসনে ।

হামি । হাঁ তুমি বসো ;—দাঁড়াতে কষ্ট হয় ।

পান্না । হাঁ বাবা, পায় বাত করেছে,—বাবার আমার কথাগুলিও মিষ্টি ।

হামি । তোমার কত বয়স হয়েছে ?

পান্না । বয়েস বাবা ঠিক বলতে পারি না—তোমার পিতামহের যখন  
বিয়ে হোলো, তখন আমি দুই বেটার মা ।

হামি । তোমার বেটারা কি করে ?

পান্না । ( সরোদনে ) বাবা ! তারা সকলেই আমাকে ফেলে গেছে,—  
আমার বেটা, পুত্র, মা, বাপ সকলি লীলা ;—আমার আর কেউ  
নাই । বাবা ! তোমার কাছে আমার একটি ভিক্ষে আছে ;—  
আমাকে সেই ভিক্ষেটি দিতে হবে বাবা ।

হামি । কি চাও বল ।

পান্না । আমি টাকা কড়ি চাইনে, আমার একটি কথা রাখতে হবে বাবা ।

হামি । কি কথা ?

বীর । ( সরোষে ) আবার কি পাগলামি কচ্ছে ? চল তোমাকে নিচে  
রেখে আসি ।

পান্না । থাম্ বীরণ ! সকল সময় জ্বালাতন করিসনে ;—আমার মনের  
কথা আগে বলতে দে ।

হামি । কি কথা বল ।

পান্না । বাবা তুমি বড় ঘরের বেটা ;—রঘুবংশী ; পূর্বের সূর্য্য যদি পশ্চিমে  
যায়, তবু তোমাদের কথা নড়ে না । তুমি আগে বল বাবা,  
আমার কথাটি রাখবে ।

হামি । যদি রাখবের মত কথা হয় ত অবশ্যই রাখবো ।

পান্না । রাখবেত বাবা । আমি টাকা কড়ি শাল দোসালা কিছুই চাইনে ।  
আমাকে এই ভিক্ষেটি দিতে হবে যে আমার লীলাকে যেন  
সতীনের জ্বালা সইতে না হয় ।

হামি । ( কিম্বৎকণ নীরবে থাকিয়া ) ভালো তাই হবে,—আমি আর  
বিবাহ করবো না ।

পান্না। তুমি রাজরাজেশ্বর হও ;—বাবা ! আমার বুকটো যেন পাতলা হলো । রাজার ঘরে খাওয়া পরার দুঃখ নাই, সোনা, রূপা, হীরা, মুক্তার অভাব নাই,—রাজরাণীদের সকলি সুখ, কিন্তু সুখ থেকেও নাই—সতীনের কাঁটা দিন রাত্তির বৃকে বেঁকে । লীলার বিবাহের কথা শুনে অবধি আমি তাই ভাবছি । ( রোদন )

হামি। আর কান্দো কেন ? তুমি নিশ্চিত জেনো আমি আর বিবাহ করবোনা ।

পান্না। বাবা ! তুমি রঘুবংশী,—তোমার কথা কখনই নড়বে না, তা আমি জানি । লীলা ! মা আমি অতি দুঃখী,—আমার কিছুই নাই, তোমার বিয়েতে আমি আর কি যৌতুক দেব ;—বাবা আমাকে যে ভিক্ষেটি দিলেন এইটিই তোমার যৌতুক ।

বীর। ঠাকুরকণ্ঠে ! তোমার চোখে জল এসেছে ;—তা আসতে পারে, বুড়ির পেটে পেটে এত বুদ্ধি তা আমি জানিনে ;—এই জন্মে বুড়ী আসতে এত ব্যস্ত হয়েছিল ।

পান্না। বাবা তবে আমি নিচে যাই ;—বীরণ ! আমাকে রেখে আয় ।

[ বীরণ ও পান্নার প্রস্থান । ]

লীলা। মহারাজ ! আমার খাত্তী প্রাচীনা হয়েছে, প্রাচীন হলেই বুদ্ধির ভুল হয়,—নৈলে এমন কঠিন অসুরোধ করবে কেন ? যাই হোক ও অঙ্গীকারে আপনাকে আবদ্ধ জ্ঞান করবেন না ।

হামি। প্রিয়ে ! অতি সামান্য ব্যক্তিও আপনার বাক্যের অন্তর্থাচরণ করতে চায় না । আর আমি আমার বংশের ধর্ম লঙ্ঘন করবো, তোমার কি এইরূপ বিশ্বাস হয় ?

লীলা। মহা অতি কঠিন প্রতিজ্ঞা করলেন, তাই বলছি ।

হামি। কঠিন কি ? তোমায় বলেছি যে চিতোর ভিন্ন আমার হৃদয়ে আর কিছুই নাই,—চিতোরকুললক্ষ্মী ব্যতীত আমার হৃদয়ে কে আর স্থান পাবে ?

লীলা। স্থান না পাক ঐশ্বর্য দেখাবার জন্মেও আবশ্যক । সে যা হউক আমার কথাটি যেন ভুল না হয় ।

হামি। কি কথা ?

লীলা। জাল ।

হামি। সে কথা ভুলেবের নয়। প্রিয়ে! আমার কি দুর্বল হৃদয়? রোগী যেমন আরোগ্য ভিন্ন আর কিছুই চিন্তা করে না, চিতোর ভিন্ন সেইরূপ আমারও আর কোন চিন্তার উদয় হয় না। আমার বংশের সকলেই চিতোরের নিমিত্ত প্রাণত্যাগ করেছেন, আমি হয় চিতোর উদ্ধার করে গিহোলোট কুলের কলঙ্ক ভঞ্জন করবো,—না হয় চিতোরের নিমিত্ত প্রাণ ত্যাগ করে গিহোলোট কুল নির্মূল করবো, সম্প্রতি আমি ভিন্ন আমার বংশেত আর কেউ নাই।

লীলা। মহারাজ! আপনি নিশ্চিন্ত থাকুন, চিতোর অবশ্যই আপনার হস্তগত হবে।

( বীরণের প্রবেশ )

বীর। ঠাকুরকণ্ঠে! বাড়ীর সকলেই জেগেছে।

লীলা। আমিই কি ঘুমছি।

বীর। সবাই মনে কচ্ছে তাই, সমস্ত রাত্রি জেগে ভোরে না ঘুমুলে এত বেলা হবে কেন?

হামি। ইনিই তোমার সখী? ইনি কাল্ তোরণ রক্ষায় ছিলেন না?

লীলা। ছিলেন বই কি,—ইনিই দলপতি।

বীর। দলপতি কি? সেনাপতি বল।

হামি। যে যুদ্ধে পরাজয় হয়েছে, তার সেনাপতি উপাধি নিয়ে আর গৌরব কি? তোরণতো রক্ষা হলো না।

বীর। ভাঙতে না দিলে কি কেউ জোর করে ভাঙতে পারে?

হামি। জোর করে ভাঙা যায় কি না, না হয় এসো আর একবার পরীক্ষা নেও।

বীর। এখন যে পরীক্ষা নেবার—সেই নেবে। তার কাছেই ভালো করে পরীক্ষা দিন, আমাদের পরীক্ষা কাটে কাটে হয়ে গেছে।

লীলা। মরণ আর কি, বীরণ! চল নিচে যাই [ হামিরের প্রতি দৃষ্টি করিতে করিতে বীরণের সহিত প্রস্থান ]

হামি। ( পরিক্রম করিতে করিতে ) কি অদ্ভুত ঘটনা! পরম বৈরী মালদেবের কন্যাকে বিবাহ কল্লেম,—সে কিনা আবার বিধবা,—পূর্বে তার আর একবার বিবাহ হয়েছিল। হা বিধাতা!

গিহোলোট কুলের প্রতি তোমার কোণদৃষ্টির কি অবসান হবে না? ছিন্নকান্ধে একমাত্র তরুর গুঁড়ি গিহোলোট বংশে একা আমিই জীবিত আছি,—আমার উপরেই এই বজ্রাঘাত। যাই হোক, ঐশ্বর্য ধারণ বিনে আর আমার গতাস্তর নাই।

( জনৈক ভৃত্যের প্রবেশ )

ভৃত্য। মহারাজ! কি আদেশ হয়?

হামি। আমার সামন্তেরা সকলেই জেগেছেন?

ভৃত্য। আজ্ঞে সকলেই জেগেছেন।

হামি। চল আমি সেই খানে গিয়ে প্রাতঃক্রিয়া করবো।

ভৃত্য। যে আজ্ঞা।

[ উভয়ের প্রস্থান।

যবনিকা পতন।











